


ছিন্নপত্র ।

RARE B



শ্রীরবীন্দ্রনাথ ঠাকুর ।

A1514

প্রকাশক—

শ্রীনাথেন্দ্রনাথ গঙ্গোপাধ্যায়

শিলাইদহ, নদিয়া



182 me 9/12-10

আদিত্যকামাজ প্রেস

৫৫, আপার চিংপুর রোড, কলিকাতা

শ্রীরণগোপাল চক্রবর্তী দ্বারা মুদ্রিত

১৩১৯ সাল

ছিন্ন পত্র।

২

৩০ অক্টোবর

১৮৮৫ খ্রি

বন্দোরা সমুদ্রতীর।

ভারি বৃষ্টি আরম্ভ হয়েছে। এক সপ্তাহ ধরে ক্রমাগতই বৃষ্টি। এখনও বিরামের লক্ষণ নেই। আমার বারান্দার কাঁচের জানালা সমস্ত বন্ধ করে চুপ ঘেরে বসে আছি। নিতান্ত মন্দ লাগছেনা, আপনাতে আপনি বেশ একরকম আচ্ছন্ন হয়ে আছি—কোন প্রকার Emotion-এর প্রাবল্য নেই—ঝড় ঝঞ্ঝা যা কিছু সমস্তই বাহিরে। অসহায় অনাবৃত সমুদ্র ফুলে ফুলে ফেনিয়ে ফেনিয়ে শাদা হয়ে উঠছে। সমুদ্রকে দেখে আমার মনে হয় কি একটা প্রকাণ্ড অন্ধ শক্তি বাঁধা পড়ে আফালন করুচে—আমরা নিশ্চিন্ত মনে তীরে দাঁড়িয়ে আছি—সমুদ্রের বিস্ফারিত গ্রাসের মুখেই আমরা ঘর বাড়ি বেঁধে বসে আছি। আমরা যেন সিংহের কেশর ধরে টান্চি অথচ অসহায় সিংহ কিছু বলতে পার-চেনা—একবার যদি সমস্ত সমুদ্র ছাড়া পায় তাহলে আমাদের আর চিহ্নমাত্র থাকে না। বাঁচার মধ্যে বাধ তার লেজ আছড়াচ্ছে, আমরা কেবল দু হাত তক্তাতে দাঁড়িয়ে হাস্চি। একবার চেয়ে দেখুন কি বিপুল বল! তরঙ্গগুলো যেন দৈত্যের মাংসপেশীর মত ফুলে উঠছে। পৃথিবীর স্থিতির আরম্ভ থেকে এই ডাঙার জলে লড়াই চলুচে—ডাঙা ধীরে ধীরে নীরবে এক এক পা করে আপনার অধিকার বিস্তার করুচে, আপনার সন্তানদের ক্রমেই

কোল বাড়িয়ে বাড়িয়ে দিচ্ছে—আর পরাজিত সমুদ্র পিছু হটে হটে কেবল হুঁসে হুঁসে বকে করাঘাত করে মরচে । মনে রাখবেন এক কালে সমুদ্রের একাধিপত্য ছিল—তখন সে সম্পূর্ণ মুক্ত । ভূমি তারই গর্ভ থেকে উঠে তার সিংহাসন বেড়ে নিয়েছে, উন্মাদ স্বপ্ন সমুদ্র তার গুল ফেনা নিয়ে King Lear-এর মত বড়ে বজ্রায় অনাবৃত আকাশে কেবল বিলাপ করুচে ।

আপনি ত সব-ডেপুটি সাহেব—বজার মুখে বাংলা মুল্লুকে ভেসে বেড়াছেন—আমরা কলকাতায় যাচ্ছি সে খবর রাখেন কি ? এই চিঠি এবং আমরা শুক্রবারের সকালের ডাকে কলকাতায় বিলি হব। আমাদের প্রবাসের পালা সাজ করলুম—এখানকার অগাধ আকাশ, অবাধ বাতাস, উদার মাঠ, বিমল শান্তি এসব পশ্চাতে রেখে সেই বাঁশ-তলার গলি, ঘোড়াসাঁকোর মোড়, সেই ছেকড়া গাড়ির আস্তাবল, সেই ধলো, সেই ঘড়-ঘড়—হুড়-মুড়—হৈ হৈ, সেই মাছি-ভন্‌ভন্‌ ময়রার দোকান, সেই ঘোরতর হিজিবিজি হ-য-ব-র-লর মধ্যে সম্পূর্ণ আত্মবিসর্জন করতে চললুম। সেখানে তিন হাজার গির্জার চূড়ো, কলের চিমনি, জাহাজের মাস্তল নীল আকাশে যেন গুঁতো মারতে উঠেচে, কলকাতা তার সমস্ত লোষ্ট্রকাষ্ঠ দিয়ে প্রকৃতিকে গঙ্গা পার করেছে—তার উপরে আবার এক পাঁচিল দেওয়া নিমতলার ঘাট, মানুষের মরেও স্থখ নেই। এখানে আমরা ক'জনে মিলে অশোক কাননের নীড়ের মধ্যে ছিলাম, সেখানে এক প্রকার ইটের খাঁচার মধ্যে প্রবেশ করতে চল্লম। সেখানকার সেই লক্ষ লক্ষ কয়েদির সঙ্গে Municipalityর জুর্গের মধ্যে বন্দী হতে চল্লম। শুনে স্থখী হলেন ত ?

এতদিন ভুলে ছিলাম কিন্তু আজ আবার আমার সেই পর্দাটানা ঘোমটা-দেওয়া ঘরটি মনে পড়চে।—কিন্তু কোথায় আপনি, কোথায় আপনার সেই ছাতা, পাপোষ-শয্যা শয়ান সেই পুবাতন জুতোযুগল ! আমার সেই জটপুষ্ট বিরহিনী তাকিয়া—সে কি আমাদের বিরহে রোগা হয়ে গেছে, আমি তাই ভাব্‌চি। আমার বইগুলো কীচের অন্তঃপুর থেকে চেয়ে আছে—কিন্তু কাব দিকে চেয়ে আছে ? আমার শূন্যহৃদয়া চৌকি দিনরাত্রি তার ছই বাহ বাড়িয়ে দাঁড়িয়ে আছে, কিন্তু এখন তার এই নীরব আহ্বান কেউ গ্রাহ করে না। আমার সেই ঘাড়টা টিক্‌ টিক্‌ করচে, সে বড় একটা কাউকে খাতির করে না, সে কেবল সময়ের পদচিহ্নের হিসেব রাখতেই ব্যস্ত।—কিন্তু আমার

সেই হার্মোনিয়ম ! সে আপনার নীরব সঙ্গীতের উপর বনাত মুড়ি দিয়ে ভাব্চে, ঘড়িটা ব্রাকেটের উপরে দাঁড়িয়ে মিছে মিছি তাল দিয়ে ময়ূচে কেন ? দেয়ালগুলো তাকিয়ে আছে—ভাব্চে ঘরের প্রধান আসবাবটা গেল কোথায় ? কলকাতার সেই জনতাসমুদ্রের মধ্যে আমার সেই বিরহাঙ্ককার ঘরটিই কেবল বিজন । তার সেই রুদ্ধ হারের ভিতর থেকে কাতর স্বর উঠে—“রবি বাবু—উ—উ—উ ।” রবিবাবু আজ এখান থেকে সাড়া দিচ্ছেন—“এই যা—আ—আ—ই ।”

কলকাতায় ফিরে গিয়ে কি আর আপনার সঙ্গে দেখা হতে পারে না ? আপনি কি এখন ইচ্ছাস্রোত মত সব ডেপুটিপুরে প্রয়ান করলেন ? শীত্র আর মুক্তির ভয়সা সেই ? আইনের গলগ্রহ গলায় বেঁধে আপনি কি তা হলে সর্কিস-সরোবরে একরকম ভ্রম মারলেন ? যাক, তা হলে আপনার আশা একেবারে পরিত্যাগ করে আমরা আস্‌মানে বিহার করি আর বলাবলি করি “আহা, শ্রীশ বাবু লোকটা ছিলেন ভাল ।”

সাব্ ডেপুটি সা'ব,—

৬গয়াধামে আপনি গমন করেছেন, এখন আমার কি গতি করে গেলেন? আপনার দর্শন আমার নিয়মিত বরাদ্দের মত হয়ে গিয়েছিল এখন তার থেকে বঞ্চিত হয়ে আমি মোতাহীন অহিফেন-সেবীর মত ছটকট করছি। বাস্তবিক আপনি আমাকে অহিফেনই ধরিয়েছেন বটে। আপনি এসে নানা কোশলে আমাকে গোটাকতক ছোট ছোট কল্পনার গুলি গেলাতেন, আমার স্বপ্ন জাগিয়ে তুলতেন, আমাকে আমারই প্রভাসসঙ্গীত সন্ধ্যাসঙ্গীতের মধ্যে আচ্ছন্ন করে ফেলতেন, আমি চোখ বুজে আনন্দে আমার নিজের মধ্যে প্রবেশ করে বসে থাকতুম এবং সেইখান থেকে নেশার বোঁকে স্বপ্ন উক্তি প্রয়োগ করতুম, আপনি শুনে মনে মনে হাসতেন। আফিমের নেশা একেই বলে। আত্মভরিতার মধ্যে আচ্ছন্ন হয়ে নিজের স্বপ্নে ভোর হওয়াকেই বলে আফিমের নেশা। আপনি সেই নেশাটাই আমাকে অভ্যেস করিয়েছেন। আপনি প্রায় আপনার নিজের কথা বলতেন না, উল্টে পাল্টে আমারই কবিতা, আমারই লেখা, আমারই কথার মধ্যে আমাকে টেনে নিয়ে ফেলতেন—আমাকে খুব মাজিয়ে রেখেছিলেন যাহোক। ইংরেজেরা বর্মার, চীনে আফিম চুকিয়েচে, আপনি আমার সেই অয়েলক্লথ মণ্ডিত ক্ষুদ্র ঘরটার মধ্যে গোপনে অলক্ষ্যে আফিমের ব্যবসা প্রবেশ করিয়েছেন—আপনি সহজ লোকটী নন। কিন্তু একবার আফিম ধরিয়ে আপনি কোটা সমেত কোথায় অন্তর্ধান হলেন? আমি মোতাহ-বিরহে এই দরস্ত গ্রীষ্মে একলা ঘরে বসে দুবেলা হাই তুলছি এবং গা-মোড়া দিচ্ছি। নিদেন, আমার দ্বারের পার্শ্বে আপনার সেই পরিচিত ছাতিটা, জুতোটা রেখে গেলেও আমার কথঞ্চিৎ সাধুনা ছিল। আপনার পত্র পাঠে অবগত হলেম আপনি ত্রীগয়াধামে আপনার প্রেতপুরীতে মহাশয় নিতান্ত কাতর আছেন, কিন্তু আপনার কাছ আপনার সঙ্গী অর্থাৎ আপনি আছেন এবং আপনার চিরসঙ্গী “সাব্-ডেপুটি” আপনার ছায়ার মত সঙ্গে আছেন ॥ সে সঙ্গীকে

এখনও আপনার তেমন ভাল লাগচে না কিন্তু ক্রমে তার প্রতি প্রীতি জন্মান কিছু অসম্ভব নয় ।

আমি-ব্যক্তির হাতে এখন কোন কাজকর্ম নেই—চাপকানের বোতামগুলো ধুলে দেহ এলিয়ে এখন গায়ে বাতাস লাগাচ্ছি । সৌভাগ্যক্রমে এখন অহিফেনের ততটা দরকার বোধ হচ্ছে না । আমার তাকিয়ার মধ্যে স্বপ্ন পোষা রয়েছে—সেটা একটা স্বপ্নের রূহং ডিবের মত বোধ হচ্ছে, তার উপরে মাথা রাখলেই মাথার মধ্যে ছুঁ করে নেশা প্রবেশ করে । এতদিন মাথার উপরে বালক কাগজের বোঝাটা থাকতেই মাথা যেন রুদ্ধ হয়ে ছিল, নেশা একেবারে ছুটে গিয়েছিল—এখন সমস্ত খোলাসা—দক্ষিণে বাতাসের সঙ্গে সঙ্গে মাথাটা যেন চারদিকে উড়ে বেড়াচ্ছে ।

এ সময়ে আমাকে যদি একটা বাগান দিতে পারতেন । নদীর তীর, গাছের ছায়া, মাঠের বাতাস, আমের বোল, কোকিলের কুহ, বসন্তী রঙের চাদর, বকুল ফুলের মালা, এবং সেই সঙ্গে আপনাকেও চাচ্ছি । কলকাতা সহর, পোলিটিকেল্ এজিটেশন্, বসন্ত-কালে এ ত সহ হয় না । কোথায় আপনার বাগান শ্রীশ বাবু, কোথায় আপনি ! সংস্কৃত কবি বলেচেন—

সঙ্গম বিরহ বিকল্পে

বরমপি বিরহো ন সঙ্গমস্তম্ভাঃ

সঙ্গে সৈব তথৈকা

ত্রিভুবনমপি তন্ময়ং বিরহে ।

ভাবার্থ : “সঙ্গম এবং বিরহের মধ্যে বরং বিরহ ভাল তবু সঙ্গম কিছু না—কারণ মিলনের অবস্থায় সে একা আমার কাছে থাকে মাত্র, আর বিরহাবস্থায় ত্রিভুবন তা’তেই পূরে যায় ।” কিন্তু ভট্টচার্য্য মশায়ের সঙ্গে আমার মতের মিল হল না—আপনার বিরহে আমার এই রকম মনে হচ্ছে যে, ত্রিভুবনময় শ্রীশ বাবুর ঝাঁক থাকার চেয়ে হাতের কাছে একটা শ্রীশ বাবু থাকা ভাল । ইংরেজিতে একটা প্রবাদ আছে “কোপের মধ্যে গুণাথানেক পাখী থাকার চেয়ে মুঠোর মধ্যে একটা পাখী থাকা চের ভাল ।” এ সম্বন্ধে আমি এই ইংরেজের মত practical view নিয়ে থাকি । আপনি কি বলেন আমি জানতে ইচ্ছে করি ।

ইতিমধ্যে একদিন গো—বাবুদের ওখানে যাওয়া গিয়েছিল। সেখানে আমি আপনার “বান্দালার বসন্তোৎসবের” কথা পাড়লুম, আশ্চর্য্য হলুম, তাঁরাও সুক্লমে একবাক্যে আপনার এই লেখার প্রশংসা করলেন। আশ্চর্য্য হবার কারণ এই যে, ভাল লাগা এক, এবং ভাল বলা এক। ভাল জিনিষ সহজেই ভাল লাগে, তর্কবিতর্ক যুক্তি বিচার করে ভাললাগে না—কিন্তু সমালোচনা করবার সময়ে মনের মধ্যে এমনি তর্কবিচারের প্রাহুর্ভাব হয়, যে, খপ ক’রে একটা জিনিষকে ভাল বলা অত্যন্ত দুরূহ ব্যাপার হয়ে ওঠে। তখন মনে হয়, যে লেখাটা পড়লুম সেটা লিখচে কে, তাতে আছে কি, তাতে নূতন কথা বলা হয়েছে কি, এই রকম লেখাকে সমালোচকেরা কি বলে থাকে, এ কোন্ শ্রেণীর অন্তর্গত ইত্যাদি ইত্যাদি। এবং তার পরে দেখতে দেখতে দলে দলে “যদি” “কিন্তু” “কি জানি” “হয় ত” প্রভৃতি সহস্র রক্তশোষকের আমদানী হয়। তাঁরা চতুর্দিকে তিন ক্রোশের মধ্যে রসকস কিছুই অবশিষ্ট রাখেন না। “ভাল লাগা” জিনিষটি এমনি কোমল স্নকুমার যে, ভাল লেগেছে কি না এই সহজ সত্যটুকু ঘটা করে প্রমাণ কর্ত্তে বসলে সে ব্যক্তি যায়-যায় হয়ে ওঠে। সমালোচকেরা আপনার বিরুদ্ধে আপনি মিথ্যা সাক্ষ্য দিয়ে থাকে, ভাল লাগলেও তারা যুক্তির দ্বারা প্রমাণ করে দেয় যে ভাল লাগেনি। এই গেল সমালোচনতত্ত্ব। যাহোক, আপনার বহিটা শেষ হয়ে গেলে সাধারণ পাঠকদের কি রকম লাগে জানতে ইচ্ছে রইল। হয়ত বা ভাল লাগতেও পারে। ভাল লাগবার একটা কারণ এই দেখচি, আপনি আপনার কেতাবের মধ্যে আমাদের চিরপরিচিত বাংলাদেশের একটি সজীব মূর্ত্তি জাগ্রত করে তুলেচেন, বাংলার আর কোন লেখক এতে কৃতকার্য্য হন নি। ? এখনকার অধিকাংশ বাংলা বই পড়ে আমার এই মনে হয় যে, আধুনিক বঙ্গসাহিত্যের সময় বাংলাদেশই ছিল কি না ভবিষ্যতে এ নিয়ে তর্ক উঠতে পারে। আপনি হয় ত শুনে থাকবেন কোনো

মার্কিন দেশীয় ভাষাতত্ত্ববিদ বলেন, পাণিনি যে ভাষার ব্যাকরণ, সে ভাষাই কোনকালে ছিল না—তিনি দেখেছেন পাণিনিতে এমন অনেক ধাতু প্রভৃতি পাওয়া যায় সমস্ত সংস্কৃত ভাষায় যা খুঁজলে মেলে না। এইরূপ নানা কারণে তিনি ঠিক করে রেখেচেন যে পাণিনি ব্যাকরণটি এমন একটি ঘোড়ার ডিম যা কোন ঘোড়ায় পাড়েনি। অনেক ভাষা আছে যার ব্যাকরণ এখনও তৈরি হয়নি কিন্তু কে জানত এমন ব্যাকরণ আছে যার ভাষা তৈরি হয় নি? এই ঘটনায় আমার মনে হয়েছে ভবিষ্যতে এমন একজন তত্ত্বজ্ঞের প্রাহুর্ভাব হতে পারে, যিনি নিঃসংশয়ে প্রমাণ করে দিতে পারবেন, যে, বাংলা সাহিত্য যে দেশের সাহিত্য সে দেশ হুঁলেই ছিল না—তখন বঙ্কিম বাবুর এত সাধের “সুজলাং সুফলাং মলয়জশীতলাং,” পুরাতত্ত্বের গবেষণার তোড়ে কোথায় ভেসে যাবে! পণ্ডিতেরা বলবেন, বঙ্গসাহিত্য একটা কলেজের সাহিত্য, এটা দেশের সাহিত্য নয় কিন্তু সে কলেজটা ছিল কোথায় এ বিষয়ে কিছুই মীমাংসা হবে না। আপনার সেই লেখাটির মধ্যে বাংলাদেশের সম্বন্ধ পাওয়া যায়। ভারতবর্ষের পূর্ব-বিভাগের জিওগ্রাফির প্রতি বিশ্বাস জন্মায়। আপনার সেই লেখার মধ্যে অধিকাংশ স্থলে বাংলার ছেলেমেয়েবা কলেজি কথা কয় না ও কলেজি কাজ করে না, তারা প্রতিদিন গৃহেব মধ্যে যে রকম কথা কয় ও যে রকম কাজ করে তাই দেখতে পাওয়া যায়। অত্বে কারো অথবা ক্ষুদ্র আমার লেখায় সেইটি হবার যো নেই। কিন্তু আপনাকে আর অহঙ্কৃত করা হবে না, অতএব এখানেই সমালোচনায় দ্বাণ্ড হলুম।

আপনার চিঠি এইমাত্র পেলাম, বেলা দশটা বেজে গেছে। বাহিরে অসহ্য উত্তাপ আমাদের ঘরের সমস্ত জানালা দরজা বন্ধ—অন্ধকার—মাথার উপরে পাখা আনা-গোনা করচে; আর্দ্র থস্‌থস্‌ ভেদ করে প্রচণ্ড পশ্চিম পবন শীতল ভাবে ঘরের মধ্যে প্রবেশ করচে। ঘরের মধ্যে এক রকম আছি ভাল। সেই পুরাতন ডেকের উপর ঝুঁকে পড়ে চিঠি লিখতে প্রবৃত্ত হয়েছি। আপনার ফুলজানি আমি পূর্বেই ভারতীতে পড়েছি এবং পড়েই আপনাকে একটা চিঠি লিখব মনে করেছিলুম। তার পরে ভাবলুম আপনি একেই ত চিঠির উত্তর বহু বিলম্বে দেন তার পর যদি বিনা উত্তরেই চিঠি লিখি তবে আপনাকে অত্যন্ত আশ্বা দেওয়া হয়। এ রকম ব্যবহার পেলে বন্ধুদের স্বভাব ধারাপ হয়ে যায়। তাই নিবৃত্ত হলাম। আপনার লেখা আমার ভারি ভাল লাগে। ওর মধ্যে কোন রকম নভেলি মিথ্যা ছায়া নেই। আর এমন একটি ছবি মনে এনে দেয় বা আমাদের দেশের কোন লেখকের লেখাতে দেয় না। আপনি কোন রকম ঐতিহাসিক বা ঔপদেশিক বিভ্রম না যাবেন না—সরল মানবহৃদয়ের মধ্যে যে গভীরতা আছে—এবং ক্ষুদ্র ক্ষুদ্র সুখদুঃখপূর্ণ মানবের দৈনন্দিন জীবনের যে চিরানন্দময় ইতিহাস তাই আপনি দেখাবেন। শীতল ছায়া, আম কাঁঠালের বন, পুকুরের পাড়, কোকিলের ডাক, শান্তিময় প্রভাত এবং সন্ধ্যা। এরি মধ্যে প্রচ্ছন্নভাবে, তরল কলধ্বনি তুলে, বিরহ মিলন হাসি কান্না নিয়ে যে মানব-জীবনস্রোত অবিপ্রান্ত প্রবাহিত হচ্ছে তাই আপনি আপনার ছবির মধ্যে আনবেন। প্রকৃতির শান্তির মধ্যে, স্নিগ্ধছায়া শ্রামল নীড়ের মধ্যে যে সব ছোট ছোট হৃদয়ের ব্যাকুলতা বাস করচে দয়েল কোকিল বউকথাকওয়ার গানের সঙ্গে মানবহৃদয়ের যে সকল আকাঙ্ক্ষাধ্বনি মিশ্রিত হয়ে অবিপ্রাম আকাশের দিকে উঠছে আপনার লেখার মধ্যে সেই ছবি এবং সেই গান মেশাবেন। কোন রকম জটিলতা বা চরিত্রবিব্লেশ বা হৃদয় অসাধারণ হৃদয়াবেগ এনে স্বচ্ছ মধুর শান্তিময় ঘটনাস্রোতকে

ঘোলা করে তুলবেন না। আমার বিশ্বাস, আপনি যদি অধিক ফলাও কাণ্ড না করেন তাহলে বাংলার সর্বশ্রেষ্ঠ উপন্যাসলেখকের সঙ্গে সমান আসন পেতে পারবেন। বাংলার অন্তর্দেশবাসী নিতান্ত বাঙালীদের সুখচ্ছত্রের কথা এ পর্যন্ত কেহই বলেন নি— আপনার উপর সেই ভার রইল। বঙ্কিম বাবু ঊনবিংশ শতাব্দীর পোস্তপুত্র আধুনিক বাঙালীর কথা যেখানে বলেছেন সেখানে কৃতকার্য হয়েছেন, কিন্তু যেখানে পুরাতন বাঙালীর কথা বলতে গিয়েছেন সেখানে তাঁকে অনেক বানাতো হয়েছে; চন্দ্রশেখর প্রতাপ প্রভৃতি কতকগুলি বড় বড় মানুষ এঁকেছেন (অর্থাৎ তাঁরা সকল দেশীয় সকল জাতীয় লোকই হতে পারতেন, তাঁদের মধ্যে জাতি এবং দেশকালের বিশেষ চিহ্ন নেই) কিন্তু বাঙালী আঁকতে পারেন নি। আমাদের এই চিরপীড়িত, ধৈর্য্যশীল, স্বজন্মবৎসল স্বাভাবিকভাবেই প্রচণ্ডকর্ণশীল-পৃথিবীর এক নিম্নতপ্রান্তবাসী শান্ত বাঙালীর কাহিনী ফেঁট ভাল করে বলে নি। ? ? ?

মাইভে: মাইভে:। সপ্তাহের পর সপ্তাহ আসবে কিন্তু “সপ্তাহ” * আর বের হবে না।
অতএব বন্ধুবান্ধবেরা সকলে নিশ্চিত হোন। ভেবে দেখুন কি করতে বসেছিলেন! সপ্তাহ
বের করবার চেষ্টা করে জীবন থেকে সপ্তাহগুলো একেবারে লোপ কর্তে বসেছিলেন।
এখন যেমন আমি সপ্তাহে সাতটা দিন করে পাই তখন সপ্তাহে সাতটা দিন বাদ পড়ত।
মাসের পর মাস আসত—কিন্তু সপ্তাহ নেই; দিনগুলো আমাকে লাঠি হাতে তাড়া করে
বেড়াতে। আমি কোথায় গিয়ে দাঁড়াব ভেবে পেতুম না। হরিশ্চন্দ্র যেমন বিখ্যামিত্রকে
সমস্ত পৃথিবী দান করে বিব্রত হয়ে পড়েছিলেন অবশেষে স্বর্গ টা পর্যন্ত অদৃষ্টে ছুটলনা—
আমিও তেমনি আমার সমস্ত সময় পরের হাতে দিয়ে অবশেষে স্বর্গ পর্যন্ত খোঁজাছুঁ—
কারণ খবরের কাগজ লিখে এ পর্যন্ত কেউ অমরলোক প্রাপ্ত হয় নি। এই বসন্তকাল
এসেছে—দক্ষিণের হাওয়া বয়েছে—এ সময়টা একটু আধটু গানবাজনার সময়—এ
সময়টা যদি কেবলি ক্লস, চীন, পাঠানের অরাজকত্ব, মগের মুন্সুক, আবকারী ডিপার্টমেন্ট,
জুনের মাশুল, তারের খবর এবং পৃথিবীর যত সময়তানের প্রতি নজর রাখতে হয়
তাহলে ত আর বাঁচিনে। পৃথিবীর গুপ্তচর হয়ে বেঁচে কোন হুখ নেই। জীবনে শু
বসন্তকাল বেশী আসে না। যতদিন যোবন ততদিন গোটাকতক বসন্ত হাতে পাওয়া
যায়—সে কটা না খুঁয়ে মনে করচি বুড়ো বয়সে একটা খবরের কাগজ খুব—তখন
হয়ত প্রাণ খোলা নেই, গান বন্ধ, সেই সময়টা ভাঙাগালায় পলিটিক্স প্রচার করা বাবে।
এখনো অনেক কথা বলা বাকী আছে সে গুলো হয়ে যাক আগে। কি বলেন!—
আপনার চিঠিতে রাণী শরৎসুন্দরীর বিবরণ পড়ে আমার বড় ভাল লাগল। আপনি
তার অহ ভোগ করেচেন এ আপনার নিজস্ব সৌভাগ্যের কথা। তার জীবনসম্বন্ধে
কিছু লিখলে ভাল হয়। আমাদের মহদুষ্টান্ত নানা কারণে আমাদের নজরে পড়ে না
সে গুলো যাতে আমাদের দৃষ্টিপথে পড়ে সে চেষ্টা করা উচিত।

* সপ্তাহ নামক সাপ্তাহিক পত্র বাহির করার আয়োজন উপলক্ষে লিখিত।

আমি প্রায় এক মাস কাল দার্জিলিঙে কাটিয়ে এলুম। আপনার পত্র কলুকাতায় আমার জন্তে অপেক্ষা করছিল। আমি ফিরে এসে পেলুম। আপনাকে অনেক দিন থেকে লিখি লিখি করুচি, কিন্তু দৈব বিপাকে হয়ে গুঠে নি। এবার আমার ততটা দোষ ছিল না। আমার কোমরে বাত হয়ে কিছুকাল শয্যাগত হয়ে পড়েছিলুম এখনো ভাল করে সারিনি। তবে এখন বিছানা থেকে উঠে বসেছি। কিন্তু বেশীক্ষণ চোঁকিতে বসে থাকতে পারি নে। আমার কোমর ছাড়া পৃথিবীতে আর আর সমস্ত মঙ্গল। আমার স্ত্রী কত্না দার্জিলিঙে, আমি কলকাতায় ঘরে বসে বিরহ ভোগ করচি—কিন্তু বিরহের চেয়ে কোমরের বাতটা বেশী গুরুতর বোধ হচ্ছে। কবিতা যাই বলুন আমি এবার টের পেয়েছি বাতের কাছে বিরহ লাগে না। কোমরে বাত হলে চন্দনপঙ্ক লেপন করলে দ্বিগুণ বেড়ে ওঠে—চন্দ্রমাশালিনী পূর্ণিমা-যামিনী সাঙ্ঘন্য কারণ না হয়ে যন্ত্রণার কারণ হয়—আর স্নিগ্ধ সমীরণকে বিভীষিকা বলে জ্ঞান হয়—অথচ কালিদাস থেকে রাজকুমারায় পর্যন্ত কেউই বাতের উপর একছত্র কবিতা লেখেন নি, বোধ হয় কারু বাত হয় নি। আমি লিখব।—এই প্রসঙ্গে আমি আপনাকে একটা তত্ত্বের মীমাংসা জিজ্ঞাসা করি—বিরহের কষ্টই বা কেন কবিতার বিষয় আর বাতের কষ্টই বা কেন কবিতার বিষয় নয়। কোমরটাকে যত সামান্য বোধ হত এখন ত তত সামান্য বোধ হয় না। হৃদয় ভেঙে গেলেও মানুষ মাথা তুলে খাড়া হয়ে দাঁড়িয়ে থাকতে পারে—কিন্তু কোমর ভেঙে গেলেই মানুষ একেবারে কাৎ—তার আর উত্থানশক্তি থাকে না। তখন প্রেমের আত্মান, স্বদেশের আত্মান, সমস্ত পৃথিবীর আত্মান এলেও সে কোমরে টার্পিন তেল মাগিয়ে করবে। যতদিন মানুষের কোমর না ভাঙে ততদিন পৃথিবীর মাধ্যাকর্ষণশক্তি মানুষ ঠিক অহুভব কর্তে পারে না—আপনি কেতাবে পড়েছেন কিন্তু তবুও জানেন না যে জননী বসুন্ধরা ক্রমাগতই আমাদের মধ্যদেশ ধরে আকর্ষণ করছেন—বাত হলেই তবে

তার সেই মাতৃস্নেহের প্রবল টান সবিশেষ অনুভব করা যায়। বা হোক শ্রীশ বাবু বন্ধুর
 হৃদয় অবধান করে কোমরকে আর কখনো হেয়জ্ঞান করবেন না—কপাল ভাঙা সে ভ
 রূপক মাত্র—কিন্তু কোমর ভাঙা অত্যন্ত সত্য—তাতে কল্পনার লেশমাত্র নেই। সেই
 সত্য বর্তমান কালে অত্যন্ত অনুভব করছি বলে আপনাকে আর চিঠি লিখতে পারছি নে।
 বাল্যবিবাহ সম্বন্ধে আপনি প্রশ্ন করেছেন সে বিষয় পরে উত্থাপন করা যাবে আপাততঃ
এই বলে রাখছি বাল্যবিবাহ যে ইচ্ছে করুক—কিন্তু কোমরে বাত যেন কারো না হয়।

Humour! Eh? - —

বহুদিন চিঠিপত্র লিখিনি, কারণ চিঠি লেখা কম কাণ্ড নয়। দিনের পর দিন চলে যাচ্ছে—কেবল বয়স বাড়ছে। হু বৎসর আগে পঁচিশ ছিলুম এইবার সাতাশে পড়েছি—এই ঘটনাটাই কেবল মাঝে মাঝে মনে পড়ছে—আর কোন ঘটনা ত দেখচিনে। কিন্তু সাতাশ হওয়াই কি কম কথা! কুড়ির কোঠার মধ্যাহ্ন পেরিয়ে ত্রিশের অভিমুখে অগ্রসর হওয়া।—ত্রিশ-অর্থাৎ-বুনো-অবস্থা। অর্থাৎ যে অবস্থার লোকে সহজেই রসের অপেক্ষা শস্ত্রের প্রত্যাশা করে—কিন্তু শস্ত্রের সম্ভাবনা কই! এখনও মাথা নাড়া দিলে মাথার মধ্যে রস থলু থলু করে—কই তত্ত্বজ্ঞান কই! লোকে মাঝে মাঝে জিজ্ঞাসা করচে—“তোমার কাছে যা আশা করি তা কই? এতদিন আশায় আশায় ছিলুম তাই কচি অবস্থার শ্রাম শোভা দেখেও সন্তোষ জন্মাত—কিন্তু তাই বলে চিরদিন কচি থাকলে ত চলবে না। এবারে—তোমার কাছে কতখানি লাভ করতে পারব তাই জানতে চাই—চোখে-ঠুলি-বাঁধা নিরপেক্ষ সমালোচকের ঘানি-সংযোগে তোমার কাছ থেকে কতটুকু তেল আদায় হতে পারে এবার তার একটা হিসেব চাই!”—আর ত ফাঁকি দিয়ে চলে না। এতদিন বয়স অল্প ছিল, ভবিষ্যতে সাবালক অবস্থার ভরসায় লোকে ধারে থ্যাতি দিত। এখন ত্রিশ বৎসর হতে চল্ল আর ত তাদের বসিয়ে রাখলে চলে না। কিন্তু পাকা-কথা কিছুতেই বেরোয় না গ্রীষ্ম বাবু। যাতে পাঁচ জনের কিছু লভ্য হয় এমন বন্দোবস্ত করতে পারুচিনে। ছোটো গান বা গুজোব, হাসি বা তামাসা এর চেয়ে বেশী আর কিছু হয়ে উঠল না। যারা প্রত্যাশা করেছিল তারা মাঝের থেকে আমারই উপর চটবে। কিন্তু কে তাদের মাথার দিবি দিয়ে প্রত্যাশা করতে বলেছিল। হঠাৎ একদিন বৈশাখের প্রভাতে নববর্ষের নূতন পত্র পুষ্প আলোক ও সমীরণের মধ্যে জেগেউঠে যখন শুনলুম আমার বয়স সাতাশ তখন আমার মনে এই সকল কথার উদয় হল। আসল কথা—যতদিন আপনি কোন লোককে বা বস্তুকে সম্পূর্ণ না জানেন ততদিন কল্পনা

ও কৌতূহল মিশ্রিত ভায় প্রতি একপ্রকার বিশেষ আসক্তি থাকে। পশ্চিমবঙ্গের পর্য্যন্ত কোন লোককে সম্পূর্ণ জানা যায় না—তার যে কি হবে কি হতে পারে কিছুই বলা যায় না, তার যতটুকু সম্ভূত তার চেয়ে সম্ভাবনা বেশী। কিন্তু সাতাশ বৎসরে মাহুমকে একরকম ঠাহর করা যায়—বোঝা যায় তার যা হবার তা একরকম হয়েছে—এখন থেকে প্রায় এই রকমই বরাবরই চম্বে—এ লোকের জীবনে হঠাৎ আশ্চর্য্য হবার আর কোন কারণ রইল না। এই সময়ে তার চারদিক থেকে কতকগুলো লোক ঝরে যায়, কতকগুলো লোক স্থায়ী হয়—এই সময়ে যারা রইল তারাই রইল। কিন্তু আর নূতন প্রেমের আশাও রইল না, নূতন বিরহের আশঙ্কাও গেল। অতএব এ এক রকম মন্দ নয়। জীবনের আরামজনক স্থায়িত্ব লাভ করা গেল। আপনাকেও বোঝা গেল এবং অন্যদেরও বোঝা গেল। ভাবনা গেল।

আজকাল আমাদের এখানে বর্ষা পড়েছে। ঘন মেঘ ও অবিরাম বৃষ্টি। এই সময়ই ত বঙ্গসঙ্গের সময়। এই সময়টা ইচ্ছে করচে, তাকিয়া আশ্রয় করে পড়ে পড়ে না-তা বকাবকি করি। বাইরে কেবল ধূপ্ ধূপ্ বৃষ্টি—বন্ বন্ বজ্র—হ হ বাতাস এবং রাজপথে সেকড়া গাড়ির জীর্ণ চক্রে কদাচিৎ খড়খড় শব্দ। ইংরাজরাজের উপদ্রবে তাও ভাল করে হবার যো নেই—ইংরাজ রাজত্বে বজ্র বৃষ্টি বাতাস এবং সেকড়া গাড়ির অভাব নেই—কিন্তু এই রাক্ষসী তার দেশ-বিদেশ-ব্যাপী আফিস আদালত প্রভৃতি বদন-ব্যাদান পূর্ব্বক তাকিয়ার কোমল কোল শুষ্ট করে আমাদের গোটা গোটা বজ্র-বান্ধবদের গ্রাস করে ফেলেচে; এই ভরা বাদরে আমাদের মন্দির হাহাকার করচে। আবাঢ়ে গল্প নামক আমাদের একটি নিভাস্ত দেশজ পদার্থ অস্ত্রাস্ত্র সহস্র দেশজ শিল্পের সঙ্গে সঙ্গে লোপ পাবার উপক্রম করচে। আমাদের সেই বহু পুৰাতন আবাঢ় সহস্র দালান ও চণ্ডীমণ্ডপের চক্রে সম্মুখে অবিশ্রাম কৈদে মরচে কিন্তু তার আবাঢ়ে গল্প নেই। আমাদের সেই শত শত গান গল্প সাহিত্য-চর্চার স্মৃতিতে ও তুলোতে পরিপূর্ণ তাকিয়াই বা কোথায়, আমিই বা কোথায়, এবং আপনিই বা কোথায়। যত্নপতিই বা কোথায়, মথুরাপুরীই বা কোথায়। অতএব হে বন্ধুবর

ইতি বিচিন্ত্য কুরু স্বমন স্থিরঃ

ন সদিদং জগদিত্য বধায়ম।

এই আমার চিঠির Moral, তব্ধ, উদ্দেশ্য—অতএব কেবল এইটুকু গ্রহণ করে বাকিটুকু বাদ দেবেন কিন্তু চটপট উত্তর দিতে ভুলবেন না।

আপনার বিশেষরূপে মনে থাকবে বলে এই চিঠির কিয়দংশ পড়ে অনুবাদ করে পাঠাই। অবধান করা হউক—বন্ধুহে

পরিপূর্ণ বয়সায়
আছি তব ভরসায়,
কাজ কর্ম কর সায়,—
এস চটপট।

শাম্ভা আঁটিয়া নিত্য
তুমি কর ডেপুটি,
একা পড়ে মোর চিত্ত
করে ছট্‌ফট।

যখন যা সাজে ভাই
তখন করিবে তাই ;
কালাকাল মানা নাই
কলির বিচার,

শ্রাবণে ডেপুটি-পনা
এ ত কভু নয় সনা-
তন প্রথা এ যে অনা-
সৃষ্টি অনাচার।

রাজহুত্র ফেল শ্রাম,
এস এই ব্রজধাম,
কলিকাতা যার নাম
কিংবা ক্যালকাটা !

ঘুরেছিলে এইধেনে
কত রোডে কত লেনে,
এইধেনে ফেল এনে
জুতোস্বক পা-টা !

ছুটি লয়ে কোনমতে
পোটমাণ্টো তুলি রখে,

সেজেগেজে, রেলপথে

কর অভিসার !

লয়ে দাড়ি লয়ে হাসি

অবতীর্ণ হও আসি,

রুধিরা আনালা শাসি

বসি একবার ।—

যজ্ঞরবে সচকিত

কাঁপিবে গৃহের ভিত্ত,

পথে শুনি কদাচিত্ত

চক্রে ধড়ধড় !—

হারেয়ে ইংরাজ-রাজ

এ সাথে হানিলি বাজ

শুধু কাজ শুধু কাজ

শুধু ধড়ধড় !

আম্‌লা শাম্‌লা স্রোতে

ভাসাইলি এ জারতে,

যেন নেই ত্রিজগতে

হাসি গল্প গান !

নেই বাঁশি, নেই বঁধু,

নেইরে যৌবন-মধু,

মুচেছে পথিক-বধু

সজল নয়ান !

যেনরে সরম টুটে

কদম্ব আর না ফুটে,

কেতকী শিহরি উঠে

করে না আকুল ;

কেবল জগৎটাকে

জড়িয়ে সহস্রপাকে

গবর্মেন্টো পড়ে থাকে
বিরাট বিপুল ।

বিষম রান্সস ওটা,
মেলিয়া আকিস-কোটা,
গ্রাস করে গোটাগোটা

বহুবাক্ষবেদে—

বুহৎ বিদেশে ঘেষে
কে কোথা ভলায় শেষে
কোথাকার সর্ব্বনেশে
সার্কিসের করে !

এদিকে বাদল ভরা
নবীন শ্রামল ধরা,
নিশিদিন ঝুমঝুরা
সহন গগন ।

এদিকে ঘরের কোণে
বিরহিনী বাতায়নে,
গহন তমাল বনে
নয়ন মগন ।

হেঁট মুণ্ড করি হেঁট
মিছে কর অ্যাজিটেট
খালি রেখে খালি পেট
লিখিছ কান্নজ,—

এ দিকে গোহ্বায় মিলে
কাল-বহু ভুটে নিলে,
তার বেলা কি কয়িলে,
মাই কোন ধোঁজ !

দেখিছ না ঝাঁপি খুলে,
ম্যাঞ্চেষ্ট্র লিজারুলে

দিশী শিল্প জলে জ্বলে
করিল finish !

“আষাঢ়ে গল্প” সে কই !

সেও বুঝি গেল ওই !

আমাদের নিতান্তই

দেশের জিনিষ !

আষাঢ় কাহার আশে
বর্ষে বর্ষে কিরে আসে,
নয়নের নীরে ভাসে

দিবসরজনী !

আছে ভাব নাই ভাষা,
নাই শস্য আছে চাষা,
আছে নস্য নাই নাসা,

এও যে তেমনি !

তুমি আছ কোথা গিয়া,
আমি আছি শূন্য হিয়া,
কোথায় বা সে তাকিয়া

শোকতাপহরা !

সে তাকিয়া, গল্প-গীতি—
সাহিত্যচর্চার স্থিতি,
কত হাসি কত প্রীতি

কত তুলো ভরা !

কোথায় সে যত্নপতি,
কোথা মথুরার পতি,
অথ চিন্তা করি ইতি

কুরু মনস্থির—

মায়াময় এ জগৎ

নহে সৎ, নহে সৎ,

(২০)

যেন পদ্মপত্রবৎ

তছুপরি নীর !

অতএব ঘরা করে

উত্তর লিখিবা মোরে,

সর্বদা নিকটে ঘোরে

কাল সে করাল ;

(সুধী তুমি ত্যজি নীর

গ্রহণ করিও কীর)

এই তব্ব এই চিঠির

জানিও Moral ।

এইত দার্জিলিং এসে পড়লুম । পথে বে—খুব ভাল রকম behave করেছে । বড় একটা কাঁদেনি । খুব চোঁচামেচি গোলমালও করেছে—উল্ও দিয়েছে—হাতও ছুরিয়েচে এবং পাখীকে ডেকেচে যদিও পাখী কোথায় দেখতে পাওয়া গেল না । সারাঘাটে ষ্টীমারে ওঠবার সময় মহা হাঙ্গাম । রাত্রি দশটা—জিনিষপত্র সহস্র, কুলি গোটাছুতক, মেয়ে মানুষ পাঁচটা এবং পুরুষ মানুষ একটি মাত্র । নদী পেরিয়ে একটা ছোট রেল-গাড়িতে ওঠা গেল—তাতে চারটে করে শয্যা, আমরা ছটি মনিয়ি । মেয়েদের এবং অগ্ন্যস্ত্র জিনিষপত্র ladies compartment-এ তোলা গেল, কথাটা শুনতে যত সংক্ষেপ হ'ল কাজে ঠিক তেমনটা হয়নি । ডাকাডাকি হাঁকাহাঁকি ছোটোছোটো নিতান্ত অল্প হয়নি—তবু ন—বলেন আমি কিছুই করিনি—অর্থাৎ একখান আস্ত মানুষ একেবারে আস্ত রকম খেপলে যে রকমটা হয় সেই প্রকার যুক্তি ধারণ করলে ঠিক পুরুষ মানুষের উপযুক্ত হত । কিন্তু এই দুদিনে আমি এত বাস্তব খুঁজেছি এবং বন্ধ করেছি এবং বেকির নীচে ঠেলে গুঁজেছি, এবং উক্ত স্থান থেকে টেনে বের করেছি, এত বাস্তব এবং পুঁটুলির পিছনে আমি ফিরেছি এবং এত বাস্তব এবং পুঁটুলি আমার পিছনে অভিলাষের মত ফিরেচে, এত হারিয়েচে এবং এত ফের পাওয়া গেছে এবং এত পাওয়া যায়নি এবং পাবার জন্য এত চেষ্টা করা গেছে এবং বাচ্ছে যে, কোন ছাফিশ বৎসর বয়সের ভদ্রসন্তানের অদৃষ্টে এমনটা ঘটেনি । আমার ঠিক বাস্তব-phobia হয়েছে; বাস্তব দেখলে আমার দাঁতে দাঁতে লাগে । যখন চারিদিকে চেয়ে দেখি বাস্তব, কেবলি বাস্তব, ছোট বড় মাঝারি, হাঙ্গা এবং তারি, কাঠের এবং টিনের এবং পশুচর্শ্বের এবং কাঁপড়ের—নীচে একটা, উপরে একটা, পাশে একটা, পিছনে একটা—তখন আমার ডাকাডাকি, হাঁকাহাঁকি এবং ছোটোছোটো করবার স্বাভাবিক শক্তি একেবারে চলে যায় এবং তখন আমার শূন্য দৃষ্টি, শুষ্ক মুখ এবং দীনভাব দেখলে নিতান্ত কাপুরুষের মত বোধ হয় অতএব আমার সম্বন্ধে

ন—র যা মত দাঁড়িয়েচে তা ঠিক। যাক্, তার পরে আমি আর একটা গাড়িতে গিয়ে শুভুম। সে গাড়িতে আর দুটি বাঙালী ছিলেন। তাঁরা ঢাকা থেকে আসছেন—তাঁদের মধ্যে একজনের মাথা টাকে প্রার পরিপূর্ণ এবং ভাষা অত্যন্ত বাঁকা—তিনি আমাকে জিজ্ঞাসা করলেন “আপনার পিতা দারজিলিঙ্গে ছিল?” লক্ষী থাকলে এর যথোচিত উত্তর দিতে পারত—সে হয় ত বলত “তিনি দারজিলিঙ্গে ছিল কিন্তু তখন দারজিলিং বড় ঠাণ্ডা ছিলেন বলে তিনি বাড়ি ফিরে গেছে।” আমার উপস্থিতমত এক রকম বাংলা যোগাল না। * * * * *

সিলিগুড়ি থেকে দারজিলিং পর্যন্ত ক্রমাগত স—র উচ্ছ্বাস উক্তি। “ও মা” “কি চমৎকার” “কি আশ্চর্য্য” “কি সুন্দর”—কেবলি আমাকে ঠেলে আর বলে “র—দেখ দেখ”। কি করি, যা দেখায় তা দেখতেই হয়—কখন বা গাহ, কখন বা মেঘ, কখন বা একটা দুর্জয় খাঁদা নাকওয়ালা পাহাড়ী মেয়ে—কখন বা এমন কত কি, যা দেখতে না দেখতেই গাড়ি চলে যাচ্ছে, এবং স—হুখে কছে যে র—দেখতে পেলো না। গাড়ি চলতে লাগল। ক্রমে ঠাণ্ডা, তার পরে মেঘ, তার পরে সর্দি, তার পরে হাঁচি, তার পরে শাল, কঙ্কল, বালাপোষ, মোটা মোজা, পা কন্ কন্, হাত ঠাণ্ডা, মুখ নীল, গলা ভার-ভার এবং ঠিক তার পরেই দারজিলিং। আবার সেই বাজ, সেই ব্যাগ, সেই বিছানা, সেই পুটুলি, মোটের উপর মোট, যুটের উপর যুটে। ব্রেক থেকে তিনিষ পত্র দেখে নেওয়া, চিনে নেওয়া, যুটের মাথায় চাপান, সাহেবকে রান্না দেখান, সাহেবের তর্ক বিতর্ক, জিনিষ খুঁজে না পাওয়া এবং সেই হারান জিনিষ পুনরুদ্ধারের জন্য বিবিধ বন্দোবস্ত করা, এতে আমার ঘণ্টা দুয়েক লেগেছিল।

শিলাইদহের অপর পারে একটা চরের সামনে আমাদের বোট লাগান আছে । প্রকাণ্ড চর—ধু ধু করচে—কোথাও শেষ দেখা যায় না—কেবল মাঝে মাঝে এক এক জায়গায় নদীর রেখা দেখা যায়—আবার অনেক সময়ে বালিকে নদী বলে ভ্রম হয় । গ্রাম নেই, লোক নেই, তরু নেই, তৃণ নেই—বৈচিত্র্যের মধ্যে জায়গার জায়গায় কাটল-ঘরা ভিজে কালো মাটি, জায়গায় জায়গায় শুকনো শাদা বালি । পূর্বদিকে মুখ ফিরিয়ে চেয়ে দেখলে দেখা যায় উপরে অনন্ত নীলিমা আর নীচে অনন্ত পাণ্ডুরতা । আকাশ শূন্য এবং ধরঙ্গীও শূন্য, নীচে দরিদ্র শুষ্ক কঠিন শূন্যতা আর উপরে অশরীরী উদার শূন্যতা । এমনতর desolation কোথাও দেখা যায় না । হঠাৎ পশ্চিমে মুখ ফেরাবানাত্র দেখা যায় স্রোতহীন ছোট নদীর কোল, ওপারে উঁচু পাড়, গাছপালা, কুটীর, সন্ধ্যা-সূর্যালোকে আশ্চর্য্য স্বপ্নের মত । ঠিক যেন এক পারে সৃষ্টি, এবং আর এক পারে প্রলয় । সন্ধ্যাসূর্যালোক বলবার তাৎপর্য্য এই—সন্ধ্যার সময়ই আমরা বেড়াতে বেরই এবং সেই ছবিটাই মনে অঙ্কিত হয়ে আছে । পৃথিবী যে বাস্তবিক কি আশ্চর্য্য অন্ধরী তা কলকাতার থাকলে ভুলে যেতে হয় । এই যে ছোট নদীর ধারে শান্তিময় গাছপালার মধ্যে সূর্য্য প্রতিদিন অন্ত যাচ্ছে, এবং এই অসন্ত ধূসর নির্জন নিশেপ চরের উপরে প্রতিরাত্রে শত সহস্র নক্ষত্রের নিশেপ অভ্যুদয় হচ্ছে, জগৎসংসারে এ যে কি একটা আশ্চর্য্য মহৎ ঘটনা তা এখানে থাকলে তবে বোঝা যায় । সূর্য্য আস্তে আস্তে ভোরের বেলা পূর্বদিক থেকে কি এক প্রকাণ্ড গ্রহের পাতা খুলে দিচ্ছে এবং সন্ধ্যার পশ্চিম থেকে ধীরে ধীরে আকাশের উপরে যে এক প্রকাণ্ড পাতা উল্টে দিচ্ছে সেই বা কি আশ্চর্য্য লিখন—আর, এই ক্রীণ-পরিসর নদী আর এই দিগন্তবিস্তৃত চর, আর ওই ছবির মতন পরপার, ধরঙ্গীর এই উপেক্ষিত একটা প্রান্তভাগ—এই বা কি বৃহৎ নিস্তক নিস্তৃত পাঠশালা ! বাক । এ কথাগুলো রাজধানীতে অনেকটা “পেট্রির” মত শুভ্র হব, কিন্তু এখানকার পক্ষে কথাগুলো কিছুমাত্র বোধ্য নয় ।

সন্ধ্যাবেলা এই বৃহৎ চরের মধ্যে ছাড়া পেয়ে অনুচরসমেত ছেলেরা একদিকে যায়, বলু একদিকে যায়, আমি একদিকে যাই, দুটি রমণী আর একদিকে যায়। ইতিমধ্যে সূর্য সম্পূর্ণ অস্ত যায়, আকাশের সুবর্ণ আভা মিলিয়ে যায়, অন্ধকারে চারিদিক অস্পষ্ট হয়ে আসে, ক্রমে আপনার পাশের ক্ষীণ ছায়া দেখে বুঝতে পারি, বাঁকা ক্লশ চাঁদথানির আলো অল্প অল্প ফুটেছে। পাণ্ডুবর্ণ বালির উপরে এই পাণ্ডুবর্ণ জ্যোৎস্নায় চোখে আরো কেমন বিভ্রম জন্মিয়ে দেয়—কোথায় বালি, কোথায় জল, কোথায় পৃথিবী, কোথায় আকাশ নিতান্ত অসুমান করে নিতে হয়। কাজেই সবটা জড়িয়ে ভারি একটা অবাস্তবিক মরীচিকা-জগতের মত বোধ হয়। * * * * গতকল্য এই মায়া উপকূলে অনেককণ ধরে বিচরণ করে বোটে ফিরে গিয়ে দেখি ছেলেরা ছাড়া আমাদের দলের আর কেউ ফেরেন নি—আমি একখানি কেদারায় স্থির হয়ে বসলুম—Animal Magnetism নামক একখানা অত্যন্ত ঝপসা subject-এর বই একটা বাতির ঝাপসা আলোতে বসে পড়তে আরম্ভ করলুম। কিন্তু কেউ আর ফেরেন না। বইখানাকে খাটের উপরে উপড় করে বেরোলুম—উপরে উঠে চারিদিকে চেয়ে কাল মাথার কোন চিহ্ন দেখতে পেলুম না। সমস্ত ফেকাশে ধু ধু করচে। একবার বলু বলে পুরো জোরে চীৎকার করলুম—কণ্ঠস্বর হ হ করতে করতে দশ দিকে ছুটে গেল—কিন্তু কারো সাড়া পেলুম না। তখন বুকটা হঠাৎ চারদিক থেকে দমে গেল, একখানা বড় খোলা ফাঁতা হঠাৎ বন্ধ করে দিলে যেমনতর হয়। গোফুর আলো নিয়ে বেরোল—প্রসন্ন বেরোল—বোটের মাঝিগুলো বেরোল, সবাই ভাগ করে ভিন্ন ভিন্ন দিকে চললুম—আমি একদিকে বলু বলু করে চীৎকার করচি—প্রসন্ন আর একদিকে ডাক দিচ্ছে “ছোট মা”—মাঝে মাঝে শোনা যাচ্ছে মাঝিরা “বাবু” “বাবু” করে ফুক্ করে উঠে। সেই মরুভূমির মধ্যে নিস্তব্ধ রাত্রে অনেকগুলো আর্কস্বর উঠতে লাগল। কারো সাড়া শব্দ নেই। গোফুর ছই একবার অতি দূর থেকে হেঁকে বলে—“দেখতে পেয়েছি” তার পরেই আবার সংশোধন করে বলে “না” “না”। আমার মানসিক অবস্থাটা একবার কল্পনা করে দেখ—কল্পনা করতে গেলে নিঃশব্দ রাত্রি, ক্ষীণ চন্দ্রালোক, নির্জন নিস্তব্ধ শূন্য চর, দূরে গোফুরের চলনশীল একটা লণ্ঠনের আলো, মাঝে মাঝে এক এক দিক থেকে কাতর কণ্ঠের আহ্বান এবং চতুর্দিকে তার উদাস প্রাতিধ্বনি—মাঝে মাঝে আশার উন্মেষ এবং পর মুহূর্তেই স্রগভীর নৈরাশ্র এই সমস্তটা মনে আনতে হবে। অসম্ভব রকমের আশঙ্কাসকল মনে জাগতে লাগল। কখন মনে হল চোরাবালিতে পড়েছে, কখন মনে

হল বল্লর হয়ত হঠাৎ মুছা কিংবা কিছু একটা হয়েছে—কখন বা নানাবিধ খাপস জন্তর বিভীষিকা কল্পনার উদয় হতে লাগল। মনে মনে হতে লাগল “আত্মরক্ষা-অসমর্থ ব্যাৰা, নিশ্চিন্তে ঘটার তারা পরের বিপদ।” জীবাধীনতার বিরুদ্ধে দৃঢ়প্রতিজ্ঞ হয়ে উঠলুম। এমন সময়ে ঘণ্টাখানেক পরে রব উঠল এঁরা চড়া বেয়ে বেয়ে ওপারে গিয়ে পড়েছেন আর ফিরতে পারছেন না। বোট ওপারে গেল—বোটলক্ষী বোট ফিরলেন—বলু বলতে লাগল “তোমাদের নিয়ে আমি আর কখনো বেরোব না”—সকলেই অহুতপ্ত শ্রাস্তকাতর, হুতরাং আমার ভাল ভাল উপাদেয় ভৎসনাবাক্য হৃদয়েই রয়ে গেল। পরদিন প্রাতঃকালে উঠেও কোনমতেই রাগতে পারলুম না।

পাড়ি ছাড়বার পর বে—চারিদিক চেয়ে গম্ভীর হয়ে বসে রইল, ভাবলে এসংসারে কোথা থেকে আগমন, কোথায় গতি, জীবনের উদ্দেশ্য কি—ভাবতে ভাবতে ক্রমে দেখলুম ঘন ঘন হাই তুলতে লাগল, তার পরে খানিক বাদে আমার কোলে মাথা রেখে পা ছড়িয়ে নিদ্রা আরম্ভ করে দিল। আমার মনেও সংসারের সুখদুঃখসম্বন্ধে নানাবিধ চিন্তার উদয় হয়েছিল, কিন্তু ঘুম এল না। স্মরণে আপন মনে ভৈরবী আলাপ করতে লাগলুম। ভৈরবী সুরের মোচড়গুলো কানে এলে জগতের প্রতি এক রকম বিচিত্র ভাবের উদয় হয়। মনে হয় একটা নিয়মের যন্ত্র-হস্ত অবিশ্রাম আর্গনি যন্ত্রের হাতা ঘোরাচ্ছে এবং সেই ঘর্ষণ বেদনার সমস্ত বিশ্বত্রুষ্ণার মর্মস্থল হতে একটা গম্ভীর কাতর করুণ রাগিনী উচ্ছ্বসিত হয়ে উঠছে। সকালবেলাকার সূর্য্যের সমস্ত আলো ম্লান হয়ে এসেচে, গাছপালা নিস্তব্ধ হয়ে কি যেন শুনচে, এবং আকাশ একটা বিশ্বব্যাপী অশ্রুর বাষ্পে যেন আচ্ছন্ন হয়ে রয়েছে অর্থাৎ দূর আকাশের দিকে চাইলে মনে হয় যেন একটা অনিমেষ নীল চোখ কেবল ছলছল করে চেয়ে আছে।

খিড়কি ট্রেনের কাছাকাছি আমাদের সেই আকের ক্ষেত, গাছের সার, টেনিস ক্ষেত্র, কাঁচের জানালা-মোড়া বাড়ি দেখতে পেলুম, দেখে মনটা ক্ষণকালের জন্য কেমন করে উঠল। এই এক আশ্চর্য্য! যখন এখানে বাস করতুম তখন এ বাড়ির উপরে যে সবিশেষ স্নেহ ছিল তা নয়—যখন এবাড়ি ছেড়ে গিয়েছিলুম তখনও যে সবিশেষ কাতর হয়েছিলুম তাও বলতে পারিনে অথচ দ্রুতগতি ট্রেনের বাতায়নে বসে যখন কেবল নিমেষের মত দেখলুম সেই একলা বাড়ি তার খেলার জায়গা এবং ফাঁকা ঘরগুলো নিয়ে দাঁড়িয়ে রয়েছে তখন সমস্ত হৃদয়টা বিদ্রোহবলে সেই বাড়ির উপরে ঝাঁপিয়ে গিয়ে পড়ল, অমনি বুকের ভিতরে বাঁদিক থেকে ডান দিক পর্য্যন্ত ধক্করে একটা শব্দ হল, হস্ করে গাড়ি চলে গেল, আকের ক্ষেত মিলিয়ে গেল—বাস্ সমস্ত ফুরোল—কেবল হঠাৎ ঘা খাওয়ার দরুণ মনের ছোট বড় ছ চারটে তার প্রায় দেড় সুর

আন্দাজ নেবে গেল। কিন্তু গাড়ির এঞ্জিন এ সকল বিষয়ে বড় একটা চিন্তা করে না, সে লোহার রাস্তার উপর দিয়ে এক রোথে চলে যায়, কোন্ লোক কোথায় কি ভাবে যাচ্ছে, সে বিষয়ে তার খেয়াল করবার সময় নেই—সে কেবল গল গল করে জল ঝাঁক হস্ হস্ করে ঝোঁয়া ছাড়ে, গাঁ গাঁ করে চীৎকার করে, এবং গড় গড় করে চলে যায় সংসারের গতির সঙ্গে এর স্তম্ভের তুলনা দেওয়া যেতে পারত কিন্তু সেটা এত পুরোণো এবং অনাবশ্যক যে কেবল একবার নির্দেশ করে ক্ষান্ত থাকা গেল। খাণ্ডালার কাছাকাছি এসে মেঘ এবং রুষ্টি। সেই সব পাহাড়গুলোর উপর মেঘ জমে ঝাপসা হয়ে গেছে—ঠিক যেন কে পাথর এঁকে তার পরে রবার দিয়ে ঘসে দিয়েছে; খানিক খানিক outline দেখা যাচ্ছে এবং খানিকটা পেন্সিলের দাগ চারিদিকে ধেবড়ে গেছে। অবশেষে গাড়ির ঘণ্টা দিলে—দূর থেকে গাড়ির নিদ্রাহীন লাল চক্ষু দেখা গেল, ধরনী খর খর করে কাঁপতে লাগল, ষ্টেযনের কর্তারা চটি জুতো, ঘুটি দেওয়া চাপকান এবং টিকির উপরে তকমা দেওয়া গোল টুপি পরে নানা ঘর থেকে বেরিয়ে পড়ল—বিপুল হাতল্যার্ণ চারিদিকে আলো নিক্ষেপ করতে লাগল—খানসামাবর্গ সচকিত হয়ে যে যার জিনিষপত্র আগলে দাড়াল, বে—ঘুমোতে লাগল। গাড়িতে উঠা গেল।

* * * * বে—অকারণে খুঁৎ খুঁৎ আবস্ত করলে—বেলা বাড়তে লাগল—যদিও রোদ্দুর নেই তবুও গরম বোধ হতে লাগল, কিন্তু সময় আর কাটে না। প্রত্যেক মিনিটকে যেন স্পর্শ করে ঠেলে ঠেলে এগোতে হচ্ছে। সোভাগ্যক্রমে খানিক দূর গিয়ে ঘোরতর রুষ্টি আরম্ভ হল—চারদিক বন্ধ করে কাঁচের জানালার কাছে বসে মেঘরুষ্টি দেখতে বেশ লাগল। এক জারগায় একটা বর্ষার নদীর কাণ্ড যে দেখলুম সে আর কি বলব—সে একেবারে ফুলে ফেঁপে ফেনিয়ে পাকিয়ে ঘুলিয়ে, ছুটে, মাথা খুঁড়ে, পাথর গুলোর উপরে পড়ে আছড়ে বিছড়ে তাদের ডিঙিয়ে, তাদের চারদিকে ঘুরপাক খেয়ে একটা কাণ্ড কর্তে লাগল। এরকম উন্মত্ততা আর কোথাও দেখিনি। সোভাগ্যপূরে বিকেলে এসে যখন থেলুম তখন রুষ্টি থেমেছে—যখন গাড়ি ছাড়লে তখন দেখলুম সূর্য্য অত্যন্ত রাঙা হয়ে মেঘের মধ্যে অন্ত যাচ্ছে। আমি ভাবছিলুম, খাওয়া দাওয়া গল্পবল খেলাধুলো পড়াশুনোর মধ্যে আর সবার সময় কেবল অগমিতভাবে কেটে যাচ্ছে, সময় তাদের উপর দিয়ে প্রবাহিত হয়ে যাচ্ছে—তার অস্তিত্বই তারা টের পাচ্ছে না—আর আমি সময়ের উপরে সীতার কেটে চলেছি, সমস্ত অগাধ সময়টা আমার

বুকে মুখে সর্বদা লাগচে। * * * * * বখাসময়ে হাওড়ার গাড়ি গিরে পৌছল। প্রথমে বাড়ির জমাদার তার পরে ঘো—তার পরে গ—একে একে দৃষ্টিপথে পড়ল। তারপরে সেকেণ্ড ক্লাসের সেক্ড়া গাড়ির ছাতের উপরে ষটানো বিছানা, আয়ার দোম্‌ডানো টিনের বাক্স এবং নাবার টব (তার মধ্যে ছধের বোতল, লোটা, হাঁড়ি, টিন্‌পট, পুঁটুলি ইত্যাদি) চাপিয়ে বাড়ি পৌছন গেল। একটা কলরব, লোকের ভিড়, ক্ষরোরানদের সেলাম, চাকরদের প্রণাম, সরকারদের নমস্কার, আমাদের মধ্যে কে মোটা হয়েছে কে রোগা হয়েছে সে সম্বন্ধে সাধারণের সম্পূর্ণ মতভেদ, বে—কে নিয়ে স্ব—এও কোম্পানির লুটোপুটি, চায়ের টেবিলে লোকসমাগম, স্নান, আহাৰ ইত্যাদি।

—কাজেই ছকুর বেলা পাগড়ি পরে কার্ডে নাম লিখে পাঙ্কী চড়ে জমিদারবারু চলে। সাহেব তাঁরুর বারান্দায় বসে বিচার করতেন, দক্ষিণ পার্শ্বে পুলিশের চর। বিচারপ্রার্থীর দল মাঠে ঘাটে গাছতলায় পড়ে অপেক্ষা করে আছে—একেবারে তার নাকের সামনে পাঙ্কী নাবালে—সাহেব খাতির করে চৌকিতে বসালেন। ছোকরা-হেন, গৌফের রেখা উঠছে—চুল খুব কটা, মাঝে মাঝে একটু একটু কালো চুলের তালি দেওয়া—হঠাৎ মনে হয় বুড়ো মাহুম, অথচ মুখ নিতান্ত ঝাঁটা। সাহেবকে বল্লম কাল রাতে আমার সঙ্গে খেতে এস তিনি বলেন আমি আজই আর এক জায়গায় যাবি—Pig-sticking-এর যোগাড় করতে। বাড়ি চলে এলুম। ভয়ানক মেঘ করে এল—ঘোরতর ঝড়—মুঘলধারে বৃষ্টি। বই ছুঁতে ইচ্ছে করচে না, কিছু লেখা অসম্ভব—মনের মধ্যে যাকে কবিশ্বের ভাষায় বলে, কি যেন কি ইত্যাদি। এ ঘর থেকে ও ঘরে পাঁয়চারী করে বেড়াতে লাগলুম। অন্ধকার হয়ে এসেছে—গড়গড় শব্দে মেঘ ডাক্চে, বিদ্যুতের উপর বিদ্যুৎ—হু হু করে এক-একটা বাতাসের দম্কা আস্চে আর আমাদের বারান্দার সামনের বড় নীচু গাছটার ঘাড় ধরে যেন তার দাড়ি হুক মাথাটা নাড়িয়ে দিচ্ছে। দেখতে দেখতে বৃষ্টির জলে আমাদের শুকনো খালটা প্রায় পূরে এল। এই রকম করে বেড়াতে বেড়াতে হঠাৎ আমার মনে হল ম্যাজিষ্ট্রেটকে এই বাদলার আমাদের বাড়িতে আশ্রয় নিতে অনুরোধ করা আমার কর্তব্য। চিঠি লিখে দিলুম। চিঠি পাঠিয়ে দিয়ে ঘর তদারক করে গিয়ে দেখি, সে ঘরে ছোটো বাঁশের ঝোলার উপর তাকিয়া গদি ময়লা লেপ টাঙান।—চাকরদের গুল টিকে তামাক, তাদেরই ছোটো কাঠের সিঁক—তাদেরই মলিন লেপ, ওয়াড়হীন তৈলাক্ত বালিশ ও মসীবর্ণ মাহুর, এক টুকরো ছেঁড়া চট ও তার উপরে বিচিত্র জাতীয় মলিনতা—কতকগুলো প্যাক বাক্সের মধ্যে নানাবিধ জিনিষের ভগ্নাবশেষ—যথা মরচেপড়া কাংলির ঢাকনি, তলাহীন

ভাঙা লোহার উলুন, অত্যন্ত ময়লা একটা দস্তার চাননি, ভাঙা সেজের কাঁচ ও ময়লা শামানান, ছোটো অকর্মণ্য ফিল্টার, meatsafe, একটা সুপপ্লেটে খানিকটা পাতলা গুড়—ধুলো পড়ে পড়ে সেটা গাঢ় হয়ে এসেছে, গোটা কতক ময়লা কালীবর্ণ ভিজে ঝাড়ন, কোণে বাসন ধোবার গামলা, গোছুর মিশ্রার একটা ময়লা কোর্টা এবং পুরোনো মকমলের Skull-cap, জলের দাগ তেলের দাগ ছুধের দাগ কালো দাগ brown দাগ, শাদা দাগ এবং নানা মিশ্রিত দাগ বিশিষ্ট আয়নাহীন একটা জীর্ণ পোকাকটা Dressing table ; তার পাশকটা ভাঙা, আরনাটা অন্তর দেয়ালে ঠেসান দেওয়া, তার খোপের মধ্যে ধুলো, খড়্কে, ন্যাপকিন, পুরোণো তালো, ভাঙা গেলাসের তলো এবং সোডা-ওয়াটার বোতলের তার, কতকগুলো খাটের খুরো ভাঙা—ব্যাপার দেখে আমার চক্ষু স্থির—ডাক লোকজন, নিয়ে আর নায়েব, ডেকে আন খাজাঞ্চি, যোগাড় কর কুলি, আন কাঁটা, আন জল, মই লাগা, দড়ি খোল, বাঁশ খোল, তাকিয়া লেপ কাঁথা টেনে ফেল, ভাঙা কাঁচের টুকরো গুলো খুঁটে খুঁটে তোল, দেয়ালের পেরেকগুলো একে একে উপড়ে ফেল—ওরে তোরা সব হাঁ করে দাঁড়িয়ে রয়েছিস কেন, নে না একটা একটা করে জিনিষ নে না—ওরে ভাঙলের সব ভাঙলে—ঝন ঝন ঝনাং—তিনটে সেজ ভেঙে চুরমার, খুঁটে খুঁটে তোল—ভাঙা চুপড়িগুলো এবং ছেঁড়া চটটা বহুদিনসঞ্চিত ধুলোসমেত নিজের হাতে টেনে ফেলে দিলুম—নিচে থেকে পাঁচ ছটা আরসলা সপরিবারে চতুর্দিকে ছড়িয়ে পড়লেন তাঁরা আমারই সঙ্গে একায়বস্ত্রী হয়ে বাস করছিলেন, আমার গুড়, আমার পাটরুটি এবং আমারই নতুন জুতোর বার্নিশ তাঁদের উপজীবিকা ছিল। সাহেব লিখলেন “আমি এখনি যাচি বড় বিপদে পড়েছি।” ওরে এলরে এল—চট পট কর। তার পরে—ঐ এসেছে সাহেব। তাড়াতাড়ি চুল দাড়ি সমস্ত বেড়ে ফেলে ভদ্র লোক হয়ে যেন কোন কাজ ছিলনা যেন সমস্ত দিনে আরামে বসেছিলুম এই রকম ভাবে হলের ঘরে বনে রইলুম—সাহেবের সঙ্গে ঈষৎ হেসে হাত নাড়ানাড়ি করে অত্যন্ত নিশ্চিতভাবে গল্প কর্তে লাগলুম—সাহেবের শোবার ঘরে কি হল এই চিন্তা ক্রমাগত মনের মধ্যে ঠেলে ঠেলে উঠতে লাগল। গিয়ে দেখলুম এক রকম দাঁড়িয়ে গেছে ; রাত্তিরটা ঘুমিয়ে কাটতেও পারে যদি না সেই গৃহহীন আরসলো-গুলো রাত্তিরে তাঁর পায়ের তেলোয় স্ফুটস্ফুটি দেয়।

মাহুম কি লোহার কল, যে, ঠিক নিয়ম-অনুসারে চলাবে? মাহুমের মনের এত বিচিত্র এবং বিস্তৃত কাণ্ড কারখানা, তার এত দিকে গতি এবং এত রকমের অধিকার যে এদিকে ওদিকে হেলতেই হবে। সেই তার জীবনের লক্ষণ, তার মনুষ্যত্বের চিহ্ন, তার জড়ত্বের প্রতিবাদ। এই বিধা, এই দুর্বলতা যার নেই তার মন নিতান্ত সজীব এবং কঠিন এবং জীবনবিহীন। যাকে আমরা প্রবৃত্তি বলি এবং যার প্রতি আমরা সর্বদাই কটুভাষা প্রয়োগ করি সেই ত আমাদের জীবনের গতিশক্তি—সেই আমাদের নানা সুখদুঃখ পাণপুণ্যের মধ্যে দিয়ে অনন্তের দিকে বিকশিত করে তুলে। নদী যদি প্রতি পদে বলে, কই সমুদ্র কোথায়—এ যে মরুভূমি—ঐ যে অরণ্য—ঐ যে বালির চড়া—আমাকে যে শক্তি ঠেলে নিয়ে যাচ্ছে সে বুঝি আমাকে ভুলিয়ে অল্প জায়গার নিয়ে যাচ্ছে—তা হলে তার যেসকল ভ্রম হয় প্রবৃত্তির উপরে একান্ত অবিশ্বাস করলে আমাদেরও কতকটা সেই রকম ভ্রম হয়। আমরাও প্রতিদিন বিচিত্র সংশয়ের মধ্যে দিয়ে প্রবাহিত হয়ে যাচ্ছি—আমাদের শেষ আমরা দেখতে পাচ্ছি নে—কিন্তু যিনি আমাদের অনন্ত জীবনের মধ্যে প্রবৃত্তি নামক প্রচণ্ড গতিশক্তি দিয়েছেন তিনিই জানেন তার দ্বারা আমাদের কিরকম করে চালনা করবেন। আমাদের সর্বদা এই একটা মন্ত ভুল হয় যে আমাদের প্রবৃত্তি আমাদের যেখানে নিয়ে এসেছে সেইখানেই বুঝি ছেড়ে দিয়ে চলে যাবে—আমরা তখন জানতে পারিনে সে আমাদের তার মধ্যে থেকে টেনে তুলবে। নদীকে যে শক্তি মরুভূমির মধ্যে নিয়ে আসে সেই শক্তিই সমুদ্রের মধ্যে নিয়ে যায়। ভ্রমের মধ্যে যে ফেলে ভ্রম থেকে সেই টেনে নিয়ে যায়—এই রকম করেই আমরা চলছি। যার এই প্রবৃত্তি অর্থাৎ জীবনীশক্তির প্রাবল্য নেই, যার মনের রহস্যময় বিচিত্র বিকাশ নেই, সে স্থবী হতে পারে সাধু হতে পারে, এবং তার সেই সজীবতাকে লোকে মনের জোর বলতে পারে—কিন্তু অনন্ত জীবনের পাথেয় তার বেশী নেই।

আমার বোট কাছারির কাছ থেকে অনেক দূরে এনে একটি নিরিবিলি জায়গায় বৈধেছি। এ দেশে গোলমাল কোথাও নেই, ইচ্ছে করলেও পাওয়া যায় না, কেবল হয়ত অত্যন্ত বিবিধ জিনিসের সঙ্গে হাটে পাওয়া যেতে পারে।—আমি এখন যেখানে এসেছি এ জায়গায় অধিকন্তু মাহুঘের মুখ দেখা যায় না। চারিদিকে কেবল মাঠ ধু ধু করচে—মাঠের শস্ত কেটে নিয়ে গেছে, কেবল কাটা ধানের গোড়াগুলিতে সমস্ত মাঠ আচ্ছন্ন। সমস্ত দিনের পর সূর্যাস্তের সময় এই মাঠে কাল একবার বেড়াতে বেরিয়ে-ছিলাম। সূর্য ক্রমেই রক্তবর্ণ হয়ে একেবারে পৃথিবীর শেষরেখার অন্তরালে অন্তর্হিত হয়ে গেল। চারিদিক কি যে স্তম্ভর হয়ে উঠল সে আর কি বলব। বহুদূরে একেবারে দিগন্তের শেষ প্রান্তে একটু গাছপালার ঘের দেওয়া ছিল, সেখানটা এমন মায়াময় হয়ে উঠল, নীলেতে লালেতে মিশে এমন আবছায়া হয়ে এল,—মনে হল ঐখানে বেন সন্ধ্যার বাড়ি, ঐখানে গিয়ে সে আপনার রাঙা আঁচলটি শিথিলভাবে এলিয়ে দেয়, আপনার সন্ধ্যাতারাটি যত্ন করে আলিয়ে তোলে, আপন নিঃসৃত নির্জনতার মধ্যে সিঁদুর পরে' বধূর মত কার প্রতীক্ষায় বসে থাকে, এবং বসে বসে পা ছুটি মেলে' তারার মালা গাঁথে এবং গুন্ গুন্ স্বরে স্বপ্ন রচনা করে। সমস্ত অপার মাঠের উপর একটি ছায়া পড়েছে—একটি কোমল বিবাদ—ঠিক অশ্রুজল নয়—একটি নির্নিমেষ চোখের বড় বড় পল্লবের নীচে গভীর ছলছলে ভাবের মত। এমন মনে করা যেতে পারে—মা পৃথিবী লোকালয়ের মধ্যে আপন ছেলে-পুলে এবং কোলাহল এবং ঘরকন্নার কাজ নিয়ে থাকে, যেখানে একটু ফাঁকা, একটু নিস্তরঙ্গতা, একটু খোলা আকাশ, সেইখানেই তার বিশাল হৃদয়ের অন্তর্নিহিত বৈরাগ্য এবং বিবাদ ফুটে ওঠে, সেইখানেই তার গভীর দীর্ঘনিঃশ্বাস শোনা যায়। ভারতবর্ষে যেমন বাধাহীন পরিষ্কার আকাশ, বহুদূরবিস্তৃত সমতলভূমি আছে এমন যুরোপের কোথাও আছে কিনা সন্দেহ। এই জন্তে আমাদের জাতি বেন বৃহৎ পৃথিবীর সেই অসীম বৈরাগ্য আবিষ্কার করতে পেরেছে,—এই জন্তে আমাদের

পূরবীতে কিম্বা টোড়িতে সমস্ত বিশাল জগতের অন্তরের হা হা ধ্বনি যেন বাজ করচে, কারো ঘরের কথা নয়। পৃথিবীর একটা অংশ আছে, যেটা কৰ্মপটু, স্নেহলীল, সীমাবদ্ধ, তার ভাবটা আমাদের মনে তেমন প্রভাব বিস্তার করবার অবসর পায়নি; পৃথিবীর যে ভাবটা নিৰ্জ্জন বিরল অসীম, সেই আমাদের উদাসীন করে দিয়েছে। তাই সেতারে যখন তৈরবীর মীড় টানে আমাদের ভারতবর্ষীয় হৃদয়ে একটা টান পড়ে। কাল সন্ধের সময় নিৰ্জ্জন মাঠের মধ্যে পূরবী বাজছিল, পাঁচ ছ ক্রোশের মধ্যে কেবল আমি একটি প্রাণী বেড়াচ্ছিলুম, এবং আর একটি প্রাণী বোটের কাছে পাগড়ি বেঁধে লাঠি হাতে অত্যন্ত সংযতভাবে দাঁড়িয়ে ছিল। আমার বা পাশে ছোট নদীটি দুই ধারের উঁচু পাড়ের মধ্যে একেবেঁকে খুব অল্প দূরেই দৃষ্টিপথের বার হয়ে গেছে, জলে ঢেউয়ের রেখামাত্র ছিলনা, কেবল সন্ধ্যার আভা অত্যন্ত মুমূর্ষু হাসির মত খানিকক্ষণের জন্তে লেগে ছিল। যেমন প্রকাণ্ড মাঠ, তেমনি প্রকাণ্ড নিস্তরতা; কেবল একরকম পাখী আছে তারা মাটিতে বাসা করে থাকে, সেই পাখী, যত অন্ধকার হয়ে আসতে লাগল তত আমাকে তার নিরালা বাসার কাছে ক্রমিক আনাগোনা করতে দেখে ব্যাকুল সন্দেহের স্বরে টী টী করে ডাকতে লাগল। ক্রমে এখানকার কৃষ্ণপঙ্কের চাঁদের আলো ঈষৎ ফুটে উঠল বরাবর নদীর ধারে ধারে মাঠের প্রান্ত দিয়ে একটা সঙ্গীর্ণ পথটিই চলে গেছে, সেইখানে নতশিরে চলতে চলতে ভাবছিলাম।



কালিগ্রাম

৫ই মাঘ,

১৮৯১।

বেশ কঁুড়েমি করবার মত বেলাটা। কেউ তাড়া দেবার লোক নেই, তা ছাড়া প্রজা এবং কাজের ভিড় এখনো চতুর্দিকে হেঁকে ধরেনি। সবস্বদ্ধ খুব ঢিলে-ঢিলে একলা-একলা কি-একরকম মনে হচ্ছে। যেন পৃথিবীতে অত্যাবশ্যক কাজ বলে একটা কিছুই নেই—এমন কি, নাইলেও চলে, না নাইলেও চলে, এবং ঠিক সময়মত খাওয়াটা কল্কাতার লোকের মধ্যে প্রচলিত একটা বহুদিনের কুসংস্কার বলে মনে হয়। এখানকার চতুর্দিকের ভাবগতিকও সেই রকম। একটা ছোট্ট নদী আছে বটে কিন্তু তাতে কানাকড়ির স্রোত নেই, সে যেন আপন শৈবালদামের মধ্যে জড়ীভূত হয়ে অঙ্গবিস্তার করে দিয়ে পড়ে পড়ে ভাব্চে যে যদি না চলেও চলে তবে আর চলবার দরকার কি? জলের মাঝে মাঝে যে লম্বা ঘাস এবং জলজ উদ্ভিদ জন্মেছে, জেলেরা জাল ফেলতে না এলে সেগুলো সমস্ত দিনের মধ্যে একটু নাড়া পায় না। পাঁচটা ছটা বড় বড় নৌকা সারি সারি বাঁধা আছে—তার মধ্যে একটার ছাতের উপর একজন মাঝি আপাদমস্তক কাপড় মুড়ে রোদ্দুরে নিদ্রা দিচ্ছে—আর একটার উপর একজন বসে বসে দড়ি পাকাচ্ছে এবং রোদ্ পোতাচ্ছে, দাঁড়ের কাছে একজন আধ-বৃদ্ধ লোক অনাবৃতগাত্রে বসে অকারণে আমাদের বোটের দিকে চেয়ে আছে; ডাঙার উপরে নানান রকমের নানান লোক অত্যন্ত মুহুমন্দ অলস চালে কেন যে আস্চে, কেন যে যাচ্ছে, কেন যে বুকের মধ্যে নিজের দুটো হাঁটুকে আলিঙ্গন করে ধরে উবু হয়ে বসে আছে, কেন যে অবাক হয়ে বিশেষ কোন-কিছুর দিকে না তাকিয়ে দাঁড়িয়ে আছে তার কোন অর্থ পাওয়া যায় না। কেবল গোটাকতক পাতি হাঁসের ওরি মধ্যে একটু ব্যস্ত ভাব দেখা যাচ্ছে—তারা ভারি কলরব করচে, এবং ক্রমাগতই উৎসাহ-সহকারে জলের মধ্যে মাথা ডুবোচ্ছে, এবং তৎক্ষণাৎ মাথা তুলে নিয়ে সবলে ঝাঁড়া দিচ্ছে। ঠিক মনে হচ্ছে যেন তারা জলের নীচেকার নিগূঢ় রহস্য আবিষ্কার করবার জন্যে

প্রতিক্ষণেই গলা বাড়িয়ে দিচ্ছে এবং তার পরে সবগে মাথা নেড়ে বল্চে, “কিছুই না—
 কিছুই না।” এখানকার দিনগুলো এইরকম বারো ঘণ্টা পড়ে পড়ে কেবল রোদ পোহায়,
 এবং অবশিষ্ট বারো ঘণ্টা খুব গভীর অন্ধকার মুড়ি দিয়ে নিঃশব্দে নিদ্রা দেয়। এখানে
 সমস্তক্ষণ বাইরের দিকে চেয়ে চেয়ে কেবল নিজের মনের ভাবগুলোকে বসে বসে দোলা
 দিতে ইচ্ছে করে, তার সঙ্গে সঙ্গে একটু একটু গুন গুন করে গান গাওয়া যায়, মাঝে
 মাঝে বা ঘুমে চোখ একটু অলস হয়ে আসে। মা যেমন করে শীতকালের সারা বেলা
 রোদদূরে পিঠ দিয়ে ছেলে কোলে করে গুন গুন করে দোলা দেয়, সেই রকম।



ছোট নদীটি ঈষৎ বেঁকে এইখানে একটুখানি কোণের মত একটু কোলের মত তৈরি করেছে—দুই ধারের উঁচু পাড়ের মধ্যে সেই কোণের কোণটুকুতে বেশ প্রচ্ছন্ন হয়ে থাকি—একটু দূর থেকে আমাদের আর দেখা যায় না। নৌকাওয়ালার উত্তর দিক থেকে গুণ টেনে টেনে আসে, হঠাৎ একটা বাঁক ফিরেই এই জনহীন মাঠের ধারে অকারণে একটা মস্ত বোট বাঁধা দেখে আশ্চর্য্য হয়ে যায়। “হাঁ গা, কাদের বজ্রা গা?” “জমিদার বাবুর।” “এখানে কেন? কাছারির সামনে কেন বাঁধনি?” “হাওয়া খেতে এসেছেন।”—এসেছি হাওয়ার চেয়ে আরো ঢের বেশী কঠিন জিনিষের জন্ত। যাহোক্ এরকম প্রমোত্তর প্রায় মাঝে মাঝে শুনতে পাওয়া যায়। এইমাত্র খাওয়া শেষ করে বসেচি—এখন বেলা দেড়টা। বোট খুলে দিয়েছে, আস্তে আস্তে কাছারির দিকে চলেছে। বেশ একটু বাতাস দিচ্ছে। তেমন ঠাণ্ডা নয়—হুপুরবেলার তাতে অল্প গরম হয়ে উঠেছে। মাঝে মাঝে ঘন শৈবালের মধ্যে দিয়ে যেতে থস্ থস্ শব্দ হচ্ছে। সেই শৈবালের উপরে অনেকগুলো ছোট ছোট কচ্ছপ আকাশের দিকে সমস্ত গলা বাড়িয়ে দিয়ে রোদ পোহাচ্ছে। অনেক দূরে দূরে একটা একটা ছোট ছোট গ্রাম আসচে। গুটিকতক খোড়ো ঘর—কতকগুলি চালশূন্য মাটির দেয়াল, দুটো একটা খড়ের স্তূপ, কুলগাছ, আমগাছ, বটগাছ এবং বাঁশের ঝাড়, গোটাতিনেক ছাগল চরচে, গোটাকতক উল্ল ছেলেমেয়ে—নদীপর্য্যন্ত একটি গড়ানে কাঁচা ঘাট, সেখানে কেউ কাপড় কাচ্চে, কেউ নাইচে, কেউ বাসন মাজ্চে; কোন কোন লজ্জাশীলা বধু দুই আঙুলে ঘোমটা ঈষৎ ফাঁক করে ধরে কলসী কাঁথে জমিদার বাবুকে সকৌতুকে নিরীক্ষণ করচে, তার হাঁটুর কাছে আঁচল ধরে একটি সজ্জাত তৈলচিহ্নণ বিবস্ত্র শিশুও একদৃষ্টে বর্তমান পত্রলেখকসম্বন্ধে কোতূহলনিবৃত্তি করচে—তীরে কতকগুলো নৌকা বাঁধা এবং


একটা পরিত্যক্ত প্রাচীন জেলেডিঙি অর্ধনিমিত্ত অবস্থায় পুনরুদ্ধারের প্রতীক্ষা করচে। তার পরে আবার অনেকটা দূর শতশৃঙ্খ মাঠ—মাঝে মাঝে কেবল দুই একজন রাখাল-শিশুকে দেখতে পাওয়া যায়, এবং ছোটো একটা গরু নদীর ঢালু তটের শেষ প্রান্ত পর্যন্ত এসে সরস ভূগ অন্বেষণ করচে দেখা যায়। এখানকার দুপুরবেলার মত এমন নির্জনতা নিস্তরতা আর কোথাও নেই।

—:—

জানুয়ারী, ১৮৯১ ।

কাল যখন কাছারি করচি, গুটি পাঁচ ছয় ছেলে হঠাৎ অত্যন্ত সংযতভাবে আমার সামনে এসে দাঁড়ালে—কোন প্রশ্ন জিজ্ঞাসা করতে না করতে একেবারে বিবুদ্ধ বঙ্গ-ভাষায় আরম্ভ করে দিলে “পিতঃ, অভাগ্য সন্তানগণের সৌভাগ্যবশতঃ জগদীশ্বরের রূপায় প্রভুর পুনর্ব্বার এতদ্দেশে শুভাগমন হইয়াছে।” এমনি করে আধ ঘণ্টাকাল বক্তৃতা করে গেল ; মাঝে মাঝে মুখস্থ বক্তৃতা ভুলে যাচ্ছিল, আবার আকাশের দিকে চেয়ে সংশোধন করে নিচ্ছিল। বিষয়টা হচ্ছে তাদের স্কুলে টুল ও বেক্সির অপ্রতুল হয়েচে, “সেই কাঠাসন অভাবে আমরাই বা কোথায় উপবেশন করি, আমাদের পূজনীয় শিক্ষক মহাশয়ই বা কোথায় উপবেশন করেন, এবং পরিদর্শক মহাশয় উপস্থিত হইলে তাঁহা-কেই বা কোথায় আসন দান করা যায়!” ছোট্ট ছেলের মুখে হঠাৎ এই অনর্গল বক্তৃতা শুনে আমার এমনি হাসি পাচ্ছিল! বিশেষতঃ এই জমিদারী কাছারিতে, যেখানে অশিক্ষিত চাষারা নিতান্ত গ্রাম্য ভাষায় আপনাদের যথার্থ দারিদ্র্যহঃখ জানায়—যেখানে অতিবৃষ্টি দুর্ভিক্ষে গরু বাছুর হাল লাঙল বিক্রি করেও উদরার্নের অনটনের কথা শোনা যাচ্ছে, যেখানে “অহরহ” শব্দের পরিবর্তে “রহরহ,” “অতিক্রমের” স্থলে “অতিক্রয়” ব্যবহার, সেখানে টুল বেক্সির অভাবে সংস্কৃত বক্তৃতা কানে এমনি অদ্ভুত শোনায! অস্থান আমলা এবং প্রজারা এই ছোকরার ভাষার প্রতি এতাদৃশ দখল দেখে অবাক হয়ে গিয়েছিল—তারার মনে মনে আক্ষেপ করছিল বাপ-মারার আমা-দের যত্ন করে লেখাপড়া শেখায়নি, নইলে আমরাও জমিদারের সামনে দাঁড়িয়ে এইরকম শুদ্ধ ভাষায় নিবেদন করতে পারতুম। আমি শুনতে পেলুম একজন আর একজনকে ঠেলে ঝেঁৎ ঝেঁষের ভাবে বলচে—“এ’কে কে শিখিয়ে দিয়েচে।” আমি তার বক্তৃতা শেষ না হতেই তাকে থামিয়ে, বলুম, আজ্ঞা তোমাদের টুল বেক্সির বন্দোবস্ত করে দেব। তাতেও সে দম্পনা—সে যেখানে বক্তৃতা ভঙ্গ করেছিল সেইখান থেকে আবার

আরম্ভ করলে—যদিও তার আবশ্যক ছিল না কিন্তু শেষ কথাটি পর্য্যন্ত চুকিয়ে এগাম করে বাড়ি ফিরে গেল। বেচারী অনেক কষ্টে মুখস্থ করে এসেছিল, আমি তার টুল বেশি না দিলে সে ক্ষুধা হত না, কিন্তু তার বক্তৃতা কেড়ে নিলে বোধ হয় অসহ্য হত—সেই জন্তে যদিও আমার অনেক গুরুতর কাজ ছিল, তবু খুব গম্ভীরভাবে আত্মোপাস্ত শুনে গেলুম।



১৫

কালিগ্রাম

জানুয়ারি, ১৮৯১।

ঐ যে মন্ত পৃথিবীটা চুপ করে পড়ে রয়েছে ওটাকে এমন ভালবাসি ! ওর এই গাছপালা নদী মাঠ কোলাহল নিস্তর্রতা প্রভাত সন্ধ্যা সমুদ্রতটস্থ ছ'হাতে আঁকড়ে ধরতে ইচ্ছে করে। মনে হয় পৃথিবীর কাছ থেকে আমরা যে সব পৃথিবীর ধন পেয়েছি এমন কি কোন স্বর্গ থেকে পেতুম ? স্বর্গ আর কি দিত জানিনে, কিন্তু এমন কোমলতা দুর্বলতাময় এমন স্নেহাশ্রিত্য অপরিণত এই মানুষগুলির মত এমন আপনাতর ধন কোথা থেকে দিত ! আমাদের এই মাটির মা, আমাদের এই আপনাদের পৃথিবী এর সোনার শতক্ষেত্রে, এর বৈশালিনী নদীগুলির ধারে, এর সুখদুঃখময় ভালবাসার লোকালয়ের মধ্যে এই সমস্ত দরিদ্র মর্ত্য-হৃদয়ের অশ্রুর ধনগুলিকে কোলে করে এনে দিয়েছে। আমরা হতভাগ্যরা তাদের রাখতে পারিনে, বাঁচাতে পারিনে, নানা অদৃষ্ট প্রবল শক্তি এসে বুকের কাছ থেকে তাদের ছিঁড়ে ছিঁড়ে নিয়ে যায়, কিন্তু সেচারা পৃথিবীর যতদূর সাধ্য তা সে করেছে। আমি এই পৃথিবীকে ভারি ভালবাসি। এর মুখে ভারি একটি সুদূরব্যাপী বিবাদ লেগে আছে—যেন এর মনে মনে আছে—“আমি দেবতার মেয়ে কিন্তু দেবতার ক্ষমতা আমার নেই ; আমি ভালবাসি কিন্তু রক্ষা করতে পারিনে, আরম্ভ করি সম্পূর্ণ করতে পারিনে, জন্ম দিই মৃত্যুর হাত থেকে বাঁচাতে পারিনে।” এই জন্যে স্বর্গের উপর আড়ি করে আমি আমার দরিদ্র মায়ের ঘর আরো বেশী ভালবাসি ; এত অসহায়, অসমর্থ, অসম্পূর্ণ, ভালবাসার সহস্র আশঙ্কায় সর্বদা চিন্তাকাতর বলেই।

—*—

এখনো পথে আছি। ভোর থেকে আরম্ভ করে সন্ধ্যা সাতটা আটটা পর্যন্ত ক্রমাগতই ভেসে চলেছি। কেবলমাত্র গতির কেমন একটা আকর্ষণ আছে—দুধারের তটভূমি অবিশ্রাম চোখের উপর দিয়ে সরে সরে যাচ্ছে—সমস্তদিন তাই চেয়ে আছি—কিছুতে তার থেকে চোখ ফেরাতে পারচিনে—পড়তে মন যায় না, লিখতে মন যায় না, কোন কিছু কাজ নেই, কেবল চুপ করে চেয়ে বসে আছি। কেবল যে দৃশ্যের বৈচিত্র্যের জন্যে তা নয়—হয়ত দুধারে কিছুই নেই, কেবল তরুহীন তটের রেখামাত্র চলে গেছে—কিন্তু ক্রমাগতই চলচে এই হচ্ছে তার প্রধান আকর্ষণ। আমার নিজের কোন চেষ্টা নেই, পরিশ্রম নেই, অথচ বাইরের একটা অশ্রান্ত গতি মনটাকে বেশ মৃদু প্রশান্তভাবে ব্যাপ্ত করে রাখে। মনের পরিশ্রমও নেই বিশ্রামও নেই এইরকমের একটা ভাব। চৌকিতে বসে বসে অলস অনমনস্বভাবে পা-দোলানো ঘেরকম এও সেইরকম, শরীরটা মোটের উপর বিশ্রাম করচে, অথচ শরীরের যে অতিরিক্ত উদ্যমটুকু কোনকালে স্থির থাকতে চায়না, তাকেও একটা একঘেয়ে রকম কাজ দিয়ে ভুলিয়ে রাখা হয়েছে। আমাদের কলিগ্রামের সেই মুমুরুর নাড়ির মত অতি ক্ষীণশ্রোত নদী কাল কৌনকালে ছাড়িয়ে এসেছি। সেই নদী থেকে ক্রমে একটা শ্রোতস্বিনী নদীতে এসে পড়া গেল। সেটা বেয়ে ক্রমে এমন এক জায়গায় এসে পড়লুম যেখানে ডাঙার জলে একাকার হয়ে গেছে। নদী এবং তীর উভয়ের আকার-প্রকারের ভেদ ক্রমশই ঘুচে গেছে—ছাটি অল্পবয়সের ভাইবোনের মত। তীর এবং জল মাথায় মাথায় সমান—একটুও পাড় নেই। ক্রমে নদীর সেই ছিপছিপে আকারটুকু আব থাকেনা—নানাদিকে নানারকমে ভাগ হয়ে ক্রমে চতুর্দিকে ছড়িয়ে ছড়িয়ে পড়ল। এই থানিকটা সবুজ ঘাস এই থানিকটা স্বচ্ছ জল। দেখে পৃথিবীর শিশুকাল মনে পড়ে—অসীম জলরাশির মধ্যে যখন স্থল সবে একটুখানি মাথা তুলেছে—

জলজলের অধিকার নির্দিষ্ট হয়ে যায়নি। চারিদিকে জেলদের বাঁশ পোতা—জেলদের জাল থেকে মাছ হেঁ মেরে নেবার জন্যে চিল উড়চে, পাঁকের উপরে নিরীহ বক দাঁড়িয়ে আছে—নানারকমের জলচর পাখী—জলে শ্যাওলা ভাসচে—মাঝে মাঝে পাঁকের মধ্যে অযত্নসম্মত ধানের গাছ, স্থির জলের উপর ঝাঁকে ঝাঁকে মশা উড়চে। ভোরের বেলা বোট ছেড়ে দিয়ে কাঁচিকাঠার গিয়ে পড়া গেল। একটি বারো তেরো হাত সঙ্গীর্ণ খালের মত, ক্রমাগত এঁকে বেঁকে গেছে—সমস্ত বিলের জল তারি ভিতর দিয়ে প্রবল বেগে নিষ্কাশ হচ্চে—এর মধ্যে আমাদের এই প্রকাণ্ড বোট নিয়ে বিষম কাণ্ড—জলের স্রোত বিছাতের মত বোটটাকে টেনে নিয়ে যাচ্ছে, দাঁড়িরা লগি হাতে করে সামলাবার চেষ্টা করচে, পাছে ডাঙার উপর বোটটাকে আছড়ে ফেলে। এদিকে হু হু করে বাদলার বাতাস দিচ্ছে, ঘন মেঘ করে রয়েছে, মাঝে মাঝে বৃষ্টি হচ্চে, শীতে সবাই কাঁপচে। ক্রমে খোলা নদীতে এসে পড়লুম। শীতকালে মেঘাচ্ছন্ন ভিজে দিন তারি বিস্তীর্ণ লাগে। সকালবেলাটা তাই নিতান্ত নিঃস্রাবের মত ছিলুম। বেলা ছটোর সময় রোদ্‌ উঠল। তার পর থেকে চমৎকার। খুব উঁচু পাড়ে বরাবর দুই ধারে গাছপালা লোকালয় এমন শান্তিময়, এমন সুন্দর, এমন নিতৃত—দুই ধারে স্নেহ-সৌন্দর্য্য বিতরণ করে নদীটি বেঁকে বেঁকে চলে গেছে—আমাদের বাংলাদেশের একটি অপরিচিত অন্তঃপুরচারিণী নদী। কেবল স্নেহ এবং কোমলতা এবং মাধুর্য্য পরিপূর্ণ। চাঞ্চল্য নেই, অথচ অবসরও নেই। গ্রামের যে মেয়েরা ঘাটে জল নিতে আসে, এবং জলের ধারে বসে বসে অতি যত্নে গামছা দিয়ে আপনার শরীরখানি মেজে তুলতে চায় তাদের সঙ্গে এর যেন প্রতিদিন মনের কথা এবং ঘরকন্নার গল্প চলে।

আজ সন্ধ্যাবেলায় নদীর বাঁকের মুখে তারি একটি নিরালা জায়গায় বোট লাগিয়েছে। পূর্ণিমার চাঁদ উঠেছে, জলে একটিও নৌকা নেই—জ্যোৎস্না জলের উপর বিকসিক করচে—পরিষ্কার রাত্রি—নির্জন তীর—বহুদূরে ঘনবৃক্ষবেষ্টিত গ্রামটি অদৃশ্য—কেবল ঝাঁ ঝাঁ ডাক্চে আর কোন শব্দ নেই।

আমার সামনে নানারকম গ্রাম্য দৃশ্য দেখতে পাই, সেগুলো আমার দেখতে বেশ লাগে। ঠিক আমার জানুয়ার হুয়ুখে থালের ওপারে একদল বেদে বাথারির উপর ঝানুকতক দরমা এবং কাপড় টাঙিয়ে দিয়ে তারি মধ্যে আশ্রয় গ্রহণ করেছে। গুটি-তিনেক খুঁ ছোট ছোট ছাউনিমাত্র—তার মধ্যে মানুষের দাঁড়াবার ঘো নেই—ঘরের বাইরেই তাদের সমস্ত গৃহকর্ম চলে—কেবল রাত্তিরে সকলে মিলে কোন প্রকারে জড়পুটুলি হয়ে সেই ঘরের মধ্যে ঘুমতে যায়। বেদে জাতটাই এই রকম। কোথাও বাড়ি ঘর নেই, কোন জমিদারকে খাজনা দেয় না, একদল স্ত্রীর, গোটা ছয়েক কুকুর এবং কতকগুলো ছেলেমেয়ে নিয়ে যেখানে-সেখানে ঘুরে বেড়ায়। পুলিশ সর্দার এদের উপর সতর্ক দৃষ্টি রাখে। আমাদের এখানে ঘারা আছে, আমি জানলায় দাঁড়িয়ে প্রায় তাদের কাজকর্ম দেখি। এদের দেখতে মন্দ নয়, হিন্দুস্থানী ধরণের। কালো বটে কিন্তু বেশ শ্রী আছে, বেশ জোরালো স্কডোল শরীর। মেয়েদেরও বেশ দেখতে—ছিপছিপে লম্বা আঁটসাঁট, অনেকটা ইংরেজ মেয়েদের মত শরীরের স্বাধীন ভঙ্গী, অর্থাৎ বেশ অসঙ্কোচ চালচলন, নড়াচড়ার মধ্যে সহজ সরল ক্রান্তভাব আছে—আমার ত ঠিক মনে হয় কালো ইংরেজের মেয়ে। পুরুষটা রান্না চড়িয়ে দিয়ে বসে বসে বাঁশ চিরে চিরে ধামা চাঙারি কুলো প্রভৃতি তৈরি করতে—মেয়েটা কোলের উপর একটি ছোট্ট আয়না নিয়ে অত্যন্ত সাবধানে একটি গামছা ভিজিয়ে দুখটি বিশেষ যত্নের সঙ্গে দু তিনবার করে মুছে, তার পরে আঁচল টাঁচল গুলো একটু ইতস্ততঃ টেনে টুনে সেরে সুরে নিয়ে বেশ ফিটকাট হয়ে পুরুষটার কাছে উবু হয়ে বসল, তার পরে একটু আধটু কাজে হাত দিতে লাগল। এরা নিতান্তই মাটির সন্তান, নিতান্তই পৃথিবীর গায়ের সঙ্গে লেগে আছে—যেখানে-সেখানে জন্মাচ্ছে, পথে পথেই বেড়ে উঠছে, এবং যেখানে-সেখানে মরছে, এদের ঠিক

অবস্থাটা ঠিক মনের ভাবটা ভাবি জানতে ইচ্ছে করে। দিনরাত খোলা আকাশে, খোলা-বাতাসে, অনাবৃত মৃত্তিকার উপরে এ একরকম নৃতন রকমের জীবন, অথচ এরি মধ্যে কাজকর্ম ভালবাসা ছেলেপুলে ঘরকরনা সমস্তই আছে। কেউ যে একদণ্ড কুঁড়ে হয়ে বসে আছে তা দেখলুম না—একটা-না-একটা কাজে আছেই। যখন হাতের কাজ ফুরোলো তখন থপ করে একজন মেয়ে আর একজন মেয়ের পিঠের কাছে বসে তার ঝুঁটি খুলে দিয়ে মনোযোগের সঙ্গে উকুন বাহুতে আরম্ভ করে দিলে এবং বোধ করি সেই সঙ্গে, ঐ ছোট তিনটে দরমা-ছাউনির ঘরকরা সম্বন্ধে এক এক করে গল্প জুড়ে দিলে, সেটা আমি এতদূর থেকে ঠিক নিশ্চিত বলতে পারিনি, তবে অনেকটা অস্বাভাবিক করা যেতে পারে। আজ সকালবেলায় এই নিশ্চিত বৈদের পরিবারের মধ্যে একটা বিষম অশান্তি এসে জুটেছিল। তখন বেলা সাড়ে আটটা নাট হব—রাত্রে শোবার কাঁথা এবং ছেঁড়া আঁকড়াগুলো বের করে এনে দরমার চালের উপর রোদ্দুরে মেলে দিয়েছে। গুয়োরগুলো বাচ্চাকাচ্চা সমেত সকলে গায়ে গায়ে লাগাও হয়ে একটা গর্তের মত করে তার মধ্যে মস্ত এক ভাল কাদার মত পড়েছিল—সমস্ত রাত শীতের পর সকাল বেলাকার রোদ্দুরে বেশ একটু আরাম বোধ করছিল—হঠাৎ তাদেরই একপরিবারভূক্ত কুকুর ছোটো এসে ঘাড়ের উপর পড়ে ঘেউ ঘেউ করে তাদের উঠিয়ে দিলে! বিরক্তির স্বর প্রকাশ করে তারা ছোটো-হাজুরি অশেষে চতুর্দিকে চলে গেল। আমি আমার ডায়ারি লিখি এবং মাঝে মাঝে সম্মুখের পথের দিকে অস্বাভাবিক হয়ে চেয়ে দেখি—এমন সময় বিষম একটা হাঁকডাক শোনা গেল। আমি উঠে জানলার কাছে গিয়ে দেখলুম—বেদে-আশ্রমের সম্মুখে লোক জড় হয়েছে—এবং ওরি মধ্যে একটু ভক্তগোছের একজন লাঠি আঁফালন করে বিষম গালমন্দ দিচ্ছে—কর্তা বেদে দাঁড়িয়ে নিতান্ত ভীত কম্পিত ভাবে কৈফিয়ৎ দেবার চেষ্টা করছে। বুঝতে পারলুম কি একটা সন্দেহের কারণ হয়েছে তাই পুলিশের দারোগা এসে উপদ্রব বাধিয়ে দিয়েছে। মেয়েটা বসে বসে আপন মনে বাথারি ছুলে যাচ্ছে, যেন সে একলা বসে আছে—এবং কোথাও কিছু গোলমাল নেই। হঠাৎ সে উঠে দাঁড়িয়ে পরম নির্ভীকচিত্তে দারোগার মুখের সামনে বারবার বাহআন্দোলন করে উচ্চৈঃস্বরে বক্তৃতা দিতে আরম্ভ করলে। দেখতে দেখতে দারোগার তেজ প্রায় বার আনা পরিমাণ কমে গেল—অত্যন্ত মূঢ়ভাবে ছোটো একটা কথা বলবার চেষ্টা করলে কিন্তু একটুও অবসর পেল না। যে ভাবে এসেছিল সে ভাবে অনেকটা পরিবর্তন করে ধীরে ধীরে চলে যেতে হল। অনেকটা দূরে গিয়ে চৌকিয়ে

বলে “আমি এই বলে গেলাম, তোমাদের এখান হংকে যাবার লাগবে।” আমি ভাবলুম আমার বেদে প্রতিবেশীরা এখনি বুঝি খুঁটি দরমা তুলে পুঁটুলি বেধে ছানা পোনা নিয়ে শুয়ের তাড়িয়ে এখান থেকে প্রস্থান করবে। কিন্তু তার কোন লক্ষণ নেই; এখনো তারা নিশ্চিন্তভাবে বসে বসে বাঁথারি চিরচে, রাঁধচে বাড়চে, উকুন বাছচে। আমার এই খোলা জানলার মধ্যে দিয়ে নানা দৃশ্য দেখতে পাই। সবস্বল্প বেশ লাগে—কিন্তু একএকটা দেখে ভারি মন বিগড়ে যায়। গোড়ির উপর অসম্ভব ভার চাপিয়ে অসাধ্য রাত্তায় যখন গরুকে কাঠির বাড়ি খোঁচা দিতে থাকে তখন আমার নিতান্ত অসহ্য বোধ হয়। আজ সকালে দেখছিলুম একজন মেয়ে তার একটি ছোট উলঙ্গ শীর্ণ কালো ছেলেকে এই খালের জলে নাওয়াতে এনেছে—আজ ভয়ঙ্কর শীত পড়েছে—জলে দাঁড় করিয়ে যখন ছেলেটার গায়ে জল দিচ্ছে তখন সে করুণস্বরে কঁদতে আর কাঁপচে, ভয়ানক কাশীতে তার গলা ঘন্ ঘন্ করচে—মেয়েটা হঠাৎ তার গালে এমন একটা চড় মারলে যে আমি আমার ঘর থেকে তার শব্দ স্পষ্ট শুনতে পেলুম। ছেলেটা বেকে পড়ে হাঁটুর উপর হাত দিয়ে ফুলে ফুলে কঁদতে লাগল, কাশীতে তার কান্না বেধে যাচ্ছিল! তারপরে ভিজে গায়ে সেই উলঙ্গ কম্পাঘ্রিত ছেলের নড়া ধরে বাড়ির দিকে টেনে নিয়ে গেল। এই ঘটনাটা নিদারুণ পৈশাচিক বলে বোধ হল। ছেলেটা নিতান্ত ছোট—আমার খোঁকার বয়সী। এরকম একটা দৃশ্য দেখলে হঠাৎ মান্নবের যেন একটা Ideal এর উপর আঘাত লাগে—বিশ্বস্তচিত্তে চলতে চলতে খুব একটা হুচট লাগার মত। ছোট ছেলেরা কি ভয়ানক অসহায়—তাদের প্রতি অবিচার করলে তারা নিরুপায় কাতরতার সঙ্গে কেঁদে নিষ্ঠুর হৃদয়কে আরো বিরক্ত করে তোলে; ভালকরে আপনার নালিস জানাতেও পারে না। মেয়েটা শীতে সর্ব্বাঙ্গ আচ্ছন্ন করে এসেছে আর ছেলেটার গায়ে একটুকরো কাপড়ও নেই—তার উপরে কাশী—তার উপরে এই ডাকিনীর হাতের মার!

এখানকার পোষ্টমাষ্টার এক একদিন সন্দের সময় এসে আমার সঙ্গে এইরকম ডাকের চিঠি যাতায়াতসম্বন্ধে নানা গল্প জুড়ে দেন। আমাদের এই কুঠিবাড়ির একতলাতেই পোষ্টঅফিস-বেশ সুবিধে—চিঠি আসবামাত্রই পাওয়া যায়। পোষ্ট-মাষ্টারের গল্প শুন্তে আমার বেশ লাগে। বিস্তর অসম্ভব কথা বেশ গভীরভাবে বলে যান। কাল বলছিলেন, এ দেশের লোকের গল্পার উপর এমনি ভক্তি, যে এদের কোন আত্মীয় মরে গেলে তার হাড় গুঁড়ো করে রেখে দেয়, কোনকালে গল্পার জল খেয়েছে এমন লোকের যদি সাক্ষাৎ পায় তাহলে তাকে পানের সঙ্গে সেই হাড় গুঁড়ো খাইয়ে দেয় আর মনে করে তার আত্মীয়ের একটা অংশের গল্পালাভ হল। আমি হাসতেহাসতে বলুম “এটা বোধ হয় গল্প।” তিনি খুব গভীরভাবে চিন্তা করে স্বীকার করলেন “তা হতে পারে।”



শিলাইদহ।

ফেব্রুয়ারি, ১৮৯১।

কাহারির পরপায়ের নির্জন চরে বোট লাগিয়ে বেশ আরাম বোধহচ্ছে। দিনটা এবং চারিদিকটা এমন সুন্দর ঠেকচে যে আর কি বলব। অনেক দিন পরে আবার এই বড় পৃথিবীটার সঙ্গে যেন দেখাসাক্ষাৎ হল। সেও বলে “এই যে!” আমিও বলুম “এই যে!” তার পরে ছুঁনে পাশাপাশি বসে আছি আর কোন কথাবার্তা নেই। জল ছলছল করতে এবং তার উপরে রোদুর চিক্‌চিক্‌ করতে—বালির চর ধুঁধু করতে, তার উপর ছোট ছোট বনঝাউ উঠেছে। জলের শব্দ, হুপুরবেলাকার নিস্তব্ধতার ঝাঁঝ, এবং ঝাউঝোপ থেকে ছোটোএকটা পাখীর চিক্‌চিক্‌ শব্দ সবসুদ্ধ মিলে খুব একটা সুপ্রাণিষ্ট ভাব। খুব লিখে যেতে ইচ্ছে করতে—কিন্তু আর কিছু নিয়ে নয়, এই জলের শব্দ, এই রোদুরের দিন, এই বালির চর। মনে হচ্ছে রোজই ঘুরেফিরে এই কুথাই লিখতে হবে; কেননা, আমার এই একই নেশা, আমি বারবার এই এককথা নিয়েই বকি। বড় বড় নদী কাটিয়ে আমাদের বোটটা একটা ছোট নদীর মুখে প্রবেশ করতে। হুইধারে মেয়েরা স্নান করতে, কাপড় কাচতে, এবং ভিজ কাপড়ে একমাথা ঘোঁষা টেনে জলের কলসী নিয়ে ডানহাত হুলিয়ে ঘরে চলেছে—ছেলেরা কান্না মেখে জল ছুঁড়ে মাতামাতি করতে—এবং একটা ছেলে বিনা সুরে গান গাচ্ছে—“একবার দাঁদা বলে ডাক্তরে লক্ষণ।” উঁচু পাড়ের উপর দিয়ে অদূরবর্তী গ্রামের ঝড়ের চাল এবং বাঁশবনের ডগা দেখা যাচ্ছে। আজ মেঘ কেটে গিয়ে রোদুর দেখা দিয়েছে। যে মেঘগুলো আকাশের প্রান্তভাগে অবশিষ্ট আছে সেগুলো শাদা তুলোর রানের মত দেখাচ্ছে। বাতাস ঈষৎ গরম হয়ে বছেছে; ছোট নদীতে বড় বেশী নৌকা নেই; ছোটো একটা ছোট ডিলি নৌকা গাছের ডাল এবং [redacted] নিয়ে আন্তভাবে ছপ্‌ছপ্‌ দাঁড় কলে চলেচে—ডাঙার বাঁশের উপর [redacted] জাল তুলকোচ্ছে—পৃথিবীর সকালবেলাকার কাজকর্ম খানিকক্ষণের জন্য বন্ধ হয়ে আছে।

চুহালি ।

জলপথে ; ১৬ই জুন, ১৮৯১ ।

এখন পাল তুলে যমুনার মধ্যে দিয়ে চলেছি । আমার বাঁ ধারে মাঠে গরু চরচে—দক্ষিণ ধারে একেবারে কূল দেখা যাচ্ছে না । নদীর তীর শ্রোতে তীর থেকে ক্রমাগতই বুপ্‌বুপ্‌ করে মাটি খসে পড়চে । আশ্চর্য্য এই, এত বড় প্রকাণ্ড এই নদীটার মধ্যে আমাদের বোট ছাড়া আর দ্বিতীয় একটি নোকা দেখা যাচ্ছে না—চারিদিকে জলরাশি ক্রমাগতই ছল্‌ ছল্‌ থল্‌ থল্‌ শব্দ করছে—আর বাতাসের হু হু শব্দ শোনা যাচ্ছে । কাল সন্দের সময় একটা চরের উপর বোট লাগিয়েছিলুম—নদীটি ছোট্ট—যমুনার একটি শাখা—একপারে বহুদূর পর্য্যন্ত শাবা বালি ধু ধু করছে, জনমানবের সম্পর্ক নেই, আরেক পারে সবুজ শস্যক্ষেত্র এবং বহুদূরে একটি গ্রাম । আর কত বার বল্‌ব,—এই নদীর উপরে, মাঠের উপরে, গ্রামের উপরে সন্ধ্যাটা কি চমৎকার—কি প্রকাণ্ড, কি প্রশান্ত, কি অগাধ ; সে কেবল স্তব্ধ হয়ে অম্লভব করা যায় কিন্তু ব্যক্ত করতে গেলেই চঞ্চল হয়ে উঠতে হয় । ক্রমে যখন অন্ধকারে সমস্ত অস্পষ্ট হয়ে এল, কেবল জলের রেখা এবং তটের রেখায় একটা প্রভেদ দেখা যাচ্ছিল—এবং গাছপালা কুটীর লম্বা একাকার হয়ে একটা বাপ্‌সা জগৎ চোখের সামনে বিস্তৃত পড়ে ছিল—তখন ঠিক মনে হচ্ছিল এ সমস্ত যেন ছেলেবেলাকার রূপকথার অপরূপ জগৎ—যখন এই বৈজ্ঞানিক জগৎ সম্পূর্ণ গঠিত হয়ে ওঠেনি—অল্পদিন হল সৃষ্টি আরম্ভ হয়েছে—প্রদোষের অন্ধকারে এবং একটি ভীতি বিষ্ময়পূর্ণ ছন্‌ ছন্‌ নিস্তব্ধতায় সমস্ত বিশ্ব আচ্ছন্ন—যখন সাত সমুদ্র তেরোনদীর পারে মায়াপুরে পরমাত্মারাজ্য চিরনিদ্রায় নিদ্রিত—যখন রাজপুত্র এবং পাত্তরের পুত্র তেপাত্তরের মাঠে একটা অসম্ভব উদ্দেশ্য নিয়ে ঘুরে বেড়াচ্ছে—এ যেন তখনকার সেই অতি সুদূরবর্তী অর্ধ-অচেতনায় মোহাচ্ছন্ন মায়ামিশ্রিত বিশ্বত জগতের একটি নিস্তব্ধ নদীতীর এবং মনে করা যেতেও পারে আমি সেই রাজপুত্র—একটা অসম্ভবের প্রত্যাশায় সন্ধ্যারাজ্যে ঘুরে বেড়াচ্ছি—এই ছোট নদীটি সেই তেরো-

নদীর মধ্যে একটা নদী এখনো সাত সমুদ্র বাকি আছে—এখনো অনেক দূর, অনেক ঘটনা, অনেক অন্বেষণ বাকি ; এখনো কত অজ্ঞাত নদীতীরে কত অপরিচিত সমুদ্রসীমার কত ক্রীণ চন্দ্রালোকিত অনাগত রাত্রি অপেক্ষা করে আছে—তার পরে হয়ত অনেক ভ্রমণ, অনেক রোদন, অনেক বেদনের পর হঠাৎ একদিন, আমার কথাটি ফুরোলো নটে শাকটি মুড়োলো—হঠাৎ মনে হবে এতক্ষণ একটা গল্প বলছিলাম—এখন গল্প ফুরিয়েচে এখন অনেক রাত্রি, এখন ছোট ছেলের ঘুমোবার সময় ।



১৯শে জুন, ১৮৯১।

কাল পনেরো মিনিট বাইরে বসতে না বসতে পশ্চিমে ভয়ানক মেঘ কবে। এল খুব কালো, গাঢ় আলুথালুরকমের মেঘ, তারি মাঝে মাঝে চোরা আলো পড়ে রাঙা হয়ে উঠেছে। দুটোএকটা নৌকা তাড়াতাড়ি যমুনা থেকে এই ছোট নদীর মধ্যে প্রবেশ করে দড়িদড়া নোঙর দিয়ে মাটি আঁকড়ে নিশ্চিত হয়ে বসল। যারা মাঠে শস্য কাটতে এসেছিল তারা মাথার একএক বোঝা শস্য নিয়ে বাড়ির দিকে ছুটে চলেছে, গরুও ছুটেচে, তার পিছনে পিছনে বাছুর লেজ নেড়েনেড়ে সঙ্গে সঙ্গে নৌড়বার চেপ্টা করচে। খানিকবাদে একটা আক্রোশের গর্জন শোনা গেল; কতকগুলো ছিন্নভিন্ন মেঘ ভয়দূতের মত হুদ্র পশ্চিম থেকে উদ্ধ্বাসে ছুটে এল—তারপরে বিদ্যুৎ বজ্র ঝড় ঝুটি সমস্ত একসঙ্গে এসে পড়ে খুব একটা তুর্কি নাচন নাচতে আরম্ভ করে দিলে—বাঁশ গাছগুলো হাউ হাউ শব্দে একবার পূর্বে একবার পশ্চিমে লুটিয়ে লুটিয়ে পড়তে লাগল—ঝড় যেন সৌঁ সৌঁ করে সাপুড়ের মত বাঁশি বাজাতে লাগল আর জলের ঢেউগুলো তিন লক্ষ সাপের মত ফণা তুলে তালেতালে নৃত্য আরম্ভ করে দিলে। কালকের সে যে কি কাণ্ড সে আর কি বলব। বজ্রের যে শব্দ সে আর ধামে না—আকাশের কোন্‌খানে যেন একটা আন্ত জগৎ ভেঙে চুরমার হয়ে যাচ্ছে। বোটের খোলা জানলার উপর মুখ রেখে প্রকৃতির সেই রুদ্ধতালে আমিও বসেবসে মনটাকে দোলা দিচ্ছিলুম। সমস্ত মনের ভিতরটা যেন ছুটিপাওয়া স্কুলের ছেলের মত বাইরে ঝাঁপিয়ে উঠেছিল। শেষকালে ঝুটির ছাঁটে যখন বেশ একটু আর্দ্র হয়ে ওঠা গেল তখন জানলা এবং কবিত্ত বন্ধ করে খাঁচার পাখীর মত অন্ধকারে চুপচাপ বসে রইলুম।

সাজাদপুর।

জলপথে ২০শে জুন, ১৮৯১।

কাল টেলিগ্রামের উত্তর পেয়ে আমাদের সমস্ত কাজ সেরে সন্ধ্যার সময় নৌকো ছেড়ে দিলুম। আকাশে মেঘ ছিল না—চাঁদ উঠেছিল—অল্প অল্প হাওয়া দিচ্ছিল—ঝুপঝুপ দাঁড় ফেলে স্রোতের মুখে ছোট নদীটির মধ্যে ভেসে যাওয়া যাচ্ছিল। চারিদিক পরি-স্থান বলে মনে হচ্ছিল। সে সময়ে অস্ত্রান্ত সমস্ত নৌকো ডাঙায় কাছি বেঁধে পাল গুটিয়ে চন্দ্রালোকে স্তব্ধ হয়ে নিজা দিচ্ছিল। অবশেষে ছোট নদীটা যেখানে যমুনার মধ্যে গিয়ে পড়েছে তারি কাছে একটা খুব নিরাপদ স্থানে গিয়ে নৌকো বাঁধলে। কিন্তু নিরাপদ স্থানের অনেক দোষ; হাওয়া পাওয়া যায় না - বুপ্‌সির ভিতরে অস্ত্রান্ত নৌকোর কাছে—জঙ্গলের গন্ধ ইত্যাদি—আমি মাঝিকে বল্লুম—এপারে হাওয়া পাওয়া যাবে না, ওপারে চল। ওপারে উঁচু পাড় নাই; জলে স্থলে সমান—এমন কি ধানের ক্ষেতের উপর এক হাঁটু জল উঠেছে। মাঝি সেইখানেই নৌকো নিয়ে বাঁধলে। তখন আমাদের পিছনদিকের আকাশে একটু বিদ্যুৎ চিকমিক করতে আরম্ভ করেছে। আমি বিছানায় ঢুকে জানুয়ার কাছে মুখ রেখে ক্ষেতের দিকে চেয়ে আছি এমন সময় রব উঠল—ঝড় আসছে। কাছি ফেল, নোঙর ফেল, এ কর, সে কর, কবতে করতে এক প্রলয় ঝড় ছুটে এল। মাঝি থেকে থেকে বলতে লাগল—ভয়'কোরোনা ভাই আল্লার নাম কর আল্লা মালেক। থেকে থেকে সকলে আল্লা আল্লা করতে লাগল। আমাদের বোটের দুই পাশের পরদা বাতাসে আছাড় খেয়ে খেয়ে শব্দ করতে লাগল, আমাদের বোটটা যেন একটা শিকলিবাঁধা পাখীর মত পাখা ঝাপটে ঝটপট ঝটপট করছিল—ঝড়টা থেকে থেকে চীহি চীহি শব্দ করে একটা বিপর্যয় চিলের মত হঠাৎ এসে পড়ে বোটের ঝুঁটি ধরে ছোঁ মেরে ছিঁড়ে নিয়ে যেতে চায়—বোটটা অমনি সশব্দে ধড়ফড় করে ওঠে। অনেকক্ষণ বাদে বৃষ্টি আরম্ভ হয়ে ঝড় থেমে গেল। আমি হাওয়া খেতে চেয়েছিলুম—হাওয়াটা কিছু বেশী খাইয়ে দিলে—একেবারে আশাভিস্মিত।

যেন কে ঠাট্টা করে বলে যাচ্ছিল—এইবার পেট ভরে হাওয়া খেয়ে নাও, তারপরে শাখ মিটলে কিঞ্চিৎ জল খাওয়াব—তাতে এমনি পেট ভরবে যে ভবিষ্যতে আর কিছু খেতে হবে না। আমরা কি না প্রকৃতির নাতি সম্পর্ক, তাই তিনি মধ্যমধ্যে এই-রকম একটুআধটু তামাসা করে থাকেন। আমি ত পূর্বেই বলেছি জীবনটা একটা গভীর বিজ্ঞপ, এর মজাটা বোঝা একটু শক্ত—কারণ, যাকে নিয়ে মজা করা হয়, মজার রসটা সে তেমন গ্রহণ করতে পারে না। এই মনে কর, ছপুর্ন রাত্রে খাটে শুয়ে আছি, হঠাৎ পৃথিবীটা ধরে এমনি নাড়া দিলে যে কে কোথায় পালাবে পথ পায় না—মংলবটা খুব নতুন রকমের এবং মজাটা খুব আকর্ষক তার আর সন্দেহ নেই—বড় বড় সম্রাট ভদ্রলোকদের অর্ধেক রাত্রে উর্দ্ধ্বাসে অসম্মত অবস্থায় বিছানার বাইরে দৌড় করানো কি কম কৌতুক! এবং ছোটোএকটা সন্ধ্যানিজোখিত হতবুদ্ধি নিরীহ লোকের মাথার উপরে বাড়ির আঁস্ত ছাতটা ভেঙে আনা কি কম ঠাট্টা! হতভাগ্য লোকটাকে যেদিন ব্যাঙ্কে চেক্ লিখে রাজমিস্ত্রির বিল শোধ করছিল, রহস্যপ্রিয়া প্রকৃতি সেইদিন বসে বসে কত হেসেছিল।

—•—

সাজাদপুর,

২২শে জুন, ১৮৯১।

আজকাল আমার এখানে এমন চমৎকার জ্যোৎস্না রাত্রি হয় সে আর কি বন্ধ। অবশ্য যে ঠিকানায় এ চিঠি গিয়ে পৌঁছবে সেখানেও যে জ্যোৎস্নারাত্রি হয় না তা বলা আমার অভিপ্রায় নয়। স্বীকার করতেই হবে সেখানে সেই ময়দানের উপর, সেই গির্জার চূড়ার উপর, সমুদ্রের নিম্নরূপ গাছপালার উপর ধীরে ধীরে জ্যোৎস্না আপনার নীরব অধিকার বিস্তার করে কিন্তু সেখানে জ্যোৎস্না ছাড়াও অল্প পাঁচটা বস্তু আছে—কিন্তু আমার এই নিম্নরূপ রাত্রি ছাড়া আর কিছুই নেই। একলা বসে বসে আমি যে এর ভিতরে কি অনন্ত শান্তি এবং সৌন্দর্য্য দেখতে পাই সে আর ব্যক্ত করতে পারিনে। একদল আছে তারা ছটফট করে, জগতের সকল কথা জানতে পারচিনে কেন—আর একদল ছটফটিয়ে মরে মনের সকল ভাব প্রকাশ করতে পারচিনে কেন—মাঝের থেকে জগতের কথা জগতেই থেকে যায় এবং অন্তরের কথা অন্তরেই থাকে। মাথাটা জানলার উপর রেখে দিই, বাতাস প্রকৃতির স্নেহহস্তের মত আস্তে আস্তে আমার চুলের মধ্যে আঙুল বুলিয়ে দেয়, জল ছলছল শব্দ করে বয়ে যায়, জ্যোৎস্না বিক্ বিক্ করতে থাকে এবং অনেক সময় “জলে নয়ন আপনি ভেসে যায়।” অনেক সময় মনের আন্তরিক অভিমান, একটু স্নেহের স্বর শুনলেই অমনি অশ্রুজলে ফেটে পড়ে;—এই অপরিতৃপ্ত জীবনের জন্যে প্রকৃতির উপর আমাদের যে আজন্ম-কালের অভিমান আছে, যখন প্রকৃতি স্নেহমধুর হয়ে ওঠে তখন সেই অভিমান, অশ্রুজল হয়ে, নিঃশব্দে ঝরে পড়তে থাকে—তখন প্রকৃতি আরো বেশি করে আদর করে, এবং তার বুকের মধ্যে অধিকতর আবেগের সহিত মুখ লুকোই।

আজকাল ছপুর বেলাটা বেশ লাগে। রোদ্দে চারিদিক বেশ নিঃকুম হয়ে থাকে—মনটা ভারি উড়ুউড়ু করে, বই হাতে নিয়ে আর পড়তে ইচ্ছে করে না। তীরে যেখানে নৌকো বাঁধা আছে সেইখানথেকে একরকম ঘাসের গন্ধ এবং থেকেথেকে পৃথিবীর একটা গরম ভাপু গায়ের উপরে এসে লাগতে থাকে—মনে হয় এই জীবন্ত উত্তপ্ত ধরনী আমার খুব নিকটে থেকে নিশ্বাস ফেলচে—বোধ করি আমাদের নিশ্বাস তার গায়ে গিয়ে লাগচে। ছোট ছোট ধানের গাছগুলো বাতাসে ক্রমাগত কাঁপচে—পাঁতিহাঁস জলের মধ্যে নেবে ক্রমাগত মাথা ডুবছে এবং চকু দিয়ে পিঠের পালক সাফ করচে। আর কোন শব্দ নেই, কেবল জলের বেগে বোটটা যখন ধীরে ধীরে বৈকতে থাকে তখন কাছটা এবং বোটের সিঁড়িটা এক রকম ককণ মুহু শব্দ করতে থাকে। অনতিদূরে একটা খেয়াবাট আছে। বটগাছের তলার নানাবিধ লোক জড় হয়ে নৌকার জন্তে অপেক্ষা করচে—নৌকো আসবামাত্রই তাড়াতাড়ি উঠে পড়চে—অনেকক্ষণ ধরে এই নৌকোপারাপার দেখতে বেশ লাগে। ওপারে হাট; তাই খেয়া নৌকায় এত ভীড়। কেউবা ঘাসের বোঝা, কেউবা একটা চুপড়ি, কেউবা একটা বস্তা কাঁধে করে হাটে যাচ্ছে এবং হাট থেকে ফিরে আসচে—ছোট নদীটি এবং ছই পারের ছই ছোট গ্রামের মধ্যে নিত্যক ছপুরবেলায় এই একটুখানি কাজকর্ম, মনুষ্যজীবনের এই একটুখানি শ্রোত, অতি ধীরে ধীরে চলচে। আমি বসে বসে ভাবছিলাম, আমাদের দেশের মাঠ ঘাট আকাশ রোদ্দুরের মধ্যে এমন একটা সুগভীর বিবাদের ভাব কেন লেগে আছে? তার কারণ এই মনে হল আমাদের দেশে প্রকৃতিটা সব চেয়ে বেশি চোখে পড়ে—আকাশ মেঘমুক্ত, মাঠের সীমা নেই, রোদ্দু বাঁ বাঁ করচে, এর মধ্যে মানুষকে অতি সামান্য মনে হয়—মানুষ আসচে এবং যাচ্ছে—এই খেয়ানোকায় মত পারাপার হচ্ছে—তাদের অল্প অল্প কলরব শোনা যায়, এই সংসারের হাটে ছোটখাট

সুখদুঃখের চেষ্টায় একটুখানি আনাগোনা দেখা যায়,—কিন্তু এই অনন্তপ্রসারিত প্রকাণ্ড উদাসীন প্রকৃতির মধ্যে সেই যুগ্মগুন, সেই একটুআধটু গীতধ্বনি, সেই নিশিদিন কাজকর্ম কি সামান্য, কি ক্ষণস্থায়ী, কি নিষ্ফল কাতরতাপূর্ণ মনে হয়। এই নিশ্চেষ্ট, নিস্তরঙ্গ, নিশ্চিন্ত, নিরুদ্ধ প্রকৃতির মধ্যে এমন একটি রহৎ সৌন্দর্য্যপূর্ণ নিরীকার উদার শাস্তি দেখতে পাওয়া যায় এবং তারি তুলনায় আপনার মধ্যে এমন একটা সততসচেষ্ট পীড়িত জর্জরিত ক্ষুদ্র নিত্যনৈমিত্তিক অশাস্তি দেখতে পাওয়া যায় যে ঐ অতিদূর নদীতীরের ছায়ায় নীল বনরেখার দিকে চেয়ে নিতান্ত উন্মনা হয়ে যেতে হয়। “ছায়াতে বসিয়া সারা দিনমান তরুশর্ম্মর পবনে” ইত্যাদি। যেখানে মেঘে কুয়াশায় বরফে অন্ধকারে প্রকৃতি আচ্ছন্ন সঙ্কুচিত, সেখানে মানুষের খুব কর্তৃত্ব—মানুষ সেখানে আপনার সকল ইচ্ছা সকল চেষ্টাকে চিরস্থায়ী মনে করে—আপনার সকল কাজকে চিহ্নিত করে রেখে দেয়—পট্টাবিটির দিকে তাকায়, কীর্ত্তিস্তম্ভ তৈরি করে, জীবনচরিত লেখে, এবং মৃতদেহের উপরেও পাষাণের চিরস্মরণগৃহ নির্মাণ করে—তারপরে অনেক চিহ্ন ভেঙে যায় এবং অনেক নাম বিস্মৃত হয় কিন্তু সময়াভাবে সেটা কারো খেয়ালে আসে না।

—•—

সাজানপুর ।

বিকেলবেলায় আমি এখানকার গ্রামের ঘাটের উপরে বোট লাগাই । অনেক-
জলো ছেলে মিলে খেলা করে, বসে বসে দেখি । কিন্তু আমার সঙ্গে সঙ্গে নিশিদিন
যে পদাতিক সৈন্য লেগে থাকে তাদের জুলায় আর আমার মনে স্খুৎ নেই ।
ছেলেদের খেলা তারা বেআদবী মনে করে ; মাঝিরা যদি আপনাদের মধ্যে মন
খুলে হাসি গল্প করে সেটা তারা রাজার প্রতি অলম্বান জ্ঞান করে ; চাষারা যদি
ঘাটে গরুকে জল খাওয়াতে নিরে আসে তারা তৎক্ষণাৎ লাঠি হাতে করে রাজমর্যাদা
রক্ষা করতে ধাবিত হয় । অর্থাৎ রাজার চতুর্দিকটা হামিহীন খেলাহীন শব্দহীন
জনহীন ভীষণ মরুভূমি করতে পারলে তাদের মনের মত রাজসম্মান রক্ষা হয় । কালও
তারা ছেলেদের তাড়া করতে উদ্যত হয়েছিল, আমি আমার রাজমর্যাদা জলাঞ্জলি
দিয়ে তাদের নিবারণ করলুম । ঘটনাটা হচ্ছে এই—

ভাঙার উপর একটা মস্ত নৌকার মাঙ্গুল পড়ে ছিল—গোটা কতক বিবস্ত্র কুদে
ছেলে মিলে অনেক বিবেচনার পর ঠাওয়ারলে, যে যদি যথোচিত কলরবসহকারে
সেইটেকে ঠেলে ঠেলে গড়ান যেতে পারে তাহলে খুব একটা নতুন এবং আমোদজনক
খেলার সৃষ্টি হয় । যেমন মনে আসা, অমনি কার্য্যারম্ভ, “সাবাস্ জোয়ান্—হেঁইয়ো !
মারো ঠেলা হেঁইয়ো !” মাঙ্গুল যেমনি একপাক ঘুরচে অমনি : সকলের আনন্দে
উচ্চহাস্য । কিন্তু এই ছেলেদের মধ্যে যে দুটিএকটি মেয়ে আছে, তাদের ভাব আর-
একরকম । সঙ্গীঅভাবে ছেলেদের সঙ্গে মিশতে বাধ্য হয়েচে কিন্তু এই সকল প্রমসাদ্য
উৎকট খেলায় তাদের মনের যোগ নেই । একটি ছোট মেয়ে বিনাস্তাক্যব্যয়ে গম্ভীর-
প্রশান্তভাবে সেই মাঙ্গুলটার উপর গিয়ে চেপে বসল । ছেলেদের এমন সাধের খেলা
মাটি । দুইএকজন ভাবলে এমনস্থলে হারমানাই ভাল ; তফাতে গিয়ে তারা স্নানযুখে
সেই মেয়েটির অটল গাম্ভীৰ্য্য নিরীক্ষণ করতে লাগল । ওদের মধ্যে একজন এসে
পরীক্ষাক্ষেপে মেয়েটাকে একটুএকটু ঠেলতে চেষ্টা করলে । কিন্তু সে নীরবে
নিশ্চিন্ত মনে বিশ্রাম করতে লাগল । সৰ্ব্বজ্যেষ্ঠ ছেলেটি এসে তাকে বিশ্রামের

জন্যে অন্য স্থান নির্দেশ করে দিলে, সে তাতে সন্তোষে মাথা নেড়ে কোলের উপর হাট হাত জড় করে নড়েচড়ে আবার বেশ গুছিয়ে বসল—তখন সেই ছেলেটা শারীরিক যুক্তি প্রয়োগ করতে আরম্ভ করলে এবং অবিলম্বে কৃতকার্য হল। আবার অল্পভেদী আনন্দধ্বনি উঠল, পুনর্বার মাস্তুল গড়াতে লাগল—এমনকি, খানিকক্ষণ ঘাদে মেয়েটাও তার নারীগোরব এবং সুমহৎ নিশ্চেষ্ট স্বাতন্ত্র্য ত্যাগ করে কৃত্রিম উৎসাহের সঙ্গে ছেলেদের এই অর্থহীন চপলতায় যোগ দিলে। কিন্তু বেশ বোঝা যাচ্ছিল সে মনে মনে বলছিল—ছেলেরা খেলাকরতে জানে না, কেবল যতরাজ্যের ছেলে-মামুদী। হাতের কাছে যদি একটা খোঁপাওয়ালা হলুদে রঙের মাটির বেনে পুতুল থাকত তাহলে কি সে আর এই অপরিণতবুদ্ধি নিতান্ত শিশুদের সঙ্গে মাস্তুল ঠেলার মত এমন-একটা বাজে খেলার যোগ দিত! এমনসময় আরেকরকমের খেলা তাদের মনে এল, সেটাও খুব মজার। দুজন ছেলেতে মিলে একটা ছেলের হাত পা ধরে ঝুলিয়ে তাকে লোলা দেবে। এর ভিতরে খুব একটা রহস্য আছে সম্ভব নেই—কারণ, ছেলেরা বেজায় উৎফুল্ল হয়ে উঠল। কিন্তু মেয়েটার পক্ষে অসহ্য হল। সে অবজ্ঞাভরে ক্রীড়াক্ষেত্র ত্যাগ করে ঘরে চলে গেল। হঠাৎ একটা দৃষ্টিনা ঘটল। যাকে দোলাচ্ছিল সে গেল পড়ে। সেই অভিমানে সে সঙ্গীদের ত্যাগ করে বহুদূরে গিয়ে হাতের উপর মাথা রেখে তৃণশয্যায় শুয়ে পড়ল—ভাবে এই রকম জানালে—এই পাবাগন্ধর জগৎসংসারের সঙ্গে সে আর কোন সম্পর্ক রাখবেনা, কেবল একলা চীৎ হয়ে শুয়ে আকাশের তারা গণনা করবে, মেঘের খেলা দেখে হাতে মাথা রেখে জীবন কাট্টিয়ে দেবে এবং “বাবত জীবন রবে কারো সঙ্গে খেলিব না।” তার এই-রকম অকালে পরম বৈরাগ্য দেখে বড় ছেলেটা তাড়াতাড়ি ছুটে গিয়ে কোলের উপর তার মাথাটা নিয়ে সাহসেরস্বরে অত্যাশঙ্কিত প্রকাশ করে বলতে লাগল, আর না ভাই, ওঁ না ভাই লেগেছে ভাই! অনতিকাল পরেই হুই কুকুরশাবকের মত দুজনের হাতকাড়াকাড়ি খেলা বেধে গেল—এবং দুমিনিট না যেতে দেখি সেই ছেলে ফের হুলুতে আরম্ভ করেছে! এমনি মাঝবের প্রতিজ্ঞা! এমনি তার মনের বল! এমনি তার বুদ্ধির হিরজ! খেলা ছেড়ে একবার দূরে গিয়ে চীৎ হয়ে শোয়, আবার ধরা দিয়ে হেসে হেসে মোহদোলায় হুলুতে থাকে। এ মাঝবের যুক্তি কি করে হবে! এমন ক’জন ছেলে আছে যে খেলাঘর ছেড়ে মাথার হাত দিয়ে কেবল চীৎ হয়ে পড়ে থাকে—সেই সঙ্গ ভগলছেলেদের জন্যে গোলোকধামে বাসা ভৈরবহুজে।

কাল রাত্রে ভারি একটা অদ্ভুত স্বপ্ন দেখেছিলুম। সমস্ত কলকাতা সহরটা যেন মহা একটা জীষণ অথচ আশ্চর্য্য ভাবের দ্বারা আচ্ছন্ন হয়ে আছে—বাড়িঘর সমস্তই একটা অন্ধকার কালো কুয়াশার ভিতরথেকে দেখা যাচ্ছে—এবং তার ভিতর তুমুল কি একটা কাণ্ড চলছে। আমি একটা ভাড়াটে গাড়ি করে পার্কস্ট্রীটের ভিতর দিয়ে যাচ্ছি। যেতেযেতে দেখলুম সেন্ট্‌জেভিয়ার কলেজটা দেখতেদেখতে হুহ করে বেড়ে উঠছে—সেই অন্ধকার কুয়াশার মধ্যে অসম্ভব উঁচু হয়ে উঠছে। তারপরে ক্রমে জামুতে পারলুম একদল অদ্ভুত লোক এসেচে তারা টাকা পেলে কি এক কৌশলে এইরকম অপূর্ণ ব্যাপার করতে পারে। যোড়াসাঁকোর বাড়ি এসে দেখি সেখানেও তারা এসেচে ; বদ দেখতে, কতকটা মোঙ্গোলিয়ান ধাঁচের চেহারা—সবু গৌণ, গোটা দশ বারো দাড়ি মুখের এদিকেওদিকে খোঁচাখোঁচা রকম বেরিয়েচে। তারা মানুষকেও বড় করে দিতে পারে। তাই আমাদের দেউড়িতে আমাদের বাড়ির সব মেয়েরা লম্বা হবার জন্যে উমেদার হয়েচেন—তারা এঁদের মাথায় কি একটা গুঁড়ো দিচ্ছে আর এঁরা হস্ করে লম্বা হয়ে উঠেচেন। আমি কেবলি বলুচি, কি আশ্চর্য্য, এ যেন ঠিক স্বপ্নের মত মনে হচ্ছে। তার পরে, কে একজন প্রস্তাব করলে আমাদের বাড়িটা উঁচু করে দিতে। তারা রাজি হয়ে বাড়ি কতকটা ভাঙতে আরম্ভ করলে, খানিকটা ভেঙেচুরে বসে, এইবার এত টাকা চাই নইলে বাড়িতে হাত দেবনা, কুঞ্জসরকার বসে সে কি হয় ; কাজ না হয়ে গেলে কি করে টাকা দেওয়া যায়। বলতেই তারা চটে উঠল—বাড়িটা সমস্তই একরকম বেঁকে চুরে বিলী হয়ে গেল এবং মাঝেমাঝে দেখা গেল, আধখানা মানুষ দেয়ালের মধ্যে গাঁথা রয়েছে, আধখানা বেরিয়ে। সমস্ত দেখে-শুনে মনে হল এ সব সয়তানী কাণ্ড। বড়দাদাকে বল্লম “বড়দা, দেখচেন ব্যাপারটা। আহুন একবার উপাসনা করা যাক্।” দালানে গিয়ে খুব একাগ্রমনে উপাসনা করা

গেল। বেরিয়ে এসে মনে করলুম ঈশ্বরের নাম করে তাদের ভৎসনা করব—কিন্তু বুক ফেটে যেতে লাগল তবু গলা দিয়ে কথা বেরোল না। তারপর কখন জেগে উঠলুম ঠিক মনে পড়েনা। ভাবি অদ্ভুত স্বপ্ন না? সমস্ত কল্কাতাসহরে সয়তানের প্রাচুর্য; সবাই তার সাহায্যে বেড়ে ওঠবার চেষ্টা করচে, একটা অন্ধকার নারকী কুজ্জাটিকার মধ্যে সমস্ত সহরের ভয়ঙ্কর ক্রীড়াক্রি হচ্ছে। কিন্তু ওর মধ্যে একটু পরিহাসও ছিল—এত দেশ থাকতে জেসুইটদের ইন্সকুলটার উপরেই সয়তানের এত অনুগ্রহ কেন?

* * তারপরে এখানকার স্কুলের মাষ্টারেরা দর্শনাভিলাষী হয়ে এসে উপস্থিত। তাঁরা কিছুতেই উঠতে চান না, অথচ আমার আবার তেমন কথা জোগায় না—পাঁচ মিনিট অন্তর দুইএক কথা জিজ্ঞাসা করি; তার একআধটা উত্তর পাই, তার পরে বোকার মত বসে থাকি, কলম নাড়ি, মাথা চুলকোই—জিজ্ঞাসা করি এবার এখানে শস্ত্র কি রকম হয়েছে—স্কুলমাষ্টারেরা শস্ত্রসম্বন্ধে কিছুই জানেন না—ছাত্রসম্বন্ধে যা কিছু জ্ঞাতব্য বিষয় তা আরম্ভেই হয়েগেছে; ফের আবার গোড়ার কথা পাড়লুম, জিজ্ঞাসা করলুম আপনাদের স্কুলে কজন ছাত্র? একজন বলেন আশি জন, আর একজন বলেন না একশ পচাত্তর জন। মনে করলুম ছুজনের মধ্যে খুব একটা তর্ক বেধে যাবে, কিন্তু দেখলুম, তৎক্ষণাৎ মতের ঐক্য হয়ে গেল। তারপরে দেড় ঘণ্টা পরে কেন যে তাঁদের মনে পড়ল আজ তবে আসি তা ঠিক বোঝা শক্ত—আর এক ঘণ্টা পূর্বেও মনে হতে পারত, আর বারো ঘণ্টা পরেও মনে হতে পারত। দেখা যাচ্ছে এর ভিতরে কোন একটা নিয়ম নেই, অন্ধ দৈবঘটনা মাত্র।

আমাদের ঘাটে একটি নৌকো লেগে আছে, এবং এখানকার অনেকগুলি “জনপদ-বধূ” তার সম্মুখে ভিড় করে দাঁড়িয়েছে। বোধ হয় একজন কে কোথায় যাচ্ছে এবং তাকে বিদায় দিতে সবাই এসেছে। অনেকগুলি কচিছেলে অনেকগুলি ঘোমটা এবং অনেকগুলি পাকা চুল একত্র হয়েছে। কিন্তু ওদের মধ্যে একটি মেয়ে আছে তার প্রতিই আমার মনোযোগটা সর্বাঙ্গের আকৃষ্ট হচ্ছে। বোধ হয় বয়সে বারো-তেরো হবে, কিন্তু একটু ছোট্ট পুষ্ট হওয়াতে চোদ্দ পনেরো দেখাচ্ছে। মুখখানি বেড়ে। বেশ কালো অথচ বেশ দেখতে। ছেলেদের মত চুল ছাঁটা, তাতে মুখটি বেশ দেখাচ্ছে। এমন বুদ্ধিমান এবং সপ্রতিভ এবং পরিষ্কার সরলভাব। একটা ছেলে কোলে করে এমন নিঃসঙ্কোচ কোতুহলের সঙ্গে আমাকে চেয়েচেয়ে দেখতে লাগল! তার মুখখানিতে কিছু যেন নির্বুদ্ধিতা কিম্বা অসরলতা কিম্বা অসম্পূর্ণতা নেই। বিশেষতঃ আধা ছেলে আধা মেয়ের মত হয়ে আরো একটু বিশেষ মনোযোগ আকর্ষণ করে। ছেলেদের মত আত্মসম্বন্ধে সম্পূর্ণ অচেতন ভাব এবং তার সঙ্গে মাধুরী মিশে ভারি নতুনরকমের একটি মেয়ে তৈরি হয়েছে। বাংলা দেশে যে এরকম ছাঁদের “জনপদবধূ” দেখা যাবে এমন প্রত্যাশা করিনি। দেখছি এদের বংশটাই তেমন বেশী লাজুক নয়। একজন মেয়ে ভাঙায় দাঁড়িয়ে রোদ্রে চুল এলিয়ে দশাঙ্গুলি দ্বারা জটা ছাড়াচ্ছে এবং নৌকোর আর একটি রমণীর সঙ্গে উচ্চৈঃস্বরে ঘরকন্নার আলাপ হচ্ছে। শোনা গেল তার একটি মাত্র “মায়্যা” অথ “ছাওয়াল নাই”—কিন্তু সে মেয়েটির বুদ্ধিহীন নেই—“কারে কি কয় কারে কি হয়—আপন পর জ্ঞান নেই”—আরো অবগত হওয়া গেল গোপাল সাঁর জামাইটি তেমন ভাল হয়নি, মেয়ে তার কাছে যেতে চায় না। অবশেষে যখন যাত্রার সময় হল তখন দেখলুম আমার সেই চুলছাঁটা, গোলগাল হাতে-বালা-পন্ন, উজ্জল সরল মুখখানি মেয়েটিকে নৌকায় তুলে। বুঝলুম, বেচারী বোধ হয় বাপের বাড়ি

থেকে স্বামীর ঘরে যাচ্ছে। নোকো যখন ছেড়ে দিলে মেয়েরা ডাঙায় দাঁড়িয়ে চেয়ে রইল, দুই একজন আঁচল দিয়ে ধীরে ধীরে নাকচোখ মুছতে লাগল। একটি ছোট মেয়ে, খুব এঁটে চুল বাঁধা, একটি বর্ষীয়সীর কোলে চড়ে তার গলা জড়িয়ে তার কাঁধের উপর মাথাটি রেখে নিঃশব্দে কাঁদতে লাগল। যে গেল সে বোধ হয় এ বেচারির দিদিমণি, এর পুতুলখেলার বোধ হয় মাঝেমাঝে যোগ দিত, বোধ হয় ছুটমি করলে মাঝেমাঝে সে একে চিপিয়ে দিত। সকালবেলাকার রোদ্দর এবং নদীতীর এবং সমস্ত এমন গভীর বিষাদে পূর্ণ বোধ হতে লাগল! সকালবেলাকার একটা অত্যন্ত হতাশাস কল্পণ রাগিণীর মত। মনে হল সমস্ত পৃথিবীটা এমন সুন্দর অথচ এমন বেদনায় পরিপূর্ণ। এই অজ্ঞাত ছোট মেয়েটির ইতিহাস আমার যেন অনেকটা পরিচিত হয়েগেল। বিদায়-কালে এই নোকো করে নদীর শ্রোতে ভেসে যাওয়ার মধ্যে যেন আরো একটু বেশি কল্পণা আছে। অনেকটা যেন মৃত্যুর মত—তীরথেকে প্রবাহে ভেসে যাওয়া—যারা দাঁড়িয়ে থাকে তারা আবার চোখ মুছে ফিরেযায়, যে ভেসেগেল সে অদৃশ্য হয়েগেল। জানি, এই গভীর বেদনাটুকু, যারা রইল এবং যে গেল উভয়েই ভুলে যাবে, হয়ত এতক্ষণে অনেকটা ম্লগ্ন হয়ে গিয়েছে। বেদনাটুকু ক্ষণিক এবং বিস্মৃতিই চিরস্থায়ী কিন্তু ভেবে দেখতে গেলে এই বেদনাটুকুই বাস্তবিক সত্য—বিস্মৃতি সত্যি নয়। এক-একটা বিচ্ছেদ এবং একএকটা মৃত্যুর সময় মানুষ সহসা জানতে পারে এই বাথটা কি ভয়ঙ্কর সত্য। জানতে পারে, যে মানুষ কেবল ভ্রমক্রমেই নিশ্চিত থাকে। কেউ থাকে না—এবং সেইটে মনে করলে মানুষ আরো ব্যাকুল হয়েওঠে। কেবল যে থাক্বনা তা নয়, কারো মনেও থাক্ব না। একেবারে আমাদের দেশের কল্পণ রাগিণী ছাড়া সমস্ত মানুষের পক্ষে আর কোন গান সম্ভবে না।



পরিধেয় বস্ত্র প্রতিদিন মলিন এবং অসহ্য হয়ে আসচে অথচ কাপড়ের ব্যাগ্টি নেই, একথা চিন্তের মধ্যে অহর্নিশি জাগরুক থাকলে ভদ্রলোকের আত্মসম্মত দূর হয়ে যায়। সেই ব্যাগ্টি থাকলে যেরকম উন্নতমস্তকে সতেজে জনসমাজে বিচরণ করতে পারতুম এখন আর তা পারচিনে। কোনমতে নিজেকে প্রচ্ছন্ন এবং সাধারণের দৃষ্টি-অন্তরালে রাখতে ইচ্ছা করচে। এই কাপড় পরেই রাত্রে শয়নকরচি, এবং প্রাতঃকালে প্রকাশিতহচ্চি। ঈমারে আবার সর্ব্বত্রই কয়লার গুঁড়ো এবং মলিনতা মধ্যাহ্নের অসহ্য উত্তাপে সর্ব্বশরীর বাষ্পাকুল হয়ে উঠচে। তা ছাড়া ঈমারে যে স্নেহে আছি সে কথা লিখে আর কি করব। কতরকমের যে সঙ্গী জুটেচে তার আর সংখ্যা নেই। অঘোরবাবু বলে একটি কে এসেচে সে পৃথিবীর সমস্ত জড় এবং চেতন-পদার্থকে মামাখণ্ডের ভাগ্নে বলে উল্লেখকরচে। আর একটি সঙ্গীতকুশল লোক অন্ধক রাত্রে ভৈরো আলাপ করতে লাগল। বিবিধ কারণে সেটা নিতান্ত অসাময়িক বলে বোধ হতে লাগল। একটা স্কুঁড়ি খালের মধ্যে জাহাজ আটকে কাণ বিকেল থেকে আজ নটা পর্যন্ত যাপন করাগেছে। সমস্ত যাত্রীর ভিড়ের মধ্যে ডেকের এক ধারে নির্জীব এবং বিমর্ষভাবে শুয়ে ছিলুম। থানসামাজিকে বলেছিলুম রাত্রে লুচি তৈরি করতে—সে কতকগুলি আকারপ্রকারহীন ভাজা ময়দা তৈরিকরে এনেছিল, তার সঙ্গে ছোকা কিংবা ভাজাভুজির উপলক্ষমাত্র ছিল না। দেখে আমি কিঞ্চিৎ বিস্ময় এবং আক্ষেপ প্রকাশ করলুম—সে ব্যক্তি তটস্থ হয়ে বলে, হম্ আবি বনা দেতা—রাত্রের আধিক্য দেখে আমি তাতে অসম্মত হয়ে যথাসাধ্য শুষ্ক লুচি খেয়ে আলাম এবং লোকজনের মধ্যে শুয়েপড়লুম—শূন্যে মশা এবং চতুষ্পার্শ্বে আরংমালা সঞ্চরণকরচে—ঠিক পায়ের কাছেই আরএক ব্যক্তি শয়নকরচে, তার গায়ে মাঝেমাঝে আমার পা ঠেকে, চারটে পাচটা নাক অবিরাম ডাক্চে, মশকদষ্ট বীতনিদ্র হতভাগ্যগণ তামাক

টান্চে—এবং এর মধ্যে ভৈরো রাগিনী । রাত যখন সাড়ে তিনটে তখন কতকগুলি ব্যস্তবাগীশ লোক পরস্পরকে জাগ্রত হতে উৎসাহিত করতে লাগল । আমি নিতান্ত কাতরভাবে শয্যা ত্যাগ করে আমার চৌকিটাতে ঠেস দিয়ে প্রভাতের প্রতীক্ষায় বসে রইলুম । একটা বিচিত্র অভিশাপের মত রাতটা কেটেগেল । একটা খালাসীর কাছে সংবাদ পেলুম ষ্টীমার এমনি আটকে গেছে আজ সমস্ত দিন নড়বে না । একজন কর্মচারীকে জিজ্ঞাসাকরলুম কলকাতামুখী কি কোন জাহাজ ইতিমধ্যে পাওয়া যাবে, সে হেসে বলল এই জাহাজই গম্যস্থানে পৌঁছে পুনশ্চ কলকাতায় ফিরবে অতএব ইচ্ছে করলে এই জাহাজে করেই ফিরতে পারি । সৌভাগ্যক্রমে অনেক টানাটানির পর প্রায় দশটার কাছাকাছি জাহাজ চলতে আরম্ভ করলে ।

—:—

—বাবু খুব মোটামোটা বর্জিষ্ণু চেহারার লোক—তাঁর ভাবখানা খুব একজন লম্বাচোড়া কৃষ্ণবিক্রম মত । বয়স যথেষ্ট হয়েছে—একখানি কৌচানো চাদর কাঁধে, ফিটফিট সাজ, গায়ে এসেঙ্গের গন্ধ, হু-খাক চিবুক, প্রমাণসহি গৌক, কপাল গড়ানে, বড়বড় ডাবাচোখ আত্মস্তরিতায় অর্ধনিমীলিত, কথা কবার সময় চোখের তারা আকাশের দিকে ওঠে—জলদগন্তীরযরে অতি মৃদুমন্দ মুহুঃ সহাস্তভাবে কথা কন,—সময় যেন অমুগত ভূত্যের মত তাঁর অবসর অপেক্ষায় এক পাশে স্তব্ধভাবে দাঁড়িয়ে আছে—কোন বিষয়ে তিলমাত্র তাড়া নেই । চোখ দুটো উঠে আমাকে একবার জিজ্ঞাসাকরলেন “জ্যোতি এখন কোথায় আছে ?” প্রশ্নকর্তার অবিচলিত গাঙ্গীর্ষ্য আমার অন্তঃকরণ সসঙ্গমে শব্দান্ত হয়ে উঠল—আমি মুহুঃ বিনীতভাবে আমার দাদার রাজধানীতে অবস্থান জ্ঞাপনকরলুম । তিনি বল্লেন “বীরেন্দ্রের সঙ্গে আমি একসঙ্গে পড়েছি ।” শুনে আমার চিত্ত আরো অভিভূত হয়ে পড়ল । এর উপরে যখন তিনি—কারো পরামর্শের অপেক্ষা না রেখে অকস্মাৎ অসময়ে এখানে আসাসম্বন্ধে আমার বালকোচিত অবিবেচনার উল্লেখকরলেন তখন আমি কি রকম ম্লান অপ্রতিভ হয়ে গেলুম সে অনুমানকরা শক্ত হবে না । আমি কেবলি নতমুখে বারবার বলতে লাগলুম—আমি প্রকৃত অবস্থা কিছুই জানতুম না—আর কখনো আসিনি, এই প্রথম আস্চি । তার থেকে তর্ক উঠল “জ্যোতি কখন এসেছিল”—সময়নির্ণয়সম্বন্ধে বরদার সঙ্গে তাঁর ঘোর অনৈক্য হল । তিনি ৭৪।৭৫ বলেন, বরদা বলেন তার পূর্বে । এর থেকেই বুঝতে পারা যাবে ইতিহাস লেখা কত শক্ত । তাই মনে করছি এইবার থেকে আমার চিঠিতে তারিখ দিতে হবে ।

বালিয়ার ঘাটটি বেশ দেখতে। ছই ধারে বেশ বড়বড় গাছ—সবস্বল্প খালটা দেখে সেই পুণার ছোট নদীটি মনে পড়ে।

আমি ভালকরে ভেবেদেখলুম এই খালটাকে যদি নদী বলে জানতুম তাহলে ঢের বেশী ভাললাগত। ছই তীরে বড় নারকেল গাছ, আমগাছ এবং নানাজাতীয় ছায়া-তরু, চান্দু পরিষ্কার তট স্নন্দর সবুজ ঘাস এবং অসংখ্য পুষ্পিত লজ্জাবতী লতায় আচ্ছন্ন; কোথাও বা কেয়াবন; যেখানে গাছগুলি একটু বিরল সেইখানথেকে দেখা যায় খালের উঁচু পাড়ের নীচে একটা অপার মাঠ ধু ধু করচে, বর্ষাকালে শস্তক্ষেত্র এমনি গাঢ় সবুজ হয়েছে যে ছাট চোখ যেন একেবারে ভুবে যায়—মাঝেমাঝে খেজুর এবং নারকেল গাছের মণ্ডলীর মধ্যে ছোট ছোট গ্রাম;—এই সমস্ত দৃশ্য বর্ষাকালের স্নিগ্ধ মেঘাচ্ছন্ন আনন্দ আকাশের নীচে শ্রামচ্ছায়াময় হয়ে আছে। খালটি তার ছই পরিষ্কার সবুজ শল্লতটের মাঝখানদিয়ে স্নন্দবভঙ্গীতে বেকেঁবেঁকে চলে গেছে। মুহু-মুহু স্রোত; যেখানে খুব সক্ষীর্ণ হয়ে এসেছে সেখানে জলের কিনারার কাছে কাছে কুয়বন এবং বড়বড় ঘাস দেখা দিয়েছে। কিন্তু তবু মনের মধ্যে একটা আক্কেপ থেকোয় এটা একটা কাটা খাল বই নয়—এর জলকলধ্বনির মধ্যে অনাদি প্রাচীন নেই, এ কোনো দূর দুর্গম জনহীন পর্বতগুহার রহস্য জানে না; কোনো একটি প্রাচীন ক্রী-নাম ধারণকরে অতি অজ্ঞাতকালথেকে ছইতীরের গ্রামগুলিকে স্তম্ভদানকরে আসেনি—এ কখনো কুলুকুলু করে বলতেপারে না—

মেন্ মে কাম্ অ্যাণ্ড মেন্ মে গো,

বাট্, আই গো অন্ ফর এভার।

প্রাচীনকালের বড়বড় দীঘীও এরচেয়ে ঢের বেশি গৌরবলাভ করেছে। এরথেকেই বেশ বোঝা যায় একটা প্রাচীন বড় বংশ অনেক বিষয়ে হীন হলেও কেন এত সমাদর

লাভকরে। তাদের উপরে যেন বহুকাণের একটা সম্পদশ্রীর আভা থাকে। একজন সোনার ব্যাপারী হঠাৎ বড়মানুষ হয়ে উঠলে অনেক সোনা পায় কিন্তু সেই সোনার লাভগাটুকু শীঘ্র পায় না। যাহোক্ আর একশো বৎসর পরে যখন এই তীরের গাছ-গুলো আরো অনেক বড় হয়ে উঠবে, তত্কে শাদা মাইলচৌনগুলো অনেকটা ক্ষয়ে গিয়ে শৈবালাচ্ছন্ন ম্লান হয়ে আসবে, লকের উপরে খোদিত ১৮৭১ তারিখ যখন অনেক দূরবর্তী বলে মনে হবে তখন যদি আমি আমার প্রপৌত্র জন্মলাভকরে এই খালের মধ্যে বোট নিয়ে আমাদের পাণ্ডুরা জমিদারী-তদন্ত করতে যেতে পারি তখন আমার মনের মধ্যে অনেকটা ভিন্নরকম ভাবোদয় হতে পারে সন্দেহ নেই। কিন্তু হায় আমার প্রপৌত্র! তার ভাগ্যে কি আছে কে জানে! হয়ত একটা অজ্ঞাত অথাত কেরানি-গিরি। ঠাকুরবংশের একটা ছিন্ন টুকরো, বহুদূরে প্রক্ষিপ্ত হয়ে একটা মৃত উজ্জ্বলতার মত হয়ত জ্যোতিহীন নির্বাপিত। কিন্তু আমার উপস্থিত দুর্দশা এত আছে যে আমার প্রপৌত্রের জন্তে বিলাপকরবার কোন দরকার নেই।

চারটের সময় তারপুরে পৌছনগেল। এইখানে আমাদের পাঙ্কীযাত্রা আরম্ভ হল। মনেকরলুম হ্রোশ পথ, সন্ধ্যা আটটার মধ্যেই আমাদের কুঠিতে পৌছতে পারব। মাঠের পর মাঠ, গ্রামের পর গ্রাম, মাইলের পর মাইল কেটেবাচ্ছে, ছ ক্রোশ পথ আর ফুরোর না। সন্ধ্যা সাড়ে সাতটার সময় বেহারাদের জিজ্ঞাসাকরলুম আর কতদূর, তারা বলে, আর বেশি নেই, তিন ক্রোশের কিছু উপর বাকি আছে। শুনে পাঙ্কীর মধ্যে একটু নড়েচড়ে বসলুম। পাঙ্কীতে আমার আধখানা বই ধরে না—কোমর টন টন করচে, পা বিন্ বিন্ করচে, মাথা ঠক ঠক করচে—যদি নিজেকে তিন চার ভাঁজকরে মুড়েরাখবর কোন উপায় থাকত তা হলেই এই পাঙ্কীতে কিছু হুবিধে হতে পারত। রাস্তা অতি ভয়ানক! সর্বত্রই এক হাঁটু কাদা—একএক জায়গায় পিছলের ভয়ে বেহারারা অতি সাবধানে একএক পা করে পা ফেল্চে—তিনচারবার তাদের পা হড়্কে গিয়েছিল, তাড়াতাড়ি সামলেনিলে। মাঝে মাঝে রাস্তা নেই—ধানের ক্ষেতে অনেকখানিকরে জল দাঁড়িয়েছে—তারি উপর দিয়ে ছপ্ ছপ্ শব্দ করে এগোচ্ছি। মেঘে রাত খুব অন্ধকার হয়ে এসেছে, টিপ্ টিপ্ করে বৃষ্টি পড়চে, তৈলা-ভাবে মশালটা মাঝেমাঝে নিবেষাচ্ছে, আবার অনেক ফুঁ দিয়েদিয়ে জ্বালাতেহচ্ছে, বেহারারা সেই আলোকের অভাব নিয়ে ভারি বকাবকি বাধিয়ে দিয়েচে। এমন করে খানিকদূরে এলে পর বরকন্দাজ ঘোড়াহাতে নিবেদন করলে, একটা মদী এসেছে

এইখানে পাখী নৌকোকরে পারকরতে হবে কিন্তু এখনো নৌকো এসে পৌছয়নি, অবিলম্বে এল বলে—অতএব খানিকক্ষণ এইখানে পাখী রাখতে হবে। পাখী রাখলে। তারপরে নৌকো আর কিছুতে এসেপৌছয়না। আন্তেআন্তে মশালটা নিবে গেল। সেই অন্ধকার নদীতীরে বরকন্দাজগুলো ভাঙাগুলার উর্দ্ধ্বাসে নৌকোওয়ালাকে ডাক্তে-লাগল—নদীর পরপারথেকে তার প্রনিধ্বনি ফিরে আস্তেলাগল কিন্তু কোনো নৌকোওয়ালা সাড়া দিলে না। “মুকুন্দো—ও-ও-ও” “বাগবুজ—অ-অ-অ” “নীলকণ্ঠ—অ-অ-অ”। এমন কাতরস্বরে আহ্বান করলে গোলোকধাম থেকে মুকুন্দ এবং কৈলাস-শিখর থেকে নীলকণ্ঠ নেনে আস্তেন—কিন্তু কর্ণবার কর্ণবোধকরে অবিচলিতভাবে নিজ নিকেতনে বিশ্রাম করতেলাগল। নির্জুন নদীতীরে একটি কুঁড়েঘরমাত্রও নেই; কেবল পথপার্শ্বে চালকহীন বাহনহীন একটি শূন্য গরুর গাড়ি পড়েরয়েছে—আমাদের বেহারাগুলো তারি উপর চেপেবসে বিজাতীয় ভাবায় কলরব করতেলাগল। মক্-মক্ শব্দে ব্যাং ডাক্চে এবং ঝিঝির ডাকে সমস্ত রাত্রি পরিপূর্ণ হয়েউঠেচে। আমি মনেকরলুম এইখানেই পাখীর মধ্যে বেকেচুরে ছম্ড়ে আজ রাতটা কাটাতেহবে—মুকুন্দ এবং নীলকণ্ঠ বোধহয় কাল প্রভাতে এসে উপস্থিতহতেও পারে—মনেমনে গাইতেলাগলুম—ওগো।

ওগো, যদি নিশিশেষে আসে হেসে হেসে

মোর হাসি আর রবে কি !

এই, জাগরণে অশীর্ণ বদন মলিন

আমারে হেরিয়া কবে কি !

যাই হোক না কেন, যদি কয় ত উড়ে ভাবায় কবে, আমি কিছুই বুঝতেপারবনা কিন্তু মুখে যে আমার হাসি থাকবে না সে বিষয়ে কোন সন্দেহ নেই। অনেকক্ষণ এই ভাবে কেটেগেল। এমন সময় হুঁই হুঁই হুঁই হুঁই শব্দে বরদার পাখী এসে উপস্থিতহল। বরদা নৌকো আসবার সম্ভাবনা না দেখে হুকুম দিলেন পাখী মাথায় করে নদী পার করতেহবে। শুনে বেহারারা অনেক ইতস্তত করতেলাগল এবং আমার মনেও দয়া এবং ক্লিষ্ট দ্বিধা উপস্থিত হতেলাগল। যাহোক অনেক বাকবিতণ্ডার পর তারা হরিনাথ উদ্ভারণ করতেকরতে পাখী মাথায় করে নদীর মধ্যে নাবলে। বহুকষ্টে নদী পারহল। তখন রাত সাড়ে দশটা। আমি কোনরকম গুটিমুটি মেরে শুয়ে

(৬৮)

পড়লুম। বেশ খানিকটা নিদ্রাকর্ষণ হয়েছে এমন সময়ে হঠাৎ একটা বেহারায় পা
পিছলে গিয়ে পাকীটা খুব একটা নাড়া পেলো---অকস্মাৎ ঘুম ভেঙে গিয়ে বুকের ভিতর
ভারি ধড়ান্ ধড়ান্ করতেলাগল। তারপরথেকে অর্ধঘুম অর্ধজাগরণে রাত্রির ছপূরের
সময় আমাদের পাণ্ডুর কুঠিতে এসে উত্তীর্ণহলুম।

—*—

৯ই সেপ্টেম্বর, ১৮৯১।

অনেকদিন পরে কাল মেঘবৃষ্টি কেটে শরতের সোনার রোদুর উঠেছিল। পৃথিবীতে যে রোদুর আছে সে কথা যেন একেবারে ভুলেগিয়েছিলুম; হঠাৎ যখন কাল-দশটা এগারোটার পর রোদুর ভেঙেপড়ল তখন যেন একটা নতুন জিনিষ দেখে মনে অপূর্ণ বিষয়ের উদয় হল। দিনটি বড় চমৎকার হয়েছিল। আমি ছপুরবেলায় আনাহারের পর বারান্দার সামনে একটি আরামকেদারার উপরে পা ছড়িয়ে দিয়ে অন্ধশয়ান অবস্থায় জাগ্রৎস্বপ্নে নিযুক্ত ছিলাম। আমার চোখের সামনে আমাদের বাড়ির কম্পাউন্ডের কতকগুলি নারকেল গাছ,—তার উদিকে যতদূর দৃষ্টি যায় কেবলি শস্যক্ষেত্র, শস্যক্ষেত্রের একেবারে প্রান্তভাগে গাছপালার একটুখানি ঝাপসা নীল আভাসমাত্র। ঘুঘু ডাকে এবং মাঝেমাঝে গোকুর গলার নুপুর শোনাযাচ্ছে। কাঠবিড়ালী একবার ল্যাজের উপর ভর দিয়ে বসে মাথা তুলে চকিতের মধ্যে অদৃশ্য হচ্ছে। খুব একটা নিঃস্বপ্ন নিস্তব্ধ নিরালা ভাব। বাতাস অবোধে হু হু করে বয়ে আসচে—নারকেল গাছের পাতা ঝব ঝব শব্দ করে কাঁপচে। দুচারজন চাষা মাঠের একজায়গায় জটলাকরে ধানের ছোটছোট চারা উপড়ে নিয়ে আঁটি করেকরে বাঁধচে। কাজকর্মের মধ্যে এইটুকু কেবল দেখাযাচ্ছে।

বেলায় উঠে দেখলুম চমৎকার রোদদুর উঠেছে এবং শরতের পরিপূর্ণ নদীব জল তলু তলু থৈ থৈ করচে। নদীর জল এবং তীর প্রায় সমতল—ধানের ক্ষেত সুন্দর সবুজ এবং গ্রামের গাছপালাগুলি বর্ষাবসানে সতেজ এবং নিবিড় হয়েউঠেছে। এমন সুন্দর লাগল সে আর কি বলব। দুপুরবেলা খুব এক পম্পা রুষ্টি হয়েগেল। তার পরে বিকেলে পদ্মারাধারে আমাদের নারকেল বনের মধ্যে সূর্যাস্ত হ'ল। আমি নদীর ধারে উঠে আন্তেআন্তে বেড়াচ্ছিলুম। আমার সামনের দিকে দূরে আমবাগানে সজ্জার ছায়া পড়েআম্চে এবং আমার ফেরবার মুখে নাবকেল গাছগুলির পিছনে তাকাশ সোনার সোনালী হয়েউঠেছে। পৃথিবী যে কি আশ্চর্য সুন্দরী এবং কি প্রশস্তপ্রাণে এবং গভীরভাবে পরিপূর্ণতা এইখানে না এলে মনেপড়ে না। যখন সজ্জাবেলা বোটের উপর চুপকরে বসেথাকি, জল শুক থাকে, তীর আবছায়া হয়ে আসে, এবং আকাশের প্রান্তে সূর্যাস্তের দীপ্তি ক্রমেক্রমে ম্লান হয়েযায়, তখন আমার সর্কাদে এবং সমস্ত মনের উপর নিস্তর নতনের প্রকৃতির কি একটা বৃহৎ উদার বাক্য-হীন স্পর্শ অমুভবকরি! কি শান্তি, কি স্নেহ, কি মহত্ত্ব, কি অসীম করুণাপূর্ণ বিষাদ! এই লোকনিলয় শস্যক্ষেত্রথেকে ঐ নির্জ্বল নক্ষত্রলোকপর্ব্যন্ত একটা স্তম্ভিত হৃদয়রাশিতে আকাশ কানারকানায় পরিপূর্ণ হয়েওঠে; আমি তার মধ্যে অবগাহনকরে অসীম মানসলোকে একলা বসেথাকি, কেবল মৌলবীটা পাশে দাঁড়িয়ে অবিশ্রাম বক্ বক্ করে আমাকে ব্যথিত করেতোলে।

আজ দিনটি বেশ হয়েছে। ঘাটে দুটিএকটি করে নৌকো লাগ্‌চে—বিদেশথেকে প্রবাসীরা পুজোর ছুটিতে পোঁটলাপুঁটলি বাঁধা ধামা বোঝাইকরে নানা উপহারসামগ্রী নিয়ে সম্বৎসরপরে বাড়ি ফিরেআস্‌চে। দেখলুম একটি বাবু ঘাটের কাছাকাছি নৌকো আস্‌তেই পুরোণো কাপড় বদলে একটি নতুন কৌচানো ধুতি পরলে, জামার উপর শাদা রেসমের একখানি চাঘনাকোট গায়ে দিলে, আরএকখানি পাকানো চাদর বহুযত্নে কাঁধের উপর ঝুলিয়ে ছাতা ঘাড়েকরে গ্রামের অভিমুখে চলল। ধানের ক্ষেত খরখরকরে কাঁপ্‌চে—আকাশে শাদাশাদা মেঘের স্তূপ—তারি উপর আম এবং নারকেল গাছের মাথা উঠেচে—নারকেলের পাতা বাতাসে ঝুঝুঝুঝু—চরের উপর দুটিএকটাকরে কাশ ফুটেউঠবার উপক্রমকরেচে—সবস্বক্‌ বেশএকটা সুখের দৃশ্য। বিদেশথেকে যে লোকটি এইমাত্র গ্রামে ফিরেএল, তার মনের ভাব, তার ঘরের লোকদের মিলনের আগ্রহ, এবং শরৎকালের এই আব্বাশ, এই পৃথিবী, সকাল বেলাকার এই ঝিঝিঝির বাতাস, এবং গাছপালা তৃণশুল্ক নদীর তরঙ্গসকলের ভিতরকার একটি অবিশ্রাম সঘন কম্পন, সমস্ত মিশিয়ে বাতায়নবর্তী এই একক যুবকটিকে সুখেহুখে একরকম অভিভূতকরে ফেল্‌ছিল। পৃথিবীতে জান্‌লার ধারে একলা বসে চোখ মেলে' দেখলেই মনে নতুন সাধ জন্মায়—নতুন সাধ ঠিক নয়, পুরোণো সাধ নানা নতুন মূর্তি ধারণকরতে আরম্ভকরে। পশ্চাদিন অমনি বোটের জান্‌লার কাছে চুপ করে বসেআছি—একটা জেলেডিঙিতে একজন মাঝি গান গাইতেগাইতে চলে গেল—খুব যে সুস্বর তা নয়। হঠাৎ মনে পড়েগেল বহুকাল হল ছেলেবেলায় বোটেকরে পদ্মায় আস্‌ছিলুম—একদিন রাস্তির প্রায় ছোটর সময় ঘুম ভেঙেযেতেই বোটের জান্‌লাটা তুলেধরে মুখবাড়িয়ে দেখলুম নিস্তরঙ্গ নদীর উপরে ফুট্‌ফুটে জ্যোৎস্না হয়েছে, একটি ছোট ডিঙিতে একজন ছোকরা একলা দাঁড়বেয়ে চলেছে, এমনি মিলি

গলায় গানধরেছে—গান তার পূর্বে তেমন মিষ্টি কখনো শুনিনি। হঠাৎ মনে হল, আবার যদি জীবনটা ঠিক সেইদিনথেকে ফিরেপাই। আরএকবার পরীক্ষাকরে দেখা যায়—এবার তাকে আর শুধু অপরিভূক্তকরে ফেলেরেখে দিইনে—কবির গান গলায় নিয়ে একটি ছিপ্ছিপে ডিঙিতে জোয়ারের বেলায় পৃথিবীতে ভেসেপড়ি, গান গাই এবং বশ করি এবং দেখেআসি পৃথিবীতে কোথায় কি আছে ; আপনাকেও একবার জানানু দিই, অন্ধকেও একবার জানি ; জীবনে যৌবনে উচ্ছ্বসিতহয়ে বাতাসের মত একবার ছ হ করে বেড়িয়েআসি, তারপরে ঘরে ফিরেএসে পরিপূর্ণ প্রফুল্ল বার্ক্যটা কবির মত কাটাই। খুব যে একটা উঁচু আইডিয়াল তা নয়। জগতের হিত করা এর চেয়ে ঢের বেশি বড় আইডিয়াল হতেপারে—কিন্তু আমি সবস্বচ্ছ ঘেরকম লোক আমার ওটা মনেও উদয় হয় না। উপবাস করে, আকাশের দিকে তাকিয়ে অনিদ্র থেকে সর্বদা মনেমনে বিতর্ককরে, পৃথিবীকে এবং মনুষ্যহৃদয়কে কথায়কথায় বঞ্চিতকরে স্বৈচ্ছারচিত ছর্ভিক্ষে এই ছল্ভ জীবন ত্যাগকরতে চাইনে। পৃথিবী যে সৃষ্টিকর্তার একটা ফাঁকি এবং সয়তানের একটা ফাঁদ তা না মনেকরে একে বিশ্বাসকরে, ভালবেসে ভালবাসাপেয়ে মানুষের মত বেঁচে এবং মানুষের মত মরেগেলেই যথেষ্ট ;—দেবতার মত হাওয়া হয়েযাবার চেষ্টাকরা আমার কাজ নয়।

শিলাইদহ,

অক্টোবর, ১৮৯১। ২২ শে আশ্বিন।

কাল সন্ধ্যার সময় নদীর ধারে একবার পশ্চিমদিকের সোনার সূর্যাস্ত এবং এক-বার পূর্বদিকের রূপোর চন্দ্রোদয়ের দিকে ফিরে গৌফে তা দিতেদিতে পারচারীকরে বেড়াচ্ছিলুম। রুগ্ন ছেলের দিকে মা যেমনকরে তাকায় প্রকৃতি সেইরকম স্নগভীর স্তব্ধ এবং স্নিগ্ধ বিবাদের সঙ্গে আমার মুখের দিকে চেয়েছিল—নদীর জল আকাশের মত স্থির, এবং আমাদের ছুট বাঁধা নৌকো জলচরপাখীর মত মুখের উপর পাখা ঝেঁপে স্থিরভাবে ঘুমিয়েআছে এমন সময় মৌলবী এসে আমাদের ভীতকণ্ঠে চুপি চুপি থবর দিলে “কলকাতার ভজিয়া আয়ছে।” এক মুহূর্তের মধ্যে কতরকম অসম্ভব আশঙ্কা যে মনে উদয় হল তা আর বলতেপারিনি। যাহোক মনের চাঞ্চল্য দমনকরে গম্ভীর স্থিরভাবে আমার রাজচৌকিতে এসে বসে ভজিয়াকে ডেকেপাঠালুম। ভজিয়া যখন ঘরে প্রবেশকরেই কাঁহনির স্রব ধরে আমার পা জড়িয়েধরলে তখন বুঝলুম হৃৎটনা যদি কারো হয়েথাকে ত সে ভজিয়ার। তার পরে তার সেই বাঁকা বাঙলার সঙ্গে নাকের স্রব এবং চোখের জল মিশিয়ে বিস্তর অসংলগ্ন ঘটনা বলেযেতে লাগল। বহু কষ্টে তার যা সার সংগ্রহকরা গেল সেটি হচ্ছে এই—ভজিয়া এবং ভজিয়ার মায়ে প্রায়ই ঝগড়া বেধেথাকে—কিছুই আশ্চর্য নয়—কারণ হুজনেই আমাদের পশ্চিম আর্য্যাবর্তের বীরান্না, কেউ হৃদয়ের কোমলতার জন্তে প্রসিদ্ধ নয়। এর মধ্যে একদিন সন্ধ্যাবেলায় মায়ে ঝিয়ে মুখোমুখি থেকে হাতাহাতি বেধেগিয়েছিল—স্নেহালাপ থেকে যে আলিঙ্গন তা নয়, গালাগালি থেকে মারামারি। সেই বাহ্যুদ্বে তার মায়েই পতন হয়—এবং সে কিছু গুরুতর আহতও হয়েছিল। ভজিয়া বলে, তার মা তাকে একটা কাঁসার বাটি নিয়ে মস্তক লক্ষ্যকরে তাড়াকরে, সে আত্মরক্ষার চেষ্টাকরতে দৈবাৎ তার বালাটা তার মায়ের মাথায় না কোথায় লেগে রক্তপাত হয়। যাহোক এইসব

ব্যাপারে সেই মুহূর্তেই তাকে তেতাল্লা থেকে নিম্নলোকে নির্ধাসিতকরে দেওয়া হয়েছে। ব্যাপারটা তিনচার দিন হয়েছে কিন্তু আমি কোন খবরই পাইনি—মাথার উপরে একেবারে হঠাৎ বিনা নোটিসে ভজিয়াযাক।



শিলাইদহ,

অক্টোবর, ১৮৯১। ২রা কার্তিক।

আমার বোধ হয় কলকাতা ছেড়ে বেরিয়ে এলেই মানুষের নিজের স্থায়িত্ব এবং মহত্বের উপর বিশ্বাস অনেকটা হ্রাস হয়ে আসে। এখানে মানুষ কম এবং পৃথিবীটাই বেশি—চারিদিকে এমন সব জিনিষ দেখা যায় যা আজ তৈরিকরে কাল মেরামতকরে পশুদিন বিক্রির ফেলবার নয়, যা মানুষের জন্মমৃত্যু ক্রিয়াকলাপের মধ্যে চিরদিন অটলভাবে দাঁড়িয়ে আছে, প্রতিদিন সমানভাবে যাতায়াতকরে এবং চিরকাল অবি-শ্রান্তভাবে প্রবাহিত হচ্ছে। পোড়াগায়ে এলে আমি মানুষকে স্বতন্ত্র মানুষভাবে দেখিনে। যেমন নানা দেশদিয়ে নদী চলেচে, মানুষের শ্রোতও তেমনি কলরবসহকারে গাছপালা গ্রাম নগরের মধ্যে দিয়ে একেবেঁকে চিরকালধরে চলেচে—এ আর ফুরায় না। মেন্ মে কাম্ এণ্ড্ মেন্ মে গো, বাট্, আই গো অন্ ফর্ অভার—কথাটা ঠিক সঙ্গত নয়। মানুষও নানা শাখাপ্রশাখা নিয়ে নদীর মতই চলেচে—তার একপ্রান্তে জন্মশিখরে আর এক প্রান্তে মরণসাগরে, দুই দিকে দুই অন্ধকার রহস্য, মাঝখানে বিচিত্র লীলা এবং কর্ম এবং কলধ্বনি—কোনকালে এর আর শেষ নেই। ওই শোন মাঠে চাষা গান গাচ্ছে, জেলেডিঙি ভেসেচলেচে, বেলা যাচ্ছে, রোদ্দ ক্রমেই বেড়ে উঠেচে—ঘাটে কেউ স্নানকরচে কেউ জল নিয়ে যাচ্ছে—এমনিকরে এই শান্তিময়ী নদীর দুই তীরে গ্রামের মধ্যে গাছের ছায়ায় শতশত বৎসর গুন্ গুন্ শব্দ করতেকরতে ছুটে চলেচে—এবং সকলের মধ্যে থেকে একটা করুণধ্বনি জেগে উঠেচে, আই গো অন্ ফর্ অভার। ছপুরবেলার নিস্তকতার মধ্যে যখন কোন রাখাল দূরথেকে উর্দ্ধকণ্ঠে হ্রাস সঙ্গীকে ডাকদেয়, এবং একটা নৌকো ছপ্ ছপ্ শব্দকরে ঘরের দিকে ফিরেযায়, এবং মেয়েরা ঘড়াদিয়ে জল ঠেলেদেয় তাঁর চল্ চল্ শব্দ ওঠে, তার সঙ্গে মধ্যাহ্নপ্রকৃতির নানারকম অনির্দিষ্ট ধ্বনি—দুই একটা পাখীর ডাক, মৌমাছির গুন্ গুন্, বাতাসে বোটটা আস্তে আস্তে বেকে যেতে থাকে তারই একরকম কাতর স্বর—সবস্বত্ব এমন

একটা করুণ ঘুমপাড়ানী গান—যেন মা সমস্ত বেলা বসেবসে তার ব্যথিত ছেলেকে ঘুমপাড়িয়ে তুলিয়েরাখবার চেষ্টা করচে—বল্চে, আর ভাবিসনে, আর কান্দিসনে, আর কাড়াকাড়ি মারামারি করিসনে, আর তর্কবিতর্ক রাখ্—একটুখানি ভুলেথাক্ একটুখানি ঘুমো ; বলে তপ্ত কপালে আত্মে আত্মে করাধাতকরচে ।

— • —

শিলাইদহ,

সোমবার, ৩রা কার্তিক ।

কোজাগর পূর্ণিমার দিন, নদীর ধারেধারে আন্তেআন্তে বেড়াচ্ছিলুম—আর, মনের মধ্যে স্বগত কথোপকথন চলছিল—ঠিক “কথোপকথন” বলা যায় না—বোধ হয় আমি একলাই বকেযাচ্ছিলুম আর আমার সেই কাল্পনিক সঙ্গীটি অগত্যা চুপচাপকরে শুনেযাচ্ছিল, নিজের হয়ে একটা জবাবদেওয়াও সে বেচারার যো ছিল না—আমি তার মুখে যদি একটা নিতান্ত অসঙ্গত কথাও বসিয়েদিতুম তাহলেও তার কোন উপায় ছিল না । কিন্তু কি চমৎকার হইবেছিল কি আর বল্বে ! কতবার বলেছি, কিন্তু সম্পূর্ণ কিছুতেই বলা যায় না । নদীতে একটা রেখামাত্র ছিল না—ও-ই সেই চরের পরপারে যেখানে পদ্মান জলেব শেষপ্রান্তে দেখাযাচ্ছে সেখানথেকে আর এপর্যন্ত একটা প্রশস্ত জ্যোৎস্নারেখা বিকসিককরচে—একটি লোক নেই একটি নোকো নেই, ওপারের নতুন চার একটা গাছ নেই একটি তৃণ নেই—মনেহয় যেন একটি উজাড় পৃথিবীর উপরে একটি উদাসীন ঠাঁদের উদয়হুচে—জনশূন্য জগতের মাঝখানদিয়ে একটি লক্ষ্যহীন নদী বহেচলেছে, মস্তএকটা পুরাতন গল্প এই পবিত্যক্তপৃথিবীর উপরে শেষহয়ে গেছে, আজ সেই সব রাজা রাজকন্যা পাত্র মিত্র স্বর্ণপুরী কিছুই নেই, কেবল সেই গল্পের “তেপান্তরের মাঠ” এবং “সাত সমুদ্র তেরো নদী” ম্লান জ্যোৎস্নার ধু ধু করচে ।

আমি যেন সেই মুমূর্ষু পৃথিবীর একটিমাত্র নাড়ীর মত আন্তেআন্তে চলছিলুম । আবসকলে ছিল আরএক পারে, জীবনের পারে—সেখানে এই ব্রিটিশ গবর্নেন্ট এবং উনবিংশ শতাব্দী এবং চা এবং চুরোট । কতদিনথেকে কত লোক আমার মত এই-রকম একলা দাঁড়িয়ে অমুভবকরেচে এবং কত কবি প্রকাশকরতে চেষ্টাকরেচে, কিন্তু হে অনির্বচনীয়, এ কি, এ কিসের জন্মে, এ কিসের উদ্বেগ, এই নিরুদ্দেশ নিরাঙ্কুলতার নাম কি, অর্থ কি—হৃদয়ের ঠিক মাঝখানটা বিদীর্ণকরে কবে সেই সুর বেরোবে যার দ্বারা এর সঙ্গীত ঠিক ব্যক্ত হবে !

কিছু আগেই পাবনাথেকে এ—তার মেম্ এবং কচিকাচা নিয়ে এসে উপস্থিত। মেম্ চা খায়, আবার চা নেই—মেম্ ছেলেবেলাথেকে ডাল ছড়কে দেখতে পারে না, আমি অল্প খাওয়ার অভাবে ডাল তৈরিকরতে দিয়েছি, মেম্ ইয়ান্স্ এণ্ড টু ইয়ান্স্ এণ্ড মাছ ছোঁয় না, আমি মাগুর মাছের ঝোল রাঁধিয়ে নিশ্চিন্ত হয়ে আছি। কি ভাগি কাণ্ট্রি সুইট্‌স্ ভালবাসে তাই একটা বহুকালের শক্ত গুক্‌নো সন্দেশ বহুকষ্টে কাঁটা দিয়ে ভেঙে খেলে। এক বাস্ক বিস্কুট গতবারের রসদের অবশেষস্বরূপে ছিল সেটা কাজেলাগবে। আমি আবার একটা মস্ত গলদকরেছি—আমি সাহেবকে বলেছি, তোমার মেম্ চা খায় কিন্তু হুর্ভাগ্যক্রমে আমার চা নেই, কোকো আছে। সে বলে আমার মেম্ চায়ের চেয়ে কোকো বেশি ভালবাসে। আমি আলমারি খেঁটে দেখি কোকো নেই—সবগুলোই কলকাতায় ফিরে গেছে। আবার তাকে বলতে হবে চা-ও নেই কোকোও নেই পদ্মার জল আর চায়ের কাংলি আছে—দেখি কি রকম মুখের ভাব হয়। সাহেবের ছেলে দুটো এমন ছরস্ক, এবং ছুট্টু দেখতে, সে আর কি বলবে। মাঝে মাঝে সাহেব মেমেতে খুব গুরুতর ঝগড়া হয়েযাচ্ছে আমি এ বোট থেকে গুন্তে পাচ্ছি। ছেলেদের কান্না, চাকরবাকরদের চেঁচামেচি, এবং দম্পতির তর্কবিতর্কের জালায় অস্থির হয়ে আছি। আজ আর কোন কাজকর্ম লেখাপড়ার সুবিধে দেখ্‌চিনে। মেমটা তার ছেলেকে ধমকানো “What a little গুয়ার ‘you are!’” দেখ্‌ন্ত, আমার ঘাড়ে এসব উপদ্রব কেন?

শিলাইদহ,
সোমবার, ৬ই জানুয়ারী,
১৮৯২।

সন্ধ্যা হয়ে গেছে। গরমের সময় যখন বোটে ছিলুম, এই সময়টা বোটের জান্নার কাছে বসে আলামো নিবিয়েদিয়ে চুপচাপ পড়ে থাকতুম, নদীর শব্দে, সন্ধ্যার বাতাসে, নক্ষত্রভরা আকাশের নিশ্চিন্তায় মনের সমস্ত কল্লনা মধুর আকাব ধরে আমাদের ঘিরে বসত, অনেক রাতপর্যন্ত একপ্রকার নিবিড় নির্জন আনন্দে কেটে যেত। শীতকালের সন্ধ্যাবেলায় সমস্ত প্রকৃতিকে বাইরে ফেলে জান্নাদরজা বন্ধ করে বোটের এই ক্ষুদ্র কার্ঠময় গহবরের মধ্যে একটি বাতি জ্বলে মনটাকে তেমন দৌড় দিতে পারিনে—যেন নিজের সঙ্গে নিজেকে বড় বেশি ঘেঁসে ঘেঁসি ঠাসাঠাসিকরে থাকতে হয়। এরকম অবস্থায় আপনাদের মনটিকে নিয়ে থাকা বড় শক্ত।

সাহিত্যের মধ্যে ছুটিমাত্র গল্পের বই এনেছিলুম, কিন্তু এমনি আমার পোড়া কপাল, আজ বিদায়নের সময় সাহেবের মেম সেই ছুটি বই ধারনিয়ে গেছেন, কবে শোধ কববেন তার কোন ঠিকানা নেই। সেই ছোটো হাতে তুলে নিয়ে সলজ্জ কাকুতির ভাবে আরম্ভ করলেন “মিষ্টার টাগোর, বৃড ইয়ু”—কথাটা শেষ করতে না করতে আমি খুব সজোরে ঘাড়নেড়ে বল্লুম “সার্টেনলি!” এতে কতটা দূর কি বোঝায় ঠিক বলতে পারিনে। আসলে, তাঁরা তখন বিদায়নিচ্ছিলেন সেই উৎসাহে আমি আমার অন্ধেক রাজস্ব দিয়ে ফেলতে পারতুম (যে পেত তার যে খুব বেশি লাভহত তা নয়।) যাহোক্ তারা আজ গেছে—আমার এই ছোটোদিন একেবারে ঘুলিয়েদিয়ে গেছে—আবার থিতিয়েনিতে ছদিন যাবে—মেজাজটা এমনি খারাপ হয়ে আছে যে ভয়েভয়ে আছি পাছে কাউকে অজায় অকারণে তাড়নাকরে উঠি—এত বেশি সাবধানে আছি যে সন্ধ্যা অবস্থায় যখন একজনকে ধমক দিতুম এখন তাকে খুব নরম নরম করে বল্চি—মেজাজ বিগড়ে গেলে অনেক সময় আমার এইরকম উন্টোরকম ব্যাপার হয়—সে সময়ে ছেলেরা কাছে থাকলে ভয় হয় পাছে তাদের লঘুদোষে গুরুদণ্ড দিই, এইজন্তে তাদের দণ্ডই দিইনে—খুব দৃঢ় করে সহিষ্ণুতা অবলম্বন করে থাকি।

শিলাইদহ,
বৃহস্পতিবার, ৯ই জানুয়ারী,
১৮৯২।

হুইএকদিনথেকে এখানকার প্রকৃতি শীত এবং বসন্তের মধ্যে ইতস্ততঃকরচে—
সকালে হয়ত উত্তরেবাতাসে জলেস্থলে হী হী ধরিয়েদিয়ে গেল—সন্ধ্যাবেলায় গুরু-
পক্ষের জ্যোৎস্নায় দক্ষিণেবাতাসে চারিদিক হু হু করেউঠল। বসন্ত অনেকটা এসে
পৌঁচেছে বেশ বোঝাযাচ্ছে। অনেকদিনপরে আজকাল ওপারের বাগানথেকে
একটা পাপিয়া ডাকতে আরম্ভকরেচে। মানুষের মনটাও কতকটা বিচলিতহয়ে
উঠচে—আজকাল সন্ধ্যা হলে ওপারের গ্রামথেকে গানবাজনার শব্দ শুনতেপাওয়া
যায়—এর থেকে বোঝা যাচ্ছে, লোকে দরজা জানুলা বন্ধকরে মুড়িমুড়ি দিয়ে তাড়াতাড়ি
শুয়ে পড়বার জন্তে তেমন উৎসুক নয়। আজ পূর্ণিমারাত—ঠিক আমার ঝাঁ-দিকের
খোলা জানুয়ার উপরেই একটা মস্ত চাঁদ উঠে আমার মুখের দিকে তাকিয়ে আছে—
বোধহয় দেখেচে আমি চিঠিতে তারসম্বন্ধে কোন নিষ্পত্তি করচি কিনা—সে হয়ত
মনে করে, তার জ্যোৎস্নার চেয়ে তার কলঙ্কের কথা নিয়েই পৃথিবীর লোকে বেশি
কানাকানি করে। নিস্তব্ধ চরে একটা টিটি পাখী ডাকচে—নদী স্থির—নৌকো নেই,
জলের উপর স্থির ছায়া ফেলে' ওপারের ঘনীভূত বন স্তম্ভিত হয়ে রয়েছে—ঘুমন্ত চোখ
খোলা থাকলে যেমন দেখতে হয়, এই প্রকাণ্ড পূর্ণিমার আকাশ সেইরকম ঈষৎ ঝাপসা
দেখাচ্ছে। কাল সন্ধ্যা থেকে আবার ক্রমেক্রমে অন্ধকারের হস্তগাত হবে, কাল
কাছারী সেরে এই ছোট নদীটি পার হবার সময় দেখতে পাব আমার সঙ্গে আমার
এই প্রবাসের প্রণয়িনীর একটুখানি বিচ্ছেদ হয়েছে, কাল যে আমার কাছে আপনায়
রহস্যময় অপায় হৃদয় উদঘাটন করে দিয়েছিল আজ তার মনে যেন একটু সন্দেহ
উপস্থিত হয়েছে, যেন তার মনেহচ্ছে একেবারে এতখানি আত্মপ্রকাশ কি ভাল
হয়েছিল, তাই হৃদয় আবার একটু একটু করে বন্ধ করচে। বাস্তবিক বিবেশে বিজ্ঞান-
অবস্থার প্রকৃতি বড় কাছাকাছির জিনিষ—আমি সত্যসত্য জু'তিনদিন ধরে মাঝে মাঝে

ভেবেচি, পূর্ণিমার পরদিন থেকে আমি আর এ জোয়ার পাব না—আমি বেন বিদেশ থেকে আরো একটু বিদেশে চলে যাব, কাজকর্মের পরে প্রতিদিন সন্ধ্যাবেলায় যে একটি শান্তিময় পরিচিত সৌন্দর্য আমার জন্তে নদীতীরে অপেক্ষা করে থাকত সে আর থাকবে না—অন্ধকারের মধ্যে দিয়ে বোট ফিরে আসতে হবে ।

কিন্তু আজ পূর্ণিমা, এ বৎসরকার বসন্তের এই প্রথম পূর্ণিমা, এর কথাটা লিখে রেখে দিলাম—হয়ত অনেকদিন পরে এই নিতরুণ রাত্রিট মনে পড়বে—ঐ টি ট পাখীর ডাকস্বরূপ এবং ওপারের ঐ বাধা নৌকোয় যে আলোটি জ্বলচে সেটিস্বরূপ ; এই একটুখানি উজ্জ্বল নদীর রেখা, ঐ একটুখানি অন্ধকার বনের একটা পৌচ্, এবং ঐ নির্লিপ্ত উমানীন পাণ্ডুবর্ণ আকাশ ।



সকাল থেকে সুন্দর বাতাস দিচ্ছে—কোন কাজ করতে ইচ্ছে করচে না। বোধ হয় এগারোটা কিম্বা সাড়ে এগারোটা বেজে গেছে—কিন্তু এ পর্য্যন্ত লেখা পড়া কিম্বা কোন কাজে হাত দিইনি। সকাল থেকে একটি চৌকিতে স্থির হয়ে বসে আছি। মাথাব মধ্যে কত টুকরো টুকরো লাইন এবং কত অসমাপ্ত ভাব যাতায়াত করচে, কিন্তু সেগুলোকে একত্র করে বাধি কিম্বা পরিস্ফুট করে তুলি এমন শক্তি অনুভব করচিনি। সেই গানটা মনে পড়চে “পারেরিয়া বাজে, ঝনক ঝনক ঝন ঝন নন নন নন” সুন্দর সকালবেলায় মধুর বাতাসে নদীর মাঝখানে মাথার মধ্যে সেইরকম ঝন নন নুপুর বাজচে—কিন্তু সে কেবল এদিক ওদিক থেকে অন্তরালে—কেউ ধরা দিচ্ছে না, দেখা দিচ্ছে না। তাই চুপচাপ করে বসে আছি। নদীর জল অনেকটা শুকিয়ে এসেচে, কোথাও এক কোনরের বেশি জল আর প্রায় নেই—তাই বোটটাকে নদীর প্রায় মাঝখানে বেঁধে রাখা কিছুই শক্ত হয়নি। আমার ডানদিকের পারে চরের উপরে চাষারা চাষ করচে এবং মাঝে মাঝে গোরুকে জল খাইয়ে নিয়ে যাচ্ছে—আমার বামপারে শিলাইদহের নারকেল এবং আমবাগান, ঘাটে মেয়েরা কাপড় কাচ্চে, জল তুলচে, স্নান করচে এবং উচ্চৈষরে বাঁদল ভাণ্ডায় হাস্যালাপ করচে—যারা অল্পবয়সী মেয়ে, তাদের জগকীড়া আর শেষ হয় না। একবার স্নান সেরে উপরে উঠে আবার ঝুপ করে জলে ঝাঁপিয়ে পড়চে—তাদের নিশ্চিন্ত উচ্ছ্বাস্য শব্দে বেশ লাগে। পুরুষরা গভীরভাবে এসে গোটাকতক ডুব মেয়ে তাদের নিত্যকর্ম সমাপ্ত করে চলে যায়—কিন্তু মেয়েদের যেন জলের সঙ্গে বেশি ডাব। পরস্পরের যেন একটা সাদৃশ্য এবং ^A সখিত্ব আছে—জল এবং মেয়ে উভয়েই বেশ সহজে ছল্ ছল্ জল্ জল্ করতে থাকে, একটা বেশ সহজ গতি ছন্দ তরঙ্গ, দুঃখতাপে অল্পে অল্পে শুকিয়ে যেতে পারে কিন্তু আঘাতে একেবারে জন্মের মত ছ'থানা হয়ে ভেঙে যায় না। সমস্ত কঠিন পৃথিবীকে

সে বাহুবন্ধনে আলিঙ্গন করে আছে, পৃথিবী তার অন্তরের গভীর রহস্য বুঝতে পারে না ; সে নিজের শত্রু উৎপাদন করে না কিন্তু ভিতরে ভিতরে সে না থাকলে পৃথিবীতে একটি ঘাসও গজাতে পারত না । মেয়েকে পুরুষের সঙ্গে তুলনা করে টেনিসন্ বলেচেন, Water unto wine—আমার আজকার মনে হচ্ছে জল unto স্থল । তাইজন্তে মেয়েতে ও জলেতে বেশ মিশধায়—অন্ত অনেকরকম ভারবহন মেয়েকে শোভা পায় না, কিন্তু উৎসথেকে কুয়োথেকে ঘাটথেকে জল তুলে নিয়েযাওয়া কোনকালেই মেয়েদের পক্ষে অসম্ভব মনে হয় না । গা ধোয়া স্নানকরা, পুকুরের ঘাটে এককোমর জলে বসে পরস্পর গল্পকরা, এসমস্ত মেয়েকে পক্ষে কেমন শোভন । আমি দেখেছি মেয়েরা জল ভালবাসে কেননা উভয়ে স্বজাত । অবিশ্রাম সহজপ্রবাহ এবং কলধ্বনি জল এবং মেয়ে ছাড়া আর কারো নেই । ইচ্ছে করলে আরো অনেক সাদৃশ্য দেখান যেতে পারত, কিন্তু বেশাও বোধকরি অনেক হয়েছে, এবং একটা কথা ফেনিয়ে বেশি নেংড়ানো কিছু নয় ।

এখানে এসে আমি এত এলিমেন্টস্ অফ পলিটিক্স্ এবং প্রভ্লেম্স্ অফ দি ফ্যুচার পড়ছি শুনে বোধহয় খুব আশ্চর্য্য ঠেকতে পারে। আসল কথা, ঠিক এখানকার উপযুক্ত কোন কাব্য নভেল খুঁজে পাইনে। যেটা খুলেদেখি সেই ইংরাজি নাম, ইংরাজি সমাজ, লগুনের রাস্তা এবং ড্রয়িংরুম, এবং যতরকম হিজিবিজি হাদ্জাম। বেশ শাদাসিদে সহজ সুন্দর উন্মুক্ত এবং অপ্রবিন্দুব মত উজ্জ্বল কোমল স্নগোল করণ কিছুই খুঁজে পাইনে। কেবল প্যাঁচের উপর প্যাঁচ, অ্যানালিসিসের উপর অ্যানালিসিস—কেবল মানবচরিত্রকে মুচড়ে নিংড়ে কুঁচকে মুচকে, তাকে সজোরে পাক দিয়েদিয়ে তারথেকে নতুন নতুন থিওরি এবং নীতিজ্ঞান বেরকরবার চেষ্টা। সেগুলো পড়তেগেলে আমার এখানকার এই গ্রীষ্মশীর্ণ ছোট নদীর শান্তশ্রোত, উদাস বাতাসের প্রবাহ, আকাশের অখণ্ড প্রদার, ছইকুলের অবিরল শান্তি এবং চারিদিকের নিস্তর্রতাকে একেবারে ঘুলিয়ে দেবে। এখানে পড়বার উপযোগী রচনা আমি প্রায় খুঁজে পাইনে, এক বৈষ্ণব কবিদের ছোটছোট পদ ছাড়া। বাংলার যদি কতকগুলি ভালভাল মেয়েলি রূপকথা জানতুম এবং সরলছন্দে সুন্দরকরে ছেলেবেলাকার ঘোরো-স্মৃতি দিয়ে সরসকরে লিখতে পারতুম তাহলে ঠিক এখানকার উপযুক্ত হত। বেশ ছোট নদীর কলরবের মত, ঘাটের মেয়েদের উচ্ছ্বাসি নিষ্ঠ কণ্ঠস্বর এবং ছোটখাট কথাবার্তার মত, বেশ নারকেলপাতার ঝুরঝুর কাঁপুনি, আমবাগানের ঘনছায়া, এবং প্রস্ফুটিত সর্ষেক্ষেতের গন্ধের মত—বেশ শাদাসিদে অথচ সুন্দর এবং শান্তিময়—অনেকখানি আকাশ আলো নিস্তর্রতা এবং করুণতায় পরিপূর্ণ। মারামারি হানাহানি ঘোঝাযুঝি কান্নাকাটি সে সমস্ত এই ছায়াময় নদীস্নেহবেষ্টিত প্রচ্ছন্ন বাংলাদেশের নয়। যাইহোক, এলিমেন্টস্ অফ পলিটিক্স্ জলেরউপরে তেলের মত এখানকার নিস্তর্র শান্তির উপরদিয়ে অবাধে ভেসে চলেযায, একে কোনরকমে নাড়াদিয়ে ভেঙেদেয় না।

নদীর মাঝখানে বসে আছি, দিনরাত্রি হু হু করে বাতাস দিচ্ছে, হুইদিকের হুইপার পৃথিবীর ছুটি আরম্ভ-রেখারমত বোবহচ্ছে—ওখানে জীবনের কেবল আভাসমাত্র দেখাদিয়েছে, জীবন স্তূতিভাবে পরিফুট হয়ে ওঠেনি—যারা জলতুল্চে, স্নানকরচে, নোকো বাচ্ছে, গোকচরাচ্ছে, মেঠো পথদিয়ে আন্চেবাচ্ছে, তারা যেন যথেষ্ট জীবন্ত সত্য নয়। অল্প জাঙ্গায় মানুষরা ভিড়করে, তাবা সাম্নে উপস্থিত হলে চিন্তার ব্যাঘাত করে, তাদের অস্তিত্বই যেন কুহুইদিয়ে ঠেলাদেয়, তারা প্রত্যেকে একএকটি পজ্জিটিভ মানুষ;—এখানকার এরা সম্মুখে আনাগোনা চলাবলা কাজকর্ম করচে—কিন্তু মনকে ঠেলাদিয়ে যাচ্ছে না। কোতুহলে সাম্নে দাঁড়িয়ে দেখ্চে কিন্তু সেই সরল কোতুহল ভিড়করে গায়ের উপর এসে পড়েনা। যাহোক, বেশ লাগ্চে।

বোলপুর।

শনিবার, ২রা মে, ১৮৯২।

জগৎসংসারে অনেকগুলো প্যারাডক্স আছে তারমধ্যে এও একটি যে, যেখানে বৃহৎদৃশ্য, অসীম আকাশ, নিবিড় মেঘ, গভীর ভাব, অর্থাৎ যেখানে অনন্তের আবির্ভাব সেখানে তার উপযুক্ত সঙ্গী একজন মানুষ—অনেকগুলো মানুষ ভারি ক্ষুদ্র এবং থিজি-বিজি। অসীমতা এবং একটি মানুষ উভয়ে পরস্পরের সমকক্ষ—আপন আপন সিংহাসনে পরস্পর মুখোমুখী বসে থাকবার যোগ্য। আর কতকগুলো মানুষে একত্রে থাকলে তারা পরস্পরকে ছেঁটেছোঁটে অত্যন্ত খাটো করে রেখে দেয়—একজন মানুষ যদি আপনার সমস্ত অন্তরাঙ্গাকে বিস্তৃত করতে চায় তাহলে এত বেশি জায়গার আবশ্যক করে যে কাছাকাছি পাঁচ ছ জনের স্থান থাকে না। অধিক লোক জোটাতে গেলেই পরস্পরের অনুরোধে আপনাকে সংক্ষেপ করতে হয়—যেখানে যতটুকু ফাঁক সেইখানে ততটুকু মাথা গলাতে হয়। মাঝের থেকে, দুই বাহু প্রসারিত করে দুই অঙ্গুলি পুণ করে প্রকৃতির এই অগাধ অনন্ত বিস্তীর্ণতাকে গ্রহণ করতে পারচিনে।

— o —

রসিকতা জিনিষটা বড় বিপদের জিনিষ—ও যদি প্রসন্ন সহাস্যমুখে আপনি ধরা দিলে ত অতি উত্তম, আর ওকে নিয়ে যদি টানাটানি করা যায় তবে বড়ই “ব্যাগ্রহ” হবার সম্ভাবনা। হাস্যরস প্রাচীনকালের ব্রহ্মাঙ্গের মত, যে ওর প্রয়োগ জানে সে ওকে নিয়ে একেবারে কুরুক্ষেত্র বাধিয়ে দিতে পারে—আর যে হতভাগ্য ছুঁড়তে জানে না অথচ নাড়তে যায়, তার বেলায় “বিমুখ ব্রহ্মাঙ্গ আসি অঙ্গীকেই বধে,” হাস্যরস তাকেই হাস্যজনক করে তোলে।

মেয়েরা রসিকতা করতে গিয়ে যদি মুখরা হয়ে পড়ে তবে সেটা ভারি অশোভন দেখতে হয়। আমার ত মনে হয় “কমিক্” হতে চেষ্টা করে সফল হলেও মেয়েদের সাজে না—নিষ্ফল হলেও মেয়েদের সাজে না। কারণ “কমিক্” জিনিষটা ভারি গাব্বা এবং প্রকাণ্ড। (“সাল্লিমিটি”র সঙ্গে “কমিক্যালিটি”র একটা আত্মীয়তার সম্পর্ক আছে—সেইজন্যে হাতি কমিক্, উট কমিক্, জিরাফ্ কমিক্, স্থূলতা কমিক্।) সৌন্দর্য্যের সঙ্গে বরঞ্চ প্রখরতা শোভা পায় যেমন ফুলের সঙ্গে কাঁটা—তেমনি শাণিত কথা মেয়েদের মুখে বড় বাজে বটে তেমনি সাজেও বটে। কিন্তু যে সকল বিক্রমে কোনরকম স্থূলত্বের আভাসমাত্র দেয় তার দিক দিয়েও মেয়েদের যাওয়া উচিত হয় না ;—সে হচ্ছে আমাদের সার্বাইম স্বজাতীয়ের জন্যে। পুরুষ ফল্গ্‌টাক্ আমাদের হাসিয়ে নাড়ি ছিঁড়ে দিতে পারে কিন্তু মেয়ে ফল্গ্‌টাক্ আমাদের গা জালিয়ে দিত।

কাল যে ঝড় সে আর কি বল্‌ব ! আমার সাধনার নিত্যনৈমিত্তিক লেখা সেরেটা^(১) থাবার জন্যে উপরে যাচ্ছি, এমন সময়ে প্রচণ্ড ঝড় এসে উপস্থিত। ধূলোয় আকাশ আচ্ছন্ন হয়ে গেল এবং বাগানের যত শুকনো পাতা একত্র হয়ে লাটিমের মত বাগানময় ঘুরে ঘুরে বেড়াতে লাগল,—যেন অরণ্যের যত প্রেতাঙ্গাগুলো হঠাৎ জেগে উঠে ভুতুড়ে নাচন নাচতে আরম্ভ করে দিলে। বাগানের সমস্ত গাছপালা পায়ে-শিকলি-বাধা প্রকাণ্ড জটায়ুপাখীর মত ডান। আছড়ে ঝটপট ঝটপট করতে লাগল। সে কি গর্জ্জন, কি মাতামাতি, কি একটা লুটোপুটি ব্যাপার ! ঝড়টা দেখে আমার মনে পড়ছিল, আমেরিকার Ranch সম্বন্ধে মাঝে মাঝে যে রকম বর্ণনা পড়া যায়—হঠাৎ কোন একটা বেড়া ভেঙে ফেলে ছ সাতশো বুনো ঘোড়া ধুলো উড়িয়ে উর্দ্ধ্বাসে ছুটে পালাচ্ছে, আর তার পিছনে পিছনে তাদের তাড়িয়ে ফিরিয়ে আনবার জন্যে বড় বড় ফাঁস হাতে অনেকগুলো অশ্বরোহী ছুটেছে—মাঝে মাঝে যেখানে যাকে পাচ্ছে সাঁই সাঁই শব্দে দিচ্ছে চাব্‌কে—বোলপুরের অব্যবহিত আকাশ এবং মাঠের মধ্যে যেন সেই রকমের একটা উচ্ছ্বল পলায়ন এবং পশ্চাৎগমন চলছে—দৌড় দৌড় ধবধর পালা' পালা' হুড়মুড় হুড়দাড় ব্যাপার।

পূর্বেই লিখেছি অপরাহ্নে আমি আপন মনে একাকী ছাত্তের উপর বেড়াই; কাল সন্ধ্যাবেলার আমার ছুই বন্ধুকে ছুই পার্শ্বে নিয়ে অশোরকে আমার পথপ্রদর্শক করে তাঁদের এখানকার প্রাকৃতিক শোভা সন্দর্শনকরানো আমার কর্তব্য মনে করে বেরিয়ে পড়া গেল। তখন সূর্য্য অস্ত গেছে কিন্তু অন্ধকার হয়নি। একেবারে দিগন্তের প্রান্তে যেখানে গাছের সার নীলবর্ণ হয়ে দেখা যাচ্ছে, তারি উপরেই ঠিক একটি রেখামাত্র খুব গাঢ় নীল মেঘ উঠে খুব চমৎকার দেখতে হয়েছে—আমি তারি মধ্যে একটুখানি কবিত্ত্ব করে বল্লম, ঠিক যেন নীল চোখের পাতার উপরে নীল সূক্ষ্ম লাগিয়েছে। সঙ্গীরা কেউ কেউ শুন্তে পেলেনা, কেউ কেউ বুঝতে পারলেনা—কেউ কেউ মংক্ষেপে বল্ল—হাঁ, দিবি্য দেখতে হয়েছে। তার পর থেকে দ্বিতীয়বার কবিত্ত্ব করতে আমার উৎসাহ হল না। প্রায় মাইলখানেক গিয়ে একটা বাধের ধারে একসার তালবন এবং তালবনের কাছে একটি মেঠো ঝরনার মত আছে—সেইটে দাঁড়িয়ে দাঁড়িয়ে দেখছি এমন সময়ে দেখি উত্তরে সেই নীল মেঘ অত্যন্ত প্রগাঢ় এবং ক্ষীণ হয়ে চলে আসচে এবং মধ্যে মধ্যে বিছ্যদন্ত বিকাশ করচে। আমাদের সকলেরই মত হল এরকম প্রাকৃতিক সৌন্দর্য্য ঘরের মধ্যে বসে দেখাই সর্বাপেক্ষা নিরাপদ, বাড়িমুখে যেমন কিরেচি অম্মনি প্রকাণ্ড মাঠের উপর দীর্ঘ পদক্ষেপ করতে করতে সরোবগর্জনে একটা ঝড় আমাদের ঘাড়ের উপর এসে পড়ল। আমরা যখন প্রকৃতিসুন্দরীর চোখের সূক্ষ্ম বাহার নিয়ে তারিক করছিলাম তখন তিলমাত্র আশঙ্কা করিনি যে, তিনি ঘোঁরাবিট্টা গৃহিনীর মত এত বড় একটা প্রকাণ্ড জপটাঘাত নিয়ে আমাদের উপর ছুটে আসবেন। গুলোর অম্মনি অন্ধকার হয়ে এল যে পাঁচ হাত দূরে কিছু দেখা যায় না। বাতাসের বেগ ক্রমেই বাড়তে লাগল—কাকরগুলো বায়ুতড়িত হয়ে ছিটে গুলির মত আমাদের

বিধিতে লাগল—মনে হল বাতাস পিছন থেকে ঝড় ধরে আমাদের ঠেলে নিয়ে যাচ্ছে—
 ফোঁটা ফোঁটা বৃষ্টিও পিট পিট করে মুখের উপর সবেগে আঘাত করতে লাগল। দৌড়
 দৌড়। মাঠ সমান নয়। এক এক জায়গায় আবার খোয়াইয়ের ভিতর নাবতে
 হয়, সেখানে সহজ অবস্থাতেই চলা শক্ত, এই ঝড়ের বেগে চলা আরো মুষ্ণিল। পথের
 মধ্যে আবার পায়ে কাঁটাত্মক একটা শুকনো ডাল বিধে গেল—সেটা ছাড়াতে গিয়ে
 বাতাস আবার পিছন থেকে ঠেলা দিয়ে মুখ খুঁড়ে ফেলবার চেষ্টা করে। বাড়ির যখন
 প্রায় কাছাকাছি এসেছি, তখন দেখি, তিন চারটে চাকর মহা সোব্গোল্ করে দ্বিতীয়
 আর একটা ঝড়ের মত আমাদের উপরে এসে পড়ল। কেউ হাত ধরে, কেউ আঁহা
 উহ্ বলে, কেউ পথদেখাতে চায়, কেউ আবার মনে করে বাবু বাতাসে উড়ে যাবেন
 বলে' পিঠের দিক থেকে জড়িয়ে ধরে; এই সমস্ত অহুচরদের দোঁরাঙ্কা কাটিয়ে কুটিরে
 এলোমেলো চুল, ধূলিমলিন দেহে, সিক্ত বস্ত্রে, হাঁপিয়ে বাড়িতে এসেত পড়লুম।
 ঘাহোক, একটা খুব শিক্ষালাভ করেছি—হয়ত কোন্‌দিন কোন্‌ কাব্যে কিম্বা উপন্যাসে
 বর্ণনা করতে বসতুম একজন নায়ক মাঠের মধ্যে দিয়ে ভীষণ ঝড়বৃষ্টি ভেঙে নায়িকার
 মধুর মুখচ্ছবি স্মরণ ক'রে অকাতরে চলে যাচ্ছে—কিন্তু এখন আর এরকম মিথ্যে কথা
 লিখতে পারব না; ঝড়ের সময় কারো মধুর মুখ মনে রাখা অসম্ভব—কি করলে চোখে
 কাঁকর ঢুকবেনা সেই চিন্তাই সর্বাপেক্ষা প্রবল হয়ে ওঠে। আমার আবার চোখে
 eye-glass ছিল, সেটা বাতাসে উড়িয়ে নিয়ে ফেলে, কিছুতেই রাখতে পারিনে।
 এক হাতে চষমা ধরে আর এক হাতে ধুতির কোঁচা সামলে পথের কাঁটাগাছ এবং গর্ভ
 বাঁচিয়ে চলছি। যদি এখানকার কোপাই নদীর ধারে আমার কোন প্রণয়িনীর বাড়ি
 থাকত, আমার চষমা এবং কোঁচা সামলাতুম, না, তার স্মৃতি সামলাতুম! বাড়িতে
 ফিরে এসে কাল অনেকক্ষণ ভাবলুম—বৈষ্ণব কবির। গভীর রাত্রে ঝড়ের সময় রাধিকার
 অকাতর অভিসারসম্বন্ধে অনেক ভাল ভাল মিষ্টি কবিতা লিখেচেন—কিন্তু একটা কথা
 জাবেননি এরকম ঝড়ে কৃষ্ণের কাছে তিনি কি মূর্ত্তি নিয়ে উপস্থিত হতেন? চুলগুলোর
 অবস্থা যে কিরকম হত সেত বেশ বোঝা যাচ্ছে। বেশবিক্রাসেরই বা কিরকম দশা!
 ধলাতে লিপ্ত হয়ে, তার উপর বৃষ্টির জলে কাদা জমিয়ে কুঁচবনে কিরকম অপক্লপ মূর্ত্তি
 করে গিয়েই দাঁড়াতেন! এসব কথা কিন্তু বৈষ্ণব কবিদের লেখা পড়বার সময় মনে
 হয় না—কেবল মানসচক্ষে ছবির মত দেখতে পাওয়া যায় একজন সুন্দরী শ্রাবণের
 অঙ্গকার রাত্রে বিকশিত কদম্ববনের ছায়া দিয়ে যমুনা র তীরপথে প্রেমের আকর্ষণে

ঝড়ঝড়ির মাঝে আশ্রয়বিহীন হয়ে স্বপ্নগতার মত চলেচেন ; পাছে শোনা যায় বলে
 পায়ের নুপুর বেঁধে রেখেচেন, পাছে দেখা যায় বলে নীলাস্বরী কাপড় পরেচেন, কিন্তু
 পাছে ভিজি যান বলে ছাতা নেননি, পাছে পড়ে যান বলে বাতি আনা আবশ্যক বোধ
 করেন নি । হায়, আবশ্যক জিনিষগুলো আবশ্যকের সময় এত বেশি দরকার, অথচ
 কবিশ্বের বেলায় এত উপেক্ষিত ! (আবশ্যকের শতলক্ষ দাসত্ববন্ধন থেকে আমাদের
 মুক্তি দেবার জন্তে কবিতা মিথ্যে ভাগ করচে । ছাতা জুতো জামাঘোড়া চিরকাল
 থাকবে । বরঞ্চ শোনা যায় সভ্যতার উন্নতি সহকারে কাব্য ক্রমে লোপ পাবে কিন্তু
 ছাতা জুতোর নতুন নতুন পেটেন্ট বেরোতে থাকবে ।) E.H.

এখানে রাত্রে কোন গির্জের ঘড়িতে ঘন্টা বাজে না—এবং কাছাকাছি কোন লোকালয় না থাকাতে পাখীরা গান বন্ধ করবানাব্রহ্মই সন্ধ্যার পর থেকে একেবারে পরিপূর্ণ নিশ্চলতা আরম্ভ হয়। প্রথম রাত্রি এবং অন্ধরাত্রে বিশেষ কোন প্রভেদ নেই। কলকাতায় অনিদ্রাব রাত্রি মস্ত একটা অন্ধকার নদীর মত, খুব ধীরে ধীরে চলতে থাকে, বিছানার চক্ষু মেলে চিৎ হয়ে গাড়ে তার গতিশীল মনে মনে গণনা করা যেতে পারে; এখানকার রাত্রিটা যেন একটা প্রকাণ্ড নিস্তরঙ্গ হ্রদের মত—আগাগোড়া সমান থম্ থম্ করচে কোথাও কিছু গতি নেই। যতই এপাশ ফিরি এবং যতই ওপাশ ফিরি একটা মস্ত যেন অনিদ্রার গুমই কবে ছিল, তার মধ্যে প্রবাহের লেশমাত্র পাওয়া যায় না। আজ সকালে কিছু বিলম্বে শয্যা ত্যাগ করে আমার নীচেকার ঘরের তাকিয়া ঠেসান দিয়ে বুকের উপর স্লেট রেখে পায়ের উপর পা তুলে দিয়ে সকালের বাতাস এবং পাখীর ডাকের মধ্যে একটি কবিতা লিখতে প্রবৃত্ত হয়েছিলুম। বেশ জমে এসেছিল—মুখ সহাস্ত, চক্ষু দীপ্ত মুদ্রিত, মাথা ঘন ঘন আন্দোলিত এবং গুন্ গুন্ আবৃত্তি উত্তরোত্তর পরিস্ফুট হয়ে উঠছিল—এমন সময় একখানি চিঠি, একখানি সাধনা, একখানি সাধনার গ্লফ এবং একখানি Monist কাগজ পাওয়া গেল। চিঠিখানি পড়লুম এবং সাধনার পাঁতাগুলোর মধ্যে চোখ দুটোকে একবার সবেগে ঘোড়দৌড় করিয়ে নিয়ে এলুম। তার পরে পুনশ্চ শিরশ্চালন করে অক্ষুট গুঞ্জনস্বরে কবিত্তে প্রবৃত্ত হইলুম। শেষ করে ফেলে তবে অল্প কথা। একটি কবিতা লিখেফেলে যেমন আনন্দ হয় হাজার গাছ লিখলেও তেমন হয় না কেন তাই ভাব্চি। কবিতায় মনের ভাব বেশ একটি সম্পূর্ণতা লাভ করে, বেশ যেন হাতে করে তুলে নেবার মত। আর, গল্প যেন এক বস্তা আলুগা জিনিষ—একটি জায়গা ধরলে সমস্তটি অমনি স্বচ্ছন্দে উঠে আসে না—

একেবারে একটা বোঝাবিশেষ। রোজ রোজ যদি একটি করে কবিতা লিখে শেষ করতে পারি তাহলে জীবনটা বেশ একবকম আনন্দে কেটে যায়—কিন্তু এতদিন ধরে সাধনা করে আস্টি ওজিনিষটা এখনো তেমন পোষ মানেনি—প্রতিদিন লাগাম পরাতে দেবে তেমন পক্ষীরাজ ঘোড়াটি নয়! আটের একটা প্রধান আনন্দ হচ্ছে স্বাধীনতার আনন্দ—বেশ আপনাকে অনেক দূরে নিয়ে যাওয়া যায় তার পরে আবার এই ভবকাঁরাগারের মধ্যে ফিরে এসেও অনেকক্ষণ কানেক মধ্যে একটা বন্ধার, মনের মধ্যে একটা ক্ষুধা লেগে থাকে। এই ছোট ছোট কবিতাগুলো আপনাপ্রাণি এসে পড়চে বলে আর নাটকে হাত দিতে পারচিনে। নইলে দুটো তিনটে ভারী নাটকের উমেদার মাঝেমাঝে দরজা-ঠেলাঠেলি করচে। শীতকাল ছাড়া বোধহয় সেগুলোতে হাত দেওয়া হয়ে উঠবে না। চিত্রাপ্রদা ছাড়া আমার আর সব নাটকই শীতকালে লেখা। সে সময়ে গীতিকাব্যের আবেগ অনেকটা ঠাণ্ডা হয়ে আসে—অনেকটা ধীরে-সুস্থে নাটক লেখা যায়।



বোলপুর,

৩১ শে মে, ১৮৯২।

এখনো পাঁচটা বাজেনি—কিন্তু আলো হয়েছে, বেশ বাতাস দিচ্ছে এবং বাগানের সমস্ত পাখীগুলো জেগে উঠে গান জুড়ে দিয়েছে। কোকিলটা ত সারা হয়ে গেল—সে কেন যে এত অবিশ্রাম ডাকে এ পর্যন্ত বোঝা গেল না—অবশ্য আমাদের প্রতিবিনোদনের জন্তে নয়, বিরহিনীকে পীড়ন করবার অভিপ্রায়েও নয়—তার নিজের একটা পার্সোনাল উদ্দেশ্য নিশ্চয়ই আছে—কিন্তু হতভাগার সে উদ্দেশ্য কি কিছুতেই সিদ্ধ হচ্ছে না? ছাড়েও না ত—কুউ কুউ চল্চেই—আবার একএকবার যেন দিগুণ অস্থির হয়ে ক্রতবেগে কুহুধ্বনি করচে। এর মানে কি? আবার আরখানিকটা দূরে আর-একটা কি পাখী নিতান্ত মুহূর্তেরে কুক্ কুক্ করচে—তাতে কিছুমাত্র উৎসাহ আগ্রহের ঝাঁজ নেই—লোকটা যেন নেহাৎ মন-মরা হয়ে গেছে—সমস্ত আশা ভরসা ছেড়ে দিয়েছে—কিন্তু তবু ছায়ায় বসে সমস্ত দিন ওই একটুখানি কুক্ কুক্ কুক্ কুক্ ওটুকু ছাড়তে পারচে না। বাস্তবিক ঐ ডানাওয়ালা ছোট ছোট নিরীহ জীবগুলি, অতি কোমল গ্রীবাটুকু বুকটুকু এবং পাঁচমিশালি রং নিয়ে গাছের ছায়ায় বসে আপন-আপন ঝরঝর করচে—ওদের আসল বৃত্তান্ত কিছুই জানিনে। বাস্তবিক, বুঝতে পারিনে ওদের এত ডাকবার কি আবশ্যক।

—•—

শিলাইদহ,
৩১ শে জ্যৈষ্ঠ,
১৮৯২। ?

এ সব শিষ্টাচার আর ভাল লাগে না—আজকাল প্রায় বসে বসে আওড়াই—
“ইহার চেয়ে হতেম যদি আরব বেহুয়িন !” বেশ একটা স্বস্থ সবল উন্মুক্ত অসভ্যতা ইচ্ছা করে দিনরাত্রি বিচার আচার বিবেক বুদ্ধি নিয়ে কতকগুলো বহুকেলে জীর্ণতার মধ্যে শরীরমনকে অকালে জরাগ্রস্ত না করে একটা দ্বিধাহীন চিন্তাহীন প্রাণ নিয়ে খুব একটা প্রবল জীবনের আনন্দ লাভ করি। মনের সমস্ত বাসনা ভাবনা ভালই হোক মন্দই হোক, বেশ অসংশয় অসঙ্কোচ এবং প্রশস্ত যেন হয়—প্রথার সঙ্গে বুদ্ধির, বুদ্ধির সঙ্গে ইচ্ছার, ইচ্ছার সঙ্গে কাজের কোনরকম অহর্নিশি খিটিমিটি না ঘটে। একবার যদি এই রুদ্ধ জীবনকে খুব উদ্ধাম উচ্ছৃঙ্খলভাবে ছাড়া দিতে পারতুম, একেবারে দিগ্বিদিকে ঢেউ খেলিয়ে ঝড় বাঁহিয়ে দিতুম, একটা বলিষ্ঠ বুনো ঘোড়ার মত কেবল আপনার লঘুত্বের আনন্দ-আবেগে ছুটে যেতুম! কিন্তু আমি বেহুয়িন নই বাঙালী। আমি কোণে বসে বসে খুঁৎ খুঁৎ করব বিচার করব তর্ক করব, মনটাকে নিয়ে একবার ওণ্টাব একবার পাণ্টাব—যেমন করে মাছ ভাজে, ফুটন্ত তেলে একবার এ পিট চিড়বিড় করে উঠবে একবার ওপিঠ চিড়বিড় করবে,—যাক্গে, যখন রীতিমত অসভ্য হওয়া অসাধ্য তখন রীতিমত সভ্য হবার চেষ্টা করাই সঙ্গত—সভ্যতা এবং বর্করতার মধ্যে লড়াই বাধাবার দরকার নেই।

যতই একলা আপনমনে নদীর উপরে কিছা পাড়াগায়ে কোন থোলা জায়গায় পাকা যায়, ততই প্রতিদিন পরিষ্কার বুঝতে পারা যায়, সহজভাবে আপনার জীবনের প্রাত্যহিক কাজ করে যাওয়ার চেয়ে জ্ঞান এবং মহৎ আর কিছু হতে পারে না। মার্চের তৃণ থেকে আকাশের তারা পর্যন্ত তাই করচে; কেউ গায়ের জোরে আপনার সীমাকে অত্যন্ত বেশি অতিক্রম করবাব জন্তে চেষ্টা করচেনা বলেই প্রকৃতির মধ্যে এমন পড়ীর শান্তি এবং আপনার সৌন্দর্য—অথচ প্রত্যেকে যেটুকু করচে সেটুকু বড় সামান্য নয়—যদি আপনার চূড়ান্ত শক্তি প্রয়োগ করে তবে ঘাসরূপে টিকে থাকতে পারে, তার শিকড়ের শেষ প্রান্তটুকু পর্যন্ত দিয়ে তাকে রসাকর্ষণ করতে হয়, সে যে নিজের শক্তি লঙ্ঘন করে বটগাছ হবার নিষ্ফল চেষ্টা করচেনা এইজন্যই পৃথিবী এমন জ্ঞানর শ্রামল হয়ে রয়েছে। বাস্তবিক, বড় বড় উদ্যোগ এবং লক্ষা-চৌড়া কথার দ্বারা নয় কিন্তু প্রাত্যহিক ছোট ছোট কর্তব্য-সমাধারাই মানুষের সমাজে বথাসম্ভব শোভা এবং শান্তি আছে। কবিত্বই বল আর বীরত্বই বল কোনটাই আপনাকে আপনি সম্পূর্ণ নয়, কিন্তু একটি অতি ক্ষুদ্র কর্তব্যের মধ্যেও তৃপ্তি এবং সম্পূর্ণতা আছে। বসে বসে হাঁসফাঁস করা, কল্পনা করা, কোন অবস্থাকেই আপনার যোগ্য মনে না করা, এবং ইতিমধ্যে সন্তুখ দিয়ে সময়কে চলে যেতে দেওয়া, এর চেয়ে ছোট আর কিছু হতে পারে না। যখন মনে মনে প্রতিজ্ঞা করা যায় নিজের সাধ্যায়ত্ত সমস্ত কর্তব্য সত্যের সঙ্গে, বলের সঙ্গে, হৃদয়ের সঙ্গে স্বেচ্ছা-স্বৈর ভিতর দিয়ে পালন করে যাব, এবং যখন বিশ্বাস হয় তা করতে পারব, তখন সমস্ত জীবন আনন্দে পরিপূর্ণ হয়ে ওঠে, ছোটখাট দুঃখবেদনা একেবারে দূর হয়ে যায়। অবশ্য, আমার জীবনের প্রতিদিন এবং প্রত্যেক মুহূর্ত আমার সম্মুখে এখন প্রত্যক্ষভাবে উপস্থিত নেই, তাই

হয়ত দূর থেকে হঠাৎ একটা কাল্পনিক আশার উচ্ছ্বাসে স্বীত হয়ে উইচি, সমস্ত খুঁটিনাটি খিঁটমিটি সজ্জা এবং সংঘর্ষ বাদ দিয়ে ভাবী জীবনের একটা মোটামুটি চিত্র অঙ্কিত করে এতটা ভরসা পাচ্ছি, কিন্তু তা ঠিক নয় ।

শিলাইদহ,
২রা আষাঢ়,
১২৯২।

বাংলা আষাঢ়স্য প্রথম দিবসে বর্ষার নব রাজ্যাভিষেক বেশ রীতিমত আড়ম্বরের সঙ্গে সম্পন্ন হয়ে গেছে। দিনেরবেলাটা খুব গরম হয়ে বিকেলের দিকে ভারি ঘনঘটা মেঘ করে এল।

কাল ভাবলুম, বর্ষার প্রথম দিনটা, আজ বরঞ্চ ভেজাও ভাল তবু অন্ধকূপের মধ্যে দিনযাপন করবনা। জীবনে ৯৩ সাল আর দ্বিতীয়বার আসবেনা—ভেবে দেখতে গেলে পরমায়ুর মধ্যে আষাঢ়ের প্রথম দিন আর ক'বারই বা আসবে—সবগুলো কুড়িয়ে যদি ত্রিশটা দিন হয় তাহ'লেও খুব দীর্ঘজীবন বলতে হবে। মেঘদূত লেখার পর থেকে আষাঢ়ের প্রথম দিনটা একটা বিশেষ চিহ্নিত দিন হয়ে গেছে—নিদেন আমার পক্ষে। আমি প্রায়ই একএক সময়ে ভাবি, এই যে আমার জীবনে প্রত্যহ একটি একটি করে দিন আসছে, কোনটি সূর্য্যোদয় সূর্য্যাস্তে রাঙা, কোনটি ঘনঘোর মেঘে স্নিগ্ধশীতল, কোনটি পূর্ণিমার জ্যোৎস্নার শাদা ফুলের মত প্রফুল্ল, এগুলি কি আমার কম সৌভাগ্য! এবং এরা কি কম মূল্যবান! হাজার বৎসর পূর্বে কালিদাস সেই যে আষাঢ়ের প্রথম দিনকে অভ্যর্থনা করেছিলেন—আমার জীবনেও প্রতি বৎসরে সেই আষাঢ়ের প্রথম দিন তার সমস্ত আকাশ-যোড়া ঐশ্বর্য্য নিয়ে উদয় হয়—সেই প্রাচীন উজ্জয়িনীর প্রাচীন কবির—সেই বহু-বহুকালের শত শত স্মৃৎস্মৃৎখবিরহমিলনময় নরনারীদের আষাঢ়স্য প্রথম দিবসঃ! সেই অতি পুরাতন আষাঢ়ের প্রথম মহাদিন আমার জীবনে প্রতিবৎসর একটি একটি করে কমে যাচ্ছে, অবশেষে এক সময় আসবে, যখন এই কালিদাসের দিন, এই মেঘদূতের দিন, এই ভারতবর্ষের বর্ষার চিরকালীন প্রথম দিন, আমার অদৃষ্টে আর একটিও অবশিষ্ট থাকবে না। একথা ভাল করে ভাবলে পৃথিবীর দিকে আবার ভাল করে চেয়ে দেখতে ইচ্ছে করে; ইচ্ছে করে জীবনের প্রত্যেক সূর্য্যোদয়কে সজ্ঞানভাবে অভিবাদন করি এবং প্রত্যেক সূর্য্যাস্তকে পরিচিত বন্ধুর মত বিদায় নিই। আমি যদি

সাধুপ্রকৃতির লোক হতুম তাহলে চ্যুত মনে করতুম জীবন নখর অতএব প্রতিদিন বৃথা ব্যয় না করে সংকার্য্যে এবং হরিনামে যাপন করি। কিন্তু আমার সে প্রকৃতি নয়—তাই আমার মাঝে মাঝে মনে হয় এমন সুন্দর দিনরাত্রিগুলি আমার জীবন থেকে প্রতিদিন চলে যাচ্ছে—এর সমস্তটা গ্রহণ করিতে পারচিনে। এই সমস্ত রং, এই আলো এবং ছায়া, এই আকাশব্যাপী নিঃশব্দ সনারোহ, এই দ্যলোকভুলোকের মাঝখানের সমস্ত শৃঙ্খলা-পরিপূর্ণ করা শাস্তি এবং সৌন্দর্য্য, এর জন্যে কি কম আয়োজনটা চল্চে! কত বড় উৎসবের ক্ষেত্রটা! আর আমাদের ভিতরে ভাল করে তার সাড়া পাওয়াই যায় না! জগৎ থেকে এতই তফাতে আমরা বাস করি! লক্ষ লক্ষ যোজন দূর থেকে লক্ষ লক্ষ বৎসর ধরে অনন্ত অন্ধকারের পথে যাত্রা করে একটি তারার আলো এই পৃথিবীতে এসে পৌছয় আর আমাদের অন্তরে এসে প্রবেশ করতে পারে না, সে যেন আরো লক্ষযোজন দূরে! রঙীন সকাগ এবং রঙীন সন্ধ্যাগুলি দিগ্ধূদের ছিন্ন কণ্ঠহার থেকে এক একটি মাণিকের মত সমুদ্রের জলে খসে খসে পড়ে যাচ্ছে আমাদের মনের মধ্যে একটাও এসে পড়ে না। সেই বিলেত যাবার পথে লোহিত সমুদ্রের স্থির জলের উপরে যে একটি অলৌকিক সূর্যাস্ত দেখেছিলুম, সে কোথায় গেছে! কিন্তু ভাগ্যিস্ আমি দেখেছিলুম, আমার জীবনে ভাগ্যিস্ সেই একটি সন্ধ্যা উপেক্ষিত হয়ে ব্যর্থ হয়ে যাবনি—অনন্ত দিনরাত্রির মধ্যে সেই একটি অত্যশ্চর্য্য সূর্যাস্ত আমি ছাড়া পৃথিবীর আর কোন কবি দেখেনি। আমার জীবনে তার রং রয়ে গেছে। এমন এক একটি দিন এক একটি সম্পত্তির মত। আমার সেই পেনেটির বাগানের গুটিকতক দিন, তেতালার ছাতের গুটিকতক রাত্রি, পশ্চিম ও দক্ষিণের বারান্দার গুটিকতক বর্ষা, চন্দননগরের গঙ্গার গুটিকতক সন্ধ্যা, দার্জিলিংয়ে সিঞ্চল শিখরের একটি সূর্যাস্ত ও চন্দ্রোদয় এইরকম কতকগুলি উজ্জ্বল সুন্দর ক্ষণ-খণ্ড আমার যেন ফাইল করা রয়েছে। ছেলেবেলায় বসন্তের জ্যোৎস্নারাত্রে যখন ছাতে পড়ে থাকতুম তখন জ্যোৎস্না যেন মদের গুল্ল ফেনার মত একেবারে উপচে পড়ে নেশায় আমাকে ডুবিয়ে দিত। যে পৃথিবীতে এসে পড়েছি এখানকার মানুষগুলো সব অদ্ভুত জীব—এরা কেবলই দিনরাত্রি নিয়ম এবং দেয়াল গাঁথচে, পাছে ছোটো চোখে কিছু দেখতে পায় এই জন্তে বহু যত্নে পর্দা টাঙিয়ে দিচ্ছে। বাস্তবিক পৃথিবীর জীবগুলো ভারি অদ্ভুত! এরা যে ফুলের গাছে এক একটি ঘাটা-টোপ পরিষে রাখেনি, চাঁদের নীচে চাঁদোয়া খাটায়নি সেই আশ্চর্য্য! এই স্বেচ্ছা-অন্ধগুলো বন্ধ পাঙ্কীর মধ্যে চড়ে পৃথিবীর ভিতর দিয়ে কি দেখে চলে যাচ্ছে! যদি

বাসনা এবং সাধনা-অমুরূপ পরকাল থাকে তাহলে এবার আমি এই ওয়াড়-পরানো পৃথিবী থেকে বেরিয়ে গিয়ে যেন এক উদার উন্মুক্ত সৌন্দর্য্যের আনন্দলোকে গিয়ে জন্মগ্রহণ করতে পারি। (যারা সৌন্দর্য্যের মধ্যে সত্যি সত্যি নিমগ্ন হতে অক্ষম তারাই সৌন্দর্য্যকে কেবলমাত্র ইন্দ্রিয়ের ধন বলে অবজ্ঞা করে—কিন্তু এর মধ্যে যে অনির্কচনীয় গভীরতা আছে, তার আবাদ যারা পেয়েচে তারা জানে সৌন্দর্য্য ইন্দ্রিয়ের চূড়ান্ত শক্তিরও অতীত—কেবল চক্ষু কর্ণ দূরে থাক, সমস্ত হৃদয় নিয়ে প্রবেশ করলেও ব্যাকুলতার শেষ পাওয়া যায় না।

আমি ভদ্রলোক সেজে সহরের বড় রাস্তায় আনাগোনা করছি, পরিপাটি ভদ্রলোকদের সঙ্গে ভদ্রভাবে কথাবার্তা করে জীবন মিথ্যে কাটিয়ে দিচ্ছি। আমি অন্তরে অসভ্য অভদ্র—আমার জন্তে কোথাও কি একটা ভারি সুন্দর অরাজকতা নেই, কতকগুলো ক্যাপা লোকের আনন্দমেলা নেই! কিন্তু আমি কি এ সমস্ত বকচি—কাব্যের নায়কেরা এইরকম সব কথা বলে—কনভেন্শ্যনালিটির উপরে তিন-চার পাতঘোড়া স্বগত উক্তি প্রয়োগ করে—আপনাকে সমস্ত মানবসমাজের চেয়ে বড় মনে কবে। বাস্তবিক এ সব কথা বলতে লজ্জা করে। এর মধ্যে যে সত্যটা আছে সে বহুকালথেকে ক্রমাগত কথাচাপা পড়ে আস্চে। পৃথিবীতে সবাই ভারি কথা কয়—তার মধ্যে আমি একজন অগ্রগণ্য—ইচ্ছা এতক্ষণে সে বিষয়ে চেষ্টা হল।

পুং—আসল যে কথাটা বলতে গিয়েছিলুম—সেটা বলে নিই—ভয় নেই, আবার চার পাতা জুড়বেনা—কথাটা হচ্ছে—পয়লা আধাটের দিন বিকেলে খুব ঘুঘলধারে বৃষ্টি হয়ে গেছে। বাস্।

—•—

শিলাইদহ,
৪ঠা আষাঢ়,
১৮৯২

আজকাল আমি বিকেলে সন্ধ্যার দিকে ডাঙায় উঠে অনেকরূপ বেড়াতে থাকি—
পূর্বদিকে যখন ফিরি একরকম দৃশ্য দেখতে পাই পশ্চিমে যখন ফিরি আরেকরকম
দেখতে পাই—আকাশ থেকে আমার মাথার উপরে যেন সাস্ত্রনা বৃষ্টি হতে থাকে—
আমার দুই মুক্ত চোখের ভিতর দিয়ে যেন একটি স্বর্ণময় মঙ্গলের ধারা আমার অন্তরের
মধ্যে প্রবেশ করতে থাকে। এই বাতাসে আকাশে এবং আলোকে প্রতিফলনে আমার
মন ছেয়ে যেন নতুন পাতা গজিয়ে উঠে—আমি নতুন প্রাণ এবং বলে পরিপূর্ণ হয়ে
উঠছি। সংসারের সমস্ত কাজ করা এবং লোকের সঙ্গে ব্যবহার করা আমার পক্ষে
ভারি সহজ হয়ে পড়েছে। আসলে সবই সোজা—একটিমাত্র সিধে রাস্তা আছে। চোখ
চেয়ে সেই রাস্তা ধরে গেলেই হল, নানারকম বুদ্ধিপূর্বক short cut খোঁজবার
দরকার দেখিনে—সুখ দুঃখ সকল রাস্তাতেই আছে কোন রাস্তা দিয়েই তাদের এড়িয়ে
যাবার যো নেই, কিন্তু শান্তি কেবল এই বড় রাস্তাতেই আছে।

এমন সুন্দর শরতের সকালবেলা ! চোখের উপর যে কি সুধাবর্ষণ করচে সে আর কি বলব ! তেমনি সুন্দর বাতাস দিচ্ছে এবং পাখী ডাক্চে । এই ভরা নদীর ধারে বর্ষার জলে প্রফুল্ল নবীন পৃথিবীর উপর শরতের সোনালি আলো দেখে মনে হয় যেন আমাদের এই নবযৌবনা ধরণীসুন্দরীর সঙ্গে কোন্ এক জ্যোতির্ময় দেবতার ভালবাসা চল্চে—তাই এই আলো এবং এই বাতাস, এই অর্ধ উদাস অর্ধ সুখের ভাব, গাঁছের পাতা এবং ধানের ক্ষেতের মধ্যে এই অবিশ্রাম স্পন্দন,—জলের মধ্যে এমন অগাধ পরিপূর্ণতা, স্থলের মধ্যে এমন শ্রামশ্রী, আকাশে এমন নিশ্চল নীলিমা । প্রেমের যেমন একটা গুণ আছে তার কাছে জগতের মহা মহা ঘটনাও তুচ্ছ মনে হয় 'এখানকার আকাশের মধ্যে তেমনি যে একটি ভাব ব্যাপ্ত হয়ে আছে তার কাছে কলকাতার দৌড়ধাপ হাঁসফাঁস ধড়ফড়ানি ঘড়ঘড়ানি ভারি ছোট এবং অত্যন্ত সুদূর মনে হয় । চারদিক থেকে আকাশ আলো বাতাস এবং গান একরকম মিলিতভাবে এসে আমাদের অত্যন্ত লঘু করে আপনাদের সঙ্গে যেন মিশিয়ে ফেল্চে—আমার সমস্ত মনটাকে কে যেন তুলিতে করে তুলে নিয়ে এই রঙীন শরৎপ্রকৃতির উপর আর এক পোঁচ রঙের মত মাখিয়ে দিচ্ছে,—তাতে করে এই সমস্ত নীল সবুজ এবং সোনার উপর আর একটা যেন নেশার রং লেগে গেছে । বেশ লাগ্চে । “কি জানি পরণ কি যে চায়” বলতে লজ্জা বোধ হয় এবং সহরে থাকলে বলতুম না—কিন্তু ওটা যোলো আনা কবিত্ব হলেও এখানে বলতে দোষ নেই । অনেক পুরোণো শুকনো কবিতা—কলকাতায় যাকে উপহাসানলে আলিয়ে ফেলবার যোগ্য মনে হয় তারা এখানে আসবামাত্র দেখতে দেখতে মুকুলিত পল্লবিত হয়ে উঠে ।

গোয়ালন্দে পথে,

২১শে জুন,

১৮৯২,

আজ সমস্তদিন নদীর উপর ভেসে চলেছি। আশ্চর্য্য এই বোধ হচ্ছে যে, কতবার এই রাস্তা দিয়ে গেছি এই বোটে চড়ে জলে জলে বেড়িয়েছি এবং নদীর দুইতীরের মাঝখান দিয়ে ভেসে যাবার যে একটা বিশেষ আনন্দ আছে সে উপভোগ করেছি—কিন্তু দিনটুই ডাঙার বসে থাকলে সেটা ঠিকটা আর মনে থাকে না। এইযে একলাটি চুপকরে বসে চেয়ে থাকা—দুইধারে গ্রাম ঘাট শস্যক্ষেত্র চর, বিচিত্র ছবি দেখা দিচ্ছে এবং চলে যাচ্ছে, আকাশে মেঘ ভাসছে এবং সন্ধ্যার সময় নানারকম রং ফুটেছে ;—নৌকো চলেছে, জেলেরা মাছধরচে, অহর্নিশি জলের একপ্রকার আদরপরিপূর্ণ তরল শব্দ শোনা যাচ্ছে—সন্ধ্যাবেলায় বিস্তৃত জলরাশি শ্রান্ত নিদ্রিত শিশুর মত একেবারে স্থির হয়ে যাচ্ছে এবং উন্মুক্ত আকাশের সমস্ত তারা মাথার উপরে জেগে চেয়ে আছে—গভীররাত্রে যেদিন ঘুম নেই সেদিন উঠে বসে দেখি অন্ধকারাচ্ছন্ন দুই কূল নিদ্রিত, মাঝে মাঝে কেবল গ্রামের বনে শৃগাল ডাক্চে, এবং পদ্মার নীরব খরস্রোতে রূপস্থাপ করে পাড় খসে খসে পড়াচ্ছে—এই সমস্ত পরিবর্তনশীল ছবি যেমন যেমন চখে পড়তে থাকে অমনি মনের ভিতরে একটা কল্পনার স্রোত বইতে থাকে এবং তার দুইপারে তটদৃশ্যের মত নব নব আকাঙ্ক্ষার চিত্র দেখা দিতে থাকে। হয়ত সম্মুখের দৃশ্যটা খুব একটা চমৎকার কিছু নয়—একটা হৃদয়ে রকমের তৃণতরুণ্য বালির চর ধু ধু করচে—তারি গায়ে একটা জনশূন্য নৌকো বাঁধা রয়েছে এবং আকাশের ছায়ায় ক্ষিকে নীলবর্ণ নদী বয়ে চলে যাচ্ছে—দেখে মনের ভিতরে কি রকম করে বলতে পারিনে। বোধ হয় সেই ছেলেবেলায় যখন আদর্য উপত্যাস পড়তুম, সিদ্ধবাদ নানা নূতন দেশে বাণিজ্য করতে বাহির হত, ভূত্যাশাসিত আমি তোষাখানার মধ্যে রুদ্ধ হয়ে বসে বসে ছপ্পুর বেলায় সিদ্ধবাদের সঙ্গে ঘুরে বেড়াতুম তখন যে আকাঙ্ক্ষাটা মানব মাধ্য জ্ঞানোত্তীর্ণ

সেটা যেন এখনো বেঁচে আছে, ঐ বালিচরে নৌকো বাধা দেখলে সেই যেন চঞ্চল হয়ে ওঠে। ছেলেবেলায় যদি আরব্য উপজাস রবিন্সন্ জুসো না পড়তুম, রূপকথা না শুনতুম, তাহলে নিশ্চয় বলতে পারি ঐ নদীতীর এবং মাঠের প্রান্তের দূর দৃশ্য দেখে ঠিক এমনভাবে মনে উদয় হত না—সমস্ত পৃথিবীর চেহারা আমার পক্ষে আর এক রকম হয়ে যেত। এইটুকু মানুষের মনের ভিতরে বাস্তবিক কাল্পনিকে জড়িয়ে মড়িয়ে কি যে একটা জাল পাঁকিয়ে আছে! কিসের সঙ্গে যে কি গেঁথে গেছে—কত গল্পের সঙ্গে ছবির সঙ্গে ঘটনার সঙ্গে সামান্যের সঙ্গে বড়র সঙ্গে জড়িয়ে গিঁঠপড়ে আছে—প্রতিদিন অজ্ঞাতে জড়িয়ে যাচ্ছে! একটা মানুষের একটা বৃহৎ জীবনের জাল খুলতে পারলে কত ছোট এবং কত বড়র মিশল আলাদা করা যায়!

—•—

শিলাইদা,

২২শে জুন,

১৮৯২।

আজ খুব ভোরে বিছানার শুখে শুয়ে শুন্ছিলুম ঘাটে মেয়েরা উলু দিচ্ছে। শুনে মনটা কেমন ঈষৎ বিকল হয়ে গেল—অথচ তার কারণ পাওয়া শক্ত। বোধ হয় এই রকমের একটা আনন্দ-ধ্বনিতে হঠাৎ অনুভব করা যায় পৃথিবীতে একটা বৃহৎ কৰ্ম্মপ্রবাহ চলচে যার অধিকাংশের সঙ্গেই আমার যোগ নেই—পৃথিবীর অধিকাংশ মানুষ আমার কেউ নয় অথচ তাদের কত কাজকৰ্ম্ম সুখদুঃখ উৎসব আনন্দ চলচে। কি বৃহৎ পৃথিবী! কি বিপুল মানবসংসার! কত সুদূর থেকে জীবনের ধ্বনি প্রবাহিত হয়ে আসে—সম্পূর্ণ অপরিচিত ঘরের একটুখানি বার্তা পাওয়া যায়। মানুষ যখন বুঝতে পারে আমার কাছে আমি যত বড়ই হই আমার কাছে দিয়ে সমস্ত বিশ্ব পরিপূর্ণ করতে পারিনে—অধিকাংশ জগৎই আমার দৃষ্টিতে অজ্ঞেয় অনাস্থ্যীয় অসামান্য—তখন এই প্রকাণ্ড টিলে জগতের মধ্যে আপনাকে অত্যন্ত খাটো এবং একরকম পরিত্যক্ত এবং প্রান্তবর্তী বলে মনে হয়—তখন মনের মধ্যে এই রকমের একটা ব্যাপ্তি বিবাদের উদয় হয়। তা ছাড়া এই উলুধ্বনিতে নিজের অতীত ভবিষ্যৎ সমস্ত জীবনটা একটি অতি সুদীর্ঘ পথের মত চখের সম্মুখে উদয় হল এবং তারি এক একটি সুদূর ছায়াময় প্রান্ত থেকে এই উলুধ্বনি কানে এসে পৌছতে লাগল। এই রকম ভাবে আজ দিনটা আরম্ভ করেছি। এখন সদরনায়েব আমলাবর্গ এবং প্রজারা উপস্থিত হলে এই উলুধ্বনির প্রতিধ্বনিটুকু পাড়া ছেড়ে পালাবে—অতি ক্ষীণ ভূতভবিষ্যৎকে ছই কইদিয়ে ঠেলে ফেলে জোয়ান বর্তমান নিজমুর্তিধরে সেলামঠুকে এসে দাঁড়াবে।

সাজাদপুর

২৮শে জুন,

১৮৯২।

আজকের চিঠির মধ্যে একজায়গায় অ—র গানের একটুখানি উল্লেখ আছে। পড়ে মনটা কেমন হঠাৎ হুহু করে উঠল। জীবনের অনেকগুলি ছোট ছোট উপেক্ষিত স্মৃতি, যারা সহরের গোলমালের মধ্যে কোন আমল পায় না, বিদেশে এলে তারা সময় বুঝে হৃদয়ের কাছে আপন আপন দরখাস্ত পাঠিয়ে দেয়। আমি গানবাজনা এত ভালবাসি এবং সহরেও এত কণ্ঠ এবং বাজ আছে কিন্তু দিনের পর দিন চলে যায় এক দিনও কর্ণপাত করিনে। যদিও সব সময়ে বুঝতে পারিনে কিন্তু মনের ভিতরটা কি তৃপ্ত হয়ে থাকে না? আজকের চিঠি পড়বামাত্রই অ—র মিষ্টিগান শোনবার জন্তে আমার এমনি ইচ্ছা করে উঠল যে তখন বুঝতে পারলুম প্রকৃতির অনেকগুলি ক্রন্দনের মধ্যে এও একটা ক্রন্দন ভিতরে ভিতরে চাপা ছিল। বড় বড় হুরাশার মোহে জীবনের ছোট ছোট আনন্দগুলিকে উপেক্ষা করে আমাদের জীবনকে কি উপবাসী করেই রাখি! যখন বিলেতে যাচ্ছিলুম আমার একটা কল্পনার স্মৃতির ছবি এই ছিল যে কেউ একজন পিয়ানো বাজাচ্ছে, খোলা দরজা জানলার ভিতর দিয়ে আলো এবং বাতাস আসছে, খানিকটা সুদূর আকাশ ও গাছপালা দেখা যাচ্ছে,—আমি একটা খোলা জানলার কাছে কোচের উপর পড়ে বাইরে চোখ রেখে শুনিচি। এটা যে একটা দুর্লভ হুরাশা তা বলতে পারিনে কিন্তু তিনশো পঁয়ষট্টি দিনের মধ্যে ক’দিন অদৃষ্টে এ স্মৃতি পাওয়া যায়! এই সমস্ত স্মরণীয় আনন্দের অপরিভূষিত জীবনের হিসাবে প্রতিদিন খেড়ে উঠচে—এর পরে এমন একটা দিন আসতেও পারে যখন মনে হবে যদি আবার জীবনটা সমস্তটা ফিরে পাই তাহলে আর কিছু অসাধ্য সাধন করতে চাইনে কেবল জীবনের এই প্রতিদিনের অযাচিত ছোট ছোট আনন্দগুলি প্রতিদিন উপভোগ করে নিই।

সাজাদপুর

২৭শে জুন,

১৮৯২।

কাল বিকেলের দিকে এমনি করে এল আমার ভয় হল। এমনতর রাগী চেহারার মেঘ আমি কখনো দেখেছি বলে মনে হয় না। গাঢ় নীল মেঘ দিগন্তের কাছে একেবারে থাকে থাকে ফুলে উঠেছে, একটা প্রকাণ্ড হিংস্র দৈত্যের রোষাক্ত গৌফজোড়াটার মত। এই ঘন নীলের ঠিক পাশেই দিগন্তের সব শেষে ছিল মেঘের ভিতর থেকে একটা টকটকে রক্তবর্ণ আভা বেরচে—একটা আকাশব্যাপী প্রকাণ্ড অলৌকিক “বাইসন” মোষ যেন স্ফেপে উঠে রাঙা চোখ দুটো পাকিয়ে ঘাড়ের নীল কেশরগুলো ফুলিয়ে বক্রভাবে মাথাটা নীচু করে দাঁড়িয়েছে—এখনি পৃথিবীকে শৃঙ্গাবাত করতে আরম্ভ করে দেবে এবং এই আসন্ন সন্ধটের সময় পৃথিবীর সমস্ত শস্তক্ষেত এবং গাছের পাতা হী হী করতে, জলের উপরিভাগ শিউরে শিউরে উঠে, কাকগুলো অশান্তভাবে উড়ে উড়ে কা কা করে ডাক্চে।

— * —

কালকের চিঠিতে লিখেছিলুম আজ অপরাহ্ন সাতটার সময় কবি কালিদাসের সঙ্গে একটা এন্গেজমেন্ট করা যাবে। বাতিটি জালিয়ে টেবিলের কাছে কেদারাটি টেনে বইখানি হাতে যখন বেশ প্রস্তুত হয়ে বসেছি হেনকালে কবি কালিদাসের পরিবর্তে এখানকার পোষ্টমাষ্টার এসে উপস্থিত। মৃত কবির চেয়ে একজন জীবিত পোষ্টমাষ্টারের দাবী ঢের বেশি। আমি তাঁকে বলতে পারলুম না—আগনি এখন যান, কালিদাসের সঙ্গে আমার একটু বিশেষ প্রয়োজন আছে—বল্লেও সে লোকটি ভাল বুঝতে পারতেন না। অতএব পোষ্টমাষ্টারকে চৌকিটি ছেড়ে দিয়ে কালিদাসকে আস্তে আস্তে বিনায় নিতে হল। এই লোকটির সঙ্গে আমার একটু বিশেষ যোগ আছে। যখন আমাদের এই কুঠিবাড়ির একতলাতেই পোষ্ট অপিস ছিল এবং আমি এঁকে প্রতিদিন দেখতে পেতুম তখন আমি একদিন দুপুরবেলায় এই দৌতালার বসে সেই পোষ্টমাষ্টারের গল্পটি লিখেছিলুম এবং সে গল্পট যখন হিতবাহীতে বেরল তখন আমাদের পোষ্টমাষ্টার বাবু তার উল্লেখ করে বিস্তার লজ্জামিশ্রিত হাস্য বিস্তার করেছিলেন। যাই হোক এই লোকটিকে আমার বেশ লাগে। বেশ নানারকম গল্প করে যান আমি চুপ করে বসে শুনি। ওরি মধ্যে ওঁর আবার বেশ একটু হাস্যরসও আছে।

পোষ্টমাষ্টার চলে গেলে সেই রাত্রে আবার রবুৎশ নিয়ে পড়লুম। ইন্দুযতীর স্বয়ম্বর পড়ছিলুম। সভায় সিংহাসনের উপর সারিসারি সুসজ্জিত সুন্দর চেহারা রাজারা বসে গেছেন—এমন সময় শত্রু এবং তুরীধ্বনির মধ্যে বিবাহবেশ পরে সুন্দার হাত ধরে ইন্দুযতী তাঁদের মাঝখানের সভাপথে এসে দাঁড়ালেন। ছবিটি মনে করতে এমন সুন্দর লাগে! তার পরে সুন্দা এক এক জনের পরিচয় করিয়ে দিচ্ছে আর ইন্দুযতী অজুরাগহীন এক একটি প্রণাম করে চলে যাচ্ছেন। এই প্রণাম করাটি

কেমন সুন্দর ! যাকে ত্যাগ করছেন তাকে যে নম্রভাবে সম্মান করে যাচ্ছেন এতে কতটা মানিয়ে যাচ্ছে ! সকলেই রাজা, সকলেই তার চেয়ে বয়সে বড়, ইন্দুমতী একটি বালিকা, সে যে তাঁদের একে একে অতিক্রম করে যাচ্ছে এই অবশ্যকৃত্যটুকু যদি একটি একটি সুন্দর সবিনয় প্রণাম দিয়ে না মুছে দিয়ে যেত তাহলে এই দৃশ্যের সৌন্দর্য্য থাকত না ।



সাজাদপুর,
৩রা জুলাই।

১৮৯২।

কালরাত্রে আমি বেশ একটা নতুন রকমের স্বপ্ন দেখেছি। যেন কোথায় এক জায়গায় লেপ্টেনান্ট গবর্নর এসেছেন এবং তাঁর অভ্যর্থনা উপলক্ষ্যে উৎসব হচ্ছে। অত্যন্ত নানারকম আমোদের মধ্যে একটা তাস্খুতে একজন বিখ্যাত বুড়ো গাইয়ে গান গাচ্ছে। গাইয়ে একটা বড়বকম ইমনকল্যাণ গাচ্ছিল। গাইতে গাইতে হঠাৎ এক জায়গায় সে ভুলে গেল। ছবার সেটা ফিরে ফিরে মনে করবার চেষ্টা করলে—তারপর তৃতীয় বারের বার নিরাশ হয়ে গানের কথাগুলো ছেড়ে দিয়ে অমনি কেবল সুরটা ভেঁজে যেতে যেতে হঠাৎ সেই সুরটা কেমন করে কান্নায় পরিবর্তিত হয়ে গেল—সবাই মনে করছিল সে গান গাচ্ছে, হঠাৎ দেখে সে কান্না। তার কান্না শুনে বড়দাদা “আহা আহা” করে উঠলেন। একজন প্রকৃত গুণীর মনে এরকম ঘটনায় কতখানি আঘাত লাগতে পারে তিনি যেন সেটা পরিষ্কার বুঝতে পারলেন। তারপরে নানারকম অসংলগ্ন হিজিবিজি কি হল এবং বাংলা মুন্সুকের লেপ্টেনান্ট গবর্নর যে কোথায় উড়ে গেলেন তার কিছুই মনে নেই।

—•—

আজ এইমাত্র প্রাণটা যাবার যো হয়েছিল। পাণ্ট থেকে শিলাইদা যাচ্ছিলুম, বেশ পাল পেয়েছিলুম, খুব হুঃ শব্দে চলে আসছিলুম। বর্ষার নদী চারদিকে থই থই করতে এবং হৈ হৈ শব্দে ঢেউ উঠে আসি মাঝে মাঝে তাকিয়ে দেখছি এবং মাঝে মাঝে লেখা পড়া করছি। বেলা সাড়ে দশটার সময় গড়ই নদীর ব্রিজ দেখা গেল। বোটের মাস্তুল ব্রিজে বাধবে কিনা তাই নিয়ে মাঝিদের মধ্যে তর্ক পড়ে গেল—ইতিমধ্যে বোট ব্রিজের অভিমুখে চলেছে। মাঝিদের আশা ছিল যে, আমরা স্রোতের বিপরীতমুখে যখন চলেছি তখন ভাবনা নেই—কারণ ব্রিজের বাঁহাঁকাছি এসেও যদি দেখা যায় যে মাস্তুল বাধবে তখনই পাল নাবিয়ে দিলে বোট স্রোতে পিছিয়ে যাবে। কিন্তু ব্রিজের কাছে এসে আবিষ্কার করা গেল মাস্তুল ঠেকবে এবং সেখানে একটা আঁওড় (আবর্ত) আছে। সেই আঁওড় থাকাতে সেখানে স্রোতের গতি বিপরীত মুখে হয়েছে। তখন বোঝা গেল সামনে একটি বিপদ উপস্থিত কিন্তু বেশিক্ষণ চিন্তা করবার সময় ছিল না—দেখতে দেখতে বোট ব্রিজের উপর গিয়ে পড়ল। মাস্তুল মড়মড় করে ক্রমেই কাত হতে লাগল—আমি হতবুদ্ধি মাল্লাদের ক্রমাগত বলছি তোরা ওখান থেকে সর, মাথায মাস্তুল ভেঙে মরবি না কি। এমন সময় আর একটা নৌকো তাড়াতাড়ি দাঁড় বেয়ে এসে আমাদের তুলে নিলে এবং রসি নিয়ে আমাদের বোটটাকে টানতে লাগল—তপসি এবং আর একজন মাল্লা রসি দাঁতে কামড়ে সাঁতরে ডাঙায় উঠে টানতে লাগল—সেখানে আরো অনেক লোক জমা হয়ে বোট টেনে তুললে। সকলে ডাঙায় ভিড়করে এসে বসে আশ্রয় বাঁচিয়ে দিয়েছেন নইলে বাঁচবার কোনো কথা ছিল না। সমস্তই জড় পদার্থের কাণ্ড কিনা—আমরা হাজার কাতর হই, চৈচাই, লোহাতে যখন কাঁঠ ঠেকল এবং নীচের থেকে যখন জল ঠেলতে লাগল, তখন যা হবার তা হবেই,—জলও এক মুহূর্ত থামল না, মাস্তুলও একচুল মাথা নীচু করল না, লোহার ব্রিজও যেমন তেমনি দাঁড়িয়ে রইল।

শিলাইদা,
২১শে জুলাই,
১৮৯২।

কাল বিকেলে শিলাইদহে পৌছেছিলুম আজ সকালে আবার পাবনা'র চলেছি। নদীর যে রোথ! যেন লেজ-দোঁগানো কেশর-ফোঁনো তাজা বুনো ঘোড়ার মত। গতিগর্বে ঢেউতুলে ফুলে ফুলে চলেছে—এই প্যাঁপা নদীর উপর চড়ে আমরা ছলতে ছলতে চলেছি। এর মধ্যে ভারি একটা উল্লাস আছে। এই ভরা নদীর যে কলরব সে আর কি বলব! ছল্‌ছল্‌ খল্‌খল্‌ করে কিছতে যেন আর ক্ষান্ত হতে পারচেনা, ভারি একটা যৌবনের মত্ততার ভাব। এ তবু গড়ই নদী—এখান থেকে আবার পদ্মায় গিয়ে পড়তে হবে—তার বোধ হয় আর কুলকিনারা দেখবার যো নেই—সে মেয়ে বোধ হয় একেবারে উন্মাদ হয়ে ক্ষেপে নেচে বেরিয়ে চলেছে, সে আর কিছুর মধ্যেই থাকতে চায় না। তাকে মনে করলে আমার কালীর মূর্তি মনে হয়—মৃত্যু করচে, ভাঙচে, এবং চুল এলিয়ে দিয়ে ছুটে চলেছে। মাঝিরা বলছিল নূতন বর্ষার পদ্মায় খুব “ধার” হয়েছে। ধার কথাটা ঠিক। তীব্রশ্রোত যেন চকচকে ঞ্জোর মত—পাংলা ইম্পাতের মত একেবারে কেটে চলে যায়—প্রাচীন বিটনদের যুদ্ধরথের চাকার যেমন কুঠার বাধা—হুইধারের তীর একেবারে অবহেলে ছারখার করে দিয়ে চলেচে।

কাল যে কাণ্ডটি হয়েছিল সে কিছু গুরুতর বটে। কাল যমরাজের সঙ্গে একরকম হাউ-ডু-ডু করে আসা গেছে। মৃত্যু যে ঠিক আমাদের নেকট-ডোর-নেবার, তা এবকম ঘটনা না হলে সহজে মনে হয় না। হয়েও বড় মনে পড়ে না। কাল চকিতে র মত বীর আভাস পাওয়া গিয়েছিল আজ তাঁর মূর্তিখানা কিছুই স্মরণ হচ্ছে না। অপ্রিয় অনাবশ্যক বন্ধুর মত একেবারে অনাহুত ঘাড়ে এদে না পড়লে তাঁর বিষয়ে আমরা বড় একটা ভাবিনে। যদিও তিনি আড়াল থেকে আমাদের সর্বদাই খোঁজ খবর নিয়ে

খাকেন। বা হোক তাঁকে আমি বহুত বহুত সেলাম দিয়ে জানিয়ে রাখ্চি তাঁকে আমি এক কানা কড়ির কেয়ার করিনে—তাঁ তিনি জলেই ঢেউ তুলুন আর আকাশ থেকে কুঁই দিন—আমি আমার পাল তুলে চল্লুম—তিনি যতদূর করতে পারেন তা পৃথিবীস্থিত সকলেরই জানা আছে, তার বেশি আর কি করবেন! যেমনি হোক, হাঁউমাউ করব না!



শিলাইদা,

১০শে অগষ্ট, ১৮৯২।

রোজ সকালে চোখ চেয়েই আমার দাঁ দিকে জল এবং ডানদিকে নদীতীর সূর্য্য-
কিরণে প্লাবিত দেখতে পাই। অনেক সময়ে ছবি দেখলে যে মনে হয় অহা এইখানে
যদি থাকতুম, ঠিক সেই ইচ্ছাটা এখানে পরিতৃপ্ত হয়—মনে হয়, একটি জাজ্জল্যমান
ছবির মধ্যে আমি বাস করি—বাস্তব জগতের কোনো কঠিনতাই এখানে যেন নেই।
ছেলেবেলায় রবিন্সন ক্রুসো, পোলবর্জিনি প্রভৃতি বই থেকে গাছপালা সমুদ্রের ছবি দেখে
মন ভারি উদ্যত হইত—এখানকার রোজের আমার সেই ছবিদেখার বাস্তবায়িত
ভারি জেগে ওঠে—এর যে কি মানে ঠিক ধরতে পারিনে—এর সঙ্গে যে কি একটা
আকাঙ্ক্ষা জড়িত আছে ঠিক বুঝতে পারিনে। এ যেন এই হৃৎ ধরণীর প্রতি একটা
নাড়ীর টান। এক সময়ে যখন আমি এই পৃথিবীর সঙ্গে এক হয়ে ছিলাম, যখন আমার
উপর সবুজ ঘাস উঠত, শরতেব আলো পড়ত, সূর্য্যকিরণে আমার সুদূরবিস্তৃত শ্যামল
অঙ্গের প্রত্যেক রোমকূপ থেকে যৌবনের সুগন্ধি উত্তাপ উথিত হতে থাকত—আমি
কত দূর দূরান্তর কত দেশদেশান্তরের জলস্থলপর্ব্বত ব্যাপ্ত করে উজ্জল আকাশের নীচে
নিমন্তভাবে শুয়ে পড়ে থাকতুম, তখন শরৎসূর্য্যালোকে আমার রুহৎ সর্ব্বাঙ্গে যে একটি
আনন্দরস একটি জীবনীশক্তি অত্যন্ত অব্যক্ত অর্জ্জচেতন এবং অত্যন্ত প্রকাণ্ডভাবে
সঞ্চারিত হতে থাকত তাই যেন খানিকটা মনে পড়ে। আমার এই যে মনের ভাব
এ যেন এই প্রতিনিয়ত অঙ্কুরিত মুকুলিত পুলকিত সূর্য্যসনাথা আদিম পৃথিবীর ভাব।
যেন আমার এই চেতনার প্রবাহ পৃথিবীর প্রত্যেক ঘাসে এবং গাছের শিকড়ে শিকড়ে
শিরায় শিরায় ধীরে ধীরে প্রবাহিত হচ্ছে—সমস্ত শস্যক্ষেত্র রোমাঞ্চিত হয়ে উঠছে এবং
নাংকল গাছের প্রত্যেক পাতা জীবনের আবেগে ধরধর করে কাঁপছে। এই
পৃথিবীর উপর আমার যে একটি আন্তরিক আত্মীয়বৎসলতার ভাব আছে, ইচ্ছা করে
সেটা ভালকরে প্রকাশ করতে—কিন্তু ওটা বোধ হয় অনেকেই ঠিকটি বুঝতে পারবে না,
কি একটা কিম্বদন্তি রকমের মনে করবে।

বোখালিয়া

১৮ই নবেম্বর,

১৮৯১।

ভাবছিলুম এতক্ষণে রেলগাড়ি না জানি কোথায় গিয়ে পৌছল। এই সময়টা সকালবেলায় নওয়াড়ির কাছে উঁচু নীচু প্রস্তরকঠিন তরুবিবল পৃথিবীর উপর সূর্য্যোদয় হয়। বোধ হয় নবীন রোদে এতক্ষণে চারিদিক উজ্জ্বল হয়ে উঠেছে, মাঝে মাঝে আকাশপটে নীল পর্কতের আভাস দেখা যাচ্ছে ; শস্যক্ষেত্র বড় একটা নেই ; দৈবাৎ ছই এক জায়গায় সেখানকার বুনো চাষারা মহিব নিয়ে চাষ আরম্ভ করেছে ; ছইদ্বারে বিনীর্ণ পৃথিবী, কালো কালো পাথর, শুকনো জলস্রোতের ছুড়িছড়ানো পদচিহ্ন, ছোট ছোট অপরিণত শালগাছ, এবং টেসিগ্রাফের তারের উপর কালো লেজ ঝোলানো চঞ্চল ফিঙে পাখী। একটা যেন বৃহৎ বস্তু প্রকৃতি পোষ মেনে একটি জ্যোতির্গায় নবীন দেবশিশুর উজ্জ্বল কোমল করস্পর্শ সর্বাঙ্গে অনুভব করে শান্ত স্থির ভাবে শুয়ে পড়ে আছে। কি রকম ছবিটা আমার মনে আসে বল্ব ? কালিদাসের শকুন্তলায় আছে ছদ্মস্তর ছেলে শিশু ভরত একটা সিংহশাবক নিয়ে খেলা করত। সে যেন একদিন পশুবৎসলভাবে সিংহশাবকের বড় বড় রোঁখার মধ্যে দিয়ে আস্তে আস্তে আপনায় শুভ্রকোমল অঙ্গুলিগুলি চালনা করচে, আর বৃহৎ জন্তুটা স্থির হয়ে পড়ে আছে, এবং মাঝে মাঝে সন্নেহে একান্ত নির্ভরের ভাবে আপনায় মানববন্ধুর প্রতি আড়চক্ষে চেয়ে দেখচে। আর ঐ যে শুকনো স্রোতের ছুড়িছড়ানো পথের কথা বল্লুম ওতে আমার কি মনে পড়ে বল্ব ? বিলাতি রূপকথায় পড়া যায় বিমাতা যখন তার সতীনের হেলে-মেয়েকে ঘর থেকে তাড়িয়ে ছল করে একটা অচেনা অরণ্যের মধ্যে পাঠিয়ে দিলে তখন ছই ভাইবোনে বনের ভিতর চলতে চলতে বুদ্ধিপূর্ব্বক একটা একটা ছুড়ি ফেলে আপনাদের পথ চিহ্নিত করে গিয়েছিল। ছোট ছোট স্রোতগুলি যেন সেইরকম ছোট ছোট ছেলেমেয়ে ; তারা খুব তরুণ শৈশবে এই অচেনা বৃহৎ পৃথিবীর মধ্যে বেরিয়ে

পড়ে ; তাই চলতে চলতে আপনাদের ছোট ছোট পথের উপর হুড়ি ছড়িয়ে রেখে
যায়—আবার যদি ফিরে আসে আপনার এই গৃহপথটি ফিরে পাবে । কিন্তু ফিরে আসা
আর ঘটবে না ।

—*—


নাটোর,
২রা ডিসেম্বর।

কাল ম—র ওখানে গিয়েছিলুম। বিকেলে সকলে মিলে বেড়াতে গেলুম। ছুইধারে মাঠের মাঝখান দিয়ে রাস্তাটা আমার বেশ লেগেছিল। বাংলাদেশের ধু ধু জনহীন মাঠ এবং তার প্রান্তবর্তী গাছপাণার মধ্যে স্র্যাস্ত—কি একটি বিশাল শান্তি এবং কোমল করুণা! আমাদের এই আপনাদের পৃথিবীর সঙ্গে আর ঐ বহুদূরবর্তী আকাশের সঙ্গে কি একটি স্নেহভারবিনত মৌন স্নান মিলন! অনন্তের মধ্যে যে একটি প্রকাণ্ড চিরবিরহ-বিষাদ আছে সে এই সঙ্কোচলোকার পরিত্যক্তা পৃথিবীর উপরে কি একটি উদাস আলোকে আপনাকে ঈষৎ প্রকাশ করে দেয়, - সমস্ত জলে স্থলে আকাশে ফি একটি ভাষাপরিপূর্ণ নীরবতা! অনেককণ চূপ করে অনিমেঘ নেত্রে চেয়ে দেখতে দেখতে মনে হয়, যদি এই চরাচর ব্যাপ্ত নীরবতা আপনাকে আর ধারণ করতে না পারে, সহসা তার অনাদি ভাষা যদি বিদীর্ণ হয়ে প্রকাশ পায় তাহলে কি একটা গভীর গভীর শাস্তসুন্দর সক্রুণ সঙ্গীত পৃথিবী থেকে নক্ষত্রলোক পর্যন্ত বেজে ওঠে! আসলে তাই হচ্ছে। আমরা একটু নিবিষ্টচিত্তে স্থির হয়ে চেষ্ঠা করলে জগতের সমস্ত সম্মিলিত আলোক এবং বর্ণের বৃহৎ হার্মোনিকে মনে মনে একটি বিপুল সঙ্গীতে তর্জমা করে নিতে পারি। এই জগৎব্যাপী দৃশ্যপ্রবাহের অবিশ্রাম কম্পনধ্বনিকে কেবল একবার চোখবুজে মনের কান দিয়ে শুনতে হয়। কিন্তু আমি এই স্র্যোদয় এবং স্র্যাস্তের কথা কতবার লিখ্ব! নিত্য নূতন করে অল্পভব করা যায় কিন্তু নিত্য নূতন করে প্রকাশ করি কি করে!

শিলাইদহ,
১ই ডিসেম্বর।

এখন একলাটি আমার সেই বোটের জানলার কাছে অধিষ্ঠিত হয়ে বহুদিন পরে একটু মনের শান্তি পেয়েছি। স্রোতের অমুকুলে বোট চলচে, তাব উপর পাল পেয়েচে—ছপুরবেলাকার রোদ্দুরে শীতের দিনটা ঈষৎ তেতে উঠেছে, পদ্মায় নৌকো নেই—শৃঙ্খ বালির চর, হৃদয়ে রং, একদিকে নদীর নীল আর একদিকে আকাশের নীলের মাঝে একটি রেখার মত আঁকা রয়েছে—জল কেবল উদ্ভরে বাতাসে খুব অল্প অল্প চিক্ চিক্ করে কাঁপচে, চেঁটে নেই। আমি এই খোলা জানলার ধারে হেলান দিয়ে বসে আছি; আমার মাথাব অল্প অল্প বাতাস লাগচে বেশ আরাম করচে। অনেকদিন তীব্র রোগভোগের পর শরীরটা শিথিল দুর্বল অবস্থায় আছে, এইরকম সময় প্রকৃতিব এই ধীর স্নিগ্ধ শুশ্রূষা ভারি মধুর লাগচে—এই শীতশীর্ণ নদীর মত আমার সমস্ত অস্তিত্ব যেন মৃদু রোদ্দে গড়ে অলসভাবে ঝিক্ ঝিক্ করচে, এবং যেন অর্ধেক আনমনে চিঠি লিখে যাচ্ছি। প্রতিবার এই পদ্মার উপর আসবার আগে ভয় হয় আমার পরা বোব হয় পুণোণী হয়ে গেছে—কিন্তু যখন বোট ভাসিয়ে দিই, চারিদিকে জল কুল কুল করে উঠে—চারিদিকে একটা স্পন্দন কম্পন আলোক আকাশ মুহূ কলধ্বনি, একটা স্নকোমল নীল বিস্তার, একটা স্ননবীন স্তামল রেখা, বর্ণ এবং নৃত্য এবং সঙ্গীত এবং সৌন্দর্য্যের একটি নিত্য উৎসব উদ্ঘাটিত হয়ে যায় তখন আমার নতুন করে আমার হৃদয় যেন অভিভূত হয়ে যায়। এই পৃথিবীটি আমার অনেকদিন-কার এবং অনেক জন্মকার ভালবাসার লোকের মত আমার কাছে চিরকাল নতুন : আমাদের দুজনকার মধ্যে একটা খুব গভীর এবং সুদূরব্যাপী চেনাশোনা আছে। আমি বেশ মনে করতে পারি, বহুযুগ পূর্বে যখন তরুণী পৃথিবী সমুদ্রস্নান থেকে সবে মাথা তুলে উঠে তখনকার নবীন স্বর্য্যকে বন্দনা করচেন, তখন আমি এই পৃথিবীর নূতন মাটিতে কোথা থেকে এক প্রথম জীবনোচ্ছ্বাসে গাছ হয়ে পল্লবিত হয়ে উঠেছিলুম।

তখন পৃথিবীতে জীবজন্তু কিছুই ছিল না, বৃহৎ সমুদ্র দিনরাত্রি ছলচে, এবং অবোধ মাতার মত আপনার নবজাত ক্ষুদ্র ভূমিকে মাঝে মাঝে উন্নত আলিঙ্গনে একেবারে আবৃত করে ফেল্চে—তখন আমি এই পৃথিবীতে আমার সমস্ত সর্বাঙ্গ দিয়ে প্রথম সূর্যালোক পান করেছিলুম, নবশিশুর মত একটা অন্ধ জীবনের পুলকে নীলাম্বরভলে আন্দোলিত হয়ে উঠেছিলুম, এই আমার মাটির মাতাকে আমার সমস্ত শিকড়গুলি দিয়ে জড়িয়ে এর স্তম্ভরস পান করেছিলুম। একটা মূঢ় আনন্দে আমার ফুল ফুটত এবং নব পল্লব উদ্গত হত। যখন ঘনঘটা করে বর্ষার মেঘ উঠত তখন তার ঘনশ্রাম ছায়া আমার সমস্ত পল্লবকে একটি পরিচিত করতলের মত স্পর্শ করত। তার পরেও নব নব যুগে এই পৃথিবীর মাটিতে আমি জন্মেছি। আমরা দুজনে একলা মুখোমুখি করে বসলেই আমাদের সেই বহুকালের পরিচয় বেন অল্পে অল্পে মনে পড়ে। আমার বসুন্ধরা এখন “একখানি রৌদ্রপীত হিরণ্য অঞ্চল” পরে ঐ নদীতীরের শস্তক্ষেত্রে বসে আছেন ; আমি তাঁর পায়ের কাছে কোলের কাছে গিয়ে লুটিয়ে পড়ি—অনেক ছেলের বহুসন্তানবতী মা যেমন অর্দ্ধমনস্ক অথচ নিশ্চল সহিষ্ণুভাবে আপন শিশুদের আনাগোনার প্রতি তেমন দৃকপাত করেন না—তেমনি আমার পৃথিবী এই ছপুরবেলার ঐ আকাশপ্রান্তের দিকে চেয়ে বহু আদিমকালের কথা ভাবচেন আমার দিকে তেমন লক্ষ্য করচেন না, আর আমি কেবল অবিশ্রাম বকে যাচ্ছি। এইভাবে একরকম কেটে যাচ্ছে। প্রায় বিকেল হয়ে এল। এখন শীতের বেলা কি না, দেখতে দেখতে রোদ্র পড়ে যায়।



কটক

ফেব্রুয়ারি ১৮৯৩।

আমি ত বলি যতদিন না আমরা একটা কিছু করে তুলতে পারব ততদিন আমাদের অজ্ঞাতবাস ভাল। কেননা আমরা যখন সত্যই অবমাননার যোগ্য তখন কিসের দোহাই দিয়ে পরের কাছে আত্মসম্মান রক্ষা করব? পৃথিবীর মধ্যে যখন আমাদের একটা কোনো প্রতিষ্ঠাভূমি হবে, পৃথিবীর কাজে যখন আমাদের একটা কোনো হাত থাকবে, তখন আমরা ওদের সঙ্গে হাসিমুখে কথা কইতে পারব। ততদিন লুকিয়ে থেকে চুপ মেরে আপনার কাজ করে যাওয়াই ভাল। দেশের লোকের ঠিক এর উণ্টো ধারণা। বা কিছু ভিতরকার কাজ, যা গোপনে থেকে করতে হবে সে তারা তুচ্ছ জ্ঞান করে, যেটা নিতান্ত অস্থায়ী আশ্বালন এবং আড়ম্বরমাত্র সেইটেতেই তাদের যত ঝোক। আমাদের এ বড় হতভাগা দেশ। এখানে মনের মধ্যে কাজ করবার বল রাখা বড় শক্ত। যথার্থ সাহায্য করবার লোক কেউ নেই। যার সঙ্গে দুটো কথা কয়ে প্রাণ সঞ্চয় করা যায় এমন মানুষ দশবিশ ক্রোশের মধ্যে একটি পাওয়া যায় না। কেউ চিন্তা করে না, অনুভব করে না, কাজ করে না; বৃহৎ কার্যের, যথার্থ জীবনের কোনো অভিজ্ঞতা কারো নেই, বেশ একটি পরিণত মহুয়া কোথাও পাওয়া যায় না। সমস্ত মানুষগুলো বেন উপছারার মত ঘুরে বেড়াচ্ছে। খাচ্ছেনাচ্ছে, আপিস যাচ্ছে, ঘুমচ্ছে, তামাক টানচে, আর নিতান্ত নিরীক্ষার মত বকর বকর বকছে। যখন ভাবের কথা বলে তখন সেন্টিমেন্টাল হয়ে পড়ে, আর যখন যুক্তির কথা পাড়ে তখন ছেলেমানুষী করে। যথার্থ মানুষের সংস্রব পাবার জন্যে মানুষের মনে ভারি একটা তৃষ্ণা থাকে। কিন্তু সত্যকার রক্তমাংসের শক্তসমর্থ মানুষ ত নেই—সমস্ত উপছারা, পৃথিবীর সঙ্গে অসংলগ্নভাবে বাণেশের মত ভাসছে।

বালিয়া; মঙ্গলবার ;

ফেব্রুয়ারি, ১৮৯৩।

আমার কিন্তু আর ভ্রমণ করতে ইচ্ছে করচে না। ভারি ইচ্ছে করচে একটি কোণের মধ্যে আড্ডা করে একটু নিরিবিলা হয়ে বসি। ভারতবর্ষের দুটি অংশ আছে, এক অংশ গৃহস্থ, আর এক অংশ সন্ন্যাসী, কেউ বা ঘরের কোণে থেকে নড়ে না, কেউ বা একে-বারে গৃহহীন। আমার মধ্যে ভারতবর্ষের সেই দুই ভাগই আছে। ঘরের কোণও আমাকে টানে, ঘরের বাহিরও আমাকে আহ্বান করে। খুব ভ্রমণ করে দেখে বেড়াব ইচ্ছে করে, আবার উদ্ভ্রান্ত শ্রান্ত মন একটি নীড়ের জন্তে লালায়িত হয়ে ওঠে। পাখীর মত ভাব আর কি! থাকবার জন্তে যেমন ছোট্ট নীড়টি, ওড়বার জন্তে তেমনি মস্ত আকাশ। আমি যে কোণটি ভালবাসি সে কেবল মনকে শান্ত করবার জন্তে। আমার মনটা ভিতরে ভিতরে এমনি অশ্রান্তভাবে কাজ করতে চায়, লোকজনের ভিড়ের মধ্যে তার কর্মোচ্ছন্ন এমনি পদে পদে প্রতিহত হতে থাকে যে সে অস্থির হয়ে ওঠে, খাঁচার ভিতর থেকে আমাকে কেবলি যেন আঘাত করে। একটু নিরালা পেলে সে বেশ সাধ মিটিয়ে ভাবতে পারে, চারিদিকে চেয়ে দেখতে পারে, ভাবগুলিকে মনের মত করে প্রকাশ করতে পারে। দিবারাত্রি সে অথও অবসর চায়—স্বষ্টিকর্তা আপনার স্থষ্টির মধ্যে যেমন একাকী সে আপনার ভাবরাজ্যের মধ্যখানে তেমনি একলা বিরাজ করতে চায়।

—•—

১০ই ফেব্রুয়ারি, ১৮৯৩।

এখানকার একটা উৎকট ইংরেজ—প্রকাণ্ড নাক, ধূর্ত চোখ, দেড়হাত চিবুক, গৌফদাড়ি কামানো, মোটা গলা, একটা পূর্ণপরিণত জনবৃষ। গবর্নেন্ট আমাদের দেশের জুরিপ্রথা উপর হস্তক্ষেপ করতে চেয়েছিল বলে চারদিকে একটা আপত্তি উঠেছে। লোকটা জোর করে সেই বিষয়ে কথা তুলে—বাবুর সঙ্গে তর্ক করতে লাগল। বলে এদেশের moral standard low এখানকার লোকের life-এর sacredness সম্বন্ধে যথেষ্ট বিশ্বাস নেই, এরা জুরি হবার যোগ্য নয়। একজন বাঙালীর নিমন্ত্রণে এসে বাঙালীর মধ্যে বসে যারা এরকম করে বলতে কুণ্ঠিত হয় না, তারা আমাদের কি চক্ষে দেখে! খাবার টেবিল থেকে যখন ড্রয়িংরুমের এক কোণে এসে বসলুম আমার চোখে সমস্ত ছায়ার মত ঠেকছিল। আমি যেন আমার চোখের সামনে সমস্ত বৃহৎ ভারতবর্ষ বিস্তৃত দেখতে পাচ্ছিলুম—আমাদের এই গৌরবহীন বিষন্ন জন্মভূমির ঠিক শিয়রের কাছে আমি যেন বসেছিলুম,—এমন একটা বিপুল বিষাদ আমার সমস্ত হৃদয়কে আচ্ছন্ন করেছিল সে আর কি বলব! অথচ চোখের সামনে ঈভনিং ড্রেসপরা মেমসাহেব, এবং কানের কাছে ইংরেজি হাস্তালাপের গুঞ্জনধ্বনি—সবস্বত্ব এমনি অসঙ্গত। আমাদের চিরকালের ভারতবর্ষ আমার কাছে কতখানি সত্য—আর এই ডিনার টেবিলের বিলিতি মিষ্টহাসি, ইংরিজি শিষ্টালাপ আমাদের পক্ষে কত ফাঁকা, কত ফাঁকি!

পুরী,

১৫ই ফেব্রুয়ারি, ১৮৯৩।

তাঁর কবিতা যে খারাপ তা নয়, কেবল চলনসই মাত্র। কেউ কেউ যেমন প্রথম শ্রেণীতে পাস করে কেউ কেউ তেমনি প্রথম শ্রেণীতে ফেল্ করে। কিন্তু যারা পাস করে তাদেরই ভিন্ন ভিন্ন শ্রেণী নির্দিষ্ট হয় যারা ফেল্ করে তারা সবাই একদলের মধ্যে পড়ে যায়। বিশ্ববিদ্যালয়ের পরীক্ষায় যেমন অনেক ভাল ছেলে অঙ্কে ফেল্, তেমনি কাব্যে যারা ফেল্ তারা অনেকেই সঙ্গীতে ফেল্। তাদের ভাব আছে, কথা আছে, রকমসকম আছে, আয়োজনের কোনো ক্রটি নেই কেবল সেই সঙ্গীতটি নেই যাতে মুহূর্তে সমস্তটি কবিতা হয়ে ওঠে। সেইটেই চোখে আঙুল দিয়ে দেখিয়ে দেওয়া ভারি শক্ত। কাঁঠও আছে, ফুঁও আছে, কেবল সেই আঙুনের ফুলিঙ্গটুকুমাত্র নেই যাতে সবটা ধরে উঠে আগুন হয়ে ওঠে। এর মধ্যে কাঁঠের বোঝাটা নানা স্থান থেকে পরি-শ্রমপূর্বক সংগ্রহ করে আনা যায় কিন্তু সেই অগ্নিকণাটুকু নিজের অন্তরের মধ্যে আছে—সেটুকু না থাকলে পরিতপ্রমাণ স্তূপ ব্যর্থ হয়ে যায়।

—•—

পুরী,

১৪ই ফেব্রুয়ারি, ১৮৯৩।

কারো কারো মন ফোটোগ্রাফের wet plate-এর মত ; যে ছবিটা ওঠে সেটাকে তখন ফুটিয়ে কাগজে না ছাপিয়ে নিলে নষ্ট হয়ে যায়। আমার মন সেই জাতের। যখন যে কোনো ছবি দেখি অমনি মনে করি এটা চিঠিতে ভাল করে লিখতে হবে। কটক থেকে পুরী পর্য্যন্ত এলুম, এই ভ্রমণের কত কি বর্ণনা করবার আছে তার ঠিক নেই। যেদিন যা দেখছি সেইদিনই সেইগুলো লেখবার যদি সময় পেতুম তাহলে ছবি বেশ ফুটে উঠতে পারত—কিন্তু মাঝে দুই একদিন গোলেমালা কেটে গেল—ইতিমধ্যে ছবির খুঁটিনাট রেখাগুলি অনেকটা অস্পষ্ট হয়ে এসেছে। তার একটা প্রধান কারণ, পুরীতে এসে পৌঁছে সামনে অহর্নিশি সমুদ্র দেখছি, সেই আমার সমস্ত মন হরণ করেছে, আমাদের দীর্ঘ ভ্রমণপথের দিকে পশ্চাৎ ফিরে চাইবার আর অবসর পাওয়া যাচ্ছে না।

শনিবার মধ্যাহ্নে আহারাদি করে বস্তু আমি বি—বাবু, একটি ভাড়াটে ফিট্‌ন গাড়িতে আমাদের কক্ষল বিছানা পেতে তিনটি পিঠের কাছে তিন বালিশ রেখে কোচ-বাক্সে একটি চাপরাশি চড়িয়ে যাত্রা আরম্ভ করে দিলাম।

কাঠযুড়ি পেরিয়ে আমাদের পথ। সেখানে গাড়ি থেকে নেবে আমাদের পাঙ্কিতে উঠতে হল। ধূসর বাবুকা ধু ধু করচে। ইংরেজিতে একে যে নদীর বিছানা বলে—বিছানাই বটে। সকাগবেলাকার পরিত্যক্ত বিছানার মত—নদীর স্রোত যেখানে যেমন পাশ ফিরেছিল, যেখানে যেমন তার ভার দিয়েছিল, তার বানুশযায় সেখানে তেমনি উঁচু নীচু হয়ে আছে—সেই বিশৃঙ্খল শয়ন কেউ আর যত্ন করে হাত দিয়ে সমান করে বিছিয়ে রাখেনি। এই বিস্তীর্ণ বালির ওপারে একটি প্রান্তে একটুখানি শীর্ণ স্ফটিকস্বচ্ছ জল ফাঁদ স্রোতে বয়ে চলে যাচ্ছে। কালিদাসের মেঘদূতে বিরহিনীর বর্ণনায় আছে যে, যক্ষপত্নী বিরহশয়নেব একটি প্রান্তে লীন হয়ে আছে—যেন পূর্বদিকের শেষ সীমা

কৃষ্ণপক্ষের কৃষ্ণতম চাঁদটুকুর মত । বর্ষাশেষের এই নদীটুকু দেখে বিরহিনীর যেন আর একটি উপমা পাওয়া গেল ।

কটক থেকে পুরী পর্য্যন্ত পথটি খুব ভাল । পথ উচ্ছে, তার ছইধারে নিম্নক্ষেত্র । বড় বড় গাছে ছায়াময় । অধিকাংশ আমগাছ । এই সময়ে সমস্ত আমগাছে মুকুল ধরেছে, গন্ধে পথ আকুল হয়ে আছে । আম অশ্বথ বট নারিকেল এবং খেজুর গাছে ঘেরা এক একটি গ্রাম দেখা যাচ্ছে । কোথাও বা স্বল্পজলা নদীর তীরে ছাপরওয়ালা গরুর গাড়ি দাঁড়িয়ে আছে ; গোলাপতার ছাউনির নীচে মেঠাইয়ের দোকান বসেছে ; পথের ধারে গাছের তলায় এবং শ্রেণীবদ্ধ কুঁড়ে ঘরের মধ্যে যাত্রীরা খাওয়াদাওয়া করচে ; ভিক্ষুকের দল নতুন যাত্রী ও গাড়ি পাঙ্কি দেখবামাত্র বিচিত্র কণ্ঠে ও ভাষায় আর্জনাদ করতে আরম্ভ করেছে ।

যত পুরীর নিকটবর্তী হচ্ছি তত পথের মধ্যে যাত্রীর সংখ্যা বেশি দেখতে পাচ্ছি । ঢাকা গরুর গাড়ি সারি সারি চলেছে । রাত্তার ধারে, গাছের তলায়, পুকুরের পাড়ে লোক গুয়ে আছে, রাঁধচে, জটলা করে রয়েছে । মাঝে মাঝে মন্দির, পাঁছশালা, বড় বড় পুষ্করিণী । পথের ডানদিকে একটা খুব মস্ত বিলের মত—তার ওপারে পশ্চিমে গাছের মাথার উপর জগন্নাথের মন্দিরচূড়া দেখা যাচ্ছে । হঠাৎ এক জায়গায় গাছ-পালার মধ্যে থেকে বেরিয়ে পড়েই সুবিগ্ণীর্ণ বালির তীর এবং ঘন নীল সমুদ্রের রেখা দেখতে পাওয়া গেল ।

বালিয়া,

১১ই মার্চ, ১৮৯৩।

ছোট্ট বোটখানি। আমার মত লম্বা লোকের দৈর্ঘ্যগর্ক খর্ব্ব করাই এর মুখ্য উদ্দেশ্য দেখতে পাচ্ছি। ভ্রমক্রমে মাথা একটুখানি তুলতে গেলেই অমনি কাঁঠফলকের প্রচণ্ড চপেটাবাত মাথার উপর এসে পড়ে—হঠাৎ একেবারে দমে যেতে হয়; সেইজন্তে কাল থেকে নতশিরে যাপন করছি। কপালে যত দ্রুৎ যত ব্যথা ছিল তার উপরে আবার প্রত্যেকবার দাঁড়াতে গিয়ে নতুন ব্যথা বাড়তে। সে জন্তে তত আপত্তি করিনে কিন্তু কাল মশার জ্বালায় ঘুম হয়নি সেটা আমার অত্যাগ মনে হচ্ছে।

এদিকে আবার শীত কেটে গিয়ে গরম পড়ে এসেছে; রৌদ্র উত্তপ্ত হয়ে উঠেছে এবং পাশের জানলা দিয়ে মন্দ মন্দ সজল শীতল বাতাস পিঠের উপর এসে লাগতে। আজ আর শীত কিম্বা সভ্যতার কোনো খাতির নেই—বনাতের চাপকান চোগা হকের উপর উদ্ভঙ্কনে ঝুলুচে। ঘণ্টাও বাজচে না, সসজ্জ খানসামা এসেও সেলাম করচে না—অসভ্যতার অপরিচ্ছন্ন শৈথিল্য ও আরাম উপভোগ করছি। পাখীগুলো ডাকচে এবং তীরে ছোটো বড় বড় বটগাছের পাতা বাতাসে ঝরঝর করে শব্দ করচে—কম্পিত জলের উপরকার রৌদ্রালোক বোটের ভিতরে এসে বিকসিক করে উঠচে—বেলাটা এরকম ঢিলেভাবেই চলেছে। কটকে থাকতে ছেলেদের ইস্কুল ও বি—বাবুর আদালতে যাবার তাড়া দেখে সময়ের হুর্খূল্যতা এবং সভ্য মানবসমাজের ব্যততা খুব অনুভব করা যেত। এখানে সময়ের ছোট ছোট নির্দিষ্ট সীমা নেই—কেবল দিন এবং রাত্রি এই দুটি বড় বড় বিভাগ।

তীরন,

মার্চ, ১৮৯৩।

এই মেঘঝুটি পাকা কোঠার মধ্যে অতি ভাল কিন্তু ছোট্ট বোটটির মধ্যে ছোট্ট কুক্ক প্রাণীর পক্ষে মনোরম নয়। একেত উঠতে বসতে মাথা ঠেকে, তার উপরে আবার যদি মাথায় জল পড়তে থাকে, তাহলে বেদনার কিঞ্চিৎ উপশম হতেও পারে কিন্তু আমার “হৃদশার পেয়ালা” একেবারে পূর্ণ হয়ে ওঠে। মনেকরেছিলুম ঝুটি বাদলা একরকম ফুরোলো, এখন স্নাত পৃথিবীসুন্দরী কিছুদিন রৌদ্রে পিঠ দিয়ে আপনার ভিজে এলোচুল শুকোবে, আপনার সিক্ত সবুজ সাড়িখানি রৌদ্রে গাছের ডালে টাঙিয়ে দেবে, মাঠের মধ্যে মেলে দেবে,—বসন্তী আঁচলখানি শুকিয়ে ফুরফুরে হয়ে বাতাসে উড়তে থাক্বে। কিন্তু রকমটা এখনও সে ভাবের নয়—বাদলার পর বাদলা, এর আর বিরাম নেই। আমিও দেখে শুনে এই ফাস্তন মাসের শেষভাগে কটকের এক ব্যক্তির একখানি মেঘদূত ধার করে নিয়ে এসেছি। আমাদের পাণ্ডুরার কুঠির সম্মুখবর্তী অব্যবহিত শতক্ষেত্রের উপরে আকাশ যেদিন আর্দ্রশ্লিষ্ণ সুনীলবর্ণ হয়ে উঠবে সেদিন বারান্দায় বসে আনুভূতি করা যাবে। জুর্ভাগ্যক্রমে আমার কিছুই মুখস্থ হয় না—কবিতা ঠিক উপযুক্ত সময়ে মুখস্থ আনুভূতি করে যাওয়া একটা পরম সুখ, সেটা আমার অদৃষ্টে নেই। যখন আবশ্যক হয় তখন বই হাওড়ে সন্ধান করে পড়তে গিয়ে আবশ্যক ফুরিয়ে যায়। মনে কর, মনে ব্যথা লেগে ভারি কান্দতে ইচ্ছে হয়েছে তখন যদি দরওয়ান পাঠিয়ে বাথগেটের বাড়ি থেকে শিশি করে চোখের জল আনতে হত, তাহলে কি মুক্লিলই হত। এই জন্তে মফস্বলে যখন যাই তখন অনেকগুলো বই সঙ্গে নিতে হয়, তার সবগুলোই যে প্রতিবার পড়ি তা নয়, কিন্তু কখন কোন্টা দরকার বোধ হবে আগে থাকতে জানবার যো নেই তাই সমস্ত সরঞ্জাম হাতে রাখতে হয়। মাহুকের মনের যদি নির্দিষ্ট ঋতুভেদ থাকত তাহলে অনেক সুবিধে হত। যেমন শীতের সময় কেবল শীতের কাপড় নিয়ে যাই এবং গরমের সময় বাল্যাপোষ

নেবার কোন দরকার থাকে না, তেমনি যদি জানতুম মনে কখন শীত কখন বসন্ত আসবে তাহলে আগে থাকতে সেইরকম গাছ কিস্তি গাছের যোগাড় করা যেতে পারত। কিন্তু মনের ঋতু আবার ছ-টা নয় একেবারে বাহ্যিক—এক প্যাকেট্‌ তাসের মত—কখন কোনটা হাতে আসে তার কিছু ঠিক নেই—অন্তরে বসে বসে কোন খামখেয়ালী 'খেলোয়াড়' যে এই তাস ডীল করে' এই খামখেয়ালী খেলা খেলে তার পরিচয় জানিনে। সেইজন্ত মানুষের আয়োজনের শেষ নেই—তাকে যে কত রকমের কত কি হাতে রাখতে হয় তার ঠিক নেই। সেই জন্তে আমার সঙ্গে “নেপালীজ্‌ বুদ্ধিষ্টিক্‌ লিটারেচর” থেকে আরম্ভ করে শেষপীর পর্যন্ত কত রকমেরই যে বই আছে তার আর ঠিকানা নেই। এর মধ্যে অধিকাংশ বইই ছোঁবনা কিন্তু কখন কি আবশ্যক হবে বলা যায় না। অত্যাধিক বরাবর আমার বৈষ্ণব কবি এবং সংস্কৃত বই আনি, এবার আনি নি সেই জন্তে ঐ ছোটোই প্রয়োজন বেশী অনুভব হচ্ছে। যখন পুরী খণ্ডগিরি প্রভৃতি ভ্রমণ করছিলুম তখন যদি মেঘদূতটা হাতে থাকত তারি স্মৃতি হতুম। কিন্তু মেঘদূত ছিলনা তার বদলে Caird's Philosophical Essays ছিল।

কটক,

মার্চ, ১৮৯৩।

তারপরে সাহেবের গান শুনলুম, সাহেবকে গান শোনালুম, তালি দিলুম এবং তালি পেলুম। এই যে বাহবাটুকু পাওয়া যায় একি যথার্থ হৃদয়ের মধ্যে প্রবেশ করে? একি কতকটা কৌতুহলপরিভূষ্টি নয়? সত্যি কি আমার যা ভাল লাগে ওদের তাই ভাল লাগে? এবং ওদের যা ভাল লাগে না তাই বাস্তবিক ভাল নয়? তাই যদি না হয় তবে ঐ করতলের তালিতে আমার এতই কি স্নেহ হবে? (ইংরেজের তালিকে যদি আমরা অতিরিক্ত মূল্য দিতে আরম্ভ করি তাহলে আমাদের দেশের অনেক ভালকে ত্যাগ করতে হয় এবং ওদের দেশের অনেক মন্দেরকে গ্রহণ করতে হয়। তাহলে পায়ের মোজাটি খুলে বেরতে আমাদের হয়ত লজ্জা হবে কিন্তু ওদের নাচের কাপড় পরতে লজ্জা হবে না। আমাদের দেশের শিল্পাচার সম্পূর্ণ লঙ্ঘন করতে কিছুই সঙ্কোচ হবেনা এবং ওদের দেশের কোন প্রচলিত শিল্পাচারও অমান্যমুখে গ্রহণ করতে পারব।) আমাদের দেশের আচ্ছাদনকে সম্পূর্ণ মনের মত ভাল দেখতে নয় বলে ত্যাগ করব কিন্তু ওদের দেশের টুপিকে বদলে দিতে হলেও শিরোধার্য করব। আমরা জ্ঞাত এবং অজ্ঞাত-সারে ঐ করতালির নির্দেশমত আপনার জীবনকে গঠিত করতে থাকি এবং তাকে অত্যন্ত ক্ষুদ্র করে ফেলি। আমি নিজেকে সম্বোধন করে বলি—“হে মৃৎপাত্র, ঐ কাংক্ষ-পাত্রের কাছ থেকে দূরে থেকে;—ও যদি রাগ করে তোমাকে আঘাত করে তাতেও তুমি চূর্ণ হয়ে যাবে, আর ও যদি সোহাগ করে তোমার পিঠে চাপড় মারে তাতেও তুমি স্কুটো হয়ে অতলে মগ্ন হয়ে যাবে—অতএব বৃদ্ধ জীসপের উপদেশ শোন, তফাৎ থাকাই সার কথা। উনি থাকুন বড় ঘরে, আর আমার সামান্য ঘরে সামান্য পাত্রের হয়ত ছোটখাট কাজ আছে—কিন্তু সে যদি আপনাকে ভেঙে ফেলে তবে তার বড় ঘরও নেই ছোট ঘরও নেই, তবে সে মাটির সমান হয়ে যাবে। তখন হয়ত আমাদের বড়ঘর-

ওমালা ব্যক্তিটি ঐ খণ্ড জিনিসকে তাঁর ড্রয়িংরুমের ক্যাবিনেটের এক পার্শ্বে সাজিয়ে
রাখতে পারেন—সে কিন্তু কুরিয়মসিটির স্বরূপে—তার চেয়ে ক্ষুদ্র গ্রামের কুলবধুর কক্ষে
বিস্তার করেও গৌরব আছে।”

— * —

এক একজন লোক আছে যারা কোন কিছু না করলেও যেন আশাতীত ফল দান করে—সু—সেই দলের লোক। ও যে খুব পাশ করবে, প্রাইজ পাবে, লিখবে, বড় কাজ কিছা ভাল চাকরি করবে তা যেন তেমন আবশ্যক মনে হয় না—মনে হয় যেন কিছু না করলেও ওর মধ্যে একটা চরিতার্থতা আছে। অধিকাংশ লোককেই অকর্মণ্য হয়ে থাকা শোভা পায় না, তাতে তাদের অপদার্থতা পরিস্ফুট হয়ে ওঠে। কিন্তু সু— কিছুই না করলেও ওকে কেউ অযোগ্য বলে ঘৃণা করতে পারবেনা। কাজকর্মের ব্যস্ততা মানুষের পক্ষে একটা আচ্ছাদনের মত, সমস্ত কমনুয়েন্স লোকের সেটা ভারি আবশ্যক—তাতে তাদের দৈন্ত্য তাদের শীর্ণতা ঢাকা পড়ে—কিন্তু যারা স্বভাবতই পরিপূর্ণ প্রকৃতিব লোক, তারা সমস্ত কর্মাবরণমুক্ত হলেও একটি শোভা এবং সম্মম রুক্ষা করতে পারে। সু—ব মতন অমন ষোলআনা শৈথিল্য আব কোন ছেলের দেখলে নিশ্চয় অসহ্য বোধ হত—কিন্তু সু—ব কুঁড়েমিতে একটি মাধুর্য্য আছে। সে আমি ওকে ভালবাসি বলে নয়—তাব প্রধান কারণ হচ্ছে চুপচাপ বসে থেকেও ওর মনটি বেশ পরিণত হয়ে উঠে এবং ওব আত্মীয় স্বজনের প্রতি ওব কিছুমাত্র ঔদাসীন্য় নেই। যে কুঁড়েমিতে মুঢ়তা এবং অশ্রব প্রতি অবহেলা ক্রমাগত স্ফীত হয়ে গোলগাল তেলচুকচুকে হয়ে উঠতে থাকে সেইটেই যথার্থ ঘৃণ্য। সু—একটি সহৃদয় এবং সুবুদ্ধি আলস্তেব দ্বারা যেন মধুব-রস-সিক্ত হয়ে আছে। যে গাছে স্বগন্ধ ফুল ফোটে সে গাছে আহাৰ্য্য ফল না ধরলেও চলে। সু—কে যে সকলে ভালবাসে সে ওর কোন কাজের দরুণ, ক্ষমতার দরুণ, চেষ্টার দরুণ নয়, ওর প্রকৃতির অন্তর্গত একটি সামঞ্জস্য ও সৌন্দর্য্যের দরুণ।

১৬ই এপ্রিল, ১৮৯৩।

ভ্রমণের গোলমালের মধ্যে হোটেলে বসে এটা পড়ে কিরকম লাগবে সন্দেহ আছে। কোথায় সেই পুরীর সমুদ্র আর কোথায় আগ্রার হোটেল! এই পৃথিবীর সঙ্গে সমুদ্রের সঙ্গে আমাদের যে একটা বহুকালের গভীর আত্মীয়তা আছে, নিরুজ্জনে প্রকৃতির সঙ্গে মুখোমুখি করে অন্তরের মধ্যে অনুভব না করলে সে কি কিছূতেই বোঝা যায়! পৃথিবীতে যখন মাটি ছিল না সমুদ্র একেবারে একলা ছিল, আমার আজকের এই চঞ্চল হৃদয় তখনকার সেই জনশূন্য জলরাশির মধ্যে অব্যক্তভাবে তরঙ্গিত হতে থাকত; সমুদ্রের দিকে চেয়ে তার একতান কলধ্বনি শুনে তা যেন বোঝা যায়। আমার অন্তরসমুদ্রও আজ একলা বসে বসে সেইরকম তরঙ্গিত হচ্ছে, তার ভিতরে ভিতরে কি একটা ঘেন সৃজিত হয়ে উঠছে। কত অনির্দিষ্ট আশা, অকারণ আশঙ্কা, কতরকমের প্রলয়, কত স্বর্গনরক, কত বিশ্বাস সন্দেহ, কত লোকাতীত প্রত্যক্ষাতীত প্রমাণাতীত অনুভব এবং অনুমান, সৌন্দর্যের অপার রহস্য, প্রেমের অতল অতৃপ্তি—মানবমনের জড়িত জটিল সহস্র রকমের অপূর্ণ অপরিমেয় ব্যাপার! বৃহৎ সমুদ্রের তীরে কিছা মুক্ত আকাশের নীচে একলা না বসলে সেই আপনার অন্তরের গোপন মহারহস্য ঠিক অনুভব করা যায় না। কিন্তু তা নিয়ে আমার মাথা খুঁড়ে মরবার দরকার নেই—আমার যা মনে উদয় হয়েছে আমি তাই বলে খালাস—তার পরে সমুদ্র সমভাবে তরঙ্গিত হতে থাকুক আর মানুষ হাঁস্‌ফাঁস্ করে ঘুরে ঘুরে বেড়াক।

৩০ শে এপ্রিল ১৮৯৩।

কাল তাই রাত্রি দশটা পর্যন্ত ছাতে পড়ে থাকতে পেরেছিলুম। চতুর্দশী টাদ উঠেছিল—চমৎকার হাওয়া দিচ্ছিল—ছাতে আর কেউ ছিলনা। আমি একলা পড়ে পড়ে আমার সমস্ত জীবনের কথা ভাবছিলাম। এই তেতালার ছাত, এইরকম জ্যোৎস্না, এইরকম দক্ষিণের বাতাস জীবনের স্মৃতিতে কতরকমে মিশ্রিত হয়ে আছে। দক্ষিণের বাগানের শিমুগাছের পাতা বরবর শব্দ করছিল, আমি অর্ধেক চোখ বুজে আমার ছেলেবেলাকার মনের ভাবগুলিকে মনে আনবার চেষ্টা করছিলাম। পুরোণো স্মৃতিগুলো মদের মত ;—যত বেশিদিন মনের মধ্যে সঞ্চিত হয়ে থাকে, ততই তার বর্ণ এবং স্বাদ এবং নেশা যেন মধুর হয়ে আসে। আমাদের এই স্মৃতির বোতলগুলি বুড়ো বয়সের জন্তে “In the deep-delved earth” ঠাণ্ডা করে রেখে দেওয়া যাচ্ছে—তখন বোধ হয় ছাতের উপর জ্যোৎস্না রাত্রে এক এক ফোঁটা করে আঁষাদ করতে বেশ লাগবে। অল্প বয়সে মানুষ কেবলমাত্র কল্পনা এবং স্মৃতিতে সন্তুষ্ট থাকে না, কেননা তখন তার রক্তের জোর তার শরীরের তেজ তাকে কিছু একটা কাজে প্রবৃত্ত করতে চায় কিন্তু বুড়ো বয়সে যখন স্বভাবতই আমরা কাজে অক্ষম, শবীরের যৌবনের অতিরিক্ত তেজ আমাদের কোনরকম তাড়না করচেনা, তখন স্মৃতি বোধ হয় আমাদের পক্ষে যথেষ্ট—তখন জ্যোৎস্না রাত্রের স্থির জলাশয়ের মত আমাদের অচঞ্চল মনে পূর্ণ স্মৃতির ছায়া এমনি পরিষ্কার স্পষ্টভাবে পড়ে, যে বর্তমান ব্যাপারের সঙ্গে তার প্রভেদ বোঝা শক্ত।

এখন আমি বোটে। এই যেন আমার নিজের বাড়ি। এখানে আমিই একমাত্র কর্তা। এখানে আমার উপরে আমার সময়ের উপরে আর কারো কোনো অধিকার নেই। এই বোটটি আমার পুরোণো ড্রেসিং গাউনের মত—এর মধ্যে প্রবেশ করলে খুব একটা চিলে অবসরের মধ্যে প্রবেশ করা যায়। যেমন ইচ্ছা ভাবি, যেমন ইচ্ছা কল্পনা করি, যত খুসি পড়ি, যত খুসি লিখি, এবং যত খুসি নদীর দিকে চেয়ে টেবিলের উপর পা তুলে দিয়ে আপন মনে এই আকাশপূর্ণ, আলোকপূর্ণ, আলস্তপূর্ণ দিনের মধ্যে নিমগ্ন হয়ে থাকি।

এখন প্রথম দিনকতক আমার এই পূর্বপরিচিতের সঙ্গে পুনর্জন্মের নতুন বাধো-বাধো ভাবটা কাটাতেই যাবে। তার পরে নিয়মিত লিখতে পড়তে নদীর ধারে বেড়াতে বেড়াতে আমাদের পুরাতন সখ্য আবার বেশ সহজ হয়ে আসবে। বাস্তবিক, পদ্মাকে আমি বড় ভালবাসি। ইজের যেমন ঐরাবত আমার তেমনি পদ্মা আমার স্বার্থ বাহন—খুব বেশি পোষমানা নয়, কিছু বুনোরকম ;—কিন্তু ওর পিঠে এবং কাঁধে হাত বুলিয়ে ওকে আমার আদর করতে ইচ্ছে করে। এখন পদ্মার জল অনেক কমে গেছে—বেশ স্বচ্ছ কৃষ্ণকার হয়ে এসেছে—একটা পা ভুবর্ণ ছিপছিপে মেয়ের মত, নরম শাড়িটি গায়ের সঙ্গে বেশ সংলগ্ন। সুন্দর ভঙ্গীতে চলে যাচ্ছে আর শাড়িটি বেশ গায়ের গতির সঙ্গে সঙ্গে বেঁকে যাচ্ছে। আমি যখন শিলাইদহে বোটে থাকি, তখন পদ্মা আমার পক্ষে সত্যিকার একটি স্বতন্ত্র মানুষের মত,—অতএব তার কথা যদি কিছু বাহ্যিক করে লিখি তবে সে কথাগুলো চিঠিতে লেখবার অযোগ্য মনে করা উচিত হবেনা। সেগুলো হচ্ছে এখানকার পার্সোনাল খবরের মধ্যে। একদিনেই কলকাতার সঙ্গে ভাবের কত তফাৎ হয়ে যায়। কাল বিকেলে সেখানে ছাতে বসেছিলুম সে একরকম, আর আজ এখানে ছপুরবেলার বোটে বসে আছি এ একরকম। কলকাতার

পক্ষে যা সেন্টিমেন্টাল, পোয়েটিকাল, এখানকার পক্ষে তা কতখানি সত্যিকার সত্যি ।
 পাব্লিক নামক গ্যাসালোকজালা ষ্টেজের উপর আর নাচতে ইচ্ছে করেনা—এখানকার
 এই স্বচ্ছ দিবালোক এবং নিভৃত অবসরের মধ্যে গোপনে আপনার কাজ করে যেতে
 ইচ্ছে করে । নেপথ্যে এসে রংচংগুলো ধুয়ে মুছে না ফেলে মনের অশান্তি আর যায়না ।
 সাধনা চালানো, সাধারণের উপকার করা এবং হাঁস্ফাঁস্ করে মরাটা অনেকটা অনা-
 বাক্য বলে মনে হয়—তার ভিতরে অনেক জিনিষ থাকে যা খাঁটি সোনা নয় যা খাদ—
 আর, এই প্রসারিত আকাশ আর সুবিস্তীর্ণ শান্তির মধ্যে যদি কারো প্রতি দৃকপাত না
 করে আপনার গভীর আনন্দে আপনার কাজ করে যাই তাহলেই যথার্থ কাজ হয় ।



কবিতা আমার বহুকালের প্রেয়সী—বোধ হয় যখন আমার রথীর মত বয়স ছিল তখন থেকে আমার সঙ্গে বাকদ্দতা হয়েছিল। তখন থেকে আমাদের পুকুরের ধারে বটের তলা, বাড়িভিতরের বাগান, বাড়িভিতরের একতলার অনাবিষ্কৃত ঘরগুলো, এবং সমস্ত বাহিরের জগৎ, এবং দাসীদের মুখের সমস্ত রূপকথা এবং ছড়াগুলো, আমার মনের মধ্যে ভারি একটা মায়াজগৎ তৈরি করছিল। তখনকার সেই আবছায়া অপূর্ণ মনের ভাব প্রকাশ করা ভারি শক্ত,—কিন্তু এই পর্য্যন্ত বেশ বলতে পারি কবিকল্পনার সঙ্গে তখন থেকেই মালাবদল হয়েগিয়েছিল। কিন্তু ও মেয়েটি পয়মস্ত নয়, তা স্বীকার করতে হয়;—আর যাই হোক সৌভাগ্য নিয়ে আসেন না। সুখ দেন না বলতে পারিনে, কিন্তু স্বস্তির সঙ্গে কোন সম্পর্ক নেই। যাকে বরণ করেন তাকে নিবিড় আনন্দ দেন কিন্তু এক এক সময় কঠিন আলিঙ্গনে হৃৎপিণ্ডটি নিংড়ে রক্ত বের করে নেন। যে লোককে তিনি নির্দোষ করেন, সংসারের মাঝখানে ভিত্তিস্থাপন করে গৃহস্থ হয়ে স্থির হয়ে আয়েস করে বসা সে লক্ষ্মীছাড়ার পক্ষে একেবারে অসম্ভব। কিন্তু আমার আসল জীবনটি তার কাছেই বদ্ধক আছে। সাধনাই লিখি আর জমিদারিই দেখি যেমনি কবিতা লিখতে আরম্ভ করি অমনি আমার চিরকালের মথার্থ আপনার মধ্যে প্রবেশ করি—আমি বেশ বুঝতে পারি এই আমার স্থান। জীবনে জ্ঞাতসারে এবং অজ্ঞাতসারে অনেক মিথ্যাচরণ করা যায় কিন্তু কবিতায় কখনো মিথ্যা কথা বলিনে—সেই আমার জীবনের সমস্ত গভীর সত্যের একমাত্র আশ্রয়স্থান।

ইতিমধ্যে দেখিছি খুব ফুলো ফুলো বড় বড় কতকগুলো মেঘ চতুর্দিক থেকে জমে এসেছে—আমার এই চারিদিকের দৃশ্যপট থেকে কাঁচা সোনারানী রৌদ্ররটুকু যেন মোটা মোটা ব্লটিংপ্যাড দিয়ে একেবারে চুপসে তুলে নিয়েছে। আবার যদি রুষ্টি আরম্ভ হয় তাহলে বিক্ ইন্দ্রদেবকে! মেঘগুলোর তেমন কাঁচা দরিদ্র চেহারা দেখিচেন, বাবুদের মত দিব্যি সজলশ্রামল টেবোটোবো নধর নন্দন ভাব। এখনি রুষ্টি আরম্ভ হল বলে—হাওয়াটাও সেইরকম কাঁচো কাঁচো ভিজ্জে ভিজ্জে ঠেঁক্চে। এখানে এই মেঘরোদ্ভের যাওয়াআসা ব্যাপারটা যে কতটা গুরুতর, আকাশের দিকে যে কত লোক হাঁ করে তাকিয়ে আছে, সিমলার সেই অভ্রভেদী পরীতশৃঙ্গে বসে তা ঠিকটুকল্লনা করা শক্ত হবে। আমার এই দরিদ্র চাঁদীপ্রজাগুলোকে দেখলে আমার ভারি মায়ার করে, এরা যেন বিধাতার শিশুসন্তানের মত নিরুপায়। তিনি এদের মুখে নিজের হাতে কিছু তুলে না দিলে এদের আর গতি নেই। পৃথিবীর স্তন যখন শুকিয়ে যায়, তখন এরা কেবল কাঁদতে জানে—কোনমতে একটুখানি ক্ষুধা ভাঙলেই আবার তখন সমস্ত ভুলে যায়। সোশিয়ালিষ্টরা যে সমস্ত পৃথিবীময় ধন বিভাগ করে দেয় সেটা সম্ভব কি অসম্ভব ঠিক জানিনে—যদি একেবারেই অসম্ভব হয় তাহলে বিধির বিধান বড় নিষ্ঠুর, মানুষ ভারি হতভাগ্য! কেননা পৃথিবীতে যদি দুঃখ থাকে ত থাক্, কিন্তু তার মধ্যে এতটুকু একটু ছিদ্র একটু সম্ভাবনা রেখে দেওয়া উচিত যাতে সেই দুঃখমোচনের জন্যে মানুষের উন্নত অংশ অবিশ্রাম চেষ্টা করতে পারে, একটা আশা পোষণ করতে পারে! যারা বলে, কোনোকালে পৃথিবীর সকল মানুষকে জীবনধারণের কতকগুলি মূল আবশ্যক জিনিষও বণ্টন করে দেওয়া নিতান্ত অসম্ভব অমূলক কল্পনামাত্র, কখনই সকল মানুষ খেতে পরতে পাবেনা, পৃথিবীর অধিকাংশ মানুষ চিরকালই অর্দ্ধাশনে টাটাবেই, এর কোন পথ নেই, তারা ভারি কঠিন কথা বলে। কিন্তু এ সমস্ত সামাজিক

সমস্তা এমন কঠিন ! বিধাতা আমাদের এমনি একটি ক্ষুদ্র জীর্ণ দীন বস্ত্রখণ্ড দিয়েছেন, পৃথিবীর একদিক চাক্তে গিয়ে আর একদিক ঝেরিয়ে পড়ে—হারিজ্য দূর করতে গেলে ধন চলে যায় এবং ধন গেলে সমাজের কত যে অসৌন্দর্য্য উন্নতির কারণ চলে যায় তার আর সীমা নেই । কিন্তু আবার এক একবার রোন্দুর উঠে—পশ্চিমে মেঘও যথেষ্ট জমে আছে ।



কাল বিকেলের দিকে খুব ঘনঘটা করে মেঘ করে খানিকটা বৃষ্টি হয়ে আবার পরিষ্কার হয়ে গেছে। আজ খানকতক দলভ্রষ্ট বিচ্ছিন্ন মেঘ স্বর্য়্যালোকে গুল্ল হয়ে খুব নিরীহ নিরপরাধভাবে আকাশের ধারে ধারে ঘুরে ঘুরে বেড়াচ্ছে। দেখতে মনে হয় এদের বর্ষণের অভিপ্রায় কিছুমাত্র নেই। কিন্তু চাণক্য তাঁর সুবিখ্যাত শ্লোকে যাদের যাদের বিশ্বাস করতে নিষেধ করেচেন তার মধ্যে দেবতাকেও ধরা উচিত ছিল। আজ সকালবেলাটি বড় সুন্দর হয়ে উঠেছে—আকাশ পরিষ্কার নীল, নদীর জলে রেখামাত্র নেই এবং ডাঙার কাছে গড়ানে জায়গায় যে ঘাসগুলি হয়েছে তাতে পূর্নদিন-কার বৃষ্টির কণাগুলি লেগে সেগুলি ঝকঝক করে। এই সমস্ত মিলে স্বর্য়্যালোকে আজকের প্রকৃতিকে ভারি একটি গুভ্রবসনা মহিমময়ী মহেশ্বরীর মত দেখাচ্ছে। সকালবেলাটি এমনি নিস্তরূ হয়ে রয়েছে। কেন জানিনে নদীতে একটি নৌকা নেই, বোটের নিকটবর্তী ঘাটে কেউ জল নিতে কেউ স্নান করতে আসেনি, নায়েব সকাল সকাল কাজ সেরে চলে গেছে। খানিকটা চুপ করে কানপেতে থাকলে কি একটা বাঁ বাঁ শব্দ শোনা যায় এবং এই রৌদ্রালোক আর আকাশ আন্তে আন্তে প্রবেশ করে মাথার ভিতরটি একেবারে ভরে ওঠে এবং সেখানকার সমুদয় ভাব ও চিন্তাগুলিকে একটি নীল সোনালী রঙে রঙিয়ে দেয়। বোটের একপাশে একটা বাঁকা কোচ আনিয়ে রেখেছি, এইরকম সকালবেলায় তার মধ্যে শরীরটা ছড়িয়ে দিয়ে সমস্ত কাজ ফেলে চুপচাপ করে পড়ে থাকতে ইচ্ছে করে, মনে হয়

—“নাই মোর পূর্বাপর,

যেন আমি একদিনে উঠেছি ফুটিয়া

অরণ্যের পিতৃমাতৃহীন ফুল!”—

যেন আমি এই আকাশের, এই নদীর, এই পুরাতন শ্রামল পৃথিবীর। বোটে আমার

এইরকম করে কাটে। পড়ে' পড়ে' পবিচিত প্রকৃতির কত রকমের যে ভাবের পরি-
বর্তন দেখি তার ঠিক নেই। এখানে আমার আর একটি স্মৃতি আছে। একএকসময় এক-
একটি সরল ভক্ত বৃদ্ধ প্রজা আসে, তাদের ভক্তি এমন অকৃত্রিম! বাস্তবিক এর হৃদয়
সরলতা এবং আন্তরিক ভক্তিতে এ লোকটি আমার চেয়ে কত বড়! আমিই যেন এ
ভক্তির অযোগ্য কিন্তু এ ভক্তিটিত বড় সামান্য জিনিষ নয়। ছোট ছেলেদের উপর
যেরকম ভালবাসা এই বৃদ্ধ ছেলেদের উপর অনেকটা সেইরকম—কিন্তু কিছু প্রভেদ
আছে। এরা তাদের চেয়েও ছোট। কেননা তারা বড় হবে এরা আর কোন কালেও
বড় হবেনা—এদের এই জীর্ণ শীর্ণ কুণ্ডিত বনিত বৃদ্ধদেহখানির মধ্যে কি একটি শুভ্র
সরল কোণল মন রয়েছে! শিশুদের মনে কেবল সরলতা আছে মাত্র কিন্তু এমন স্থির
বিশ্বাসপূর্ণ একাগ্রনিষ্ঠা নেই। মাঝে মাঝে যদি সত্যি একটা আধ্যাত্মিক যোগ
থাকে তাহলে আমার এই অন্তরের মঙ্গল ইচ্ছা ওর হয়ত কিছু কাজে লাগতে পারে।
কিন্তু সব প্রজা এককম নব—সেরকম প্রত্যাশা করাও যায় না। সব চেয়ে যা ভাল
সব চেয়ে তা হ্রলভ।

আজ টেলিগ্রাম পেলুম যে Missing gown lying Post office এর ছোটো অর্থ হতে পারে। এক অর্থ হতে হারা গাববস্ত্র ডাকঘরে গুয়ে আছেন। আর এক অর্থ হতে—গাউনটা মিসিং এবং পোষ্টঅফিসটা লাইং। দুই অর্থই সম্ভব হতে পারে—কিন্তু যে পর্যন্ত প্রতিবাদ না শুনি সে পর্যন্ত প্রথম অর্থটাই গ্রহণ করা গেল। কিন্তু মজা হচ্চে এই—সঙ্গে সঙ্গে যে চিঠিখানি এনেচে তাতে পরিষ্কার করে বলা আছে একটা গাউন যে পাওয়া যাবে নি তাতে আর কোনো সন্দেহ নেই।

বেচারি চিঠি! তার জিন্মায় যে কয়টি কথা লেফাফার পুরে দেওয়া হয়েছে সেই কয়টি কথা কাধে করে নিয়ে দীর্ঘ পথ টিকতে টিকতে চলে আন্টে—ইতিমধ্যে যে পৃথিবীতে কত কি হয়ে যাচ্ছে তা সে জানে না, এবং তার ছোট ভাই যে এক লক্ষ্যে তাকে ডিঙিয়ে তার সমস্ত কথার একটিনাত্র সংক্ষেপ রূপে প্রতিবাদ নিয়ে এসে হাজির হল তারও সে জবাব দিতে পারে না; সে ভালমামুষের মত বলে “আমি কিছু জানিনে বাপু, আমাকে সে যা বলে দিয়েচে আমি তাই বলে এনেচি।” বাস্তবিক এনেচে বটে। একটি কথার এদিক ওদিক হরনি—সমস্ত পথটি মাড়িয়ে, দীর্ঘ পথের কত চিহ্ন, আঙুল-পৃষ্ঠে কত ছাপ নিয়েই বেচারি ঠিক সময়ে এসে উপস্থিত হয়েছে। তা হোক তার খবর ভুল, আমি তাকে ভালবাসি। আর তারে চড়ে’ চক্ষের পলকে টেলিগ্রাফ এলেন—কোথাও পথশ্রমের কোন চিহ্ন নেই—লেফাফাখানি একেবারে রাঙা টুক টুক করচে—হড় বড় তড় বড় করে ছোটো কথা বলেন আর তিতর থেকে আটটা দশটা কথা পড়ে গেছে—তার মধ্যে ব্যাকরণ নেই ভঙ্গতা নেই কিছু নেই—একটা সম্বোধন নেই একটা বিনায়ের শিষ্টতাও নেই, আমার প্রতি যেন তার কিছুমাত্র বজ্রতার ভাব নেই, কেবল কোনোনতে তাড়াতাড়ি কথাটা যেমন তেমন করে বলে ফেলে দায় কাটিয়ে চলে যেতে পারলে বাঁচে।

আমি বিকেলে বেলা সাড়ে ছটার পর স্নান করে ঠাণ্ডা এবং পরিষ্কার হয়ে চরের উপর নদীর ধারে ঘণ্টাখানেক বেড়াই, তার পর আমাদের নতুন জলিবোটটাকে নদীর মধ্যে টেনে নিয়ে গিয়ে তার উপরে বিছানাটি পেতে ঠাণ্ডা হাওয়ায় সন্ধ্যার অন্ধকারে চীৎ হয়ে চুপচাপ পড়ে থাকি। শ—কাছে বসে' নানা কথা বকে যায়। চোখের উপরে আকাশ তারাব একেবারে খচিত হয়ে ওঠে। আমি প্রায় রোজই মনে করি, এই তারাময় আকাশের নীচে আবার কি কখনো জন্মগ্রহণ করব? আর কি কখনো এমন প্রশান্ত সন্ধ্যাবেলায় এই নিস্তক্ক গোবাই নদীটির উপর বাংলা দেশের এই সুন্দর একটি কোণে এমন নিশ্চিন্ত মুগ্ধ মনে জলিবোটের উপর বিছানা পেতে পড়ে থাকতে পাব? হয়ত আর কোনো জন্মে এমন একটি সন্ধ্যাবেলা আব কখনো ফিরে পাবনা। তখন কোথায় দৃশ্য পরিবর্তন হবে—আর, কিরকম মন নিয়েই বা জন্মাব? এমন সন্ধ্যা হয়ত অনেক পেতেও পারি কিন্তু সে সন্ধ্যা এমন নিস্তক্কভাবে তার সমস্ত কেশপাশ ছড়িয়ে দিয়ে আমার বুকের উপরে এত সুগভীর ভালবাসার সঙ্গে পড়ে থাকবেনা। আমি কি ঠিক এমনি মাহুঘটি তখন থাকব! আশ্চর্য্য এই আমার সব চেয়ে ভয় হয় পাছে আমি স্বরোপে গিয়ে জন্মগ্রহণ করি কেননা সেখানে সমস্ত চিন্তটিকে এমন উপরের দিকে উদ্ঘাটিত রেখে পড়ে থাকবার যো নেই এবং পড়ে থাকাও সকলে ভারি দোষের বিবেচনা করে। হয়ত একটা কারখানায় নয়ত ব্যাঙ্কে নয়ত পার্লামেন্টে সমস্ত দেহ-মনপ্রাণ দিয়ে খাটতে হবে। সহরের রাস্তা যেমন ব্যবসাবাগিজ্য গাড়িঘোড়া চলবার জন্তে ইটে বাধানো কঠিন, তেমনি মনটা স্বভাবটা বিজ্ঞেন্স চালাবার উপযোগী পাকা করে বাধানো—তাতে একটি কোমল তৃণ একটি অনাবশ্যক লতা গজাবার ছিদ্রটুকু নেই। ভারি ছাঁটাছোঁটা গড়াপেটা আইনে বাধা মজবুতরকমের ভাব। কি জানি, তার চেয়ে আমার এই কল্পনাপ্রিয় অকর্ষণ্য আত্মনিমগ্ন বিস্তৃত আকাশপূর্ণ মনের

ভাবটি কিছুমাত্র অগৌরবের বিষয় বলে মনে হয় না । জলিবোটে পড়ে পড়ে জগতের
সেই কাজের লোকের কাছে আপনাকে কিছুমাত্র খাটো মনে হয় না । বরঞ্চ আমিও
যদি কোমর বেঁধে কাজে লাগতুম তাহলে হয়ত সেই সমস্ত বড় বড় ওক-গাছ-কাটা ,
জোয়ান্ লোকদের কাছে আপনাকে ভারি ষৎসামান্য মনে হত ।

—•—

এবারকার ভায়ারিটাতে ঠিক প্রকৃতির স্তব নয়—মননামক একটা স্থষ্টিছাড়া চঞ্চল পদার্থ কোনো গতিকে আমাদের শরীরের মধ্যে প্রবেশ করাতে যে কিরকম একটা উৎপাত হয়েছে তৎসম্বন্ধে আলোচনা করা গেছে। আসলে, আমরা খাব পরব্ বেঁচে থাকব এইরকম কথা ছিল—আমরা যে বিশ্বের আদিকারণ অনুসন্ধান করি, ইচ্ছাপূর্ব্বক খুব শক্ত একটা ভাব ব্যক্ত করবার প্রয়াস করি, আবার তার মধ্যে পদে পদে মিল থাকা দরকার মনে করি; আপাদমস্তক স্বর্ণে নিমগ্ন হয়ে ও মাসে মাসে ঘরের কড়ি খরচ করে সাধনা বের করি, এর কি আবশ্যকতা ছিল! ওদিকে নারায়ণ সিং দেখ ঘি দিয়ে আটা দিয়ে বেশ মোটা মোটা রুট বানিয়ে তার সঙ্গে দধি সংযোগ করে আনন্দমনে ভোজনপূর্ব্বক দু এক ছিলিম তাবাক টেনে ছপুরবেলাটা কেমন স্বচ্ছন্দে নিদ্রা দিচ্ছে এবং সকালে বিকালে লোকেনের সামান্য ছচারটে কাজ করে' রাতে অকাতরে বিশ্রাম লাভ করেছে। জীবনটা যে বার্থ হল বিফল হল এমন কখন তার স্বপ্নেও মনে হয় না, পৃথিবীর যে যথেষ্ট দ্রুতবেগে উন্নতি হচ্ছে না সেজন্তে সে নিজেকে কখনো দায়িত্ব করেনা। জীবনের সফলতা কথাটার কোনো মানে নেই—প্রকৃতির একমাত্র আদেশ হচ্ছে বেঁচে থাক। নারায়ণ সিং সেই আদেশটির প্রতি লক্ষ্য রেখেই নিশ্চিন্ত আছে। আর যে হতভাগার বক্ষের মধ্যে মন নামক একটা প্রাণী গর্ত খুঁড়ে বাসা করেছে, তার আর বিশ্রাম নেই, তার পক্ষে কিছুই যথেষ্ট নয়, তার চতুর্দিকবর্তী অবস্থার সঙ্গে সমস্ত সামঞ্জস্য নষ্ট হয়ে গেছে; সে যখন জলে থাকে তখন স্থলের জন্তে লালায়িত হয়, যখন স্থলে থাকে তখন জলে সাঁতার দেবার জন্তে তার “অসীম আকাঙ্ক্ষার” উদ্বেক হয়। এই দ্রুত অন্তঃকরণ মনটাকে প্রকৃতির অগাধ শান্তির মধ্যে বিসর্জন করে একটুখানি স্থির হয়ে বসতে পারলে বাঁচা যায়, কথাটা হচ্ছে এই।

কোনো জিনিষ যথার্থ উপভোগ করতে গেলে তার চতুর্দিকে অবসরের বেড়া দিয়ে ঘিরে নিতে হয়—তাকে বেশ অনেকখানি মেলিয়ে দিয়ে ছড়িয়ে দিয়ে চতুর্দিকে বিছিয়ে দিয়ে তবে তাকে যোগ্যানা আগন্ত করা যায়। মফস্বলে একলা থাকবার সময় যে বন্ধু বান্ধবদের চিঠিপত্র এত ভাল লাগে তার একটা প্রধান কারণ হচ্ছে—প্রত্যেক অক্ষরটি পর্যন্ত একটি একটি ফোঁটার মত করে নিঃশেষপূর্বক গ্রহণ করবার অবসর পাওয়া যায়, মনের কল্পনা ওর প্রত্যেক কথায় লতিয়ে লতিয়ে জড়িয়ে জড়িয়ে ওঠে—বেশ অনেকক্ষণ ধরে একটা গতি অনুভব করা যায়। অতিলোভে তাড়াতাড়ি করতে গিয়ে সেই সুখ থেকে বঞ্চিত হতে হয়। সুখের ইচ্ছেটা এমনি তাড়াতাড়ি এগিয়ে এগিয়ে চলে যে, অনেক সময়ে সুখটাকেই ভিত্তিয়ে চলে যায়, এবং চক্ষের পলকে সমস্ত সুখিয়ে কেলে। এইরকম জমিজমা আমলা মামলার মধ্যে কোনো চিঠিকেই যথেষ্ট মনে হয় না—মনে হয় যেন ক্ষুধার যোগ্য অন্ন পাওয়া গেল না। কিন্তু যত বয়স হচ্ছে তত এইটে সেখিচি পাওয়াটা নিজের ক্ষমতার উপর নির্ভর করে। অল্প কতটা দিতে পারে তা নিয়ে নালিশ-ফরিয়াদি করা ভুল, আমি কতটা নিতে পারি এহটেই হচ্ছে আসল কথা। যা হাতের কাছে আসে তাকেই পুরোপুরি হস্তগত করে নেওয়া অনেক শিক্ষা সাধনা এবং সংস্কারের দ্বারা হয়। সে শিক্ষা লাভ করতে জীবনের প্রায় বারো আনা বাঁচ চলে যায়, তারপরে সে শিক্ষার ফল ভোগ করবার আর বড় সময় পাওয়া যায় না। ইতি সুখতত্ত্বশাস্ত্রের প্রথম অধ্যায়।

—•—


কাল সমস্ত রাত তীব্র বাতাস পথের কুকুরের মত হুঁহু করে কেঁদেছিল—আর
 ঝুটিও অবিশ্রাম চল্চে। মাঠের জল ছোট ছোট নির্ঝরের মত নানাদিক থেকে কল্কল
 করে নদীতে এসে পড়চে—চাষারা ওপারের চর থেকে ধান কেটে আনবার জন্তে
 কেউবা টোঙ্গা মাথায় কেউবা একথানা কচুপাতা মাথার উপর ধবে ভিজতে ভিজতে
 থেয়া নৌকায় পার হচ্ছে—বড় বড় বোঝাই নৌকোর মাথার উপর মাঝি হাল ধরে বসে
 বসে ভিজ্চে, আর মাঝারা গুণ কাঁধে করে ডাঙার উপর ভিজতে ভিজতে চলেচে—
 এমন হুঁহুগায় তবু পৃথিবীর কাজকর্ম বন্ধ থাকবার যো নেই। পাখীরা বিমর্ষ মনে তাদের
 নীড়ের মধ্যে বসে আছে কিন্তু মানুষের ছেলেরা ঘর ছেড়ে বেরিয়ে পড়েছে। তাঁমার
 বোটের সামনে ছুটি রাখালবালক একপাল গরু নিয়ে এসে চরাচ্ছে; গরুগুলি কচরুমচরু
 শব্দ করে' এই বর্ষাসতেজ সরসজ্বাল সিন্ধু ঘাসগুলির মধ্যে মুখ ভরে দিয়ে ল্যাজ নেড়ে
 পিঠের মাছি তাড়াতে তাড়াতে স্নিগ্ধ শান্ত নেত্রে আহার করে করে বেড়াচ্ছে—তাদের
 পিঠের উপর ঝুটি এবং রাখালবালকের যষ্টি অবিশ্রাম পড়চে, হুইই তাদের পক্ষে সমান
 অকারণ, অজ্ঞায় এবং অনাবশ্যক, এবং হুই তারা সহিষ্ণুভাবে বিনা-সমালোচনায় সয়ে
 যাচ্ছে এবং কচরুমচর করে ঘাস খাচ্ছে। এই গরুগুলির চোখের ঝুটি কেমন বিষম
 শাস্ত সুগম্ভীর স্নেহময়—মাঝের থেকে মানুষের কর্মের বোঝা এই বড় বড় জন্তুগুলোর II
ঘাড়ের উপর কেন পড়ল ? নদীর জল প্রতিদিনই বেড়ে উঠ্চে। পশুদিন বোটের
 ছাতের উপর থেকে যতখানি দেখা যেত, আজ, বোটের জানলায় বসে প্রায় ততটা
 দেখা যাচ্ছে—প্রতিদিন সকালে উঠে দেখি তটদৃশ্য অল্প অল্প করে প্রসারিত হয়ে যাচ্ছে।
 এতদিন সামনে ঐ দূর গ্রামের গাছপালার মাথাটা সবুজ পল্লবের মেঘের মত দেখা
 যেত—আজ সমস্ত বনটা আগাগোড়া আমাদের সম্মুখে এসে উপস্থিত হয়েছে। ডাঙা
 এবং জল হুই লাজুক প্রণয়ীর মত অল্প অল্প করে পরস্পরের কাছে অগ্রসর হচ্ছে। লজ্জার

সীমা উপ্তে এল বলে—প্রায় গলাগলি হয়ে এসেছে। এই ভরা বাদরে ভরা নদীর মধ্যে দিয়ে নৌকো করে যেতে বেশ লাগবে—বাঁধা বোট ছেড়ে দেবার জন্তে মনটা অধীর হয়ে আছে।



আজ সকালবেলায় অল্প অল্প রৌদ্রের আভাস দিচ্ছে। কাল বিকেল থেকে বৃষ্টি ধরে গেছে কিন্তু আকাশের ধারে ধারে স্তরে স্তরে এত মেঘ জমে আছে যে বড় আশা নেই। ঠিক যেন মেঘের কালো কার্পেটটা সমস্ত আকাশ থেকে গুটিয়ে নিয়ে একপ্রান্তে পাকিয়ে জড় করেছে, এখনি একটা ব্যস্তবাগীশ বাতাস এসে আবার সমস্ত আকাশময় বিছিয়ে দিয়ে যাবে, তখন নীলাকাশ এবং সোনালি রৌদ্রের কোনো চিহ্নমাত্র দেখা যাবে না। এবারে এত জলও আকাশে ছিল! আমাদের চরের মধ্যে নদীর জল প্রবেশ করেছে। চাষারা নৌকো বোঝাই করে কাঁচা ধান কেটে নিয়ে আস্চে—আমার বোটের পাশ দিয়ে তাদের নৌকো যাচ্ছে আর ক্রমাগত হাহাকার শুনে পাচ্ছি—যখন আব কয়দিন থাকলে ধান পাকত তখন কাঁচা ধান কেটে আনা চাষার পক্ষে যে কি নিদারুণ তা বেশ বুঝতেই পারা যায়। যদি ঐ শীষের মধ্যে ছোটো চারটে ধান একটু শক্ত হয়ে থাকে এই তাদের আশা। প্রকৃতির কার্যপ্রণালীর মধ্যে দয়া জিনিষটা কোনো এক জায়গায় আছে অবশ্য, নইলে আমরা পেলুম কোথা থেকে—কিন্তু সেটা যে ঠিক কোন্‌খানে আছে খুঁজে পাওয়া শক্ত। এই শত সহস্র নির্দোষ হতভাগ্যের নালিশ কোন জায়গায় গিয়ে পৌঁছেছে না, বৃষ্টি যেমনি পড়বার তেমনি পড়চে, নদী যেমন বাড়বার তেমনি বাড়চে, বিশ্বসংসারে এ সম্বন্ধে কারো কাছে কোনো দরবার পাবার যো নেই। মনকে বোঝাতে হয় যে কিছু বোঝবার যো নেই—কিন্তু জগতে যে দয়া এবং আয়বিচার আছে এটুকু বোঝা নিতান্ত আবশ্যক। কিন্তু এ সমস্ত মিথ্যে খুঁৎখুঁৎ মাত্র—কেননা সৃষ্টি কখনই সম্পূর্ণ স্বেচ্ছের হতে পারে না। যতক্ষণ অপূর্ণতা ততক্ষণ অভাব ততক্ষণ দুঃখ থাকবেই। জগৎ যদি জগৎ না হয়ে জীৱন হত তাহলেই কোথাও কোনো খুঁৎ থাকত না—কিন্তু ততটা দূর পর্যন্ত দরবার করতে সাহস হয় না। তবে দেখলে সকল কথাই গোড়াই গিয়ে ঠেকে যে, সৃষ্টি হল কেন—

কিন্তু সেটা সম্বন্ধে কোনো আপত্তি যদি না করা যায় তাহলে, জগতে দুঃখ রহিল কেন এ নালিশ উত্থাপন করা মিথ্যা। সেইজন্তে বোধেরা একেবারে গোড়া ঘেষে কোপ মারতে চায় ; তারা বলে যতক্ষণ অস্তিত্ব আছে ততক্ষণ দুঃখের সংশোধন হতে পারেনা একেবারে নির্কাণ চাই। খৃষ্টানরা বলে দুঃখটা খুব উচ্চ জিনিষ, ঈশ্বর স্বয়ং মানুষ হয়ে আমাদের জন্যে দুঃখ বহন করছেন। কিন্তু নৈতিক দুঃখ এক, আর পাকা ধান ডুবে যাওয়ার দুঃখ আর। আমি বলি যা হয়েছে বেশ হয়েছে ; এই যে আমি হয়েছি এবং এই আশ্চর্য্য জগৎ হয়েছে বড় তোকা হয়েছে—এমন জিনিষটা নষ্ট না হলেই ভাল। বুদ্ধদেব তহুত্তরে বলেন, এ জিনিষটা যদি রক্ষা করতে চাও তাহলে দুঃখ সহিতে হবে—আমি নরোধম তহুত্তরে বলি ভাল জিনিষ এবং প্রিয় জিনিষ রক্ষা করতে যদি দুঃখ সহিতে হয় তাহলে দুঃখ সব—তা আর্মি থাকি আর আমার জগৎটা থাকুক ; মাঝে মাঝে অন্নবস্ত্রের কষ্ট, মনঃকোভ, নৈরাশ্র্য বহন করতে হবে, কিন্তু সে দুঃখের চেয়ে যখন অস্তিত্ব ভালবাসি এবং অস্তিত্বের জন্তই সে দুঃখ বহন করি তখন ত আর কোনো কথা বলা শোভা পায় না।



কাল সমস্ত দিন বেশ পরিষ্কার ছিল। অনেকদিন পরে মেঘ কেটে রোদ্দে দশ-দিক উজ্জল হয়ে উঠেছিল; প্রকৃতি যেন স্নানের পর নতুন-ধোয়া বাসন্তী রঙের কাপড়টি পরে পরিচ্ছন্ন প্রসন্ন প্রকুল মুখে ভিজ়ে চুলাটি মুহুমন্দ বাতাসে শুকচ্ছিলেন। কাজ সেরে বেলা সাড়ে চারটে পাঁচটার সময় যখন বোট ছেড়ে দিলুম তখন পূর্বদিকে খুব একটা গাঢ় মেঘ উঠল। ক্রমশঃ একটু বাতাস এবং বৃষ্টিও যে হয়নি তা নয়। সেই শাখানদীটার ভিতরে যখন ঢুকলুম বৃষ্টি ধরে গেল। জলে চর ভেসে গেছে—মাছ-প্রমাণ লম্বা ঘাস এবং ঝাঁউ বনের ভিতর দিয়ে সরু সরু শব্দে গুণ টেনে বোট চলতে লাগল। খানিক দূরে গিয়ে অল্পকূল বাতাস পাওয়া গেল। পাল তুলে দিতে বল্লুম, পাল তুলে দিলে। হৃদিকে ঢেউ কেটে কল্ কল্ শব্দ তুলে বোট সগর্বে চলে যেতে লাগল। আমি বাইরে চোঁকি নিয়ে বসলুম। সেই নিবিড় নীল মেঘের অন্তরালে, অর্ধনিমগ্ন জলশূন্য চর এবং পরিপূর্ণ দিগন্তপ্রসারিত নদীর মধ্যে সূর্যাস্ত যে কি জিনিষ'সে আমি বর্ণনা করতে চেষ্টা করবনা। বিশেষতঃ আকাশের অতিদূরপ্রান্তে পদ্মার জলরেখার ঠিক উপরেই-মেঘের যেখানে ফাঁক পড়েছে সেখানটা এমনি অতি-মাত্রায় স্নানতম সোনালিতম হয়ে দেখা দিয়েছিল, সেই স্বর্ণপটের উপর সারি সারি লম্বা কুশ গাছগুলির মাথা এমনি সুকোমল সুনীল রেখায় অঙ্কিত হয়েছিল—প্রকৃতি সেখানে যেন আপনার চরম পরিণতিতে পৌঁছে একটা কল্পলোকের মধ্যে শেষ হয়ে গেছে। মাঝি জিজ্ঞাসা করলে বোট চরের কাছারীঘাটে রাখব কি? আমি বল্লুম, না পদ্মা পেরিয়ে চল।—মাঝি পাড়ি দিলে,—বাতাস বেগে বইতে লাগল, পদ্মা নৃত্য করতে লাগল, পাল ফুলে উঠল, দিনের আলো মিলিয়ে এল, আকাশের ধারের মেঘগুলি ক্রমে আকাশের মাঝখানে ঘনঘটা করে জমে গেল, চারদিকে পদ্মার উদামচঞ্চল জল করতালি দিচ্ছে—সম্মুখে দূরে নীল মেঘশূণ্যের নীচে পদ্মাতটের নীল বনরেখা দেখা যাচ্ছে—নদীর মাঝ-

খানে আমাদের বোট ছাড়া আর একটিও নৌকো নেই—তীরের কাছে দুই একটা জেলে ডিঙি ছোট ছোট পাল উড়িয়ে গৃহমুখে চলেছে,—আমি যেন প্রকৃতির রাজার মত বসে আছি আর আমাকে তার হ্রস্ব ফেনিলমুখ রাজ-অশ্ব সন্ত্যাগতিতে বহন করে নিয়ে চলেছে।



ছোটখাট গ্রাম, ভাঙাচোরা ঘাট, টিনের ছাতওয়ালা বাজার, বাঁথারির বেড়া দেওয়া গোলাঘর, বাঁশঝাড়, আম কাঁঠাল খেজুর সিমুল কলা আকন্দ ভেরেণ্ডা ওল কচু লতাগুল্ম তৃণের সমষ্টিবদ্ধ ঘোপঝাড় জঙ্গল, ঘাটেবাঁধা মাস্তুলতোলা রুহদাকার নৌকোর দল, নিমগ্নপ্রায় ধান এবং অর্দ্ধমগ্ন পাটের ক্ষেতের মধ্যে দিয়ে ক্রমাগত একে বেকে কাল সন্ধ্যার সময় সাজাদপুরে এসে পৌঁচেছি। এখন কিছুদিনের মত এইখানেই স্থায়ী হওয়া গেল। অনেকদিন বোটে থাকার পর সাজাদপুরের বাড়িটা বেশ লাগে ভাল—একটা যেন নতুন স্বাধীনতা পাওয়া যায়—যতটা খুসি নড়বার চড়বার এবং শরীর প্রসারণ করবার জায়গা পাওয়া মানুষের মানসিক স্ব্থের যে একটা প্রধান অঙ্গ সেটা হঠাৎ আবিষ্কার করা যায়। আজ প্রাতে মাঝে মাঝে বেশ একটুখানি রৌদ্র দেখা দিচ্ছে, বাতাসটি চঞ্চলবেগে বছে, ঝাউ এবং লিচুগাছ ক্রমাগত সরসর মরমর, করে ছলচে, নানাজাতির পাখী নানা ভাষা নানা সুরে ডেকে ডেকে প্রাতঃকালের আরণ্য মঞ্জলি স্বরুগরম করে তুলেছে। আমি আমাদের দোতলার এই সঙ্গীহীন প্রশস্ত নির্জন আলোকিত উন্মুক্ত ঘরের মধ্যে বসে জানালা থেকে খালের উপরকার নৌকাজেলী, ওপারের তরুণমধ্যগত গ্রাম এবং ওপারের অনতিদূরবর্তী লোকালয়ের মুহূর্ণমুহূর্ণপ্রবাহ নিরীক্ষণ করে বেশ একটুখানি মনের আনন্দে আছি। পাড়াগাঁয়ের কৰ্ম্মক্ষেত্রে খুব বেশি তীব্রও নয়, অথচ নিতান্ত নিশ্চেষ্ট নিষ্কর্মেও নয়। কাজ এবং বিশ্রাম দুই যেন পাশাপাশি মিলিত হয়ে হাতধরাধরি করে চলেচে। খেয়ানোকো পারাপার করচে, পাছরা ছাতা হাতে করে খালের ধারের রাস্তা দিয়ে চলেছে, মেয়েরা ধুচুনি ডুবিয়ে চাল ধুচ্ছে, চানারা আঁটিধাবা পাট মাথার করে হাটে আসচে—ছোটো লোক একটা গাছের গুঁড়ি মাটিতে কেলে কুড়ুস নিয়ে ঠক্ ঠক্ শব্দে কাঠ চেলা করচে, একটা ছুতোর অশখ গাছের তলার জেগেডিঙি উল্টে কেলে বা টারি হাতে মেরামত করচে,

জামৈয় কুকুরটা খালের ধারে ধারে উদ্দেশ্যহীনভাবে ঘুরে বেড়াচ্ছে, শুটকভক্ত গরু বর্ষার ঘাস অপরিয়াপ্ত পরিমাণে আহারপূর্বক অলসভাবে রৌদ্রে মাটির উপর পড়ে কান এবং লেজ নেড়ে মাছি তাড়াচ্ছে, এবং কাক এসে তাদের মেরুনগের উপর বসে। যখন বড় বেশি বিরক্ত করতে তখন একবার পিঠের দিকে মাথাটা নেড়ে আগন্তিকি জানাচ্ছে। এখানকার এই দুই একটা একঘেয়ে ঠক্ ঠক্ ঠক্ ঠক্ শব্দ, উলঙ্গ ছেলে-মেয়েদের খেলার কল্লোল, রাখালের করুণ উচ্চস্বরে গান, দাঁড়ের ঝুপ্ ঝাপ ধ্বনি, কঙ্কর ঝানির তীক্ষ্ণকাতর নিখাদস্বর, সমস্ত কর্মকোলাহল একত্র মিলে এই পাখীর ডাক এবং পাতার শব্দের সঙ্গে কিছুমাত্র অসামঞ্জস্য ঘটাবে না—সমস্তটাই যেন একটা শান্তিময় স্বপ্নময় করুণামাধা একটা বড় সঙ্গীতের অন্তর্গত—যুব বিস্তৃত বৃহৎ অথচ সংযত মাত্রায় বাধা। আমাদের মাথার মধ্যে সূর্য্যের আলোক এবং এই সমস্ত শব্দ একেবারে যেন কানায় কানায় ভরে এসেছে অতএব চিঠি বন্ধ করে খানিকক্ষণ পড়ে থাকা থাক।

এসব গান যেন একটু নিরালায় গাবার মত। সুরটা যে মন্দ হয়েছে এমন আমার বিশ্বাস নয়, এমন কি ভাল হয়েছে বলে খুব বেশি অত্যাক্তি হয় না। ও গানটা আমি নাবার ঘরে অনেকদিন একটু একটু করে সুরের সঙ্গে সঙ্গে তৈরি করেছিলুম। নাবার ঘরে গান তৈরি করবার ভারি কতকগুলি সুবিধা আছে। প্রথমতঃ নিরালা, দ্বিতীয়ত অল্প কোনো কর্তব্যের কোনো দাবী থাকেনা। মাথায় এক টিন জল ঢেলে পাঁচ মিনিট গুন গুন করলে কর্তব্যজ্ঞানে বিশেষ আঘাত লাগেনা—সব চেয়ে সুবিধা হচ্ছে কোনো দর্শক-সম্ভাবনামাত্র না থাকাতে সমস্ত মন খুলে মুখভঙ্গী করা যায়। মুখভঙ্গী না করলে গান তৈরি করবার পুরো অবস্থা কিছুতেই আসে না। ওটা কিনা ঠিক যুক্তিতর্কের কাজ নয়—নিছক কিপ্তভাব। এ গানটা আমি এখনো সর্বদা গেয়ে থাকি—আজ প্রাতঃকালেও অনেকক্ষণ গুন গুন করেছি, গাইতে গাইতে গভীর একটা ভাবোন্মাদও জন্মায় অতএব এটা যে আমার একটা প্রিয় গান সে বিষয়ে আমার কোনো সন্দেহ নেই।

এখানে আমি একলা খুব মুগ্ধ এবং তপস্বিত্বেরে অর্দ্ধনিমীলিত নেত্রে গেয়ে থাকি এবং জীবন ও পৃথিবীটা একটি সূর্য্যকরোজ্জ্বল অতি হৃদয় অশ্রুবাশ্পে আবৃত হয়ে সাতরঙা ইন্দ্রধনু-রেখায় রঞ্জিত হয়ে দেখা দেয়—প্রতিদিনের সত্যকে চিরদিনের সৌন্দর্য্যের মধ্যে তর্জমা করে দেওয়া যায়—দুঃখকষ্টও আভাসময় হয়ে ওঠে। অনতি-বিলম্বেই খাজাঞ্চি এক ছটাক মাখন, এক পোয়া ঘি ও ছয় পয়সার সর্ষপ তৈলের হিসাব এনে উপস্থিত করে। আমার এখানকার ইতিহাস এইরকম।

আজকাল কবিতা লেখাটা আমার পক্ষে যেন একটা গোপননিবিদ্ধ সূক্ষ্মসন্ধানের মত হয়ে পড়েচে—এদিকে আগামী মাসের সাধনার জন্তে একটি লাইন লেখা হয়নি, ওদিকে মধ্যে মধ্যে সম্পাদকের তাড়া আসচে, অনতিদূরে আশ্বিনকার্ত্তিকের সুগল সাধনা রিক্ত হস্তে আমার মুখের দিকে তাকিয়ে ভৎসনা করচে, আর আমি আমার কবিতার অন্তঃপুরে পালিয়ে পালিয়ে আশ্রয় নিচ্ছি। রোজ মনে করি আজ একটা দিন বৈত নয়—এমনি করে কত দিন কেটে গেল। আমি বাস্তবিক ভেবে পাইনে কোন্টা আমার আসল কাজ। এক এক সময় মনে হয় আমি ছোট ছোট গল্প অনেক লিখতে পারি এবং মন্দ লিখতে পারিনে—লেখবার সময় সূখও পাওয়া যায়। এক এক সময় মনে হয় আমার মাথায় এমন অনেকগুলো ভাবের উদয় হয় যা ঠিক কবিতার ব্যক্ত করবার যোগ্য নয় সেগুলো ডায়ারি প্রভৃতি নানা আকারে প্রকাশ করে রেখে দেওয়া ভাল, বোধ হয় তাতে ফলও আছে আনন্দও আছে। এক এক সময় সামাজিক বিষয় নিয়ে আমাদের দেশের লোকের সঙ্গে বগড়া করা খুব দরকার, যখন আর কেউ করচেনা তখন কাজেই আমাকে এই অপ্রিয় কর্তব্যটা গ্রহণ করতে হয়—জাবার এক এক সময় মনে হয় দূর হোকগে ছাই, পৃথিবী আপনার চরকার আপনি তেল দেবে এখন,—মিল করে হৃদয় গেঁথে ছোট ছোট কবিতা লেখাটা আমার বেশ আসে, সব ছেড়ে ছুড়ে দিয়ে আপনার মনে আপনার কোণে সেই কাজই করা যাক। মদগর্ভিতা যুবতী যেমন তার অনেকগুলি প্রণয়ীকে নিয়ে কোনটিকেই হাতছাড়া করতে চায়না, আমার কতকটা যেন সেই দশা হয়েছে। মিউজদের মধ্যে আমি কোনোটিকেই নিরাশ করতে চাইনে—কিন্তু তাতে কাজ অত্যন্ত বেড়ে যায় এবং হয়ত “দীর্ঘ দৌড়ে” কোনটিই পরিপূর্ণভাবে আমার আরস্ত হয়না। সাহিত্যবিভাগেও কর্তব্যবুদ্ধির অধিকার আছে কিন্তু অল্প বিভাগের কর্তব্যবুদ্ধির সঙ্গে তার একটু প্রভেদ আছে। কোনটাতে পৃথিবীর সব চেয়ে

ঊপকার হবে সাহিত্যকর্তব্যজ্ঞানে সে কথা ভাববার দরকার নেই কিন্তু কোনটা আমি সব চেয়ে ভাল করতে পারি সেইটেই হচ্ছে বিচার্য। বোধ হয় জীবনের সকল বিভাগেই তাই। আমার বুদ্ধিতে যতটা আসে তাত্তত বোধ হয় কবিতাতেই আমার সকলের চেয়ে বেশি অধিকার। কিন্তু আমার ক্ষুধানল বিশ্বরাজ্য ও মনোরাজ্যের সর্বত্রই আপনার জগন্ত শিখা প্রসারিত করতে চায়। যখন গান তৈরি করতে আরম্ভ করি তখন মনে হয় এই কাজেই যদি লেগে থাকা যায় তাহলেত মন্দ হয় না—আবার যখন একটা কিছু অভিনয়ে প্রবৃত্ত হওয়া যায় তখন এমনি নেশা চেপে যায় যে মনে হয় যে, চাই কি, এটাতেও একজন মানুষ আপনার জীবন নিয়োগ করতে পারে। আবার যখন “বালা-বিবাহ” কিম্বা “শিক্ষার হেরফের” নিয়ে পড়া যায় তখন মনে হয় এই হচ্ছে জীবনের সর্বোচ্চ কাজ। আবার লজ্জার মাথা খেয়ে সত্যিকথা যদি বলতে হয় তবে এটা স্বীকার করতে হয় যে, ঐ চিত্রবিদ্যা বলে একটা বিদ্যা আছে তার প্রতিও আমি সর্বদা হতাশ প্রণয়ের লুক্কৃষ্টিপাত করে থাকি—কিন্তু আর পাবার আশা নেই, সাধনা করবার বয়স চলে গেছে। অন্যান্য বিদ্যার মত তাঁকেও সহজে পাবার ঘো নেই—তাঁর একেবারে ধমুকভাঙা পণ—তুলি টেনে টেনে একেবারে হয়রান্ না হলে তাঁর প্রসন্নতা লাভ করা যায় না। একলা কবিতাটিকে নিয়ে থাকাই আমার পক্ষে সব চেয়ে সুবিধে—বোধ হয় যেন উনিই আমাকে সবচেয়ে বেশি ধরা দিয়েছেন—আমার ছেলেবেলাকার আমার বহুকালের অমুরাগিনী সঙ্গিনী।

নীরব কবিসম্বন্ধে যে প্রশ্ন উঠেছে সে সম্বন্ধে আমার বক্তব্য এই যে, সরব এবং নীরবের মধ্যে অমুভূতির পরিমাণ সমান থাকতে পারে কিন্তু আসল কবিত্ব জিনিষটি স্বতন্ত্র। কেবল ভাষার ক্ষমতা বলে নয়, গঠন করবার শক্তি। একটা অলঙ্কিত অচেতন নৈপুণ্য বলে ভাবগুলি কবির হাতে বিচিত্র আকার ধারণ করে। সেই সৃজন-ক্ষমতাই কবিত্বের মূল। ভাষা, ভাব এবং অমুভাব তার সরঞ্জামমাত্র। কারো বা ভাষা আছে কারো বা অমুভাব আছে, কারো বা ভাষা এবং অমুভাব দুই আছে, কিন্তু আর একটি ব্যক্তি আছে যার ভাষা অমুভাব এবং সৃজনীশক্তি আছে; এই শেষোক্ত লোকটিকে কবি নাম দেওয়া যেতে পারে। প্রথমোক্ত তিনটি লোক নীরবও হতে পারেন, সরবও হতে পারেন, কিন্তু তাঁরা কবি নন। তাঁদের মধ্যে কাউকে কাউকে ভাবুক বলেই ঠিক বিশেষণটা প্রয়োগ করা হয়। তাঁরাও জগতে অত্যন্ত দীর্ঘজীবী এবং কবির তুলিত চিত্ত সর্বদাই তাঁদের জন্যে ব্যাকুল হয়ে আছে।

উপরে এই ভূমিকার পরে আমার সেই “জাল-ফেলা” কবিতাটার ব্যাখ্যা একটু সহজ হবে। লেখাটা চোখের সামনে থাকলে তার মানে নিজে একটু ভাল করে বুঝে বোঝাবার চেষ্টা করতে পারতুম—তবু একটা ঝাপসারকমের ভাব মনে আছে। মনে কর একজন ব্যক্তি তার জীবনের প্রভাতকালে সমুদ্রের ধারে দাঁড়িয়ে দাঁড়িয়ে সূর্যোদয় দেখছিল; সে সমুদ্রটা তার আপনার মন কিম্বা ঐ বাহিরের বিশ্ব কিম্বা উভয়ের সীমানামধ্যবর্তী একটি ভাবেব পারাবার, সে কথা স্পষ্ট করে বলা হয়নি। যাই হোক সেই অপূর্ণ সৌন্দর্য্যময় অগাধ সমুদ্রের দিকে চেয়ে চেয়ে লোকটার মনে হল এই রহস্যপাথারের মধ্যে জাল ফেলে দেখা যাকনা কি পাওয়া যায়। এই বলতে সে ঘুরিয়ে জাল ফেল্লে। নানারকমের অপরূপ জিনিষ উঠতে লাগল—কোনটা স্বা হাসির মত শুভ্র কোনটা বা অশ্রুর মত উজ্জল, কোনটা বা লজ্জার মত রাঙা। মনের উৎসাহে সে সমস্ত দিন ধরে ঐ কাজই কেবল করলে—গভীর তলদেশে যে সকল স্তম্ভের রহস্য ছিল সেইগুলিকে তীরে এনে রাশীকৃত করে তুল্লে। এমনি করে জীবনের সমস্ত দিনটি যাপন করলে। সন্ধ্যার সময় মনে করলে এবারকার মত যথেষ্ট হয়েছে এখন এইগুলি নিয়ে তাকে দিয়ে আসা যাক্গে। কাকে যে সে কথাটা স্পষ্ট করে বলা হয়নি—হয়ত তার প্রেরসীকে, হয়ত তার স্বদেশকে। কিন্তু যাকে দেবে সেত এ সমস্ত অপূর্ণ জিনিষ কখনো দেখেনি। সে ভাবলে এগুলো কি, এর আবশ্যকতাই বা কি, এতে কি অভাব দূর হবে, দোকানদারের কাছে যাচিয়ে দেখলে এর কতই বা মূল্য হতে পারবে! এক কথায়, এ বিজ্ঞান, দর্শন, ইতিহাস, ভূগোল, অর্থনীতি, সমাজনীতি, ধর্মনীতি, তত্ত্বজ্ঞান প্রভৃতি কিছুই নয় এ কেবল কতকগুলো রঙীন ভাবমাত্র, তারও যে কোনটার কি নাম কি বিবরণ তারও ভাল পরিচয় পাওয়া যায় না। ফলতঃ সমস্ত দিনের জালফেলা অগাধ সমুদ্রের এই রত্নগুলি যাকে দেওয়া গেল সে বলে এ আবার কি? জেলেরও মনে তখন অমুতাপ হল, সত্যি বটে, এ ত বিশেষ কিছু নয়, আমি কেবল জাল ফেলেছি আর তুলেছি; আমি ত হাতেও যাইনি পয়সা কড়িও খরচ করিনি এর জন্যেত আমাকে কাউকে এক পয়সা খাজনা কিম্বা মাশুল দিতে হয়নি! সে তখন কিঞ্চিৎ বিবদ্ধমুখে লজ্জিতভাবে সেগুলো কুড়িয়ে নিয়ে ঘরের দ্বারে বসে বসে একে একে রাতায় ফেলে দিলে। তার পর দিন সকাল বেলায় পথিকরা এসে সেই বহুমূল্য জিনিষগুলি দেশে বিদেশে আপন আপন ঘরে নিয়ে গেল। বোধ হচ্ছে এই কবিতাটি বিনি লিখেছেন তিনি মনে করচেন, তাঁর গৃহকার্য্যনিরতা অতঃ-

পূরবাসিনী জন্মভূমি, তাঁর সমসাময়িক পাঠকমণ্ডলী, তাঁর কবিতাগুলির ঠিক ভাবগ্রহ করতে পারবেনা, তার যে কতখানি মূল্য সে তাদের জ্ঞানগোচর নয়, অতএব এখন-
 কীর মত এ সমস্ত পথেই ফেলে দেওয়া যাচ্ছে, তোমরাও অবহেলা কর আমিও অবহেলা
 করি কিন্তু এরাত্রি যখন পোহাবে তখন “পষ্টারিটি” এসে এগুলি কুড়িয়ে নিয়ে দেশে
 বিদেশে চলে যাবে। কিন্তু তাতে ঐ জেলে লোকটার মনের আক্কেপ কি মিটবে ?—
 যাইহোক, “পষ্টারিটি” যে অভিসারিণী রমণীর মত দীর্ঘরাত্রি ধরে ধীরে ধীরে কবির দিকে
 অগ্রসর হচ্ছে এবং হয়ত নিশিশেষে এসে উপস্থিত হতেও পারে এ স্মৃতিচলনটুকু কবিকে
 ভোগ করতে দিতে কারো বোধহয় আপত্তি না হতেও পারে।—সেই মন্দিরের
 কবিতার ঠিক অর্থটা কি ভাল মনে পড়েনা। বোধহয় সেটা সত্যিকার মন্দির সম্বন্ধে।
 অর্থাৎ যখন কোণে বসে বসে কতকগুলো কৃত্রিম কল্পনার দ্বারা আপনার দেবতাকে
 আচ্ছন্ন করে নিজের মনটাকেও একটা অস্বাভাবিক স্মৃতির অবস্থায় নিয়ে যাওয়া গেছে
 এমন সময় যদি হঠাৎ একটা সংশয়বজ্র পড়ে, সেই সমস্ত স্মৃতিচলনের কৃত্রিম প্রাচীর
 ভেঙে যায় তখন হঠাৎ প্রকৃতির শোভা, সূর্য্যের আলোক এবং বিশ্বজনের কল্লোলগান
 এসে তত্ত্বমন্ত্র ধূপধূনার স্থান অধিকার করে এবং তখন দেখতে পাই সেই যথার্থ আরাধনা
 এবং তাতেই দেবতার তুষ্টি।



অনেকগুলো বড় বড় বিলের মধ্যে দিয়ে আসতে হয়েছে। এই বিলগুলো ভারি অদ্ভুত—কোনো আকার আরতন নেই, জলেস্থলে একাকার—পৃথিবী সমুদ্রগর্ভ থেকে নতুন জেগে উঠবার সময় যেমন ছিল। কোথাও কিছু কিনারা নেই—খানিকটা জল খানিকটা ময়প্রায় ধানক্ষেতের মাথা, খানিকটা শেওলা এবং জলজ উদ্ভিদ ভাসচে—পানকোড়ি সীতার দিচ্ছে—জাল ফেলবার জন্তে বড় বড় বাশ পোতা, তারি উপর কটা রঙের বড় বড় চিল বসে আছে—ভারি একাকার একঘেয়েরকমের দৃশ্য। ধীরে মত অতিদূরে গ্রামের রেখা দেখা যাচ্ছে—যেতে যেতে হঠাৎ আবার খানিকটা নদী, দুধারে গ্রাম, পাটের ক্ষেত এবং বাঁশের ঝাড়, আবার কখন যে সেটা বিস্তৃত বিলের মধ্যে মিলিয়ে যাচ্ছে বোঝবার যো নেই।

ঠিক সূর্যাস্তের কাছাকাছি সময় যখন একটি গ্রাম পেরিয়ে আসছিলুম একটা লম্বা নোকোয় অনেকগুলো ছোকরা ঝপ্ ঝপ্ করে দাঁড় ফেলছিল এবং সেই তালে গান গাচ্ছিল—

“বোবতী, ক্যান্ বা কর মন্ ভারী ?

✓

পাবনা থাক্যে আন্তে দেব ট্যাকা দামের মোটরি।”

স্থানীয় কবিটি যে ভাব অবলম্বন করে সঙ্গীত রচনা করেচেন আমরাও ওভাবেই ঢের লিখেছি কিন্তু ইতরবিশেষ আছে।—আমাদের যুবতী মন ভারী করলে তৎক্ষণাৎ জীবনটা কিছা নন্দনকানন থেকে পারিজাতটা এনে দিতে প্রস্তুত হই—কিন্তু এ অঞ্চলের লোক খুব স্নেহে আছে বলতে হবে, অল্প ত্যাগস্বীকারেই যুবতীর মন পায়। মোটরি জিনিষটি কি তা বলা আমার সাধ্য নয়, কিন্তু তার দামটাও নাকি পাশেই উল্লেখ করা আছে তাতেই বোঝা যাচ্ছে খুব বেশি হুশ্ল্য নয়, এবং নিতান্ত অগম্য স্থান থেকেও আনতে হয় না। গানটা শুনে বেশ মজার লাগল—যুবতীর মন ভারী হলে

জগতে যে আন্দোলন উপস্থিত হয় এই বিলের প্রান্তেও তার একটা সংবাদ পাওয়া গেছে।
 এ গানটি কেবল অস্থানেই হাত্তজনক কিন্তু দেশকালপাত্রবিশেষে এর যথেষ্ট সৌন্দর্য্য
 আছে—আমার অজ্ঞাতনামা গ্রাম্য কবিত্রাতার রচনাগুলিও এই গ্রামের লোকের
 সুখদুঃখের পক্ষে নিতান্ত আবশ্যক—আমার গানগুলি সেখানে কম হাত্তজনক নয়।

এবার এই বিলের পথ দিয়ে কালিগ্রামে আস্তে আস্তে আমার মাথায় একটি ভাব বেশ পরিষ্কাররূপে ফুটে উঠেছে। কথাটা নতুন নয় অনেকদিন থেকে জানি কিন্তু তবু একএকবার পুরোনো কথাও নতুন করে অনুভব করা যায়। দুই দিকে দুই তীর দিয়ে সীমাবদ্ধ না থাকলে জলস্রোতের তেমন শোভা থাকেনা—অনির্দিষ্ট অনিয়ন্ত্রিত বিল একঘেয়ে শোভাশূন্য। ভাবার পক্ষে ছন্দের বাঁধন ঐ তীরের কাজ করে। ভাবাকে একটি বিশেষ আকার এবং বিশেষ শোভা দেয়—তার একটি স্তম্ভর চেহারা ফুটে ওঠে। তীরবদ্ধ নদীগুলির যেমন একটি বিশেষ ব্যক্তিত্ব আছে—তাদের যেমন এক একটি স্বতন্ত্র লোকের মত মনে হয় ছন্দের দ্বারা কবিতা সেইরূপ এক একটি মুগ্ধমান অস্তিত্বের মত দাঁড়িয়ে যায়। গল্পের সেইরকম স্তম্ভর অনির্দিষ্ট স্বাভাব্য নেই—সে একটা বৃহৎ বিশেষত্ববিহীন বিলের মত। এবার তটের দ্বারা আবদ্ধ হওয়াতেই নদীর মধ্যে একটা বেগ আছে একটা গতি আছে—কিন্তু প্রবাহহীন বিল কেবল বিস্তৃতভাবে দিগ্বিদিক গ্রাস করে পড়ে থাকে। ভাবার মধ্যেও যদি একটা আবেগ একটা গতি দেবার প্রয়োজন হয় তবে তাকে ছন্দের সঙ্গীতের মধ্যে বেঁধে দিতে হয়—নইলে সে কেবল ব্যাপ্ত হয়ে পড়ে কিন্তু সমস্ত বল নিয়ে একদিকে ধাবিত হতে পারে না। বিলের জলকে পল্লিগ্রামের লোকেরা বলে বোবা জল—তার কোনো ভাষা নেই, আত্মপ্রকাশ নেই। তটবদ্ধ নদীর মধ্যে সর্বদা একটা কলধ্বনি শোনা যায়; ছন্দের মধ্যে বেঁধে দিলে কথাগুলোও সেইরকম পরস্পরের প্রতি আঘাত সংঘাত করে একটা সঙ্গীতের সৃষ্টি করতে থাকে—সেই জন্তে ছন্দের ভাষা বোবা ভাষা নয়, তার মুখে সর্বদাই কলগান। বাঁধনের মধ্যে থাকাতেই গতির সৌন্দর্য্য, ধ্বনির সৌন্দর্য্য এবং আকারের সৌন্দর্য্য। বাঁধনের মধ্যে থাকাতে যেমন সৌন্দর্য্য তেমনি শক্তি। কবিতা যে স্বভাবতই ধীরে ধীরে একটি ছন্দের মধ্যে ধরা দিয়ে আপনাকে পরিষ্কৃত করে তুলেছে ওটা একটি কৃত্রিম অভ্যাসজাত সুখ দেবার জন্তে

নয়—ওর একটি গভীর স্বাভাবিক স্মৃতি আছে। অনেক মুখ মনে করে কবিতার ছন্দোবদ্ধ কেবল একটি বাহাদুরী করা ; ওতে কেবল সাধারণ লোকের বিন্ময় উৎপাদন করে স্মৃতিদেয়—ও কেবল ভাষার ব্যায়াম মাত্র। কিন্তু সে ভাষা ভুল। কবিতার ছন্দ যে নিয়মে উৎপন্ন হয়েছে, বিশ্বজগতের সমস্ত সৌন্দর্য্যই সেই নিয়মে সৃষ্ট হয়েছে। একটি স্নানিদ্ধিষ্ট বন্ধনের মধ্যে দিয়ে বেগে প্রবাহিত হয়ে মনের মধ্যে আঘাত করে বলেই সৌন্দর্য্যের এমন অনিবার্য্য শক্তি। আর স্মৃতির বন্ধন ছাড়িয়ে গেলেই সব একাকার হয়ে যায় তার আর আঘাত করবার শক্তি থাকে না। বিল ছাড়িয়ে যেমনি নদীতে এবং নদী ছাড়িয়ে যেমনি বিলে গিয়ে পড়ছিলুম অমনি আমার মনে এই তত্ত্বটি দৌঁপ্যমান হয়ে জেগে উঠছিল।



আমি অনেকদিন থেকে ভেবে দেখেছি পুরুষরা কিছু খাপছাড়া আর মেয়েরা বেশ সুসম্পূর্ণ। মেয়েদের কথাবার্তা বেশভূষা, চালচলন, আচারব্যবহার এবং জীবনের কর্তব্যের মধ্যে একটি অখণ্ড সামঞ্জস্য আছে। তার প্রধান কারণ হচ্ছে যুগযুগান্তর থেকে প্রকৃতি তাদের কর্তব্য নিজে নির্দিষ্ট করে দিয়ে তাদের আগাগোড়া সেই ভাবে সেই উদ্দেশ্যে গঠিত করে দিয়েছে। এ পর্য্যন্ত কোনো পরিবর্তন কোনো রাষ্ট্রবিপ্লব সভ্যতার কোনো ভাঙন-গড়নে তাদের সেই ঐক্য থেকে বিক্ষিপ্ত করে দেয়নি—তারা বরাবর সেবা করেছে, ভাল বেসেছে, আনন্দ করেছে, আর কিছু করেনি। তাদের অঙ্গ-প্রত্যঙ্গে ভাষায় ভঙ্গীতে সেই কাজের নৈপুণ্য এবং সৌন্দর্য্য যেন মিশে এক হয়ে গেছে—তাদের স্বভাব এবং তাদের কাজ যেন পুষ্প এবং পুষ্পের গন্ধের মত সম্মিলিত হয়ে গেছে—তাদের মধ্যে সেই জন্যে কোনো বিরোধ কোনো ইতস্ততঃ নেই। পুরুষের চরিত্রের মধ্যে বিস্তর উঁচু নীচু, তারা যে নানাকার্য্যে নানাশক্তি নানাপরিবর্তনের ভিতর দিয়ে তৈরি হয়ে এসেছে তাদের অঙ্গে এবং স্বভাবে তার যেন চিল্ল রয়েছে। কোথাও কিছু নেই কপালটা হয়ত বৃহৎ উঁচু হয়ে উঠল, মাঝের থেকে হয়ত নাকটা এমনি ঠেলে উঠল যে, তাকে কার সাধ্য দাবিয়ে রাখে—চোয়াল ছোটো হয়ত স্রবমার কোনো নিয়ম মান্লেনা। যদি চিরকাল পুরুষ একভাবে চালিত, এককার্য্যে শিক্ষিত হয়ে আসত তা হলে তাদেরও মুখে এবং স্বভাবে একটা সামঞ্জস্য দাঁড়িয়ে যেত; একটা ছাঁচ বহুকাল থেকে তৈরি হয়ে যেত;—তাহলে তাদের আর বল প্রকাশ করে বহুচিন্তা করে কাজ করতে হত না, সকল কাজ স্মন্দরভাবে সহজে সম্পন্ন হত; তাহলে তাদের একটা সহজ নীতিও দাঁড়িয়ে যেত—অর্থাৎ বহুযুগ থেকে অবিচ্ছেদ্যে যে কাজ করে আসচে সেই কাজের কাছে তাদের মন বশ মান্ন্ত, সেই বহুযুগের অভ্যস্ত কর্তব্য থেকে কোনো সামান্য শক্তি তাদের বিক্ষিপ্ত করতে পারত না। জ্রীলোককে প্রকৃতি মা

করে দিয়ে তাকে একেবারে ছাঁচে ঢালাই করে ফেলেছে—পুরুষের সেরকম কোনো স্বাভাবিক আদিম বন্ধন নেই, সেইজন্যে একটি ঋক্বেশ্ব আশ্রয়ে পুরুষ সর্বতোভাবে তৈরি হয়ে যাননি—সে চিরকাল ধরে কেবলি বিক্ষিপ্ত হয়ে হয়ে এসেছে—তার শতমুখী উচ্ছ্বল প্রযুক্তি তাকে একটি সুন্দর সমগ্রতায় গড়ে তোলেনি। আমি সেদিনকার চিঠিতে বন্ধনকে সৌন্দর্যের কারণ বলে অনেকখানি লিখেছিলুম মনে আছে—মেয়েরা সেইরকম একটি স্বাভাবিক ছন্দের বন্ধনে সম্পূর্ণসুন্দর হয়ে তৈরি হয়ে এসেছে—আর পুরুষরা গদ্যের মত বন্ধনহীন এবং সৌন্দর্যহীন—তাদের আগাগোড়ার মধ্যে কোনো একটি “ছাঁদ নেই।” মেয়েদের সঙ্গে যে লোকে চিরকাল সঙ্গীতের কবিতার, লতার, ফুলের, নদীর তুলনা দিয়ে এসেছে এবং কখনো পুরুষের সঙ্গে দেবার কথা তাদের মনেও উদয় হয়নি তার কারণই এই। প্রকৃতির সমস্ত সুন্দর জিনিস যেমন সুসজ্জ সুসম্পূর্ণ সুসংহত সুসংযত মেয়েরাও সেইরকম; তাদের মধ্যে কোনো বিধা কোনো চিন্তা কোনো মন এসে তাদের ছন্দোভঙ্গ করে দিচ্ছে না, কোনো তর্ক এসে তাদের মিল নষ্ট করে দিচ্ছে না।



২১ শে আগষ্ট ১৮৯৩।

আজ কতকগুলো খবরের কাগজের কাঁচিছাঁটা টুকরো পাওয়া গেল। কোথায় প্যারিসের আর্টস্‌ সপ্তাহের উদ্দাম উন্নততা আর কোথায় আমার কালিগ্রামের সরল চাষী প্রজাদের দুঃখদৈন্ত নিবেদন! আমার কাছে এই সমস্ত দুঃখপীড়িত অটল বিশ্বাসপরায়ণ অম্লরক্ত প্রজাদের মুখে বড় একটি কোমল মাধুর্য্য আছে, বাস্তবিক এরা যেন আমার একটি দেশবোড়া বৃহৎ পরিবারের লোক। এই সমস্ত নিঃসহায় নিরুপায় নিতান্ত নির্ভরপর সরল চাষাভ্রমণদের আপনার লোক মনে করতে একটা সুখ আছে। এরা অনেক দুঃখ অনেক বৈর্য্যসহকারে সহ করেছে তবু এদের ভালবাসা কিছুতেই ম্লান হয় না। আজ একজন এসে বলছিল, “সে বছর ভাল ধান হয়নি বলে চুঁচড়ায় বুড়ো বাপের কাছে এনছাপ নিতে গিয়েছিলুম তা সে বলে আমি তোদের কিছু ছেড়ে দিচ্ছি তোরাও আমাকে কিছু খেতে দিস্। তার কাছে দরবার করতে গিয়েছিলুম বলে সেই মনোবাদে এখানকার আমিন আমাকে ফেরেবি মকদমা করে তিন মাস জেল খাটিয়েছিল। আমি তখন তোমার মাটিকে সেলাম করে ভিন্ এলাকার গিয়েছিলুম।”—কিন্তু তবু তার এমনি ভক্তি যে সেই ভিন্ এলাকার জমিদার আমাদের কতক জমি চুরি করে ভোগ করছিল বলে সে এখানকার সেরেস্টায় জানিয়ে যায় সেই রাগে তার নতুন জমিদার তার ধানস্বত্ব জমি কেড়ে নিয়েছে। সে বলে, “আমি যার মাটিতে বুড়োকাল পর্য্যন্ত মাছুষ হয়েছি তার হিতের কথা তাকে আমি বলতে পাবনা!” এই বলে সে চোখ থেকে ছই এক ফোঁটা জল মুছে ফেলে। সে যে কেমন সহজে কোনরকম চাতুবী না করে যেন একটা খবর দিয়ে যাবার মত সমস্তটা বলে গেল তা দেখলে এই ব্যাপারটার যথার্থ গভীরতা বুঝতে পারা যায়। এদের উপর যে আমার কতখানি শ্রদ্ধা:হয়, আপনার চেয়ে যে এদের কতখানি ভাল মনে হয় তা এরা জানেনা। কিন্তু তবু প্যারিসের সভ্যতা থেকে কত তফাৎ! সে এর

চেয়ে কত কঠিন কত উজ্জ্বল কত সুগঠিত ! তবু এখানকার মানুষের মধ্যে যে জিনিষটি আছে সে বড় অনাদরের নয় । যতক্ষণ না সভ্যতার মাঝখানে এই স্বচ্ছ সরলতার প্রতিষ্ঠা হয় ততক্ষণ সভ্যতা কখনই সম্পূর্ণ এবং সুন্দর হবে না । সরলতাই মানুষের স্বাস্থ্যের একমাত্র উপায়—সে যেন গঙ্গার মত, তার মধ্যে স্নান করে সংসারের অনেক তাপ দূর হয়ে যায় । আর যুরোপ সমস্ত তাপকে যেন লাগন করে তুলুচে এবং তার উপরে আবার সহস্রবিধ মানকতার কৃত্রিম উদ্ভাপে আপনাকে রাত্রিদিন উত্তেজিত করে তুলছে । খবরের কাগজের যে কটি টুকরো এসেছে প্রত্যেকটিতেই এই প্রমাণ দেয় !

—•—

১৯শে ফেব্রুয়ারী ১৮৯৪।

যে পারে বোট লাগিয়েচি এপারে খুব নির্জন। গ্রাম নেই বসতি নেই চষা মাঠ
 ধু ধু করচে, নদীর ধারে ধারে খানিকটা করে শুকনো ঘাসের মত আছে সেই ঘাসগুলো
 ছিঁড়ে ছিঁড়ে গোটাকতক মোষ চরে বেড়াচ্ছে। আর আমাদের দুটো হাতী আছে
 তারাও এপারে চরতে আসে। তাদের দেখতে বেশ মজা লাগে। একটা পা উঠিয়ে
 ঘাসের গোড়ায় ছ'চার বাব একটু একটু ঠোকর মারে, তার পরে শুঁড় দিয়ে টান
 মারতেই বড় বড় ঘাসের চাপড়া একেবারে মাটিমুহুর উঠে আসে, সেই চাপড়াগুলো
 শুঁড়ে করে ছলিয়ে ছলিয়ে ঝাড়ে, তার মাটিগুলো ঝরে ঝরে পড়ে যায়, তার পরে মুখের
 মধ্যে পূরে দিয়ে খেয়ে কেলে। আবার এক একসময় খেয়াল যায়, খানিকটা ধুলো
 শুঁড়ে করে নিয়ে ফুঁ দিয়ে নিজের পেটে পিঠে সর্কাজে হুস্ করে ছড়িয়ে দেয়—এই-
 রকম ত হাতির প্রসাধনক্রিয়া। রুহৎ শরীর, বিপুল বল, শ্রীহীন আয়তন, অত্যন্ত
 নিরীহ—এই প্রকাণ্ড জন্তুটাকে দেখতে আমার বেশ লাগে। এর এই প্রকাণ্ড এবং
 বিশ্রীহর জন্তুই যেন এর প্রতি একটা কি বিশেষ স্নেহের উদ্দেশ্য হয়—এর সর্কাজের
 অসৌষ্ঠব থেকে এ'কে একটা মস্ত শিশুর মত মনে হয়। তাছাড়া জন্তুটা বড় উদার
 প্রকৃতির—শিব ভোলানাতের মত—যখন ক্যাপে তখন খুব ন্যাপে যখন ঠাণ্ডা হয়—
 তখন অগাধ শান্তি। বড়দর সঙ্গে সঙ্গে যে একরকম শ্রীহীন আছে—তাতে অন্তরকে
 বিমুখ করে না, বরঞ্চ আকর্ষণ করে আনে। আমার ঘরে যে বেঠোভেনের ছবি আছে
 অনেক স্তম্ভর মুখের সঙ্গে তুলনা করলে তাকে দর্শনযোগ্য মনে না হতে পারে, কিন্তু
 আমি যখন তার দিকে চাই সে আমাকে খুব টেনে নিয়ে যায়—ঐ উকোখুকো
 মাথাটার ভিতরে কতবড় একটা শব্দহীন শব্দজগৎ! এবং কি একটা বেদনা ময়
 অশান্ত ক্লিষ্ট প্রতিভা, রুদ্ধঝড়ের মত ঐ লোকটার ভিতরে ঘূর্ণমান হত।

মাঝে মাঝে মেঘ করচে—মাঝে মাঝে পরিষ্কার হয়ে যাচ্ছে—থেকে থেকে হঠাৎ হুহু করে একটা হাওয়া এসে আমার বোটের গ্রন্থিতে গ্রন্থিতে বিচিত্র কাঁয়া কৌঃ শব্দে আন্তরিক তুল্চে আজ দুপুর বেলাটা এমনি ভাবে চল্চে।—

এখন বেলা একটা বেজেছে—পাড়াগোঁয়ে মধ্যাহ্নের এই হাঁসের ডাক, কাপড় কাচার শব্দ, নৌকো চলাচলের ছল্ ছল্ শব্দ, দূরে গোবর পাল পার করবার হৈ হৈ রব, এবং আপনার মনের ভিতরকার একটা উদাস আলস্তপূর্ণ স্বগত সঙ্গীতস্বর কলকাতায় চৌকিটেবিলসমাকীর্ণ বর্ণ বৈচিত্র্যবিহীন নিত্যনৈমিত্তিকতার মধ্যে কল্লনাও করতে পারিনে। কলকাতাটা বড় ভদ্র এবং বড় ভারি, গবর্মেণ্টের আপিসের মত। জীবনের প্রত্যেক দিনটাই যেন একই আকারে একই ছাপ নিয়ে টাংকশাল থেকে তক্তকে হয়ে কেটে কেটে বেরিয়ে আস্চে—নীরস মৃত দিন; কিন্তু খুব ভদ্র এবং সমান ওজনের। এখানে আমি দলছাড়া—এবং এখানকার প্রত্যেক দিন আমার নিজের দিন—নিত্য-নিয়মিত দম-দেওয়া কলের সঙ্গে কোনো যোগ নেই। আমার আপনার মনের ভাবনা-গুলি এবং অথও অবসরটিকে হাতে করে নিয়ে মাঠের মধ্যে বেড়াতে বাই—সময় ক্রিয়া স্থানের মধ্যে কোনো বাধা নেই। সন্ধ্যোটা জলে স্থলে আকাশে ঘনিয়ে আস্তে থাকে—আমি মাথাটা নীচু করে আস্তে আস্তে বেড়াতে থাকি।



জ্যোৎস্না প্রতি রাতেই অল্প অল্প করে ফুটে উঠে। আমি তাই আজকাল সন্ধ্যার পরেও অনেকক্ষণ বাইরে বেড়াই। নদীর এপারের মাঠে কোথাও কিছু সীমাবদ্ধ নেই, গাছপালা নেই—চরা মাঠে একটি ঘাসও নেই, কেবল নদীর ধারের ঘাসগুলো প্রথর রোদ্দে শুকিয়ে হলদে হয়ে এসেছে। জ্যোৎস্নায় এই ধূ ধূ শূন্য মাঠ ভারি অপূর্ণ দেখতে হয়।—সমুদ্র এইরকম অসীম বলে মনে হয় কিন্তু তার একটা অবিশ্রাম গতি এবং শব্দ আছে—এই মাটির সমুদ্রের কোথাও কিছু গতি নেই শব্দ নেই বৈচিত্র্য নেই প্রাণ নেই—ভারি একটা উদাস ২ত শূন্যতা—চলবার মধ্যে কেবল এক প্রান্তে আমি একটি প্রাণী চলচি এবং আমার পায়ের কাছে একটি ছায়া চলে বেড়াচ্ছে। বহুদূরের মাঠে এক এক জায়গায়—যেখানে গত শতাব্দির শুকনো গোড়া কিছু অবশিষ্ট ছিল সেইখানে চাবারা আগুন লাগিয়ে দিয়েছে, মাঝে মাঝে কেবল সেই আগুনের শ্রেণী দেখা যাচ্ছে। একটা প্রকাণ্ড বিস্তারিত প্রাণহীনতার উপর যখন অস্পষ্ট চাঁদের আলো এসে পড়ে তখন যেন একটা বিশ্বব্যাপী বিচ্ছেদশোকের ভাব মনে আসে—যেন একটি মক্কেল রুহৎ গোরের উপরে একটি শাদা কাপড়পরা মেয়ে উপুড় হয়ে মুখ ঢেকে মুচ্ছিতপ্রায় নিশ্বাস পড়ে রয়েছে।

—•—

আজকাল আমার সন্ধ্যাভ্রমণের একমাত্র সঙ্গীটির অভাব হয়েছে। সেটি আর কেউ নয় আমাদের গুরুপক্ষের চাঁদ। কালথেকে আর তাঁর দেখা নেই। ভারি অসুবিধে হয়েছে, শীত্ৰই অন্ধকার হয়ে যায়, যথেষ্ট বেড়াবার পক্ষে একটু ব্যাঘাত জন্মায়।

আজকাল ভোরের বেলায় চোখ মেলেই ঠিক আমার খোলা জানলার সামনেই শুকতারা দেখতে পাই—তাকে আমার ভারি মিষ্টি লাগে—সেও আমার দিকে চেয়ে থাকে, যেন বহুকালের আমার আপনার লোক। মনে আছে যখন শিলাইদহে কাছারি করে সন্ধ্যাবেলায় নৌকো করে নদী পার হতুম, এবং রোজ আকাশে সন্ধ্যাতারা দেখতে পেতুম আমার ভারি একটা সান্ধনা বোধ হত। ঠিক মনে হত আমার নদীটি যেন আমার ঘরসংসার এবং আমার সন্ধ্যাতারাটি আমার এই ঘরের গৃহলক্ষ্মী—আমি কখন কাছারি থেকে ফিরে আসব এই জন্তে সে উজ্জ্বল হয়ে সেজে বসে আছে। তার কাছ থেকে এমন একটি স্নেহস্পর্শ পেতুম! তখন নদীটি নিতুল হয়ে থাকত, বাতাসটি ঠাণ্ডা, কোথাও কিছু শব্দ নেই, ভারি যেন একটা ঘনিষ্ঠতার ভাবে আমার সেই প্রশান্ত সংসারটি পরিপূর্ণ হয়ে থাকত। আমার সেই শিলাইদহে প্রতি সন্ধ্যায় নিতুল অন্ধকারে নদী পার হওয়াটা খুব স্পষ্টরূপে প্রায়ই মনে পড়ে। ভোরের বেলায় প্রথম দৃষ্টিপাতেই শুকতারাটি দেখে তাকে আমার একটা বহুপরিচিত সহানু সহচরী না মনে করে থাকতে পারিনে—সে যেন একটা চিরজাগ্রত কল্যাণকামনার মত ঠিক আমার নিদ্রিত মুখের উপর প্রফুল্ল স্নেহ বিকিরণ করতে থাকে।

আজ বেড়িয়ে বোটে ফিরে এসে দেখি বাতির কাছে এত বেশি পতঙ্গের জিড় হয়েছে যে টেবিলে বসা অসাধ্য। আজ তাই বাতি নিবিয়ে দিবে বাইরে কেনারা নিয়ে অন্ধকারে বসেছিলাম—আকাশের সমস্ত জ্যোতির্জগৎ, অনন্ত রহস্যের অন্তঃপুর-বাসিনী সমস্ত মেয়ের দলের মত উপরের তলার খড়খড়ি থেকে আমাকে দেখছিল,

আমি তাদের কিছুই জানিনে এবং কোনোকালেই জানতে পাব কিনা তাও জানিনে—অথচ ঐ জ্যোতির্মণ্ডলীর মধ্যে বিচিত্র জীবনের অনন্ত ইতিহাস প্রবাহিত হয়ে যাচ্ছে। আজ সন্ধ্যার সময় আর চিঠি লেখা হয়ে ওঠেনি—তাই এখন নিশ্চিতি। এখন কত রাত হবে? এগারোটা। যখন চিঠিটা পৌঁছবে তখন দিনের বেলাকার প্রথর আলোকে জগৎটা খুবই সজাগ চকস, নানান কাজে ব্যস্ত—তখন কোথায় এই অসুস্থ নিস্তর রাত্রি কোথায় ঐ অনন্ত বিশ্বলোকের জ্যোতির্ষ্ম শব্দহীন বার্তা! এত অতীত প্রভেদ! কিছুতে ঠিক ভাবটি আনা যায় না। মানুষের মনের ক্ষমতা এত সামান্য! যে খুবই পরিচিত, চোখ বুজে তার আকৃতির প্রত্যেক রেখাটি মনে আনা যায়না—একসময় যা সর্বপ্রধান আর একসময় তা যথার্থরূপে স্মৃতিগম্য করাও শক্ত হয়ে ওঠে। দিনের বেলায় রাতকে ভুলি, রাতের বেলায় দিনকে ভুলি। তাঁদের ধণ্ড অনেকক্ষণ হল উঠেছে—চতুর্দিক একেবারে নিস্তর নিদ্রিত—কেবল গ্রামের গোটা দুই কুকুর ওপার থেকে ডাকচে—আমার এই বোটে কেবল একটি বাতি জ্বলে—আর সর্ব জায়গায় আলো নিবেছে—নদীতে একটু গতিমাত্র নাই, তাতেই মনে হয় মাছগুলো রাস্তিরে ঘুরে। জলের ধারে সুপ্ত গ্রাম এবং জলের উপর গ্রামের সুপ্ত ছায়া।



“পশুপ্রীতি” বলে ব—একটা প্রবন্ধ লিখে পাঠিয়েছে—আজ সমস্ত সকালবেলায় সেইটে নিয়ে পড়েছিলুম। কাল আমি বোটে বসে জানলার বাইরে নদীর দিকে চেয়ে আছি এমন সময় হঠাৎ দেখি—একটা কি পাখী পাংয়ে তাড়াতাড়ি ওপারের দিকে চলে যাচ্ছে আর তার পিছনে মহা ধর্ ধর্ মার ার রব উঠেছে। শেবকালে দেখি একটি ঘুরগী—তার আসন্ন মৃত্যুকালে বারুচিখানার নৌকো থেকে হঠাৎ কিরকমে ছাড়া পেয়ে জলে ঝাঁপিয়ে পড়ে পেরিয়ে যাবার চেষ্টা করছিল, ঠিক যেই তীরের কাছে গিয়ে পৌঁচেছে অমনি যমদূত মানুষ কাঁক করে তার গলা টিপে ধরে আবার নৌকো করে ফিরিয়ে নিয়ে এল। আমি ফটককে ডেকে বলুম আমার জন্তে আজ মাংস হবে না। এমন সময় ব—র পশুপ্রীতি লেখাটা এসে পৌঁছল—আমি পেয়ে কিছু আশ্চর্য হলাম। আমারত আর মাংস খেতে রুচি হয় না। আমরা যে কি অজ্ঞার এবং নিষ্ঠুর কাজ করি তা ভেবে দেখিনে বলে মাংস গলাধঃকরণ করতে পারি। পৃথিবীতে অনেক কাজ আছে যার দুষণীয়তা মানুষের স্বহস্তে গড়া—যার ভালমন্দ, অভ্যাসপ্রথা দেশাচার সমাজনিয়মের উপর নির্ভর করে কিন্তু নিষ্ঠুরতা সেরকম নয়, এটা একেবারে আদিম দোষ, এর মধ্যে কোনো তর্ক নেই, কোনো দ্বিধা নেই, হৃদয় যদি আমাদের অসাড় না হয়, হৃদয়কে যদি চোখ বেধে অন্ধ করে না রেখে দিই তাহলে নিষ্ঠুরতার বিরুদ্ধে নিষেধ একেবারে স্পষ্ট শুনতে পাই—অথচ ওটা আমরা হেসেখেলে সকলে মিলে খুব অনায়াসে আনন্দসহকারে করে থাকি, এমন কি, যে না করে তাকে কিছু অদ্ভুত বলে মনে হয়। পাপপুণ্যসম্বন্ধে মানুষের এমনি একটা কৃত্রিম অপূর্ণ ধারণা। আমার বোধ হয় সকল ধর্মের শ্রেষ্ঠধর্ম সর্ব জীবে দয়া। প্রেম হচ্ছে সমস্ত ধর্মের মূল ভিত্তি। সেদিন একটা ইংরিজি কাগজে পড়লুম, পকাশহাজার পোশু মাংস ইংলণ্ড থেকে আফিকার কোনো এক সেনানিবাসে পাঠান হয়েছিল—মাংসটা খারাপ হওয়ায়

ভারা ফিরে পাঠিয়ে দেয় ; তার পরে সেই মাংস পোর্টস্মথে পাঁচ ছশ টাকার নিলেম হয়ে যায়—ভেবে দেখ দেখি—জীবের জীবনের কি ভয়ানক অপব্যয় এবং কি অল্প মূল্য ! আমরা যখন একটা থানা দিই তখন কত প্রাণী কেবলমাত্র ডিশ পুরণের জন্তে আত্মবিসর্জন দেয়, হয়ত কেবল ফিরে ফিরে যায় কেউ পাতে নেয়না । যতক্ষণ আমরা অচেতনভাবে থাকি এবং অচেতনভাবে হিংসা করি ততক্ষণ আমাদের কেউ দোষ দিতে পারেনা । কিন্তু যখন মনে দয়া উদ্বেগ হয় তখন যদি সেই দয়াটাকে গলা টিপে মেরে দশজনের সঙ্গে মিশে হিংস্রভাবে কাজ করে যাই তাহলেই যথার্থ আপনার সমস্ত সাধুপ্রকৃতিকে অপমান করা হয় । আমি মনে করেছি—আরো একবার নিরামিষ খাওয়া ধরে দেখব ।

আমার একটি নির্জনের প্রিয়বন্ধু জুটেছে—আমি লোকেনের ওখান থেকে তার একখানা Amiel's Journal ধার করে এনেছি—যখন সময় পাই সেই বইটা উন্টে পাণ্টে দেখি—ঠিক মনে হয় তার সঙ্গে মুখোমুখি হয়ে কথা কচ্চি—এমন অন্তরঙ্গ বন্ধু আর খুব অল্প ছাপার বইয়ে পেয়েছি । অনেক বই এর চেয়ে ভাল লেখা আছে এবং এই বইয়ের অনেক দোষ থাকতে পারে কিন্তু এই বইটি আমার মনের মত । অনেক সময় আসে যখন সব বই ছুঁয়ে ছুঁয়ে ফেলে দিতে হয় কোনোটা ঠিক আরামের বোধ হয় না—যেমন রোগের সময় অনেক সময় বিছানার ঠিক আরামের অবস্থাটি পাওয়া যায় না, নানারকমে পাশ ফিরে দেখতে ইচ্ছে করে, কখনো বালিশের উপর বালিশ চাপাই, কখনো বালিশ ফেলে দিই, সেইরকম মানসিক অবস্থায় আমি যেরকম যেখানেই খুলি সেখানেই মাথাটি ঠিক গিয়ে পড়ে শরীরটা ঠিক বিশ্রাম পায় । আমার সেই অন্তরঙ্গ বন্ধু আমিয়েল পশুদের প্রতি মানুষের নিষ্ঠুরতাসম্বন্ধে এক জায়গায় লিখেছে—ব—র লেখায় আমি সেইটে সমস্তটা নোট বসিয়ে দিয়েছি । কাদম্বরীর সেই মুগরা বর্ণনা থেকে অনেকটা আমি ব—কে তর্জমা করতে বলে দিয়েছি । পাখীরাও যে কতকটা আমাদের মত—একটা জায়গায় আছে যেখানে তাতে আমাতে প্রবেশ নেই—এইটে বাণভট্ট আপন করুণ কল্পনাশক্তির দ্বারা অল্পভব ও প্রকাশ করেছেন ।

এদিকে গরমটাও বেশ পড়েছে—কিন্তু রৌদ্রের উত্তাপটাকে আমি বড় একটা গ্রাহ্য করিনে। তপ্ত বাতাস ধুলোখালি খড়কুটো উড়িয়ে নিয়ে হুহু শব্দ করে ছুটেছে—প্রায়ই হঠাৎ এক এক জায়গায় একটা আজগুবি ঘূর্ণিবাতাস দাঁড়িয়ে উঠে শুকনো পাতা এবং ধুলোর ওড়না ঘুরিয়ে ঘুরতে ঘুরতে নেচে অদৃশ্য হয়ে যাচ্ছে—সেটা দেখতে বেশ লাগে। নদীর ধারে বাগান থেকে পাখীগুলো ভারি মিষ্ট করে ডাক্চে—মনে হচ্ছে ঠিক বসন্তই বটে, তপ্ত খোলা থেকে একেবারে গরম গরম নাবিয়ে এনেছে—কিন্তু গরমটা পরিমাণে কিঞ্চিৎ বেশি, আর একটুখানি জুড়িয়ে আনলে বিশেষ ক্ষতি ছিলনা। আজ সকাল বেলাটার হঠাৎ দিবা ঠাণ্ডা পড়েছিল—এমন কি, প্রায় শীতকালেরই মত—স্নান করবার সময় মনে খুব প্রবল উৎসাহ ছিলনা। এই প্রকৃতি নামক একটা বৃহৎ ব্যাপারের মধ্যে কখন যে কি হচ্ছে তার হিসেব পাওয়া শক্ত—কোথায় তার কোন্ অজ্ঞাত কোণে কি একটা কাণ্ড ঘটচে আর অকস্মাৎ চারনিকের সমস্ত ভাবখানা বদলে যাচ্ছে। আমি কাল ভাবছিলাম মানুষের মনখানাও ঠিক ঐ প্রকাণ্ড প্রকৃতির মত রহস্যময়। চতুর্দিকে শিরা উপশিরা স্নান মস্তিষ্ক মজ্জার ভিতর কি এক অবিশ্রাম ইন্দ্রজাল চল্চে—হৃৎশব্দে রক্তস্রোত ছুটেছে স্নায়ুগুলো কাঁপচে হৃৎপিণ্ড উঠ্চে পড়্চে, আর এই রহস্যময়ী মানবপ্রকৃতির মধ্যে ঋতু পরিবর্তন হচ্ছে। কোথা থেকে কখন কি হাওয়া আসে আমরা কিছুই জানিনে। আজ মনে করলুম জীবনটা দিবা চালাতে পারব, বেশ বল আছে, সংসারের হৃৎযন্ত্রণাগুলোকে একেবারে ভিত্তিয়ে চলে যাব, এই ভেবে সমস্ত জীবনের প্রোগ্রামটি ছাপিয়ে এনে শক্ত করে বাঁধিয়ে পকেটে রেখে নিশ্চিন্ত আছি; কাল দেখি কোন্ অজ্ঞাত রসাতল থেকে আর একটা হাওয়া দিয়েছে, আকাশের ভাবগতিক সমস্ত বদলে গেছে, তখন আর মনে হয় না এ ছুর্যোগ কোনো-কালে কাটবে উঠতে পারব। এসবের উৎপত্তি কোন্‌খানে? কোন্‌ শিরার মধ্যে

স্নানস্থলে মধ্যে কি একটা নড়চড় হয়ে গেছে মাঝের থেকে আমি আমার সমস্ত বলবুদ্ধি নিয়ে আর কুলিয়ে উঠতে পারিনি। নিজের ভিতরকার এই অপার রহস্যের কথা মনে করলে ভারি ভয় হয়—কি করতে পারব না পারব কিছুই জোর করে বলতে পারিনি—মনে হয়, কিছুই না জেনে আমি এ কি একটা প্রকাণ্ড কাণ্ড সর্বদাই স্বপ্নে বহন করে নিয়ে বেড়াই, আয়ত্ত করতে পারিনি অথচ এর হাতও কিছুতেই এড়াতে পারিনি—জানিনে আমাকে কোথায় নিয়ে যাবে আমিই বা একে কোথায় নিয়ে যাব—আমার স্বপ্নে এই ভয়ঙ্কর রহস্য বোঝনা করে দেবার কি প্রয়োজন ছিল? বুকের ভিতর কি হয়, শিরার মধ্যে কি চলচে, মস্তিষ্কের মধ্যে কি নড়চে, কত কি অসংখ্য কাণ্ড আমাকে অবিশ্রাম আচ্ছন্ন করে ঘটাচে, আমি দেখতেও পারিনে, আমার সঙ্গে পরামর্শও করচেনা, অথচ সবস্বচ্ছ নিরে খাড়া হয়ে দাঁড়িয়ে কর্তব্যাক্তির মত মুখ করে মনে করছি আমি একজন আমি! তুমিত ভারি তুমি—তোমার নিজের বতটুকুই বা জান তার ঠিক নেই। আমিও অনেক ভেবেচিন্তে এইটুকু ঠিক করেছি আমি নিজেকে কিছুই জানিনে। আমি একটা সজীব পিয়ানো যন্ত্রের মত—ভিতরে অঙ্গকারের মধ্যে অনেকগুলো তার এবং কলবল আছে—কখন কে এসে বাজায় কিছুই জানিনে—কেন বাজে তাও সম্পূর্ণ বোঝা শক্ত—কেবল কি বাজে সেইটেই জানি—যখন বাজে কি ব্যথা বাজে, কড়ি বাজে কি কোমল বাজে, তালে বাজে কি বেতালে বাজে এইটুকুই বুঝতে পারি। আর জানি আমার অস্তিত্ব নীচের দিকেই বা কতদূর উপরের দিকেই বা কতদূর। না—তাও কি ঠিক জানি?


—•—

৩০শে মার্চ, ১৮৯৪।

এত অকারণ আশঙ্কা এবং কষ্ট মানুষের অদৃষ্টে থাকে! ছোট বড় এত সহস্র বিষয়ের উপর আমাদের মনের সুখশান্তি নির্ভর করে। অনেক দুঃখ আছে যা আমার নিজস্বত্ব এবং যা সরিনয়ে সহিষ্ণুভাবে বহন করা কর্তব্য মনে হয়—কিন্তু চিঠি না পেয়ে যখন আশঙ্কা হয় যে যুক্তি একটা কিছু বিপদ কিছা ব্যামো হয়েছে—তখন কষ্টটাকে শাস্ত করবার জন্যে হাতের কাছে কোনো ফিলজফিই পাওয়া যায় না। তখন বুদ্ধিটাও একেবারে কাজের বার হয়ে যায়। কাল সমস্তক্ষণ বেড়াতে বেড়াতে এমন সকল অসম্ভব এবং অসঙ্গত কল্পনা মনে উদয় হচ্ছিল এবং বুদ্ধি তার কোনো প্রতিবাদ করছিল না যে আজ তা স্মরণ করে হাসিও পাচ্ছে লজ্জাও বোধ হচ্ছে—অথচ স্থির নিশ্চয় জানি যে, আস্তে বারে, যেদিন এইরকম ঘটনা হবে ঠিক আবার এরই পুনরাবৃত্তি হবে। আমিও অনেকবার বলেছি বুদ্ধিটা মানুষের নিজস্ব জিনিষ নয়, ওটা এখনো আমাদের মনের মধ্যে ন্যাচরলাইজড্ হয়ে যায় নি।

যখন মনে করি জীবনের পথ সুদীর্ঘ, দুঃখ কষ্টের কারণ অসংখ্য এবং অবশ্য-জ্ঞাবী তখন এক এক সময় মনের বল রক্ষা করা প্রাণপণ কঠিন হয়ে পড়ে। অনেক সময় সজ্ঞার সময় একলা বসে বসে টেবিলের বাতির আলোর দিকে দৃষ্টি নিবিষ্ট করে মনে করি জীবনটাকে বীরের মত অবিচলিত ভাবে নীরবে এবং বিনা অভিযোগে বহন করব—সেই কল্পনায় মনটা উপস্থিতমত অনেকখানি ক্ষীত হয়ে ওঠে এবং আপনাকে হাতে হাতে একজন মত বীরপুরুষ বলে ভ্রম হয়—তার পরে পথ চলতে পারে সেই কুশের কাঁটাটি ফোটে অমনি যখন লাফিয়ে উঠি তখন ভবিষ্যতের পক্ষে ভারি সন্দেহ উপস্থিত হয়, তখন আবার জীবনটাকে সুদীর্ঘ এবং আপনাকে সম্পূর্ণ অযোগ্য মনে হয়। কিন্তু সে বুদ্ধিটা বোধ হয় ঠিক নয়—বাস্তবিক, বোধ হয় কুশের কাঁটার বেশি অস্থির করে। মনের ভিতরে একটি গোছালো গিরিপনা

দেখা যায়—সে দরকার হুখে ব্যয় করে, সামান্য কারণে বলের অপব্যয় করতে চায়না। সে যেন বড় বড় সৰুট এবং আত্মত্যাগের জন্যে আপনার সমস্ত বল ক্লেশের মত সমস্তে সঞ্চয় করে রাখে। ছোট ছোট বেদনার হাজার কান্নাকাটি করলেও তার রীতিমত সাহায্য পাওয়া যায় না। কিন্তু যেখানে হুখ গভীরতম সেখানে তার আলস্য নেই। এই জন্যে জীবনে একটা প্যারাড়ম্ প্রায়ই দেখা যায় যে, বড় হুখের চেয়ে ছোট হুখ যেন বেশি হুখকর। তার কারণ, বড় হুখে হৃদয়ের যেখানটা বিদীর্ণ হয়ে যায় সেইখান থেকেই একটা সাধনার উৎস উঠতে থাকে, মনের সমস্ত দলবল সমস্ত ধৈর্যবীর্য এক হুদে আপনার কাজ করতে থাকে, তখন হুখের সাহায্যের দ্বারা তার সহ করবার শক্তি বেড়ে যায়। মানুষের হৃদয়ে একদিকে যেমন সুখলোভের ইচ্ছা তেমনি আর একদিকে আত্মত্যাগের ইচ্ছাও আছে; সুখের ইচ্ছা যখন নিষ্ফল হয় তখন আত্মত্যাগের ইচ্ছা বলিষ্ঠ হয়ে ওঠে এবং সেই ইচ্ছার চরিতার্থতা সাধন করবার অবদর পেয়ে মনের ভিতরে একটা উদার উৎসাহসঞ্চার হয়। ছোট হুখের কাছে আমরা কাপুরুষ কিন্তু বড় হুখ আমাদের বীর করে তোলে, আমাদের বথার্থ মনুষ্যত্বকে আগ্রত করে দেয়। তার ভিতরে একটা সুখ আছে। হুখের সুখ বলে একটা কথা অনেকদিন থেকে প্রচলিত আছে সেটা নিতান্ত বাচ্চাতুরী নয় এবং সুখের অসন্তোষ একটা আছে সেও সত্য। তার মানে বেশি শক্ত নয়। যখন আমরা নিছক সুখ ভোগ করতে থাকি তখন আমাদের মনের একাধিক অকৃতার্থ থাকে, তখন একটা কিছু জন্যে হুখ ভোগ এবং ত্যাগ স্বীকার করতে ইচ্ছে করে, নইলে আপনাকে অযোগ্য বলে মনে হয়—এই কারণেই যে সুখের সঙ্গে হুখ মিশ্রিত সেই সুখই স্থায়ী এবং সুগভীর, তাতেই বথার্থ আমাদের সমস্ত প্রকৃতির চরিতার্থতা সাধন হয়। কিন্তু সুখ হুখের ফিলজফি ক্রমেই বেড়ে চলেতে লাগল।



সবে দিন চারেক হল এখানে এসেছি কিন্তু মনে হচ্ছে যেন কতদিন আছি তার ঠিক নেই—মনে হচ্ছে আজই যদি কলকাতার ঘাই তাহলে যেন অনেক বিষয়ে অনেক পরিবর্তন দেখতে পাব।

আমিই কেবল সময়শ্রোতের বাইরে একটি জায়গায় স্থির হয়ে আছি, আর সমস্ত জগৎ আমার অজ্ঞাতে একটু একটু করে ঠাঁই বদল করচে। আসলে, কলকাতা থেকে এখানে এলে সময়টা চতুর্গুণ দীর্ঘ হয়ে আসে, কেবল আপনার মনোরাজ্যে বাস করতে হয়, সেখানে ঘড়ি ঠিক চলে না। ভাবের তীব্রতা অনুসারে মানসিক সময়ের পরিমাপ হয়—কোন কোন কণিক অথুৎহঃ মনে হয় যেন অনেককণ ধরে ভোগ করচি। যেখানে বাইরের লোকপ্রবাহ এবং বাইরের ঘটনা এবং দৈনিক কার্যপরিপাক আমাদের সর্বদা সময়গণনার নিষ্কল না রাখে সেখানে, স্বপ্নের মত, ছোট মুহূর্ত দীর্ঘকালে এবং দীর্ঘকাল ছোটমুহূর্তে সর্বদাই পরিবর্তিত হতে থাকে। তাই আমার মনে হয় খণ্ড কাল এবং খণ্ড আকাশ আমাদের মনের ভ্রম। প্রত্যেক পরমাণু অসীম এবং প্রত্যেক মুহূর্তই অনন্ত। এসম্বন্ধে পারস্য উপন্যাসে খুব ছেলেবেলায় একটা গল্প পড়েছিলুম সেটা আমার ভারি ভাল লেগেছিল—এবং তখন যদিও খুব ছোট ছিলাম তবুও তার ভিতরকার ভাবটা একরকম করে বুঝতে পেরে-ছিলাম। কালের পরিমাণটা যে কিছুই নয় সেইটে দেখাবার জন্যে একজন ফকির একটা টবের মধ্যে মস্তঃপূত জল রেখে বাদশাকে বলে তুমি এর মধ্যে ডুব দিও। জান কর। বাদশা ডুব দেবামাত্র দেখলে সে এক সমুদ্রের ধারে নতুন দেশে উপস্থিত—সেখানে সে দীর্ঘজীবন ধরে নানা ঘটনা নানা অবস্থার মধ্যে দিয়ে নানা অথুৎহঃ অতিবাহন করলে। তার বিয়ে হল, তার একে একে অনেকগুলি ছেলে হল, ছেলেরা মরে গেল, স্ত্রী মরে গেল, টাকাকড়ি সব নষ্ট হয়ে গেল এবং সেই শোকে যখন সে

একেবারে অধীর হয়ে পড়েছে এমন সময় হঠাৎ দেখলে সে আপন রাজসভার জলের টবের মধ্যে। ফকিরের উপর খুব ক্রোধ প্রকাশ করাতে সভাসদরা সকলেই বলে, মহারাজ, আপনি কেবলমাত্র জলে ডুব দিয়েই মাথা তুলেছেন। আমাদের সমস্ত জীবনটা এবং জীবনের সমস্ত সুখ দুঃখ এই রকম এক মুহূর্তের মধ্যে বহু ; আমরা সেটাকে যতই সুদীর্ঘ এবং যতই সুতীব্র মনে করি যেমনি সংসারের টব থেকে মাথা তুলে অমনি সমস্তটা মুহূর্তকালের স্বপ্নের মত ক্ষুদ্র হয়ে যায়। কালের ছোট বড় কিছুই নেই—আমরাই ছোট বড়।

কাল দিনের বেলাটা বেশ ছিল। আমার এই নদীর জলরেখা, বাণির চর এবং ওপারের বনদৃশ্যের উপরে মেঘ এবং রৌদ্রের মুহূর্ত নতুন খেলা চলছিল—খোলা জানলার ভিতর দিয়ে যে দিকেই চোখ পড়ছিল এমন সুন্দর দেখাচ্ছিল। কোনো সুন্দর জিনিষকে “স্বপ্নের মত” কেন বলে ঠিক জানিনে, বোধ হয় নিছক সৌন্দর্যটা প্রকাশ করবার জন্যে। অর্থাৎ ওর মধ্যে যেন Realityর ভারটুকু মাত্র নেই—অর্থাৎ এই শস্যক্ষেত্র থেকে যে আহার সংগ্রহ করতে হয়, এই নদী দিয়ে যে পাটের নৌকা যাবার রাস্তা, এই চর যে জমিদারের সঙ্গে খাজনা দিয়ে বন্দোবস্ত করে নিতে হয় ইত্যাদি শত সহস্র কথা মন থেকে দূর করে দিয়ে কেবলমাত্র হিসাবহীন বিভূক্ত আনন্দময় সৌন্দর্যের ছবি যখন আমরা উপভোগ করি তখন আমরা সেটাকে স্বপ্নের মত বলি। অন্য সময়ে আমরা জগৎকে প্রধানতঃ সত্য বলে দেখি তারপরে তাকে আমরা সুন্দর অথবা অন্তরূপে জানি—কিন্তু যে সময়ে তাকে আমরা প্রধানতঃ সুন্দর হিসাবে দেখি, তারপরে সত্যহোক না হোক লক্ষ্য করিনে তখন আমরা তাকে বলি স্বপ্নের মত।

আজ সকালে বিছানা থেকে উঠেই দেখি পাংশুবর্ণ মেঘের ভারে আকাশ অন্ধকার এবং অবনত, বাদলার ভিজে হাওয়া দিচ্ছে, টিপ্ টিপ্ করে অবিশ্রাম বৃষ্টি পড়ছে, নদীতে নৌকো বেশি নেই, ধান কাটবার জন্যে কান্তে হাতে চাষার মাথায় টোকা পরে গায়ে চট মুড়ি দিয়ে খেয়ানোকোর পার হচ্ছে, মাঠে গরু চরচেনা এবং ঘাটে স্নানার্থিনী জন-পদবৃন্দের বাহ্যল্য নেই—অতদিন এতক্ষণ আমি তাদের উচ্চকণ্ঠের কলধ্বনি এপার থেকে শুনতে পেতুম, আজ সে সমস্ত কাকলী এবং পাখীর গান নীরব। বেদিক থেকে বৃষ্টির ছাঁট আসবার সম্ভাবনা সেদিককার জানুলা এবং পর্দা ফেলে দিয়ে অশ্রুদিককার জানুলা খুলে আমি এতক্ষণ কাজের প্রত্যাশায় বসে ছিলাম। অবশেষে ক্রমেই আমার ধারণা হচ্ছে আজ এ বাদলার আমলারা ঘরের বার হবেনা—হায়, আমিও শ্রাম নষ্ট, ভার্য্যও রাধিকা নয়,—বর্ষাভিসারের এমন সুযোগ মাঠে মারা গেল। তাছাড়া বাঁশি যদি বাজাতুম এবং রাধিকার যদি কিছুমাত্র সুরবোধ থাকত তাহলে বৃকভানুন্দিনী বিশেষ “হর্ষিতা” হতনা। যাই হোক, অবস্থাগতিকের বখন রাধিকাও আসচেননা আমলারাও তদ্রূপ এবং আমার “Muse”ও সম্প্রতি আমাকে পরিত্যাগ করে বাপের বাড়ি চলে গেছেন, তখন বসে বসে একখণ্ড চিঠি লেখা যেতে পারে। আসল হয়েছে কি, এতক্ষণ কোনো কাজ না থাকাতে নদীর দিকে চেয়ে শুন শুন স্বরে ভৈরবী টোড়ি রামকেলি মিশিয়ে একটা প্রভাতী রাগিনী স্বজনকরে আপন-মনে আলাপ করছিলাম, তাতে অকস্মাৎ মনের ভিতরে এমন একটা স্তম্ভীত অথচ স্তম্ভুর চাঞ্চল্য জেগে উঠল, এমন একটা অনির্কচনীয় ভাবেব আবেগ উপস্থিত হল, এক মুহূর্তের মধ্যেই আমার এই বাস্তব জীবন এবং বাস্তব জগৎ আগাগোড়া এমন একটা মূর্তি পরিবর্তন করে দেখা দিলে, অস্তিত্বের সমস্ত ছন্দই সমস্তার এমন একটা সঙ্গীতময় ভাবময় অথচ ভাবাহীন অর্থহীন অনির্দেশ্য উত্তর কানে এসে বাজতে লাগল, এবং

সেই স্রের ছিন্ন দিগে নদীর উপর বৃষ্টি জলের তরল পতন শব্দ অবিশ্রাম ক্বনিত হরে এমন একটা পুলক সঞ্চার করতে লাগল—জগতের প্রান্তবর্তী এই সঙ্গীহীন একটিমাত্র প্রাণীকে ঘিরে আধাতের অশ্রুসজল ঘনঘোর শ্রামল মেঘের মত “স্বথমিতি বা হুঃখমিতি বা” এমনি স্তরে স্তরে ঘনিরে এল যে, হঠাৎ এক সময় বলে উঠতে হল, যে, থাক্, আর কাজ নেই, এইবার Criticism on Contemporary thought and thinkers পড়তে বস। যাক্।”



কাল থেকে হঠাৎ আমার মাথায় একটা ছাপি খট এসেছে। আমি চিন্তা করে দেখলুম পৃথিবীর উপকার করব ইচ্ছা থাকলেও কৃতকার্য হওয়া যায় না ; কিন্তু তার বদলে বেটা করতে পারি সেইটে করে ফেলে অনেক সময় আপনিই পৃথিবীর উপকার হয়, নিম্নেন যাহোক্ একটা কাজ সম্পন্ন হয়ে যায়। আজকাল মনে হচ্ছে, যদি আমি আর কিছুই না করে ছোট ছোট গল্প লিখতে বসি তাহলে কতকটা মনের সুখে থাকি এবং কৃতকার্য হতে পারলে হয়ত পাঁচজন পাঠকেরও মনের সুখের কারণ হওয়া যায়। গল্প লেখবার একটা সুখ এই, বাদে কথ লিখব তারা আমার দিনরাত্রির সমস্ত অবসর একেবারে ভরে রেখে দেবে, আমার একলা মনের সঙ্গী হবে, বর্ষার সময় আমার বন্ধঘরের সঙ্গীর্ণতা দূর করবে, এবং রৌদ্রের সময় পদ্মাতীরের উজ্জল দৃশ্যের মধ্যে আমার চোখের পরে বেড়িয়ে বেড়াবে। আজ সকাল বেলায় তাই গিরিবালা নান্নী উজ্জলশ্যামবর্ণ একটি ছোট অভিমানী মেয়েকে আমার কল্পনারাজ্যে অবতারণা করা গেছে। সবেমাত্র পাঁচটি লাইন লিখেছি এবং সে পাঁচ লাইনে কেবল এই কথা বলেছি যে কাল বৃষ্টি হয়ে গেছে, আজ বর্ষণ অস্তে চঞ্চল মেঘ এবং চঞ্চল রৌদ্রের পরস্পর শিকার চলচে, হেনকালে পূর্বসংস্থিত বিন্দুবিন্দু বারিশীকরবর্ষা তরুতলে গ্রামপথে উক্ত গিরিবালায় আসা উচিত ছিল, তা না হয়ে আমার বোট আমলাবর্গের সমাগম হল—তাতে করে সম্প্রতি গিরিবালাকে কিছুক্ষণের জন্ত অপেক্ষা করতে হল। তা হোক্ তবু সে মনের মধ্যে আছে। দিনযাপনের আজ আর এক রকম উপায় পরীক্ষা করে দেখা গেছে। আজ বসে বসে ছেলেবেলাকার স্মৃতি এবং তখনকার মনের ভাব খুব স্পষ্ট করে মনে আনবার চেষ্টা করছিলুম। যখন পেনেটির বাগানে ছিলুম, যখন পৈতের নেড়া মাথা নিয়ে প্রথমবার বোলপুরের বাগানে গিয়েছিলুম, যখন পশ্চিমের বারান্দার সবশেষের ঘরে আমাদের ইন্ধুলঘর ছিল, এবং আমি একটা নীলকাগজের

হেঁড়া খাতার বাঁকা লাইন কেটে বড় বড় কাঁচা অক্ষরে প্রকৃতির বর্ণনা লিখতুম, যখন তোষাখানার ধরে শীতকালের সকালে চিন্তা বলে একটা চাকর গুন্সুন্সু ধরে মধুকানের ধরে গান করতে করতে মাখন দিয়ে রুটি তোষ করত,—তখন আমাদের গায়ে গরম কাপড় ছিলনা, একখানা কামিজ পরে সেই আগুনের কাছে বসে শীত নিবারণ করতুম এবং সেই সশব্দবিগলিতনবনীসুগন্ধি রুটিখণ্ডের উপরে লুহুহুয়াশদৃষ্টি নিক্ষেপ করে চূপ করে বসে চিন্তার গান গুন্সুতুম—সেই সমস্ত দিনগুলিকে ঠিক বর্তমানের করে দেখছিলুম এবং সেই সমস্ত দিনগুলির সঙ্গে এই রোজালোকিত পদ্মা এবং পদ্মার চর ভারী এক-রকম স্নানরভাবে মিশ্রিত হচ্ছিল,—ঠিক যেন আমার সেই ছেলেবেলাকার খোলা জাল-নার ধারে বসে এই পদ্মার একটি দৃশ্যখণ্ড দেখছি বলে মনে হচ্ছিল। তারপরে আমি ভাবলুম এই ত আমি কোনো উপকরণ না নিয়ে কেবল গল্প লিখে এবং বর্তমানকে দূর-কালের সঙ্গে মিলিয়ে দিয়ে নিজেকে নিজে স্মৃতি করতে পারি। তার পরেই মনে হল, প্রবাদ আছে “Nothing succeeds like success”—“টাকার টাকা আনে”—তেমনি স্মৃতিও স্মৃতি আনে। স্মৃতির সময়েই আমরা মনে করি আমাদের স্মৃতি হবার অসীম ক্ষমতা আছে—তারপরে হুঃখের সময় দেখতে পাই কোনো ক্ষমতাই কোনো কাজ করচেনা, সব কলই একেবারে বিগড়ে গেছে। কাল বোধ হয় একটু কিছু স্মৃতির আভাস মনের ভিতর রীরা করে উঠেছিল তাই সমস্ত কলগুলো একেবারে চলতে আরম্ভ করেছিল, জীবনের অতীতস্মৃতি এবং প্রকৃতির বর্তমান শোভা একসঙ্গেই সজীব হয়ে উঠেছিল, তাই সকালে আজ জেগে উঠেই মনে হল আমি কবি। যতই কবিত্ব থাক, যতই ক্ষমতার গর্ভ করি মানুষ ভয়ানক পরাধীন। পৃথিবীর উপর থেকে এই কাঙাল জীবগুলো লজ্জা হয়ে উঠে খাড়া হয়ে শীর্ণ হয়ে বেড়াচ্ছে,—আন্ত স্বর্গটি চায়, তারপরে টুকরোটাকরা বা পায় তাতেই ক্ষুধানিরন্তির চেষ্টা করে, অবশেষে ভিক্ষাপ্রসারিত উর্দ্ধ-গানী দেহ ধুলিলুপ্তিত হয়ে পড়ে এবং যৃত্যুকে স্বর্গপ্রাপ্তি বলে রটনা করে। যেটুকু স্মৃতি জীবনের সমস্ত কলগুলো চলে সেইটুকু স্মৃতি যদি চিরকাল ধরে রাখা যায় তাহলে সমস্ত শক্তি বিকশিত সমস্ত কাজ সম্পন্ন করে যাওয়া যেতে পারে। আজ গিরিবালা অনাহুত এসে উপস্থিত হয়েছেন কাল বড় আবশ্যকের সময় তাঁর দোহুলায়মান বেলীর হুচ্যগ্রভাগটুকুও দেখা যাবে না। কিন্তু সে কথা নিয়ে আজ আন্দোলনের লক্ষ্যকার নেই। শ্রীমতী গিরিবালায় তিরোধান সম্ভাবনা থাকে ত থাক—আজ যখন তাঁর শুভা-গমন হয়েছে তখন সেটা আন্দোলনের বিষয় সন্দেহ নেই।

এবারকার পাত্রে অবগত হওয়া গেল যে আমার বরের স্ত্রীসন্তানটি স্ত্রী তাঁটি ফুলিয়ে
অভিমান করতে শিখেছে। আমি সে চিত্র বেশ দেখতে পাচ্ছি। তাঁর সেই নরম-নরম
মুঠোর আঁচড়ের জন্তে আমার মুখটা নাকটা তৃষার্ভ হয়ে আছে। সে যেখানে-সেখানে
আমাকে মুঠো করে ধরে টলমলে মাথাটা নিয়ে হাম্ করে খেতে আস্ত এবং কুদে কুদে
আঙুলগুলোর মধ্যে আমার চব্বার হারটা জড়িয়ে নিতান্ত নির্বোধ নিশ্চিত গম্ভীরভাবে
গাল ফুলিয়ে চেয়ে থাকত সেই কথাটা মনে পড়চে।



আমার এই ক্ষুদ্র নির্জনতাটি আমার মনের কারখানা ঘরের মত; তার নানাবিধ অদৃশ্য স্বতন্ত্র এবং সমাপ্ত ও অসমাপ্ত কাজ চারিদিকে ছড়ানো রয়েছে,—কেউ যখন বাইরে থেকে আসেন তখন সেগুলি তাঁর চোখে পড়েনা—কখন কোথায় পা ফেলেন তার ঠিক নেই দিব্য অজ্ঞানে হাঙ্গামুখে বিশ্বসংসারের খবর আলোচনা করতে করতে আমার অবসরের তাঁতে চড়ানো অনেক সাধনার হুম্ব হুম্বগুলি পটপট করে ছিঁড়তে থাকেন। যখন ট্রেনে তাঁকে পৌঁছে দিয়ে আবার একাকী আমার কর্মশালায় ফিরে আসি তখন দেখতে পাই আমার কত লোকমান হয়েছে। অনেক কথা, অনেক কাজ, অনেক আলোচনা আছে যা অস্ত্রের পক্ষে সামান্য এবং জনতার মধ্যে স্বাভাবিক, কিন্তু নির্জন জীবনের পক্ষে আঘাতজনক। কেননা নির্জনে আমাদের সমস্ত গোপন অংশ গভীর অংশ বাহির হয়ে আসে স্নেহের সেই সময়ে মানুষ বড় বেশি নিজেরই মত অর্থাৎ কিছু সৃষ্টিছাড়া গোচর হয়—সে অবস্থায় সে লোকসত্ত্বের অল্পপয়স্ক হয়ে পড়ে। বাহ্য প্রকৃতির একটা গুণ এই যে সে অগ্রসর হয়ে মনের সঙ্গে কোনো বিরোধ করে না; তার নিজের মন বলে কোনো বালাই না থাকতে মানুষের মনকে সে আপনার সমস্ত জায়গাটি ছেড়ে দিতে রাজি হয়; সে নিরত সঙ্গদান করে তবু সঙ্গ আদায় করেনা, সে অনন্ত আকাশ অধিকার করে থাকে তবু সে আমার একতিল জায়গা জোড়ে না;—নির্বোধের মত বকে না, স্রবুজির মত তর্ক করে না,—আমার শিশু কন্যাটির মত আকাশের কোলে গুয়ে থাকে,—যখন শাস্ত্রভাবে থাকে সেও মিষ্টি লাগে; যখন গর্জন করে হাত পা ছুঁড়তে থাকে সেও মিষ্টি লাগে; বিশেষত যখন তার জ্ঞান গান বেশ পরিবর্তনের বন্দোবস্ত তার আমার উপর কিছুমাত্র নেই—তখন এই ভাষাহীন মনোহীন বিরাটসুন্দর শিশুটি আমার নির্জনের পক্ষে বেশ। ভাষার অভ্যস্ত পরিপূর্ণ বুদ্ধিমান বয়ঃপ্রাপ্ত মানুষ লোকালয়ের পক্ষেই উপায়ের।

সন্ধ্যাবেলার পাবনা সহরের একটি থেয়াঘাটের কাছে বোট বাধা গেল । ওপার থেকে জনকতক লোক বাঁয়াতবলার সঙ্গে গান গাচ্ছে, একটা মিশ্রিত কলরব কানে এসে প্রবেশ করচে ; রাত্তা দিয়ে স্ত্রী পুরুষ যারা চলুচে তাদের ব্যস্তভাব ; গাছপালার ভিতর দিয়ে দীপালোকিত কোটাবাড়ি দেখা যাচ্ছে, থেয়াঘাটে নানানশ্রেণী লোকের ভিড় । আকাশে নিবিড় একটা একরঙা মেঘ, সন্ধ্যাও অন্ধকার হয়ে এসেছে ; ওপারে সারবাধা মহাজনী নৌকায় আলো জ্বলে উঠল, পূজাঘর থেকে সন্ধ্যারতির কঁাসর ঘণ্টা বাজতে লাগল,—বাতি নিবিড়ে দিয়ে বোটের জানলায় বসে আমার মনে ভারি একটা অপূর্ণ আবেগ উপস্থিত হল । অন্ধকারের আবরণের মধ্যে দিয়ে এই লোকালয়ের একটি ঘন সজীব জ্বলস্পন্দন আমার বকের উপর এসে আঘাত করতে লাগল । (এই মেঘলা আকাশের নীচে, নিবিড় সন্ধ্যার মধ্যে, কত লোক, কত ইচ্ছা, কত কাজ, কত গৃহ, গৃহের মধ্যে জীবনের কত রহস্য,—মানুষে মানুষে কাছাকাছি ঘেঁষাঘেঁষি কত শত সহস্রপ্রকারের ঘাত প্রতিঘাত ।) বৃহৎ জনতার সমস্ত ভালমন্দ সমস্ত সুখদুঃখ এক হয়ে তরুলতাবেষ্টিত ক্ষুদ্র বর্ধানদীর দুইতীর থেকে একটি সক্রিয় স্তম্ভের স্ফুর্ন্তীয় রাগিণীর মত আমার হৃদয়ে এসে প্রবেশ করতে লাগল । আমার “শৈশব সন্ধ্যা” কবিতায় বোধ হয় কতকটা এই ভাব প্রকাশ করতে চেয়েছিলুম । কথাটা সংক্ষেপে এই যে, মানুষ ক্ষুদ্র এবং ক্ষণস্থায়ী, অথচ ভালমন্দ এবং সুখদুঃখপরিপূর্ণ জীবনের প্রবাহ সেই পুরাতন স্ফুর্ন্তীয় কলস্ববে চিরদিন চলুচে ও চলবে—নগরের প্রান্তে সন্ধ্যার অন্ধকারে সেই চিরন্তন কলধ্বনি শুনতে পাওয়া যাচ্ছে । মানুষের দৈনিক জীবনের কণিকতা ও স্বাভাব্য এই অবিচ্ছিন্ন স্রবের মধ্যে মিলিয়ে যাচ্ছে, সবস্বচ্ছ খুব একটা বিস্তৃত আদিঅন্তশূন্য প্রমোত্তরহীন মহাসমুদ্রের একতানশব্দের মত অন্তরের নিস্তব্ধতার মধ্যে গিয়ে প্রবেশ করচে । এক এক সময়ে কোথাকার কোন্ ছিন্ন দিয়ে জগতের বড় বড় প্রবাহ হৃদয়ের মধ্যে পথ পাঁয়—তার যে একটা ধ্বনি শোনা যায় সেটাকে কথায় তর্জনা করা অসাধ্য ।

৭ই জুলাই ১৮৯৪

অদৃষ্টক্রমে এ নভেলটা নিতান্তই অপাঠ্য। কেবলমাত্র আরম্ভ করেছিলুম বলেই প্রাণপণে শেষ করে ফেলুম। আরম্ভ করেছি বলেই যে শেষ করতে হবে এ কর্তব্য-বোধের অর্থ বোঝা শক্ত। লোকেন যে বলে আমাদের সমস্ত মনোবৃত্তির একটা অহঙ্কার আছে সেটা কতকটা ঠিক। তা'বা কেউ সহজে স্বীকার করতে চায় না আমরা সামান্য বা ক্ষণস্থায়ী বাধাতেই পরাভূত, এইজন্তে অনেক সময়ে তারা নিজেকে ধুইয়ে ধুইয়ে জাগিয়ে রাখে। আমাদের ইচ্ছাশক্তিরও একটা গর্ব আছে। সে একটা জিনিষ নিয়ে আরম্ভ করেছে বলেই অবশেষে নিজের প্রতিকূলেও সেটা শেষ করতে চায়। সেই একগুঁয়ে অনাবশ্যক অহঙ্কারবশত একটা বাজে বকুনিভরা অসংলগ্ন প্রকাণ্ড অপাঠ্যগ্রন্থ একটি দীর্ঘ বর্ষাদিনে বন্ধঘরে বসে শেষকরে ফেল্লুম—শেষ করবার মহৎসুখ ছাড়া আর কোনো সুখ পেলুম না।

ভাল করে ভেবে দেখলে হাসিপায় যে, অত্যন্ত ঘনিষ্ঠতা থাকলেও ইহজীবনে ছোটো মানুষে কতটুকু অংশ রেখার রেখার সংলগ্ন ! যাকে দশ বছর জানি তাকে দশটা বছরের কত সুদীর্ঘ অংশই জানিনে ; বোধ করি আজীবন সম্পর্কেরও জমাখরচ হিসাব করলেও তেমন বড় অঙ্ক হাতে থাকে না । সে কথা ভেবে দেখলে সবাইকেই অপরিচিত বলে বোধ হয় ; তখন বুঝতে পারি খুব বেশি পরিচয় হবার কথা নেই, কেননা হুদিন পরে বিচ্ছিন্ন হতেই হবে ;—আমাদের পূর্বে কোটি কোটি লোক এই সূর্যালোকে নীলাকাশের নীচে জীবনের পাঙ্খালায় মিলেছে এবং বিচ্ছিন্ন হয়ে বিস্মৃত হয়ে অপহৃত হয়ে গেছে । এরকম ভেবে দেখলে কোনো কোনো প্রকৃতিতে বৈরাগ্যের উদয় হয় কিন্তু আমার ঠিক উল্টোই হয় ; আমার আরো বেশি করে দেখতে বেশি করে জানতে ইচ্ছা করে । এই যে আমরা কয়েকজন প্রাণী জড় মহাসমুদ্রের বুধুদের মত ভেসে একজায়গায় এসে ঠেকেছি, এই অপূর্ব সংযোগটুকুর মধ্যে যত বিস্ময় যত আনন্দ তা আবার শত যুগে গড়ে উঠবে কিনা সন্দেহ । তাই কবি বসন্ত রায় লিখচেন :—

নিমিষে শতক যুগ হারাই হেন বাসি ।

রাস্তাবিক, মানুষের এক নিমেষের মধ্যে শত যুগেরই সংযোগ বিরোধিতা ঘটে । এখানে চলে আসবার আগে যেদিন একদিন ছপুর বেলায় স—পার্কস্ট্রীটে এসেছিলেন, পিয়ানো বাজছিল, আমি গান গাবার উদ্যোগ করছিলুম, হঠাৎ একসময়ে সকলের দিকে চেয়ে আমার মনে হল অনন্তকালের অসীম ঘটনাপরম্পরার মধ্যে এই একটুখানি আশ্চর্য ব্যাপার । মনে হল এর মধ্যে যেটুকু সৌন্দর্য ও আনন্দ আছে এবং এই যে খোলা জানলা দিয়ে মেঘলা আকাশের আলোটুকু আসচে এ একটা অসাধারণ লাভ । প্রাতিহিক অভ্যাসের জড়ত্ব একদিন কেন যে একটুখানি ছিঁড়ে যায় জানিনে, তখন যেন সদ্যোজাত হৃদয় দিয়ে আপনাকে, সম্মুখবর্তী দৃশ্যকে, এবং বর্তমান ঘটনাকে

অনন্তকালের চিত্রপটের উপরে প্রতিকলিত দেখতে পাই। অভ্যাসের একটা গুণ আছে যে, চারিদিকের অনেকগুলো জিনিষকে কমিয়ে এনে হাঙ্ক করে দেয়, বর্ষের মত আচ্ছন্ন করে বাইরের অতিশয় সংস্পর্শ থেকে মনকে রক্ষা করে—কিন্তু সেই অভ্যাস আমার মনে তেমন করে এঁটে ধরে না—পুরাতনকে বারবার নূতনের মতই দেখি—সেই জন্যে অন্য লোকের সঙ্গে ক্রমশ আমার মনের Perspective আলাদা হয়ে যায়—ভয়ে ভয়ে পরীক্ষা করে দেখতে হয় কে কোন্‌খানে আছি !

কাল সমস্ত রাত্রি খুব অজস্রধারে বৃষ্টি হয়ে গেছে। আজ ভোরে যখন উঠলুম তখনো অশ্রান্ত বৃষ্টি। এইমাত্র স্নানের ঘর থেকে বেরিয়ে এসে দেখি পশ্চিমদিকে আউষধানের ক্ষেতের উপর খুব সজল শ্যামল অবনত মেঘ স্তূপে স্তূপে স্তরে স্তরে জমে রয়েছে এবং পূর্বদক্ষিণ দিকে মেঘ খানিকটা বিচ্ছিন্ন হয়ে রৌদ্র ওঠবার চেষ্টা করছে—রৌদ্রে বৃষ্টিতে খানিকক্ষণের জন্যে যেন সন্ধি হয়েছে। যেদিকে ছিন্ন মেঘের ভিতর দিয়ে সকালবেলাকার আলো বিচ্ছুরিত হয়ে বেরিয়ে আসছে সেদিকে অপার পদ্মা-দৃশ্যটি বড় চমৎকার হয়েছে। জলের রহস্যগর্ভ থেকে একটি স্নানস্তম্ভ অলৌকিক জ্যোতিঃপ্রতিমা উদ্ভূত হয়ে নীরব মহিমায় দাঁড়িয়ে আছে; আর ডাঙার উপরে কালো মেঘ ক্ষীতকেশর সিংহের মত জ্রুট করে ধান্যক্ষেত্রের মধ্যে থাবা মেলে দিয়ে চূপ করে বসে আছে—সে যেন একটি সুন্দরী দিব্যশক্তির কাছে হার মেনেছে কিন্তু এখনো পোষমানে নি—দিগন্তের এককোণে আপনার সমস্ত রাগ এবং অভিমান গুটিয়ে নিয়ে বসে আছে। এখনি আবার বৃষ্টি হবে তার লক্ষণ দেখা যাচ্ছে; রীতিমত শ্রাবণের বর্ষণের উপক্রম হচ্ছে। স্বেপ্তাখিত সহাস্য জ্যোতীরশিখা যে মুক্তদ্বারের সামনে এসে দাঁড়িয়েছিল সেই দ্বারটি আবার আস্তে আস্তে রুদ্ধ হয়ে আসছে; পদ্মার ঘোলা জলরাশি ছায়ায় আচ্ছন্ন হয়ে এসেছে; নদীর একতীর থেকে আরেক তীর পর্যন্ত মেঘের সঙ্গে মেঘ আবদ্ধ হয়ে সমস্ত আকাশ অধিকার করে নিয়েছে—খুব নিবিড় রক্ত-মের আয়োজনটা হয়েছে।

এতদিনে আউষধান এবং পাটের ক্ষেত শূন্যপ্রায় হয়ে যাওয়া উচিত ছিল কিন্তু এবারে দেবতার গতিকে ক্ষেতের সমস্ত শস্য ক্ষেতেই আন্মোলিত হচ্ছে। দেখতে ভারি সুন্দর হয়েছে। বর্ষার আকাশ সজল মেঘে স্নিগ্ধ এবং পৃথিবী হিল্লোলিত শ্যাম-শস্যে কোমলা;—উপরে একটি গাঢ় রং এবং নীচেও একটি গাঢ় রঙের প্রলেপ; মাটি কোথাও অনাবৃত নয়; মাটির রংটি কেবল এই ঘোলা নদীর জলের মধ্যেই দেখা যাচ্ছে। পদ্মা একএকটি দেশপ্রদেশ বহন করে নিয়ে চলেছে—ওর জলের মধ্যেই কত জমিদারের জমিদারী গুলিয়ে রয়েছে। পদ্মা ভীষণ কোতুকে একরাজার রাজ্য হরণ করে আপন গেরুয়া আঁচলের মধ্যে লুকিয়ে অন্য রাজার দরজায় রাতারাতি থুয়ে আসছে—শেষে প্রাতঃকালে রাজার রাজার লাঠালাঠি কাটাকাটি।

একটিমাত্র মানুষ কেবলমাত্র সামনে উপস্থিত থাকলেই প্রকৃতির অর্ধেক কথা কানে আসে না। আমি দেখেছি থেকে থেকে টুকরোটুকরো কথাবার্তা কণ্ডার চেয়ে মানসিক শক্তির অপব্যয় আর কিছুতে হতে পারে না। দিনের পর দিন যখন একটি কথা না কয়ে কাটে তখন হঠাৎ টের পাওয়া যায় আমাদের চতুর্দিকেই কথা কচ্ছে। আজ নদীর কলকনির প্রত্যেক তরল-কার আমার সর্বাঙ্গে যেন কোমল আদর বর্ষণ করচে—মনটি আমার আজ অত্যন্ত নির্জন এবং সম্পূর্ণ নিস্তব্ধ; মেঘমুক্ত আলোকে উজ্জ্বল শস্যহিল্লোলিত জলকল্লোলিত চতুর্দিকটার সঙ্গে মুখোমুখি বিশ্রুপ্রীতিসম্মিলনের উপযুক্ত একটি নীরব গোপনতা আমার মধ্যে স্থিরভাবে বিরাজ করচে। আমি জানি আজ সন্ধ্যার সময় যখন কেদারা টেনে বোটের ছাতের উপর একলাটি বসব তখন আমার আকাশে আমার সেই সন্ধ্যাতারাটি ঘরের লোকের মত দেখা দেবে। আমি শীতের সময় যখন এই পদ্মাতীরে আসতুম—কাছারি থেকে ফিরতে অনেক দেরি হত। বোট ওপারে বালির চরের কাছে বাঁধা থাকত—ছোট জেলেডিঙি চড়ে নিস্তব্ধ নদীটি পার হতুম—তখন এই সন্ধ্যাটি সুগভীর অথচ সুপ্রসন্নমুখে আমার জন্তে অপেক্ষা করে থাকত। এখানকার প্রকৃতির সঙ্গে সেই আমার একটি মানসিক ঘরকন্নার সম্পর্ক। জীবনের যে গভীরতম অংশ সর্কদা মৌন এবং সর্কদা গুপ্ত, সেই অংশটি আস্তে আস্তে বের হয়ে এসে এখানকার অনাবৃত সন্ধ্যা এবং অনাবৃত মধ্যাহ্নের মধ্যে নীরবে এবং নির্ভয়ে সঞ্চরণ করে বেড়িয়েছে ;—এখানকার দিনগুলো তার সেই অনেক দিনের পদচিহ্নের দ্বারা যেন অঙ্কিত।

নদী একেবারে কানায় কানায় ভরে এসেছে। ওপারটা প্রায় দেখা যায় না। জল এক এক জায়গায় টগ বগ করে ফুটে, আবার এক এক জায়গায় কে যেন অস্থির জলকে দুইহাত দিয়ে চেপে চেপে সমান করে মেলে দিয়ে যাচ্ছে। আজ দেখতে পেলুম ছোট একটি মৃতপাখী ব্রোতে ভেসে আসচে—ওর মৃত্যুর ইতিহাস বেশ বোঝা যাচ্ছে। কোন এক গ্রামের ধারে বাগানের আশ্রয়স্থায় ওর বাসা ছিল। সম্ভাব্য সময় বাসায় ফিরে এসে সঙ্গীদের নরম নরম গরম ডানাগুলির সঙ্গে পাখা মিলিয়ে প্রান্তদেহে ঘুমিয়ে ছিল। হঠাৎরাতে পদ্মা একটুখানি পাশ ফিরেছেন অমনি গাছের নীচেকার মাটি ধসে পড়ে গেছে—নীড়চ্যুত পাখী হঠাৎ এক মুহূর্তের অন্তরে জেগে উঠল তারপরে আর তাকে জাগতে হল না। আমি যখন মফস্বলে থাকি তখন একটি বৃহৎ সর্বগ্রাসী রহস্যময়ী প্রকৃতির কাছে নিজের সঙ্গে অল্প জীবের প্রভেদ অকিঞ্চিৎকর বলে উপলব্ধি হয়। সহরে মনুষ্যসমাজ অত্যন্ত প্রধান হয়ে ওঠে—সেখানে সে নিষ্ঠুরভাবে আপনায় সুখদুঃখের কাছে অল্প কোনো প্রাণীর সুখদুঃখ গণনার মধ্যেই আনে না। যুরোপেও মানুষ এত জটিল ও এত প্রধান যে তারা জন্তকে বড় বেশি জন্ত মনে করে। ভারতবর্ষীয়েরা মানুষ থেকে জন্ত ও জন্ত থেকে মানুষ হওয়ারটাকে কিছুই মনে করে না এইজন্য আমাদের শাস্ত্রে সর্বভূতে দয়াটা একটা অসম্ভব আতিশয্য বলে পরিত্যক্ত হয়নি। মফস্বলে বিশ্বপ্রকৃতির সঙ্গে দেহে দেহে ঘনিষ্ঠ সংস্পর্শ হলে সেই আমার ভারতবর্ষীয় স্বভাব জেগে ওঠে। একটি পাখীর সুকোমল পালকে আশ্রিত স্পন্দমান ক্ষুদ্র বকটুকুর মধ্যে জীবনের আনন্দ যে কত প্রবল তা আর আমি অচেতনভাবে ভুলে থাকতে পারিনি।

১০ই আগস্ট, ১৮৯৪।

কাল খানিকরায়ে জলের শব্দে আমার ঘুম ভেঙে গেল। নদীর মধ্যে হঠাৎ একটা তুমুল কল্লোল এবং প্রবল চঞ্চলতা উপস্থিত হয়েছে। বোধ হয়, অকস্মাৎ একটা নতুন জলের স্রোত এসে পড়েছে। রোজই প্রায় এই রকম ব্যাপার ঘটে। বসে আছি-আছি, হঠাৎ দেখতে পাই নদী ছলছল কল্কল করে জেগে উঠেছে, আর সবজন্ম খুব একটা ধুমধাম পড়ে গেছে। বোটের তক্তার উপর পা রাখলে বেশ স্পষ্ট বোঝা যায় তার নীচে দিয়ে কতরকমের বিচিত্রশক্তি অবিশ্রাম চলে; খানিকটা কাঁপচে, খানিকটা টলচে, খানিকটা ফুলচে, খানিকটা আছাড়খেরে পড়চে—ঠিক যেন আমি সমস্ত নদীর নাড়ির স্পন্দন অনুভব করছি। কাল অর্ধেক রাতে হঠাৎ একটা চঞ্চল উচ্ছ্বাস এসে নাড়ির নৃত্য অত্যন্ত বেড়ে উঠেছিল। আমি অনেকক্ষণ জানলার ধারে বেষ্ট্রের উপর বসে রইলুম। খুব একরকম ঝাপসা আলো ছিল—তাতে করে সমস্ত উতলা নদীকে আরো যেন পাগলের মত দেখাচ্ছিল। আকাশে মাঝে মাঝে মেঘ। একটা খুব জ্বলজ্বলে মস্ত তারার ছায়া দীর্ঘতর হয়ে জলের মধ্যে অনেকদূর পর্যন্ত একটা জ্বালাময় বিদ্র বেননার মত ধরধর করে কাঁপছিল। নদীর দুইতীর অস্পষ্ট আলোকে এবং গাঢ় নিদ্রায় আচ্ছন্ন অচেতন। মাঝখান দিয়ে একটা নিদ্রাহীন উন্নত অধীরতা ভরপুরবেগে একেবারে নিরুদ্ধ হয়ে চলেছে। অর্ধেক রাতে ঐরকম দৃশ্যের মধ্যে জেগে উঠে বসে থাকলে আপনাকে এবং জগৎকে কি এক নতুন রকমের মনে হয়—দিনের বেলাকার লোকসংসর্গের জগৎটা মিথ্যা হয়ে যায়। আবার আজ সকালে উঠে আমার সেই গভীর রাত্রের জগৎ স্বপ্নের মত কত দূরবর্তী এবং লঘু হয়ে গেছে। মানুষের পক্ষে ছোটোই সত্য অথচ ছোটোই বিবম স্বভাব। আমার মনে হয় দিনের জগৎটা যুরোপীয় সঙ্গীত—মূরে বেমূরে খণ্ডে অংশে মিলে একটা গতিশীল প্রকাণ্ড হান্সনির জটলা। আর রাত্রের জগৎটা আমাদের ভারতবর্ষীয়

সঙ্গীত—একটি বিশুদ্ধ করুণ গম্ভীর অমিশ্ররাগিণী। ছোটোই আমাদের বিচলিত করে অথচ ছোটোই পরম্পর বিরোধী। কি করা যাবে! প্রকৃতির গোড়ায় একটা বিধা একটা বিরোধ আছে;—রাজা এবং রাণীর মধ্যে সমস্ত বিভক্ত। দিন এবং রাত্রি, বিচিত্র এবং অখণ্ড, পরিব্যক্ত এবং অনাদি। আমরা ভারতবর্ষীয়েরা সেই রাত্রির-রাজত্বে থাকি—আমরা অখণ্ড অনাদির দ্বারা অভিভূত। আমাদের নির্জন এককের গান, যুরোপের সজ্জন লোকালয়ের সঙ্গীত। আমাদের গানে শ্রোতাকে মল্লধ্বজের প্রতিদিনের স্তম্ভস্থলের সীমা থেকে বের করে নিয়ে নিখিলের মূলে যে একটি সঙ্গীতীন বৈরাগ্যের দেশ আছে সেইখানে নিয়ে যায়—আর যুরোপের সঙ্গীত মল্লধ্বজের স্তম্ভস্থলের অনন্ত উত্থানপতনের মধ্যে বিচিত্রভাবে নৃত্য করিয়ে নিয়ে চলে।



অহমিকার প্রভাবেই যে নিজের কথা বলতে চাই তা নয়। যেটা যথার্থ চিন্তা করব, যথার্থ অনুভব করব, যথার্থ প্রাপ্ত হব, যথার্থরূপে তাকে প্রকাশ করে তোলাই তার স্বাভাবিক পরিণাম। ভিতরকার একটা শক্তি ক্রমাগতই সেইদিকে কাজ করচে। অথচ সে শক্তিটা যে আমারই তা মনে হয় না—সে একটা জগৎব্যাপ্ত শক্তি। নিজের কাজের মাঝখানে নিজের আয়ত্তের বহির্ভূত আর একটি পদার্থ এসে তারই স্বভাবমত কাজ করে। সেই শক্তির হাতে আত্মসমর্পণ করাই জীবনের আনন্দ। সে যে কেবল প্রকাশ করায় তা নয়, সে অনুভব করায়, ভালবাসায়, সেইজন্তে অনুভূতি নিজের কাছে প্রত্যেকবার নূতন ও বিশ্বয়জনক। নিজের শিশু কথাকে যখন ভাললাগে তখন সে বিশ্বের মূল রহস্য মূল সৌন্দর্যের অন্তর্ভুক্ত হয়ে পড়ে—এবং স্নেহউচ্ছ্বাস উপাসকের মত হয়ে আসে। আমার বিশ্বাস আমাদের প্রীতিমাত্রই রহস্যময়ের পূজা; কেবল সেটা আমরা অচেতনভাবে করি। ভালবাসামাত্রই আমাদের ভিতর দিয়ে বিশ্বের অন্তরতম একটা শক্তির সজাগ আবির্ভাব,—যে নিত্য আনন্দ নিখিল জগতের মূলে সেই আনন্দের ক্ষণিক উপলব্ধি। নইলে ওর কোনো অর্থই থাকে না। বিশ্বজগতে সর্বব্যাপী আকর্ষণশক্তি যেমন—ছোটবড় সর্বত্রই তার যেমন কাজ, অন্তরজগতে সেই রকম একটা বিশ্বব্যাপী আনন্দের আকর্ষণ আছে। সেই আকর্ষণেই আমরা বিশ্বের মধ্যে সৌন্দর্য্য ও হৃদয়ের মধ্যে প্রেম অনুভব করি,—জগতের ভিতরকার সেই অনন্ত আনন্দের ক্রিয়া আমাদের মনের ভিতরেও কার্য্য করে। আমরা সেটাকে যদি বিচ্ছিন্নভাবে দেখি তবে তার যথার্থ কোনো অর্থ থাকে না। প্রকৃতির মধ্যে মানুষের মধ্যে আমরা কেন আনন্দ পাই তার একটিমাত্র সহজত্তর হচ্ছে, আনন্দাক্ষেপে ধর্ম্মমানি ভূতানি জায়ন্তে।

এখন স্তরপক্ষ কিনা—বেড়াবার সময় চমৎকার জ্যোৎস্না পাই। আমার দক্ষিণে সুবিস্তীর্ণ মাঠ, মাঝে মাঝে আউষ ধান, একপ্রান্ত দিয়ে একটি সঙ্কীর্ণ মেঠো রাস্তা, সম্মুখে পূর্বদিকে হাটের গোলাঘর, সামনে শুপাকার খড় জমা রয়েছে—জ্যোৎস্নায় সমস্ত ছবির মত দেখাচ্ছে। সন্ধ্যাবেলাটি আমার মাথার উপর, আমার চোখের সামনে, আমার পায়ের তলার, আমার চতুর্দিকে এমন সুন্দর, এমন শান্তিময়, এমন মাছুষটির মত নিবিড়ভাবে আমার নিকটবর্তী হয়ে আসে যে, আকাশের নক্ষত্রলোক থেকে আর পদ্মার সুদূর ছায়ায় তীররেখা পর্যন্ত সমস্তটি একটি নিভৃত গোপন গৃহের মত ছোট হয়ে ঘিরে দাঁড়ায়—আমার মধ্যে যে ছুটি প্রাণী আছে, বাইরের আমি, এবং আমার অন্তঃপুরবাসী আত্মা এই ছুটিতে মিলে সমস্ত ঘরটি দখল করে বসে থাকি—এই দৃশ্যের মধ্যগত সমস্ত পশুপক্ষী প্রাণী আনাদের অন্তর্গত হয়ে যায়—কানে জলের কলশঙ্গ আদতে থাকে, মুখের উপর মাথার উপর জ্যোৎস্নার শুভ্র হস্ত আদরের স্পর্শ করতে থাকে, আকাশে চকোর পাখী ডেকে চলে যায়, জেলের নৌকো পদ্মার মাঝখানে খরস্রোতের উপর দিয়ে বিনা চেষ্টায় অনায়াসে পিছলে বহে যেতে থাকে, আকাশব্যাপী স্নিগ্ধরাজি আমার রোমে রোমে প্রবেশ করে ধীরে ধীরে উত্তাপ জুড়িয়ে দেয়—চোখ বুজে কান পেতে দেহ প্রসারিত করে প্রকৃতির একমাত্র যত্নের জিনিষের মত পড়ে থাকি, তার সহস্র সহচরী আমার সেবা করে। মনের কল্পনাও তার ছুটি হস্তে থালা সাজিয়ে আমার পাশে এসে দাঁড়ায়—মুহুমন্দ বাতাসের সঙ্গে তার কোমল অঙ্গুলির স্পর্শ আমার চুলের মধ্যে অনুভব করি।

এবারে আমার সঙ্গে আমি রাঘমোহন রায়ের বাংলা গ্রন্থাবলী এনেছি। তাতে ঋতি তিনেক সংস্কৃত বেদান্তগ্রন্থ ও তার অনুবাদ আছে। তার থেকে আমার অনেক সাহায্য হয়েছে। বেদান্তপাঠে বিশ্ব এবং বিশ্বের আদিকারণ সম্বন্ধে অনেকেই নিসংশয় হয়ে থাকেন কিন্তু আমার সংশয় দূর হয় না। এক হিসাবে অল্প অনেক মত অপেক্ষা বেদান্তমত সরল। সৃষ্টি ও সৃষ্টিকর্তা কথাটা শুনতে সহজ কিন্তু অর্থন সমস্ত আর নেই। বেদান্ত তারি একেবারে গর্ভান-গ্রাসি ছেদন করে বসে আছেন—সমস্যাটাকে একেবারে আধখানা ছেঁটেই ফেলেছেন। সৃষ্টি একেবারেই নেই, আমরাও নেই, আছেন কেবল ব্রহ্ম, আর মনে হচ্ছে যেন আমরা আছি। আশ্চর্য্য এই মানুষ মনে একথা স্থান দিতে পারে, আরও আশ্চর্য্য এই কথাটা শুনতে যত অসঙ্গত আসলে তা নয়—বস্তুত কিছুই যে আছে সেইটে প্রমাণ করাই শক্ত। যাই হোক আজকাল সন্ধ্যাবেলায় যখন জ্যোৎস্না ওঠে এবং আমি যখন অর্ধনিম্নলিত চোখে বোটের বাইরে কেদারায় পা ছড়িয়ে বসি, স্নিগ্ধ সমীরণ আমার চিন্তাক্রান্ত তপ্ত ললাট স্পর্শ করতে থাকে তখন এই জলস্থল আকাশ, এই নদীকল্লোল, ডাঙার উপর দিয়ে কদাচিৎ একআধজন পখিক ও জলের উপর দিয়ে কদাচিৎ একআধখানা জেলেডিঙির গতায়াত, জ্যোৎস্নালোকে অপরিষ্কৃত মাঠের প্রান্ত, দূরে অন্ধকারজড়িত বনবেষ্টিত স্তম্ভপ্রায় গ্রাম, সমস্তই ছায়ারই মত মায়ারই মত বোধ হয় অথচ সে মায়ী সত্যের চেয়ে বেশি সত্য হয়ে জীবনমনকে জড়িয়ে ধরে, এবং এই মায়ার হাত থেকে পরিভ্রাণ পাওয়াই যে মুক্তি এ কথা কিছুতেই মনে হয় না। দার্শনিক বলতে পারেন, জগৎটাকে সত্যজ্ঞান করাতে দিনের বেলায় যে একটা দৃঢ় বন্ধনজাল থাকে সন্ধ্যাবেলায় সমস্ত ছায়াময় ও সৌন্দর্য্যময় হয়ে আসতে সেই বন্ধন অনেকটা পরিমাণে শিথিল হয়ে আসে। যখন জগৎটাকে একেবারে নিছক মায়ী বলেই নিশ্চয় জানুব তখন মুক্তির বাধা থাকবে না। এ কথাটা আমি অতি জী—বৎ অমুমান এবং অমুভব করতে পারি—হয়ত কোন্-দিন দেখব বুদ্ধবয়সের পূর্বে আমি জীবমুক্ত হয়ে বসে আছি।



কুষ্টিয়ার পথে,

২৪ শে আগস্ট, ১৮৯৪।

পদ্মাকে এখন খুব জীকালো দেখতে হয়েছে—একেবারে বুক ফুলিয়ে চলেছে—
 উপায়টা একটিমাত্র কাজলের নীলরেখার মত দেখা যায়। আমি এই জলের দিকে
 চেরে চেরে ভাবি, বস্তু থেকে বিচ্ছিন্ন করে নিয়ে গতিটাকে যদি কেবল গতিভাবেই
 উপলব্ধি করতে ইচ্ছা করি তাহলে নদীর স্রোতে সেটি পাওয়া যায়। মানুষ পশুর
 মধ্যে যে চলাচল তাতে খানিকটা চলা খানিকটা না চলা, কিন্তু নদীর আগাগোড়াই
 চলচে; সেই জন্যে আমাদের মনের সঙ্গে আমাদের চেতনার সঙ্গে তার একটা সাদৃশ্য
 পাওয়া যায়। আমাদের শরীর আংশিকভাবে পদচালনা করে, অঙ্গচালনা করে,
 আমাদের মনটার আগাগোড়াই চলেছে। সেই জন্যে এই ভাদ্রমাসের পদ্মাকে একটা
 প্রবল মানসশক্তির মত বোধ হয়—সে মনের ইচ্ছার মত ভাঙচে চুরচে এবং চলেছে,—
 মনের ইচ্ছার মত সে আপনাকে বিচিত্র তরঙ্গভঙ্গে এবং অক্ষুট কলসঙ্গীতে নানাপ্রকারে
 প্রকাশ করবার চেষ্টা করচে। বেগবান একাগ্রগামিনী নদী আমাদের ইচ্ছার মত
আর বিচিত্র শস্যশালিনী স্থির ভূমি আমাদের ইচ্ছার সামগ্রীর মত।

আমাদের বোট ছেড়ে দিয়েছে। তীরটা এখন বামে পড়েছে। খুব নিবিড়
 প্রচুর সরস সবুজের উপর খুব ঘননীল সজল মেঘরাশি মাতৃস্নেহের মত অবনত হয়ে
 রয়েছে। মাঝে মাঝে গুরুগুরু মেঘ ডাকচে। বৈষ্ণব পদাবলীতে বর্ষার বহুনা বর্ণনা
 মনে পড়ে। প্রকৃতির অনেক দৃশ্যই আমার মনে বৈষ্ণব কবির ছন্দবন্ধার এনে
 দেয়। তার প্রধান কারণ এই প্রকৃতির সৌন্দর্য্য আমার কাছে শূন্য সৌন্দর্য্য নয়—
 এর মধ্যে একটি চিরন্তন হৃদয়ের লীলা অভিনীত হচ্ছে—এর মধ্যে অনন্ত বৃন্দাবন।
 বৈষ্ণব পদাবলীর মর্মের ভিতর যে প্রবেশ করেছে, সমস্ত প্রকৃতির মধ্যে সে বৈষ্ণব
 কবিতার ধ্বনি শুনতে পায়।



অনেককাল বোটের মধ্যে বাস করে হঠাৎ সাহাজাদপুরের বাড়িতে এসে উত্তীর্ণ হলে বড় ভাললাগে। বড় বড় জানলাদরজা—চারিদিক থেকে আলো বাতাস আসচে—যেদিকে চেয়ে দেখি সেই দিকেই গাছের সবুজ ডালপালা চোখে পড়ে এবং পাখীর ডাক শুনতে পাই; দক্ষিণের বাবান্দার কেবলমাত্র কামিনীকুলের গন্ধে মস্তিষ্কের সমস্ত রক্ত পূর্ণ হয়ে ওঠে। হঠাৎ বুঝতে পারি এতদিন বৃহৎ আকাশের জন্যে ভিতরে ভিতরে একটা ক্ষুধা ছিল সেটা এখানে এসে পেটভরে পূর্ণ করে নেওয়া গেল। আমি চারটি বৃহৎবরের একলা মালিক—সমস্ত দরজাগুলি খুলে বসে থাকি। এখানে যেমন আমার মনে লেখবার ভাব ও ইচ্ছা আসে এমন কোথাও না। বাইরের জগতের একটা সজীব প্রভাব ঘরে অবাধে প্রবেশ করে, আলোতে তাকালে বাতাসে শব্দে গন্ধে সবুজ হিলোলে এবং আমার মনের নেশায় মিশিয়ে কত গল্পের ছাঁচ তৈরি হয়ে ওঠে। বিশেষত এখানকার ছপূরবেলাকার মধ্যে একটা নিবিড় মোহ আছে। রৌদ্রের উত্তাপ, নিস্তব্ধতা, নিঃশব্দতা, পাখীদের, বিশেষত, কাকের ডাক, এবং কুম্ভীর সুদীর্ঘ অবসর—সবস্বত্ব আমাকে উদাস করে দেয়। কেন জানিনে, মনে হয়, এই রকম সোনালি রৌদ্রেরা ছপূরবেলা দিয়ে আরব্যউপন্যাস তৈরি হয়েছে—অর্থাৎ সেই পারস্য এবং আরব্যদেশ, দামাস্ক, সমরকন্দ, বুখারা—আঙুরের গুচ্ছ, গোলাপের বন, বুলবুলের গান, শিরাজের মদ,—মরুভূমির পথ, উটের সার, ঘোড়-সওয়ার পথিক, ঘনখেজুরের ছায়ায় স্বচ্ছজলের উৎস,—নগরের মাঝে মাঝে চাঁদোয়া-খাঁটানো সজীব বাজারের পথ, পথের প্রান্তে পাগড়ি এবং ঢিলে কাপড়পরী দোকানী খন্দুজ এবং মেওয়া বিক্রি করচে; পথের ধারে বৃহৎ রাজপ্রাসাদ, ভিতরে ধূপের গন্ধ, জানলার কাছে বৃহৎ তাকিয়া এবং কিংখাব বিছানো; জরির চটি, ফুলো পায়জামা এবং রঙিন কাঁচলি পরা আমিনা জোবেদি স্ত্রী, পাশে পারের কাছে কুতলায়িত গুড়গুড়ির

নল গড়াচ্ছে, দরজার কাছে জমকালো কাপড়পর্য্য কাণো হাব্বি পাহারা দিচ্ছে, এবং এই রহস্যপূর্ণ অপরিচিত সূদূর দেশে, এই ঐশ্বর্য্যময় সৌন্দর্য্যময় ভয়ভীষণ বিচিত্র প্রাসাদে, মাহুঘের হাসিকান্না আশাআকাজ্জা নিয়ে কত শতসহস্ররকমের সম্ভব অসম্ভব গল্প তৈরি হচ্ছে। আমার এই সাজানপুরের দুপুরবেলা গল্পের দুপুরবেলা। মনে আছে ঠিক এই সময়ে এই টেবিলে বসে আপনার মনে ভোর হয়ে পোষ্টমাষ্টার গল্পটা লিখেছিলুম। আমিও লিখছিলাম এবং আমার চারদিকের আলো, বাতাস ও তরুশাখার কম্পন তাদের ভাষা যোগ করে দিচ্ছিল। এই রকম চতুর্দিকের সঙ্গে সম্পূর্ণ মিশে গিয়ে নিজের মনের মত একটা কিছু রচনা করে যাওয়ার যে সুখ তেমন সুখ জগতে খুব অল্পই আছে। আজ সকালে বসে “ছড়া” সম্বন্ধে একটা লেখা লিখতে প্ররক্ত হয়েছিলুম—বড় ভাল লাগছিল। ছড়ার রাজ্যে আইনকানুন নেই, মেঘরাজ্যের মত। দুর্ভাগ্যক্রমে যে রাজ্যেই থাকি আইনকানুনের বৈষয়িক রাজ্যকে বাধা দেবার জো নেই; আমার লেখার মাঝখানে তারই একটা উপদ্রব উপস্থিত হল—আমার মেঘের ইমারৎ উড়িয়ে দিলে। এইসব ব্যাপারে আহারের সময় এসে পড়ল। দুপুরবেলার পেটভরে খাওয়ার মত এমন জড়হজনক আর কিছুই নেই। আমরা বাঙালীরা কসে মধ্যাহ্নভোজন করি বলেই মধ্যাহ্নটাকে হারাই। দরজা বন্ধ করে তামাক খেতে খেতে পান চিবতে চিবতে পরিতৃপ্ত নিজার আয়োজন হতে থাকে, তাতেই আমরা বেশ চিকচিকে গোলগাল হয়ে উঠি। অথচ বাংলাদেশের বৈচিত্র্যহীন সূদূরপ্রসারিত সমতল শস্যক্ষেত্রের মধ্যে জনহীন শান্ত মধ্যাহ্ন যেমন গভীর-ভাবে বৃহৎ ভাবে বিস্তীর্ণ হতে পারে এমন আর কোথাও না।

ভাদ্রমাসের দিন, বাতাস বেশি নেই ; বোটের শিথিল পাল ঝুলে ঝুলে পড়চে— নৌকাটি আলস্যমহুরগমনে অত্যন্ত উদাসীনের মত চলছে। এই শৈবালবিকীর্ণ সুবিস্তীর্ণ জলরাজ্যের মধ্যে শরতের উজ্জ্বল রোদ্রে আমি জানালায় কাছে এক চৌকিতে বসে আরএক চৌকির উপরে পা দিয়ে সমস্ত বেলা কেবল গুন্ গুন্ করে গান করছি। রামকেলী প্রভৃতি সকালবেলাকার সুরের একটু আভাস লাগাবামাত্র এমন একটি বিশ্বব্যাপী করুণা বিগলিত হয়ে চারিদিকে বাষ্পাকুল করচে যে এই সমস্ত রাগিণীকে সমস্ত আকাশের সমস্ত পৃথিবীর নিজের গান বলে মনে হচ্ছে। এ একটা ইজ্জতাল, একটা মারামন্ত্র। আমার এই গুন্ গুন্ গুঞ্জরিত সুরের সঙ্গে কত টুকরো টুকরো কথা যে আমি জুড়ি তার সংখ্যা নেই। এমন একলাইনের গান সমস্তদিন কত জম্চে এবং কত বিসর্জন দিচ্ছি। এই চৌকিটাতে বসে আকাশ থেকে সোনালি রোদুরটুকু চোখ দিয়ে চাখতে চাখতে এবং জলের উপরকার শৈবালের সরস কোমলতার উপর মনটাকে বুলিয়ে চলতে চলতে যতটুকু অনায়াস আগম্যভরে আপনি মাথায় এসে পড়ে তার বেশি চেষ্টা করা আপাতত আমার সাধ্যাতীত। আজ সমস্ত সকাল নিভাস্ত সাদাসিধা রামকেলীতে যে গোটা দুইতিন ছত্র বারবার আবৃত্তি করেছিলাম সেটুকু মনে আছে—নয়ুনাবরণ উকৃত করে দিলুম :—

ওগো তুমি নবনবরূপে এস প্রাণে !—(আমার নিতানব)

এস গন্ধেবরণেগানে !

আমি যেদিকে নিরখি তুমি এসহে

আমার মুগ্ধমুদিত নয়ানে ।

— ০ —

বড় বড় গাছ জলের মধ্যে সমস্ত গুঁড়িটি ডুবিয়ে দিয়ে শাখা প্রশাখা জলের উপর অবনত করে দিয়ে দাঁড়িয়ে আছে। আম গাছ বটগাছের অন্ধকার জঙ্গলের ভিতর নৌকা বাঁধা, এবং তারি মধ্যে প্রচ্ছন্ন হয়ে গ্রামের লোকেরা স্নান করচে। এক একটি কুঁড়েঘর স্রোতের মধ্যে দাঁড়িয়ে রয়েছে—তার চারপাশের প্রাঙ্গণ জলমগ্ন। ধানের ক্ষেতের ভিতর দিয়ে বোট সরসর শব্দে যেতে যেতে হঠাৎ কোনো জলাশয়ের মধ্যে গিয়ে পড়ে—সেখানে নাগবনের মধ্যে শাদা শাদা নালফুল ফুটে আছে—পানকৌড়ি জলের ভিতর ডুব দিয়ে দিয়ে মাছ ধরচে। জল যেখানে সুবিধা পাচ্ছে প্রবেশ করচে—জলের এমন পরাভব আর কোথাও দেখা যায় না। আর একটু জল বাড়লেই ঘরের ভিতরে জল প্রবেশ করবে, তখন মাচা বেঁধে তার উপরে বাস করতে হবে; গরুগুলো দিনরাত একহাঁটু জলের মধ্যে দাঁড়িয়ে দাঁড়িয়ে মরবে; রাজ্যের শাপ জলমগ্ন মর্ত্ত ত্যাগ করে ঘরের চালে আশ্রয় নেবে এবং যেখানকার যত গৃহহীন কীটপতঙ্গ সরীসৃপ মাছুষের সহবাস গ্রহণ করবে। যখন গ্রামের চারিদিকের জঙ্গলগুলো জলে ডুব পাতালতাগুন্ডে পচতে থাকে, গোয়ালঘর ও লোকালয়ের বিবিধ আবর্জনা চারিদিকে ভেসে বেড়ায়, পাট পচামির গন্ধে বাতাস ভারাক্রান্ত, উলঙ্গ পেটমোটা পা-সঙ্গ রুম ছেলে-মেয়েরা যেখানেসেখানে জলেকাদায় মাথামাখি কাঁপাকাঁপি করতে থাকে—মশার ঝাঁক স্থির জলের উপর একটি বাষ্পস্তরের মত ঝাঁক বেঁধে ভেসে বেড়ায়; গৃহস্থের মেয়েরা ভিজ়ে শাড়ি গায়ে জড়িয়ে বাদলার ঠাণ্ডা হাওয়ায় হৃষ্টির জলে ভিজ়তে ভিজ়তে হাঁটুর উপর কাপড় তুলে জল ঠেলে ঠেলে সহিষ্ণু জন্তুর মত ঘরকন্নার নিষ্ঠাকর্ম্ম করে যায় তখন সে দৃশ্য কোনোমতেই ভাল লাগে না। ঘরে ঘরে বাতে ধরচে, পা ফুলচে, সর্দি হচ্ছে, জ্বরে ধরচে, পিলেওয়াল ছেলেরা অবিশ্রাম কাঁদচে, কিছুতেই কেউ তাদের বাঁচাতে পারচে না—এত অবহেলা, অস্বাস্থ্য, অসৌন্দর্য্য, দারিদ্র্য্য, মাছুষের বাসস্থানে কি এক মুহূর্ত্ত সহ্য হয়? সকল রকম শক্তির কাছেই আমরা হাল ছেড়ে দিয়ে বসে আছি। প্রকৃতি উপদ্রব করে তাও সঙ্গে থাকি, রাজা উপদ্রব করে তাও সহ্য, শাস্ত্র চিরদিন ধরে যে সকল উপদ্রব করে আস্চে তার বিরুদ্ধেও কথ্যটি বলতে সাহস হয় না।

যখন ভেবে দেখি এ জীবনে কেবলমাত্র ৩২টি শরৎকাল এসেছে এবং গেছে তখন ভারি আশ্চর্য্য বোধ হয়। অথচ মনে হয় আমার স্মৃতিপথ ক্রমশই অস্পষ্টতর হয়ে অনাদিকালের দিকে চলে গেছে এবং এই বৃহৎ মানসরাজ্যের উপর যখন মেঘযুক্ত সূর্যের প্রভাতের রৌদ্রটি এসে পড়ে তখন আমি যেন আমার এক মায়াক্টালিকার বাতায়নে বসে এক সূদূর বিস্তৃত ভাবরাজ্যের দিকে একদৃষ্টে চেয়ে থাকি এবং আমার কপালে যে বাতাসটি এসে লাগতে থাকে সে যেন অতীতের সমস্ত অস্পষ্ট স্মৃতি গুরুপ্রবাহ বহন করে আনতে থাকে। আমি আলো ও বাতাস এত ভাগবাসি! গেটে মরবার সময় বলেছিলেন—More light—আমার যদি সে সময়ে কোনো ইচ্ছা প্রকাশ করবার থাকে ত আমি বলি More light and more space! অনেকে বাংলা দেশকে সমতলভূমি বলে আপত্তি প্রকাশ করে—কিন্তু সেই জন্যই এ দেশের জাঠের দৃশ্য নদীতীরের দৃশ্য আমার এত বেশি ভাগ লাগে। যখন সন্ধ্যার আলোক এবং সন্ধ্যার শান্তি উপর থেকে নামতে থাকে তখন সমস্ত অনবরুদ্ধ আকাশটি একটি নীলকান্তমণির পেয়ালার মত আগাগোড়া পরিপূর্ণ হয়ে উঠতে থাকে; যখন স্তিমিত শান্ত নীরব মধ্যাহ্ন তার সমস্ত সোনার ঝাঁটসটি বিছিয়ে দেয় তখন কোথাও সে বাধা পায় না—চেয়ে চেয়ে দেখবার এবং দেখে দেখে মনটা ভরে নেবার এমন জায়গা আমার কোথায় আছে!

আমি অনেক সময় ভেবে দেখেছি সুখী হলাম কি দুঃখী হলাম সেইটে আমার পক্ষে শেব কথা নয়। আমাদের অন্তরতম প্রকৃতি সমস্ত সুখদুঃখের ভিতরে নিজের একটা প্রসার অনুভব করতে থাকে। আমাদের কণিক জীবন এবং চিরজীবন দুটো একত্র সংলগ্ন হয়ে আছে মাত্র কিন্তু দুটো এক নয় এ আমি স্পষ্ট উপলব্ধি করি। আমাদের কণিক জীবনই সুখ-দুঃখ ভোগ করে, আমাদের চিরজীবন সেই সুখ দুঃখ নেয় না, তার থেকে একটা তেজ সঞ্চয় করে। গাছের পাতা প্রতিদিন রোদে প্রসারিত হয়ে শুক হয়ে ঝরে যাচ্ছে, আবার নতুন পাতা গজাচ্ছে; গাছের কণিক জীবন কেবল রোদ ভোগ করচে এবং সেই উত্তাপেই শুকিয়ে পড়ে যাচ্ছে, আর গাছের চিরজীবন তার ভিতর থেকে দাহহীন চির অগ্নি সঞ্চয় করচে। আমাদেরও প্রতিদিনের প্রতিমুহূর্তের পল্লববাশি চতুর্দিকে প্রসারিত হয়ে জগতের সমস্ত প্রবহমান সুখ দুঃখ ভোগ করচে এবং সেই সুখ দুঃখের উত্তাপেই শুক হয়ে দৃঢ় হয়ে ঝরে ঝরে পড়ে যাচ্ছে কিন্তু আমাদের চিরজীবনকে সেই প্রতিমুহূর্তের দাহ স্পর্শ করতে পারচেনা অথচ তার তেজটুকু সে ক্রমাগতই গ্রহণ করচে। যে মাহুষের প্রতিমুহূর্তের সুখদুঃখ ভোগশক্তি সামান্য, তার দাহও অল্প, তেমনি তার চিরপ্রাণের সঞ্চয়ও অকিঞ্চিৎকর। সুখদুঃখের তাপ থেকে সংরক্ষিত হয়ে তাদের কণিক জীবনটা অনেকদিন স্থির থাকে, তারা অচেতনতার আবরণে কণিককে অপেক্ষাকৃত স্থায়ী করে রাখে; দুদিনকে এমনি তাজা রেখে দেয় যে হঠাৎ মনে হয় তা চিরদিনের; সংসারের সামান্য ব্যাপারকে এমনি করে তোলে যেন তা অসামান্য।

আমরা যখন খুব বড় রকমের একটা আত্মবিসর্জন করি তখন কেন করি? একটা মহৎ আবেগে আমাদের কণিক জীবনটা আমাদের থেকে বিচ্ছিন্ন হয়ে যায় তার সুখদুঃখ আমাদের আর স্পর্শ করতে পারে না। আমরা হঠাৎ দেখতে পাই আমরা আমাদের সুখদুঃখের চেয়ে বড়, আমরা প্রতিদিনের তুচ্ছবন্ধন থেকে মুক্ত। সুখের চেষ্টা এবং দুঃখের পরিহার, এই আমাদের কণিকজীবনের প্রধান নিয়ম কিন্তু এক একটা সময় আসে যখন আমরা আবিষ্কার করতে পারি যে, আমাদের ভিতরে এমন একটি জায়গা আছে যেখানে সে নিয়ম খাটে না। তখন আমরা আমাদের কণিক জীবনটাকে পরাভূত করেই একটা আনন্দ পাই, দুঃখকে গলার হার করে নিয়েই মনে উল্লাস জন্মায়। তখন মনে হয় অন্তরের সেই স্বাধীন পুরুষের বলেই সুখদুঃখের ভিতর দিয়ে চিরকাল আমি আমার প্রকৃতির সফলতাসাধন করব। কিন্তু আবার চারিদিকের সংসারের জনতা, প্রতিদিনের ক্ষুধাতৃষ্ণা, প্রবল হয়ে উঠে সেই অন্তরতম স্বাধীনতার ক্ষেত্রটিকে আমাদের চোখ থেকে ঢেকে ফেলে, তখন আত্মবিসর্জন সূকঠিন হয়ে ওঠে। আমি যখন একলা মঞ্চস্থলে থাকি তখন প্রকৃতির ভিতরকার আনন্দ আমার অন্তরের আনন্দনিকেতনের দ্বার খুলে দেয়; গানের সুরের দ্বারা গানের কথাগুলো যেমন অমরতাপ্রাপ্ত হয় তেমনি প্রাত্যহিক সংসারটা অন্তরের চিরানন্দরাগিণীর দ্বারা চিরমহিমা লাভ করে; আমাদের সমস্ত স্নেহপ্রীতির সম্বন্ধ একটি বিনম্র ধর্মোপাসনার ভাবে জ্যোতির্শ্রয় হয়ে ওঠে,—দুঃখবেদনার দুঃখ যে চলে যায় তা নয় কিন্তু সে যেন আমার নিজত্বের সঙ্কীর্ণ সীমা অতিক্রম করে এমন সুবৃহৎ আকাশে ব্যাপ্ত হয় যে সেখানে সে একটা সৌন্দর্য্য বিকিরণ করতে থাকে। এবার বোটে বসে আমি অন্তর্দ্বামী নামক একটি কবিতা লিখেছি তাতে আমি আমার অন্তরজীবনের কথা অনেকটা প্রকাশ করতে চেষ্টা করেছি।

আজ সকালের বাতাসে অতি ঈর্ষং শীতের সঞ্চার হয়েছে, একটুখানি শিউরে ওঠার মত। কাল দুর্গোৎসব; আজ তার সুন্দর সূচনা। ঘরে ঘরে দেশের লোকের মনে যখন একটা আনন্দ প্রবাহিত হচ্ছে তখন তাদের সঙ্গে আমার ধর্মসংস্কারের বিচ্ছেদ থাকে। সবেও সে আনন্দ মনকে স্পর্শ করে। পশুদিন স-র বাড়ি যাবার সময় দেখেছিলুম রাস্তার দুধারে প্রায় বড় বড় বাড়ির দালানমাত্রই প্রতিমা তৈরি হচ্ছে। দেখে আমার মনে হল, দেশের ছেলেবুড়ো সকলেই হঠাৎ দিনকয়েকের মধ্যে ছেলেমানুষ হয়ে উঠে একটা বড় গোছের খেলার লেগে গেছে। ভেবে দেখতে গেলে আনন্দের আরোজনমাত্রই পুতুলখেলা—অর্থাৎ তাতে আনন্দ ছাড়া আর কোনো উদ্দেশ্য নেই, লাভ নেই—বাইরে থেকে দেখে মনে হয় সময় নষ্ট। কিন্তু সমস্ত দেশের লোকের মনে যাতে একটা ভাবের আন্দোলন এনে দেয় তা কি কখনো নিষ্ফল হতে পারে? সমাজের মধ্যে কত লোক আছে যারা নীরস বিষয়ী-লোক—এই উৎসবে তাদেরও মন একটা সর্বব্যাপী ভাবের টানে বিচলিত হয়ে লোকের সঙ্গে মিলে যায়। এমনি করে প্রতিবৎসর কিছুকালের জন্য মনের এমন একটি অমূল্য আর্দ্র অবস্থা আসে যাতে স্নেহ প্রীতি দয়া সহজে অঙ্কুরিত হতে পারে; আগমনী বিজয়ার গান, প্রিয়স্মৃতি, নহবতের সুর, শরতের রোদ্র এবং আকাশের স্বচ্ছতা সমস্তটা মিলে মনের মধ্যে আনন্দকাব্য রচনা করে। ছেলেদের যে আনন্দ সেইটাই বিশুদ্ধ আনন্দের আদর্শ। তারা তুচ্ছ উপলক্ষ্যকে নিয়ে নিজের মন দিয়ে ভরে তোলে, সামান্য কদাকার পুতুল নিয়ে তাকে নিজের ভাব দিয়ে সুন্দর ও প্রাণ দিয়ে সজীব করে তোলে। এই ক্ষমতাটা যে লোক বড় বয়স পর্যন্ত রাখতে পারে সেইত ভাবুক। তার কাছে চারিদিকের বস্তু কেবল বস্তু নয়—কেবল দৃষ্টিগোচর বা শ্রুতিগোচর নয় কিন্তু ভাবগোচর—তার সমস্ত সঙ্গীর্ণতা এবং অসম্পূর্ণতা সে একটি সঙ্গীতের দ্বারা পূর্ণ করে নেয়। দেশের সমস্ত লোক ভাবুক হতেই পারে না কিন্তু এই রকম উৎসবের সময় ভাবপ্রোত অধিকাংশ লোকের মনকে অধিকার করে। তখন, যেটাকে দূরে থেকে সামান্য পুতুল বলে মনে হয়, কল্পনায় মগ্নিত হয়ে তার সে মূর্তি থাকে না।

আমাদের বা শ্রেষ্ঠ প্রকাশ সে আমরা কাউকে কেবল নিজের ইচ্ছা অনুসারে দিতে পারিনে। সে আমাদের আয়ত্তের অতীত, তা আমাদের দানবিক্রয়ের ক্ষমতা নেই। মূল্য নিয়ে বিক্রি করতে চেষ্টা করলেই তার উপকার আঁবরণটি কেবল পাওয়া যায়, আসল জিনিষটি হাত থেকে সরে যায়। নিজের বা মর্কোৎকৃষ্ট, কজনই বা তা নিজের ধরতে বা পৃথিবীতে রেখে যেতে পেরেছে? আমরা দৈবক্রমে প্রকাশিত হই, ইচ্ছা করলে চেষ্টা করলে প্রকাশিত হতে পারিনে। চব্বিশ ঘণ্টা যাদের কাছে থাকি তাদের কাছেও আপনাকে ব্যক্ত করা আমাদের মাধ্যম অতীত। কারো কারো এমন একটি অকৃত্রিম স্বভাব আছে, যে অন্যের ভিতরকার সত্যটিকে সে অত্যন্ত সহজেই টেনে নিতে পারে। সে তার নিজের গুণে। যদি কোনো লেখকের সব চেয়ে অভ্যর্থনের কথা তার চিঠিতে প্রকাশ পাচ্ছে তাহলে এই বুঝতে হবে যে বাক্যে চিঠি লেখা হচ্ছে তারো একটি চিঠি লেখাবার ক্ষমতা আছে।

কাল কেবল বিছানায় উপুড় হয়ে পড়ে একখানি ছোট কবিতা লিখেছি এবং একটি তিব্বতভ্রমণের বই পড়েছি। এরকম জায়গায় নভেল আমি ছুঁতে পারিনে। এই জনশূন্য মাঠের মধ্যে, শালবনের বেষ্টিনে, সমস্ত-দরজা খোলা জাজিমপাতা দোতলার একলা ঘরে, পাখীদের করুণকলধ্বনিপূর্ণ স্বপ্নাবেশময় শব্দমধ্যাহ্নে বিলাতি-নভেল কোনোমতেই থাপ থায় না। ভ্রমণবৃত্তান্তের একটা মস্ত সুবিধা এই যে তার মধ্যে অবিশ্রাম গতি আছে অথচ প্লটের বন্ধন নেই—মনের একটি অব্যবহৃত স্বাধীনতা পাওয়া যায়। এখানকার জনহীন মাঠের মাঝখান দিয়ে একটি রাস্তা রাস্তা চলে গেছে; সেই রাস্তা দিয়ে যখন দুইচার জন লোক কিছা দুটো একটা গোরুর গাড়ি মন্থর গমনে চলতে থাকে তার বড় একটা টান আছে;—মাঠ তাতে আরো যেন ধু ধু করে ওঠে; মনে হয় এই মাহুতগুলো যে কোথায় যাচ্ছে তার যেন কোনো ঠিকানা নেই। ভ্রমণবৃত্তান্তের বইও আমার এই মানসিক নিরালায় মধ্যে সেই রকম একটি গতিপ্রবাহের ক্ষীণ রেখা অঙ্কিত করে দিয়ে চলে যেতে থাকে—তাতে করে আমার মনের সুবিস্তীর্ণ নিস্তর নিঃস্রব আকাশটি আরো যেন বেশি করে অল্পভব করতে পারি।

এখনো আটটা বাজেনি তবু মনে হচ্ছে যেন অর্ধরাত্রি। কলকাতার বাড়িতে এখন কে কি করচে কিছুই জানিনে। পৃথিবীতে আমরা যাদের জানি সবাইকেই ফুটুকি লাইনে জানি—অর্থাৎ মাঝে মাঝে অনেকখানি কঁাক—সেই কঁাকগুলো নিজের মনে যেমনতেমন করে ভরিয়ে নিতে হয়। যাদের মনে করি সবচেয়ে ভাল জানি তাদেরও পরিচয়ের সঙ্গে বহুল পরিমাণে নিজের কল্পনা মিশিয়ে নিতে হয়। কত জায়গায় ঐক্যধারা ছিন্ন হয়, পথচিহ্ন লুপ্ত হয়, অনিশ্চিত অস্পষ্ট অন্ধকার থেকে যায়। সুপরিচিত লোকও যদি কল্পনার সূত্রে গাঁথা ছিন্ন অংশমাত্র হয় তাহলে কার সঙ্গে কিসের সঙ্গেইবা আমাদের পরিচয় আছে—আমাকেই বা অবিচ্ছিন্ন রেখায় কে জানে? কিন্তু হরত বিচ্ছিন্ন বলেই, হরত তাদের মধ্যে কল্পনাযোজনার স্থান আছে বলেই তারা আমাদের যথার্থ অন্তরঙ্গ। নইলে অপরিচ্ছিন্ন ব্যক্তিবিশেষে বোধ হয় সকলেই অন্তর্ধামী ছাড়া আর সকলের কাছেই হুজুপ্য। আমরা নিজেকেও অংশ-অংশ করে জানি—কল্পনাদিয়ে পূরিয়ে নিয়ে একটা স্বরচিত গল্পের নায়ক করে নিই মাত্র। খণ্ড উপকরণ নিয়ে আমরা নিজেকে নিজে সৃষ্টি করে তুলব বলেই বিধাতা এই বিচ্ছেদগুলি রেখে দিয়েছেন।

বোলপুর,

৩২

৩১শে অক্টোবর ১৮৯৪।

প্রথম শীতের আরম্ভে সমস্ত দিন ধরে যে একটা উত্তরে বাতাস দিতে থাকে সেইটে আজ সকাল থেকে শুরু হয়েছে। বাতাসটা হীহী করতে করতে আসছে। আর আমলকি তরুণশ্রী পাতাগুলি হলদে হয়ে উঠে কাঁপতে কাঁপতে ঝরে ঝরে পড়ে যাচ্ছে! এখানকার বনরাজ্যের মধ্যে যেন খাজনা আদায়ের পেয়াল্লা এসেছে—সমস্ত কাঁপচে, ঝরেচে এবং দীর্ঘনিশ্বাসে আকুলিত হয়ে উঠচে। ছপুরবেলাকার রৌদ্রকান্ত বিশ্রামপূর্ণ বৈরাগ্যে, ঘন আশ্রয়স্থায় ঘুঘুর অবিশ্রামকুলনে এই ছায়ালোকখচিত স্বপ্নাতুর প্রহরগুলোকে যেন বিরহবিধুর করে তুলে। আমার টেবিলের উপরকার ঘড়ির শকটটাও এই মধ্যাহ্নের স্রবের সঙ্গে যেন তাল রেখে চলেছে, ঘরের ভিতরে সমস্ত ছপুরবেলাটা কাঠবিড়ালীর ছুটাছুটি চলছে। কুলো ল্যাজ, কালো এবং ধূসর রেখায় অঙ্কিত রোমশ নরম গা, ছোট ছোট কালো কোঁটার মত ছোট চঞ্চল চোখ, নিতান্তই নিরীহ অথচ অত্যন্ত কেজো লোকের মত ব্যস্ত ভাবটা দেখে আমার বেশ মজা লাগে। এই ঘরের কোণে লোহার জাল দেওয়া আলমারিতে ডাল চাল প্রভৃতি আহাৰ্য্য সামগ্রী এই সমস্ত লোভীদের কাছ থেকে লুকিয়ে রাখা হয়—ওৎসুক্যব্যগ্র নাসিকাটি নিয়ে তারা সারাদিন এই আলমারিটার চারিদিকে ছিঁদ্র খুঁজে খুঁজে বেড়াবে। ছ চারটা কণা বা আলমারির বাইরে বিক্ষিপ্ত থাকে সেইগুলিকে সন্ধান করে নিয়ে সামনের গুটিকয়েক ছোট তীক্ষ্ণ দস্ত দিয়ে কুটকুট করে ভারি তৃপ্তির সঙ্গে তারা আহাৰ্য্য করে; মাঝে মাঝে লেজের উপর ভর দিয়ে সোজা হয়ে বসে' সামনের দুটি হাত জোড় করে' সেই শস্যকণাগুলিকে মুখের মধ্যে গুছিয়েগাছিয়ে জুং করে নিতে থাকে,— এমন সময় আমি একটুখানি নড়েছি কি অমনি চকিতের মধ্যে লেজটি পিঠের উপর তুলে দিয়ে দে-দোড়। যেতে যেতে হঠাৎ একবার অর্ধপথে পাপোষটার উপর থেমে একটা পা তুলে ফস্ করে একটা কাণ চুলকে নিয়ে আবার এসে উপস্থিত—এমনি সমস্ত বেলাই কুটকাট্ হুড়্‌হুড়্‌ এবং তৈজসপত্রের মধ্যে টুংটাং ঝনঝন চলছেই।

ছোলেযোগ থেকে ঐ কেরিওয়ালার হাঁকগুলো আমাকে কেমন একটু বিচলিত করে,—নিমন্তরু দুপুর বেলায় ঢীলের তীক্ষ্ণ ডাকটাও আমাকে যেন উদাস করে দিত। অনেকদিন সেই ডাকটা আমার কানে আসে নি। আজকাল যে চিল ডাকে না তা নয়—আমারই এখন চিন্তা বেশি কাজও ঢের; প্রকৃতির সঙ্গে আর আমার সে রকম ঘনিষ্ঠ যোগ নেই। এখন সময় ফেলে রাখা চলে না; যদি বা মনের গতিকে কোনো বিশেষ কাজ করতে প্রবৃত্তি না হয় তবু একটা কাজের চেষ্টা করতে হয়, নিদেন অনামনস্কভাবেও একটা বই পড়বার ভান না করলে মন স্থস্থ থাকে না।—এটা কিন্তু কলকাতায়। মফস্বলে গেলে চুপ করে চেয়ে থাকলেও হৃদয় পরিপূর্ণ হয়ে ওঠে, কাজের অঙ্ক দাস্ত করিতে হয় না। কর্তব্য কাজের বিরুদ্ধে কিছু বলতেই সাহস করিনে কিন্তু যখন উপস্থিত কোনো কাজ নেই কিম্বা ভাল করে সম্পন্ন করবার শক্তি নেই তখনো কেবল অভ্যাসবশতঃ বা সময়সাপনের তাগিদে যদি কাজ খুঁজে বেড়াতে হয়, তখনো যদি আপনাকে নিয়ে আপনি শান্তি না পাওয়া যায়, তাহলে অবস্থাটা ধারাপ হয়েছে বলতে হবে। কাজ একটা উদ্দেশ্যসাধনের উপায়মাত্র; মানুষত কাজের যন্ত্র নয়, পরিপূর্ণ তৃপ্তির সঙ্গে বিরামলাভ করবার শক্তিটা একেবারে হারানো ত কিছু নয়, কেননা তার মধ্যেও মনুষ্যত্বের একটা উচ্চ অধিকার আছে। দিন ও রাত্রি কাজ ও বিরামের উপায়। দিনের বেলায় পৃথিবী ছাড়া আর আমাদের কিছুই নেই, রাত্রে পৃথিবীটাই কম, অনন্ত জ্যোতিষ্ক-জগৎটাই বেশি। তেমনি কাজের দিনে যুক্তিতর্কের আলোকে পৃথিবীটাকেই খুব স্পষ্ট করে চোখের সামনে রাখা চাই—কিন্তু যখন বিশ্রামের সন্ধ্যা তখন পৃথিবীটাকে ছাঃস করে দেওয়াই দরকার, তখন বিশ্বের সঙ্গে আমাদের যে বিরাট যোগ আছে সেইটেকেই বড় করে দেখা চাই। সকালবেলায় উঠে জানা চাই আমরা পৃথিবীর মানুষ, দিন অবসান হয়ে এলে অনুভব করা চাই আমরা জগৎবাসী।

দিগন্তের শেষ প্রান্ত পর্যন্ত বালির চর ধুঁ ধুঁ করচে—তাতে না আছে ঘাস, না আছে গাছ, না আছে বাড়ির, না আছে কিছু। আকাশের শূন্যতা সমুদ্রের শূন্যতা আমাদের চিরাত্যন্ত, তার কাছে আমরা আর কিছু দাবি করিনে,—কিন্তু ভূমির শূন্যতাকে সব চেয়ে বেশি শূন্য বলে মনে হয়। কোথাও গতি নেই, জীবন নেই, বৈচিত্র্য নেই; যেখানে ফলে শস্যে তুণে পশুপক্ষীতে ভরে যেতে পারত সেখানে একটি কুশের অঙ্কুর পর্যন্ত নেই,—কেবল একটা উদাস কষ্টিন নিরবচ্ছিন্ন বৈধব্যের বক্ষ্যাদশ। ঠিক পাশ দিয়ে পদ্মা চলে যাচ্ছে, ওপারে ঘাট, বাঁধা নোকা, স্নানরত লোকজন, নারকেল এবং আমের বাগান, অপরাহ্নে নদীর ধারের হাটে কলধ্বনি—দূরে পাবনার পারে তরুশ্রেণীর ঘননীল রেখা—কোথাও গাঢ়নীল, কোথাও পালুনীল, কোথাও সবুজ, কোথাও মাটির ধূসরতা—আর তারই মাঝখানে এই রক্তশূন্য মৃত্যুর মত ফ্যাকাসে সাদা। সন্ধ্যাবেলা সূর্যাস্তের সময় এই চরের উপর আর কিছুই নেই, কেউ নেই, কেবল আমি একলা।

গুরুসন্ধ্যার চরে যখন একলা বেড়াই, খানিকবাদে শ—প্রায় আসে। কালও সে এসেছিল কাজকর্মের কথা কওয়ার পর যেই একটু চুপ করেছি অমনি হঠাৎ দেখলুম অনন্ত জগৎ সেই সন্ধ্যার আকাশে নীরবে আমার সম্মুখে দাঁড়িয়ে। কানের কাছে একটি মানুষের তুচ্ছ কথায় এই অসীম আকাশভরা একটি আবির্ভাব আকৃত হয়ে গিয়েছিল। যেই মানুষ চুপ করলে অমনি দেখতে দে খতে নিস্তরূ নক্ষত্রলোক হতে শান্তি নেমে এসে আমার হৃদয় পরিপূর্ণ করে ভুললে;—যে সভার মধ্যে অনন্তকোটি জ্যোতিষ্ক নীরবে সমাগত আমিও সেই সভার একপ্রান্তে স্থান পেলাম। অজি নামক এক মহাশর্চা ব্যাপারের মধ্যে ওরা এবং আমি এক আসন পেয়েছি।

সকাল সকাল বেড়াতে বেরই। যতক্ষণ না শ—আসে ততক্ষণ মনটাকে শান্তশীতল করে নিই। তারপরে হঠাৎ শ—এসে যখন জিজ্ঞাসা করে, আজ দুধ খেয়ে কেমন ছিলেন, কিম্বা আজ কি মাসকাবারী হিসাব দেখা শেষ হয়ে গেছে তখন বড় খাপছাড়া শুনতে হয়। আমরা নিত্য এবং অনিত্যের ঠিক এমন মাঝখানে পড়ে ছই দিকের ধাক্কা খেয়ে চলে যেতে থাকি। যখন আধ্যাত্মিক কথা হচ্ছে তখন গায়ের কাপড় এবং পেটের ক্ষিদের কথা আন্ডলে ভারি অসঙ্গত শুনতে হয়, অথচ আত্মা এবং পেটের ক্ষিদে চিরকাল একত্রেই যাপন করে এল। যেখানটাতে জ্যোৎস্নালোক পড়চে সেইখানেই আমার জমিদারী,—অথচ জ্যোৎস্না বলচে তোমার জমিদারী মিথ্যা, জমিদারী বলচে তোমার জ্যোৎস্নাটা আগাগোড়াই ফাঁকি। আমি ব্যক্তি এরি ঠিক মাঝখানে।

এই চরগুলো একসময়ে জলের নীচে ছিল। কি না সেইজন্যে এক এক জায়গায় অনেক দূর পর্যন্ত বালির উপর জলের ঢেউখেলানো পদচিহ্ন পড়ে গেছে। সেই সমস্ত থাকে থাকে ভাঁজ করা বালির উপর নানারঙের চিকন আভা পড়ে ঠিক যেন একটা প্রকাণ্ড সাপের নানারঙা খোলসের মত দেখাচ্ছিল। আমি মনে করলুম, পদ্মা ত একটা প্রকাণ্ড নাগিনীই বটে। সে এক সময় এই বৃহৎ চরের উপর বাস করত, এখন সেখানে কেবল তার একটা বৃহৎ খোলস সন্ধ্যার আলোয় পড়ে চিক্‌চিক্‌ করচে। বর্ষার সময় সে আপনার সহস্র ফণা তুলে ডাঙার উপর ছোবল মারতে মারতে গর্জন করতে করতে কেমন করে আপনার প্রকাণ্ড বাঁকা লেজ আছড়াতে আছড়াতে ফুলতে ফুলতে চলত সেই দৃশ্যটাও মনে পড়ল। এখন সে শীতকালের সরীসৃপ বিবরের মধ্যে অর্ধপ্রবিষ্ট হয়ে অদীর্ঘ শীতনিদ্রায় প্রতিদিন ক্লান্ত হয়ে যাচ্ছে।

বেড়াতে বেড়াতে ক্রমে এত বিচিত্র রং কখন আস্তে আস্তে মিলিয়ে এল— কেবল জ্যেৎমায় একরঙা শুভ্রতায় জলস্থল মগ্নিত হয়ে গেল। একসময় যে পূর্বদিকে দিনের উদয় হয়েছিল জগতে কোথাও তার আর কোনো স্মৃতিচিহ্নই রহিল না।

ইচ্ছা করচে শীতটা ঘুচে গিয়ে গ্রীষ্ম খুলে বসন্তের বাতাস দেয়—আচ-
কানের বোতামগুলো খুলে একবার খোলা জালিবোটের উপর পা ছড়িয়ে দিই
এবং কর্তব্যের রাস্তা ছেড়ে দিনকতক সম্পূর্ণ অকেজো কাজে মন দিই।
বছরের ছমাস আমি এবং ছমাস আর কেউ যদি সাধনার সম্পাদক থাকে
তাহলেই ঠিক সুবিধামত বন্দোবস্ত হয়। কারণ, সম্বৎসর খ্যাপামি করবার
ক্ষমতা মানুষের হাতে নেই এবং সম্বৎসর অপ্রমত্ততা বজায় রেখে চলা আমার
মত লোকের পক্ষে দুঃসাধ্য। এত বড় বিশ্বব্রহ্মাণ্ডে ছমাস অন্তর স্বত্বপরিবর্তন
হচ্ছে—আর আমরা ক্ষুদ্র মনুষ্য বারোমাস সমভাবে ভদ্রতারক্ষা করে চলি কি
করে? মানুষের মহা মুন্সিল এই, প্রকৃতির বিরুদ্ধে সমাজের আইন অনুসারে
তাকে তিনশো পঁয়ষট্টি দিন একভাবেই চলতে হয়। আসলে নিজের মধ্যে
যে একটা চিরনূতন চিররহস্য আছে সেটাকে সলজ্জ সভয়ে গোপন করে
নিজেকে সর্বসাধারণের কাছে নিতান্ত চিরাত্যস্ত রুটীন-চালিত যন্ত্রটির মত দেখাতে
হবে। সেই জন্যে থেকে থেকে মানুষ বিগড়ে যায়, বিদ্রোহী হয়ে ওঠে;
সেই জন্যে অবাধে আপনাকে উপলব্ধি করতে শিল্পসাহিত্যের আশ্রয় গ্রহণ করতে
চায়। সেইজন্যে সাহিত্য দম্ভেরের আঁচলধরা হলে নিজের উদ্দেশ্যকে নষ্ট করে।
সেইজন্যে বৈঠকখানা ঘরে শিষ্টালাপে যে সব কথা চলে না সাহিত্যে সেগুলি গভীরতা
ও উদারতা লাভ করে অসঙ্কোচে আপনাকে প্রকাশ করতে পারে। এই জন্যেই ডুয়িং
ক্রমের চা-পান সভার সুলভ্য সীমার মধ্যে সাহিত্যকে বন্ধ করতে গেলে বিরাট বিশ্ব-
প্রকৃতিকে ছিটের গাউন পরানোর মত হয়।

অদৃষ্টের পরিহাসবশতঃ, ফাল্গুনের এক মধ্যাহ্নে এই নির্জন অবসরে এই নিস্তরঙ্গ পদ্মার উপরে এই নিভৃত নৌকার মধ্যে বসে, সমুখে সোনার রোদ্র এবং স্নানীল আকাশ নিয়ে আমাকে একখানা বই সমালোচনার প্রবৃত্ত হতে হচ্ছে। সে বইও কেউ পড়বে না সে সমালোচনাও কেউ মনে রাখবে না মাঝের থেকে এমন দিনটা মাটি করতে হবে। জীবনে এমন দিন কটাই বা আসে! অধিকাংশ দিনই ভাড়াচোরা ভোড়া-ভাড়া; আজকের দিনটি যেন নদীর উপরে সোনার পদ্মফুলের মত ফুটে উঠেছে, আমার মনটিকে তার মর্ম্মকোবের মধ্যে টেনে নিচ্ছে। আবার হয়েছে কি, একটা হৃদয়-কোমরবদ্ধ পরা স্নিগ্ধ বেগুনিরঙের মস্ত ভ্রমর আমার বোটের চারদিকে গুঞ্জনসহকারে চঞ্চল হয়ে বেড়াচ্ছে। বসন্তকালে ভ্রমরগুঞ্জে বিরহিণীর বিরহ বেদনা বুদ্ধি পেয়ে থাকে এ কথাটাকে আমি বরাবর পরিহাস করে এসেছি, কিন্তু ভ্রমরগুঞ্জনের মর্ম্মটা আমি একদিন ছপাবেনা। বোগপুরে প্রথম আবিষ্কার করেছিলাম। সেদিন নিষ্কর্ম্মার মত দক্ষিণের বারান্দায় বেড়াচ্ছিলাম—মধ্যাহ্নটা মাঠের উপর ছড়িয়ে পড়েছিল, গাছের নিবিড় পল্লবগুলির মধ্যে স্তব্ধতা যেন রাশীকৃত হয়ে উঠেছিল। সেই সময়টার বারান্দার নিকটবর্তী একটা মুকুলিত নিমগাছের কাছে ভ্রমরের অগসগুঞ্জন সমস্ত উদ্দাস মধ্যাহ্নের একটা সুর বেধে দিচ্ছিল। সেইদিন বেশ বোঝা গেল মধ্যাহ্নের সমস্ত পাঁচমিশালি শ্রান্তসুরের মূল সুরটা হচ্ছে ঐ ভ্রমরের গুঞ্জন—তাতে বিরহিণীর মনটা যে হঠাৎ হাঁহা করে উঠবে তাতে আশ্চর্য্য কিছুই নেই। আসল কথাটা হচ্ছে, ঘরের মধ্যে যদি খামখা একটা ভ্রমর এসে পড়েই তৌতৌ করতে সুরু করে এবং ক্ষণে ক্ষণে শাসির কাঁচে মাথা ঠুকতে থাকে তবে তাতে করে তার নিজের ছাড়া আর কারো কোনো প্রকার ব্যথা লাগবার সম্ভাবনা নেই। কিন্তু ঠিক জায়গাটিতে সে ঠিক সুরই দেয়। আজকের আমার এই সোনার মেখলাপরা ভ্রমরটিও ঠিক সুরটি লাগিয়েছে। নিশ্চয়ই বোধ হচ্ছে কোনো গ্রন্থের সমালোচনা করচে না—কিন্তু কেন যে আমার নৌকার চারপাশে ঘুর-ঘুর করে মরচে আমি ত বুঝতে পারচিনে—নিরপেক্ষ বিচারকমাত্রইহিত বলবে আমি শকুন্তলা বা সে জাতীয় কেউ নই।

সাধনার জন্তে লিখতে লিখতে অন্তমনস্ক হয়ে যাই; নৌকা চলে যায় মুখ তুলে দেখি, ধেরা পারাপার করে তাই দেখতে দেখতে সময় কাটে। ডাঙার আমার বোটের খুব কাছে মছরগতি মোধগুলো তাদের বড় বড় মুখ তৃণগুল্মের মধ্যে পুরে দিয়ে সেগুলো নেড়েচেড়ে নিয়ে ফৌস্ ফৌস্ নিখাস ফেলে কচ্ কচ্ শব্দ করতে করতে খেতে খেতে ল্যাজের ঝাপটায় পিঠের মাছি তাড়াতে তাড়াতে চলতে থাকে,—তার পর একটা অতি দুর্বল উলঙ্গপ্রায় মনুষ্যশাবক এসে এই প্রশান্তপ্রকৃতি প্রকাণ্ড জন্তুর পিঠে পাঁচনির গুঁতো মেরে হঠ্ হঠ্ শব্দ করতে থাকে, জন্তুটা তার বড় বড় চোখে এক একবার এই ক্ষীণ মানবকটির প্রতি কটাক্ষপাত করে' পথের মধ্যে দুই এক গ্রাস ঘাস-পাতা হিঁড়ে নিয়ে অব্যাকুলচিত্তে মুহমন্দগমনে খানিকটা দূর সরে যায়—আর ছেলোটামনে করে তার রাখালিকর্তব্য সমাধা হল। আমি রাখালবালকদের মনস্তত্ত্বের এ রহস্যটা এ পর্য্যন্ত ভেদ করে উঠতে পারলুম না। গোরু কিম্বা মোষ যেখানে নিজে ইচ্ছাপূর্ব্বক তৃণভাবে আহাৰ করচে, অকারণে উৎপাত করে সেখান থেকে তাড়িয়ে আর খানিকটা দূরে নিয়ে গিয়ে কি উদ্দেশ্য সিদ্ধ হয় ঠিক জানিনে। পোষমানা সবল প্রাণীদের উপর অনাবশ্যক উৎপীড়ন করে প্রভুগর্ভ অহুভব করা বোধ করি মানুষের স্বভাব। ঘন সরস তৃণগুল্মের মধ্যে মোষের এই চরে থাওয়া আমার দেখতে বড় ভাল লাগে। কি কথা বলতে কি কথা উঠল। আমি বলতে যাচ্ছিলুম আজকাল অতি সামান্য কারণেই আমার সাধনার তপোভঙ্গ হচ্ছে। পূর্ব্বপত্রের বলেছি কদিন ধরে গোটাকয়েক ভ্রমর আমার বোটের ভিতরে বাইরে অত্যন্ত চঞ্চলভাবে ব্যর্থগুঞ্জে ও রুখা অশ্বেষণে ঘুরে বেড়াচ্ছে—রোজই বেলা নটা দশটার সময় তাদের দেখা যায়,—তাড়াতাড়ি একবার আমার টেবিলের কাছে ডেস্কের নীচে রঙীন শাসির উপরে আমার মাথার চারি ধারে ঘুরে আবার হুস্ করে বেরিয়ে চলে যায়। আমি অনায়াসে মনে করতে পারি লোকাস্তর থেকে কোনো অতৃপ্ত প্রেতাচ্ছা রোজ সেই একই সময়ে ভ্রমর আকারে একবার করে আমাকে দেখেগুনে প্রদক্ষিণ করে যাচ্ছে। কিন্তু আমি তা মনে করিনে। আমার দৃঢ় বিশ্বাস ওটা সত্যাকার ভ্রমর, মধুপ, সংস্কৃতভাষায় যাকে কখনো কখনো বলে স্বিরেক।

নিজের সেই সুগভীর স্বপ্নাবিষ্ট বাল্যকালের উদ্ভাস্ত কল্পনার কথা মনে পড়চে—
খুব বেশি দিনের কথা বলে ত মনে হচ্ছে না—অথচ এবারকার মানবজন্মের অর্ধেক
দিন ত চলে গেছেই। আমরা প্রত্যেক মুহূর্ত মাড়িয়ে মাড়িয়ে জীবনটা সম্পূর্ণ করি
কিন্তু মোটের উপরে সবটা খুবই ছোট ; দুটিঘণ্টাকালের নির্জন চিন্তার মধ্যে সমস্তটাকে
ধারণ করা যেতে পারে। শেলি ত্রিশটা বছর প্রতিদিন সহস্র কাজে সহস্র প্রয়াসে
জীবন ধারণ করে দুটিমাত্র ভলুম জীবনচরিত্রের সৃষ্টি করেছেন ; তার মধ্যেও ডাউডেন
মাহেবের বাজে বকুনি বিস্তর আছে। আমার জীবনের ত্রিশটা বছরে বোধকরি একখানা
ভলুমও পোরে না। এইত ব্যাপার, এইটুকুমাত্র কাণ্ড, কিন্তু এরই কত আয়োজন
কত দৃশ্যেষ্ঠা। এইটুকুর রসদ জোগাবার জন্তে কত ব্যবসা, কত জমিদারী, কত
লোকজন। আছি ত এই দেড় হাত চৌকিতে চুপটি করে বসে কিন্তু কত রকমে সুখি-
বীর কত জায়গাই জুড়ে আছি,—সেই সমস্ত বাদসাদ পড়ে কেবল বাকি থাকে দুটি
ঘণ্টার চিন্তা—তাও বেশি দিনের জন্তে নয়। আজকের আমার এই একলা বোটের
ছপুরবেলাকার মনের ভাব, এই একটা দিনের কুঁড়েমি সেই কয়েকখানা পাতার মধ্যে
কোথায় বিলুপ্ত হয়ে থাকবে। এই নিস্তরঙ্গ পদ্মাতীরের নিস্তক বালুচরের উপরকার
নির্জন মধ্যাহ্নটি আমার অনন্ত অতীত ও অনন্ত ভবিষ্যতের মধ্যে কি কোথাও একটি
অতি ক্ষুদ্র সোনালি রেখার চিহ্ন রেখে দেবে ?



২৮শে ফেব্রুয়ারি, ১৮৯৫।

আজ আমি এক অনামিকা চিঠি পেয়েছি—তার আরম্ভেই আছে—

পরের পায়ে ধরে প্রাণদান করা

সকল দানের সার।

আমাকে লেখক কখনো দেখেনি ; আমার সাধনার লেখা থেকে পরিচয়। লিখেছে :—
 “তোমার সাধনায় রবিকর পড়িয়াছে, তাই রবি-উপাসক যত ক্ষুদ্র বত দূরে থাকুক তবুও
 তার জন্তও আজি রবিকর বিকীর্ণ হইতেছে। তুমি জগতের কবি, তবুও সে ভাবিতেছে
 আজি তুমি তাহারো কবি।” ইত্যাদি। মানুষ প্রীতিদানের জন্ত এত ব্যাকুল যে
 শেষকালে নিজের আইডিয়াকেই ভালবাসতে থাকে। আইডিয়াকে রিয়ালিটির চেয়ে
 কম সত্য কেন মনে করি ! ইঞ্জিয়ার দ্বারা যা পাচ্ছি সেটা বস্তুত যে কি তারই ঠিকানা
 মিলচে না ; আর আইডিয়া দিয়ে যেটা পাই সেই মনের সৃষ্টির প্রকৃত সত্তার প্রতিই বা
 কেন তার চেয়ে বেশি অনাস্থা করতে যাব ? মানুষমাত্রের মধ্যেই একটি আইডিয়াল
 মানুষ আছে তাকে কেবল মাত্র ভক্তিশ্রীতিয়েহের দ্বারা খানিকটা নাগাল পাওয়া যায়।
 প্রত্যেক ছেলের মধ্যে যে একটি রুহৎ আইডিয়াল আছে সে কেবল ছেলের মা সমস্ত
 মনপ্রাণ দিয়ে অনুভব করে, অল্প ছেলের মধ্যে সেই অনির্বচনীয়টিকে দেখতে পায় না।
 মা তার ছেলেকে যা মনে করে’ প্রাণ দেয় সেইটেই কি মারা আর যা মনে করে’ আমরা
 দিতে পারিনে সেইটেই সত্য ? প্রত্যেক মানুষই অনন্ত স্বপ্নের ধন, তার মধ্যে সৌন্দর্যের
 সীমা নেই। কি কথা থেকে কি কথা উঠল ! আসল কথাটা হচ্ছে, এক হিসাবে
 আমি আমার ভক্তটির প্রীতিউপহার গ্রহণের যোগ্য নই—অর্থাৎ যদি সে আমাকে
 আমার প্রত্যাহার আবরণের মধ্যে দেখত তাহলে এরকম প্রীতি অনুভব করতেই পারত
 না,—আর এক হিসাবে আমিও এই পরিমাণে, এমন কি, এর চেয়ে অনেক বেশি
 পরিমাণে প্রীতি পাবার অধিকারী।

সৌন্দর্যের চর্চা ও সুবিধার চর্চা এর মধ্যে কোনটাকে প্রাধান্য দিতে হবে তর্কটা যদি এই হয় তবে ছাতা মাথায় দিয়ে ঘোড়ায় চড়ার দৃষ্টান্তটা সে তর্কের মধ্যে ঠিক পড়ে না। কেননা ঘোড়ায় চড়ে ছাতা মাথায় দিলে সেটা যে অসুন্দর হতেই হবে তা নয়, ওদিকে তাতে ঘোড়া চালাবার অসুবিধাও ঘটতে পারে। আসলে ওটা অসঙ্গত। অসুবিধা, অসৌন্দর্য এবং অসঙ্গতি এই তিনটেকেই আমাদের এড়িয়ে চলতে হবে—কিন্তু বোধহয় শেষটাকেই সব চেয়ে বেশি। মেয়েদের মত সাড়ি পরলে যদি কোনো পুরুষকে সুন্দর দেখতেও হয় তবু সে অদ্ভুত কাজে না যাওয়াই ভাল। সে সম্বন্ধে লজ্জাটা স্বাভাবিক লজ্জা। নিজেকে বেশি করে লোকের চোখে ফেলতে একটা স্বভাবতই সঙ্কোচ হওয়া উচিত কেননা যথার্থ ভদ্রতার স্বভাবই হচ্ছে অপ্রগল্ভ। যেমন নিজের সম্বন্ধে সর্বদা অতিমাত্র সচেতন থাকাটা কিছু নয় তেমনি পরের চেতনার উপর নিজেকে প্রবলবেগে আছড়ে ফেলতে বিশেষ একটা অপ্রবৃত্তি থাকাই উচিত। অবশ্য এর একটা সীমা আছে, কিন্তু সে সীমা অনেক দূরে। যখন কোনো প্রচলিত প্রথাকে আমি অশ্রাব্য বা অনিষ্টকর মনে করি তখন সে বিষয়ে সাধারণকে আঘাত দিতে কুণ্ঠিত হলে চলবে না। কিন্তু সেই উচ্চ লক্ষ্যটা থাকা চাই। আমাদের দেশে যে মেয়েরা প্রথম জুতা পায়ে এবং ছাতা মাথায় দিয়েছেন নিশ্চয়ই তাঁরা লোকের বিজ্ঞপ-চোখেই পড়েছেন—তাই বলে এখানে লোকব্যবহারকে খাতির করা চলে না। কিন্তু মোটের উপর, সাধারণ মানুষের মত চলার সুবিধা এই যে তাতে অল্প লোকেরও চলার সুবিধা হয়। ছোটখাটো সুবিধা অসুবিধার জঞ্জল যদি সাধারণের অভ্যাস ও সংস্কারের সঙ্গে বিরোধ করে চলতে হয় তাহলে সেটা ঠিক মশা মারতে কামান পাতার মতই অদ্ভুত হয়ে পড়ে,—সেই অদ্ভুত অসঙ্গতির মধ্যে যে হাশ্বকরতা ও বিরক্তিকরনকতা আছে তাকে অতিক্রম করবার উপযুক্ত কোনো উচ্চ অভিপ্রায় তার মধ্যে পাওয়া যায় না।

পৃথিবীতে অনেক মহামূল্য উপহার আছে, তার মধ্যে সামান্য চিঠিখানি কম জিনিষ নয়। চিঠির দ্বারা পৃথিবীতে একটা নূতন আনন্দের সৃষ্টি হয়েছে। আমরা মানুষকে দেখে যতটা লাভ করি, তার সঙ্গে কথাবার্তী করে যতটা লাভ করি, চিঠিপত্র দ্বারা তার চেয়ে আরো একটা বেশি কিছু পেয়ে থাকি। চিঠিপত্রে যে আমরা কেবল প্রত্যক্ষ আলাপের অভাব দূর করি তা নয়, ওর মধ্যে আরও একটু রস আছে যা প্রত্যক্ষ দেখাশোনায়ে নেই। মানুষ মুখের কথায় আপনাকে যতখানি ও যেরকম করে প্রকাশ করে লেখার কথায় ঠিক ততখানি করে না। আবার লেখায় যতখানি করে মুখের কথায় ততখানি করতে পারে না। এই কারণে, চিঠিতে মানুষকে দেখবার এবং পাবার জন্ম আরো একটা যেন নতুন ইঞ্জিরের সৃষ্টি হয়েছে। আমার মনে হয় যারা চিরকাল অবিচ্ছেদে চব্বিশ ঘণ্টা কাছাকাছি আছে, যাদের মধ্যে চিঠি-লেখালেখির অবসর ঘটেনি তারা পরস্পরকে অসম্পূর্ণ করেই জানে। যেমন বাছুর কাছে এলে গোরুর বাঁটে আপনি হুধ জুগিয়ে আসে তেমনি মনের বিশেষ বিশেষ রস কেবল বিশেষ বিশেষ উত্তেজনায় আপনি সঞ্চারিত হয় অথু উপায়ে হবার জো নেই। এই চার পৃষ্ঠা চিঠি মনের ঠিক যে রস দোহন করতে পারে কথা কিছা প্রবন্ধে কখনোই তা পারে না। আমার বোধ হয় ঐ লেফাফার মধ্যে একটা সুন্দর মোহ আছে—লেফাফাটি চিঠির প্রধান অঙ্গ—ওটা একটা মস্ত আবিষ্কার।

ঢং ঢং করে দশটা বাজল। চৈত্র মাসের দশটা নিত্যান্ত কম বেলা নয়। সৌত্র ঝাঁ ঝাঁ করে উঠেছে, কাকগুলো কেন যে এত ডাকাডাকি করচে জানিনে, লকেট কমলালেবু এবং কাঁচামিঠে আমওয়ালা চুপড়ি মাথায় উচ্চস্বরে সুর করে আমাদের দেউড়ির কাছ দিয়ে ডেকে যাচ্ছে।

ইচ্ছা করচে কোনো একটা বিদেশে যেতে—বেশ একটা ছবির মত দেশ—পাহাড় আছে, ঝরণা আছে, পাথরের গায়ে খুব ঘন শৈবাল হয়েছে, দূরে পাহাড়ের ঢালুর উপরে গোল চরচে, আকাশের নীল রংট খুব স্নিগ্ধ এবং সুগভীর, পাখী পতঙ্গ পল্লব এবং জলধারার একটা বিচিত্র মৃদু শব্দমিশ্র উঠে মস্তিষ্কের মধ্যে ধীরে ধীরে তরঙ্গাভি-যাত করচে। দূর হোক্গে ছাই, আজ আর কিছুতে হাত না দিয়ে দক্ষিণের ঘরে একলাটি হাত পা ছড়িয়ে একটা কোনো ভ্রমণবৃত্তান্তের বই নিয়ে পড়ব মনে করচি—বেশ অনেকগুলো ছবিওয়ালা নতুন-পাতকাটা বই। আলোচনা করবার মত, মনের উন্নতি সাধন করবার মত বই পৃথিবীতে অসংখ্য আছে কিন্তু কুঁড়েমি করবার মত বই ভারি কম; সেই রকম বই লিপ্তে অসামান্য ক্ষমতার দরকার। অবকাশের অবকাশে কিছুমাত্র নষ্ট করবেনা বরং তাকে রঙীন ও রসালো করে তুলবে, অথচ তাকে মন দিয়ে পড়বারও খোরাক দেবে এই দুই দিক বাঁচিয়ে লেখা শক্ত। ষ্টিল্পেনে লিখে মনের উপর দাগ কেটে দিয়ে যাবে না, পালকের কলমে লিখে লেগাটা মনের উপর দিয়ে উড়িয়ে নিয়ে যাবে এমন পুষ্পকরথের সারথী পাওয়া যায় কোথায়?

২৪শে এপ্রিল, ১৮৯৫।

এদিকে দেখতে দেখতে সমস্ত আকাশ মেঘাচ্ছন্ন হয়ে এসে গুরুগুরু করে মেঘ ডাক্তে লাগল, এবং মাঝে মাঝে প্রবল বাতাসে দক্ষিণের বাগানের ছোটবড় সমস্ত গাছগুলো হসহাস্ করে নিশ্বাস ফেলতে লাগল। মধ্যাহ্নটি স্নিগ্ধ ছায়াচ্ছন্ন হয়ে চারিদিক ঘনিষ্ঠ হয়ে এল। মনের ভিতরটা একটা অকারণ চঞ্চলতায় বিক্ষুব্ধ হয়ে উঠল—ভায় হাতে যে কাজটাই দিই সে ছুঁড়ে ছুঁড়ে ফেলে দিতে লাগল।

মনের গতিক আকাশের গতিকে মত,—কিছুই বলা যায় না। মাসের মধ্যে ঊনত্রিশ দিন সে ছোটখাট উপস্থিত কাজ নিয়ে বেশ চালিয়ে দেয়, কোনো গোল করে না,—ইঠাৎ ত্রিশ দিনের দিন সেসমস্ত কাজে সে পদাব্যাহত করতে থাকে—বলে আমাদের এমন একটা কিছু দাও যা খুব মন্ত, যাতে আমার সমস্ত দিনরাত্রি, সমস্ত ভূত ভবিষ্যৎ একেবারে গ্রাস করে ফেলতে পারে। তখন হাতের কাছে কোথায় বা কি পাওয়া যায়—কেবল ঘরে ঘরে বারান্দায় বারান্দায় ঘুরে ঘুরে বেড়াতে থাকি। কতক-গুলো ছিন্নবিচ্ছিন্ন খণ্ডবিখণ্ড দস্তুরবান্ধা কাজের মধ্যে মনটা যখন লাক দিয়ে দিয়ে বেড়ায় তখন তার স্তম্ভ অবস্থা বলি, আর যখন সে একটা প্রবল আবেগ একটা বৃহৎ কর্মের মধ্যে একটা অহংবিস্মৃত ঐক্য লাভ করবার জন্তে ব্যাকুল হয়ে ওঠে তখন তাকে বলি পাগলামি। কিন্তু আমি ত মনে করি মানুষের যথার্থ স্বাভাবিক অবস্থাই হচ্ছে সেই একটি প্রবল নির্ভার মধ্যে সমস্ত জীবনটাকে ঐক্যবন্ধনে বদ্ধ করবার ইচ্ছা। এই জন্তেই প্রতিদিন সমাজের মধ্যে থেকে এক একদিন মনে হয়—“আমায় বাঁশিতে ডেকেছে কে!”

বসে বসে সাধনার জন্যে একটা গল্প লিখি—খুব একটু আঁধারে গোছের গল্প। একটু একটু করে লিখি এবং বাইরের প্রকৃতির সমস্ত ছায়া আলোক বর্ণ ধ্বনি আমার লেখার সঙ্গে মিশে যাচ্ছে। আমি যে সকল দৃশ্য লোক ও ঘটনা কল্পনা করছি তারই চারিদিকে এই রোদ্দরষ্টি, নদীস্রোত এবং নদীতীরের শরবন, এই বর্ষার আকাশ, এই ছায়াবেষ্টিত গ্রাম, এই জলধারা প্রফুল্ল শস্যের ক্ষেত ঘিরে দাঁড়িয়ে তাদের সত্যে ও সৌন্দর্য্যে সজীব করে তুলে। কিন্তু পাঠকেরা এর অর্ধেক জিনিষও পাবে না। তারা কেবল কাটা শস্যই পায় কিন্তু শস্যক্ষেত্রের আকাশ বাতাস, শিশির এবং শ্যামলতা সমস্তই বাদ পড়ে যায়। আমার গল্পের সঙ্গে যদি এই মেঘ-যুক্ত বর্ষাকালের স্নিগ্ধরোদ্দরষ্টি ছোট নদীটি এবং নদীর তীরটি, এই গোছের ছায়া, এবং গ্রামের শান্তিটি এমনি অথুভাবে তুলে দিতে পারতুম তাহলে সবাই তার সত্যটুকু একেবারে সমগ্রভাবে একমুহূর্তে বুঝে নিতে পারত। অনেকটা রস মনের মধ্যেই থেকে যায়, সবটা পাঠককে দেওয়া যায় না। যা নিজের আছে তাও পরকে দেবার ক্ষমতা বিধাতা মানুষকে সম্পূর্ণ দেন নি।

কাজ করতে করতে কোনো একদিকে মুখ ফেরালেই দেখতে পাই নীল আকাশের সঙ্গে মিশ্রিত সবুজ পৃথিবীর একটা অংশ একেবারে আমাদের ঘরের লাগাও হাজির—
 যেন প্রকৃতিহুমুরী কুতূহলী পাড়ারগৈয়ে মেয়ের মত আমার জানলা দরজার কাছে উঁকি মারচে ; আমার ঘরের এবং মনের, আমার কাজের এবং অবসরের চারিদিকে নবীন ও সুন্দর হয়ে আছে। এই বর্ষণযুক্ত আকাশের আলোকে এই গ্রাম এবং জলের রেখা, এপার এবং ওপার, খোলা মাঠ এবং ভাঙা রাস্তা একটা স্বর্গীয় কবিতায় এপলোদেবের স্বর্ণবীণাধ্বনিতে বদ্ধ হইয়া উঠেছে। আমি আকাশ এবং আলো এত অন্তরের সঙ্গে ভালবাসি! আকাশ আমার সাকি, নীল স্ফটিকের স্বচ্ছ পেরালা উপুড় করে ধরেছে—সোনার আলো মদের মত আমার রক্তের সঙ্গে মিশে গিয়ে আমাকে দেবতাদের সমান করে দিচ্ছে। যেখানে আমার এই সাকির মুখ প্রসন্ন এবং উদ্ভূত যেখানে আমার এই সোনার মদ সব চেয়ে সোনালি ও স্বচ্ছ সেইখানে আমি কবি, সেইখানে আমি রাজা, সেইখানে আমার সঙ্গে বরাবর ঐ জুনীননির্মল জ্যোতির্শয় অসীমতার এই রকম প্রত্যক্ষ অব্যবহিত যোগ থাকবে।

—•—

এই আঁকাবাঁকা ইছামতী নদীর ভিতর দিয়ে চলেছি। এই ছোট খামখেয়ালী বর্ষাকালের নদীটি, এই যে দুইধারে সবুজ ঢালুঘাট, দীর্ঘ ঘন কাশবন, পাটের ক্ষেত, আখের ক্ষেত, আর সারি সারি গ্রাম—এ যেন একই কবিতার কয়েকটা লাইন, আমি বারবার আবৃত্তি করে যাচ্ছি এবং বারবারই ভাল লাগছে। পদ্মার মত বড় নদী এতই বড় যে সে যেন ঠিক মুখস্থ করে নেওয়া যায় না—আর এই কেবল ক’টি বর্ষামাসের দ্বারা অক্ষরগোণা ছোট বাঁকা নদীটি যেন বিশেষ করে আমার হয়ে যাচ্ছে।

পদ্মনদীর কাছে মাহুঘের লোকালয় তুচ্ছ কিন্তু ইছামতী মাহুঘ-বৈসা নদী;—তাম্র শান্ত জলপ্রবাহের সঙ্গে মাহুঘের কৰ্ম্মপ্রবাহের শ্রোত মিশে যাচ্ছে। সে ছেলেদের মাহু ধরবার এবং মেয়েদের স্নান করবার নদী। স্নানের সময় মেয়েরা যে সমস্ত গল্পগুজব নিয়ে আসে সেগুলি এই নদীটির হাস্যময় কলধ্বনির সঙ্গে একসুরে মিলে যায়। আশ্বিনমাসে মেনকার ঘরের পার্বতী যেমন কৈলাসশিখর ছেড়ে একবার তাঁর বাপের বাড়ি দেখে গুনে যান ইছামতী তেমনি সম্বৎসর অদর্শন গেছে বর্ষার কয়েকমাস আনন্দহাস্য করতে করতে তার আত্মীয় লোকালয়গুলির তত্ত্ব নিতে আসে। তারপরে ঘাটে ঘাটে মেয়েদের কাছে প্রত্যেক গ্রামের সমস্ত নতুন খবর গুনে নিয়ে, তাদের সঙ্গে মাথামাথি সখীত্ব করে আবার চলে যায়।

সন্ধ্যা হয়ে এসেছে। আকাশ মেঘে অন্ধকার; গুরুগুরু মেঘ ডাকচে, এবং ঝোড়ো ঝাওয়ায় তীরের বনঝাউগুলো ছলে উঠছে। বাঁশঝাড়ের মধ্যে ঘন কাপীর মত অন্ধকার এবং জলের উপর গোঁধুলির একটা বিবর্ণ ধূসর আলো পড়ে একটা অস্বাভাবিক উত্তেজনার মত দেখতে হয়েছে। আমি ক্ষীণালোকে কাগজের উপর কুঁকে পড়ে চিঠি লিখছি—উচ্ছ্বাল বাতাসে টেবিলের সমস্ত কাগজ পত্র উড়িয়ে ছড়িয়ে ফেলবার উপক্রম করচে। ছোট নদীটির উপরে ঘনবর্ষার সমরোহের মধ্যে একটা চিঠি লিখতে ইচ্ছা করচে—মেঘলা গোঁধুলিতে নিরালা ঘরে মুহুমন্দস্বরে গল্প করে যাবার মত চিঠি। কিন্তু এটা একটা ইচ্ছামাত্র। মনের এইরকম সহজ ইচ্ছাগুলিই বাস্তবিক হুঃসাধ্য। সে গুলি, হয় আপনি পূর্ণ হয়, নয় কিছুতে পূর্ণ হয় না—তাই অনেক সময় বুদ্ধ জমানো সহজ, গল্প জমানো সহজ নয়।

যত বিচিত্র রকমের কাজ হাতে নিচ্ছি ততই কাজ জিনিষটার পরে আমার শ্রদ্ধা বাড়চে। কৰ্ম যে অতি উৎকৃষ্ট পদার্থ সেটা কেবল পুঁথির উপদেশরূপেই জানতুম। এখন জীবনেই অনুভব করছি কাজের মধ্যেই পুরুষের যথার্থ চরিতার্থতা; কাজের মধ্য দিয়েই জিনিষ চিনি, মানুষ চিনি, বৃহৎ কৰ্মক্ষেত্রে সত্যের সঙ্গে যুগায়ুগি পরিচয় ঘটে। দেশদেশান্তরের লোক যেখানে বহুদূরে থেকেও মিলেছে সেইখানে আজ আমি নেমেছি; মানুষের পরস্পর শৃঙ্খলাবদ্ধ এই একটা প্রয়োজনের চিরসম্বন্ধ, কৰ্মের এই স্ব্বেপ্রসারিত ঔদার্য আমার প্রত্যক্ষগোচর হয়েছে। কাজের একটা মাহাত্ম্য এই যে কাজের খাতিরে নিজের ব্যক্তিগত সুখদুঃখকে অবজ্ঞা করে যথোচিত সংক্ষিপ্ত করে চলতে হয়। মনে আছে সাজানপুরে থাকতে সেখানকার থানসামা একদিন সকালে দেরি করে আসতে আমি রাগ করেছিলুম; সে এসে তার নিত্যনিয়মিত সেলামটি করে জীবৎ অবরুদ্ধকণ্ঠে বলে কাল রাতে আমার আটবছরের মেয়েটি মারা গেছে। এই বলে ঝাড়নটি কাঁধে করে আমার বিছানাপত্র ঝাড়পোচ করতে গেল। কঠিন কৰ্মক্ষেত্রে মৰ্ম্মাস্তিক শোকেরও অবসর নেই। অবসরটা নিয়েই বা ফল কি? কৰ্ম যদি মানুষকে বৃথা অনুশোচনার বন্ধন থেকে মুক্ত করে সম্মুখের পথে প্রবাহিত করে নিয়ে যেতে পারে তবে ভালইত! যা হবার নয় সেত চুকেছে, যা হতে পারে তা হাতের কাছে প্রস্তুত। যে মেয়ে মরে গেছে তার জন্যে শোক ছাড়া আর কিছুই করতে পারিনে—যে ছেলে বেঁচে আছে তার জন্যে ছোট বড় সব কাজই তাকিয়ে আছে। কাজের সংসারের দিকে চেয়ে দেখি—কেউ চাকরি করচে, কেউ ব্যবসা করচে, কেউ চাষ করচে, কেউ মজুরি করচে—অথচ এই প্রকাণ্ড কৰ্মক্ষেত্রের ঠিক নীচে দিয়েই প্রত্যহ কত মৃত্যু কত দুঃখ গোপনে অন্তঃশীলা বহে যাচ্ছে, তার আবরু নষ্ট হতে পারচে না—যদি সে অসংবত হয়ে বেরিয়ে আসত তাহলে কৰ্মচক্র একেবারেই বন্ধ হয়ে যেত। ব্যক্তিগত শোকদুঃখটা নীচে দিয়ে ছোটো আর উপরে অত্যন্ত কঠিন পাথরের ত্রিভুজ বান্ধা—সেই ত্রিভুজের উপর দিয়ে লক্ষলোকপূর্ণ কৰ্মের রেলগাড়ি আপন লোহপথে হুঃশব্দে চলে যায়, নিদ্রিষ্ট ষ্টেশনটি ছাড়া আর কোথাও কারো খাতিরে মুহূর্তের জন্যে থামে না। কৰ্মের এই নিষ্ঠুরতাব মানুষের কঠোর সাঙ্ঘনা।

১৪৫

শিলাইদা,

৪ঠা অক্টোবর, ১৮৯৫।

একটা ব্যাঘাতের সম্ভাবনা আসিল হওয়াতেই আজকের এই নিম্নত নিম্নত উপ-
ভোগটি মনের মধ্যে এমন নিবিড়তর হয়ে এসেছে। যেন আমার কাছে আমার এই
অভিমানিনী প্রবাসসঙ্গিনী করুণ অনিমেষ নেত্রে বিদায় নিতে এসেছে; আমাকে যেন
বল্চে, কিসের তোমার ঘরকরুনা, এবং আত্মীয়তার বন্ধন—আমি যে তোমার চিরদিনের
সাধনা, তোমার সহস্র জন্মপূর্ব্বের প্রিয়তমা, অনন্ত জীবনের অসংখ্য থণ্ড পরিচয়ের মধ্যে
তোমার একমাত্র চিরপরিচিতা। কিন্তু বর্তমানের কর্ম্মক্ষেত্রে প্রত্যক্ষ সংসারে এ সব
কথা অলীক শোনাবে। তা হোক, এই শরতের অপরিপাণ্ড শান্তির মধ্যে আমার
আত্মাকে স্তরে স্তরে সিক্ত করে নেওয়া আমার পক্ষে কম ব্যাপার নয়। এ জীবনে
আমার যা-কিছু গভীরতম তৃপ্তি ও প্রীতি সে কেবল এই রকম নির্জনে স্নান মুহূর্ত্তে
পুঞ্জীভূতভাবে আমার কাছে ধরা দেয়। আমার জীবনের অন্ততলে ক্রমশই যেন একটা
নূতন সত্যের উন্মেষ হচ্ছে; কেবল তার আভাস পাই, যে, আমার পক্ষে সে একটা স্থায়ী
নিত্য সঞ্চল, আমার সমস্ত জীবন-খনিজ-গলানো খাঁটি সোনাটুকু, আমার সমস্ত হৃৎ-
কষ্টের তুঘের ভিতরকার অমৃত শস্যকণা; সেটাকে যদি কখনো পরিষ্কৃত করে পাই
তাহলে সে আমার টাকাকড়ি খ্যাতিপ্রতিপত্তি সব চেয়ে বেশি হয়—যদি সম্পূর্ণ নাও
পাই তবু সেই দিকে চিন্তের অনিবার্য স্বাভাবিক প্রবাহ সেও একটা পরম লাভ।

—•—

কে আমাকে গভীর গভীরভাবে সমস্ত জিনিষ দেখতে বলচে—কে আমাকে অতি-নিবিষ্ট হিঁস কর্ণে সমস্ত বিখ্যাতীত সঙ্গীত শুনতে প্ররম্ব করচে—বাইরের সঙ্গে আমার সমস্ত হস্ত এবং প্রবলতম যোগহস্তগুলিকে প্রতিদিন সজাগ সচেতন করে তুলচে। হৃদয়ের প্রাত্যহিক পরিতৃপ্তির প্রাচুর্য্যে মানুষের কোনো ভাল হয় না—তাতে প্রচুর উপকরণের অপব্যয় হয়ে কেবল অল্পই সুখ উৎপন্ন করে এবং কেবল আয়োজনেই সময় কেটে গিয়ে উপভোগের অবসরমাত্র থাকে না। কিন্তু ত্রতযাপনের মত জীবনযাপন করলে দেখা যায় অল্প সুখই প্রচুর সুখ এবং সুখই একমাত্র সুখকর নয়। চিত্তের দর্শন স্পর্শন শ্রবণ মননশক্তিকে যদি সচেতন রাখতে হয়—যা কিছু পাওয়া যায় তাকেই পরিপূর্ণভাবে গ্রহণ করবার শক্তিকে যদি উজ্জল রাখতে হয় তাহলে নিজেকে অতি-প্রাচুর্য্য থেকে বঞ্চিত করা চাই। Goetheর একটি কথা আমি মনে করে রেখেছি সেটা শুনতে শানাসিধা কিন্তু বড়ই গভীর—

Entbehren sollst du, sollst entbehren.

Thou must do without, must do without.

কেবল হৃদয়ের অভিভোগ নয়, বাইরের সুখস্বাচ্ছন্দ্য জিনিষপত্রও আমাদের অসাধ্য করে দেয়। বাইরের সমস্ত যখন বিরল তখনই নিজেকে ভালরকমে পাই।

* * * * *

আমরা বাইরের শাস্ত্র থেকে যে ধর্ম পাই সে কখনোই আমার ধর্ম হয়ে ওঠে না। তার সঙ্গে কেবলমাত্র একটা অভ্যাসের যোগ জন্মে। ধর্মকে নিজের মধ্যে উদ্ভূত করে তোলাই মানুষের চিরজীবনের সাধনা। চরম বেদনায় তাকে জন্মান করতে হয়, নাড়ির শোণিত দিয়ে তাকে প্রাণদান করতে হয় তার পরে জীবনে সুখ পাই আর না পাই আনন্দে চরিতার্থ হয়ে মরতে পারি। যা মুখে বলছি, যা লোকের মুখে শুনে প্রত্যহ আবৃত্তি করছি তা যে আমার পক্ষে কতই মিথ্যা তা আমরা বুঝতেই পারিনে। এদিকে আমাদের জীবন ভিতরে ভিতরে নিজের সত্যের মন্দির প্রতিদিন একটি একটি ইট নিয়ে গড়ে তুলচে। জীবনের সমস্ত সুখদুঃখকে যখন বিচ্ছিন্ন ক্ষণিকভাবে দেখি তখন আমাদের ভিতরকার এই অনন্ত সৃজনরহস্য ঠিক বুঝতে পারিনে—প্রত্যেক পদটা বানান করে পড়তে হলে যেমন সমস্ত বাক্যটার অর্থ এবং ভাবের ঐক্য বোঝা যায় না

সেই রকম। কিন্তু নিজের ভিতরকার এই স্বজনব্যাপারের অথও ঐক্যহীন যখন একবার অনুভব করা যায় তখন এই সর্জ্যমান অনন্ত বিশ্বচরাচরের সঙ্গে নিজের যোগ উপলব্ধি করি। বুঝতে পারি যেমন গ্রহ নক্ষত্র চন্দ্র সূর্য্য জ্বলতে জ্বলতে ঘুরতে ঘুরতে চিরকাল ধরে তৈরি হয়ে উঠছে আমার ভিতরেও তেমনি অনাদিকাল ধরে একটা স্বজন চলছে—আমার সুখদুঃখ বাসনা বেদনা তার মধ্যে আপনার আপনার স্থান গ্রহণ করছে—এর থেকে কি যে হয়ে উঠছে তা আমরা স্পষ্ট জানিনে কারণ আমরা একটি ধূলিকণাকেও জানিনে। কিন্তু নিজের প্রবহমান জীবনকে যখন নিজের বাহিরে নিখিলের সঙ্গে যুক্ত করে দেখি তখন জীবনের সমস্ত দুঃখগুলিকেও একটা বৃহৎ আনন্দস্রোতের মধ্যে গ্রথিত দেখতে পাই—আমি আছি, আমি চলছি, আমি হয়ে উঠছি এইটেকেই একটা বিরাট ব্যাপার বলে বুঝতে পারি। আমি আছি এবং আমার সঙ্গে সমস্তই আছে—আমাকে ছেড়ে কোথাও একটি অনুপরিমাণও থাকতে পারে না ; এই জ্ঞানর শরৎপ্রভাতের সঙ্গে এই জ্যোতির্শ্রয় শূন্যের সঙ্গে আমার অন্তরাঙ্গার ঘনিষ্ঠ আত্মীয়তার যোগ ; অনন্ত জগৎপ্রাণের সঙ্গে আমার এই যে চিরকালের নিগূঢ় সম্বন্ধ সেই সম্বন্ধেরই প্রত্যক্ষতা এই সমস্ত বর্ণগন্ধগীত। চতুর্দিকে এই ভাষার অবিশ্রাম বিকাশ আমার মনকে লক্ষ্য অলক্ষ্য ক্রমাগতই আন্দোলিত করছে, কথাবার্তা দিন-রাত্রিই চলছে। এই যে আমার অন্তরের সঙ্গে বাহিরের কথাবার্তা আনাগোনা আদানপ্রদান—আমার যা কিছু পাওয়া সম্ভব তা কেবলমাত্র এর থেকেই পেতে পারি, তা অল্পই হোক আর বেশিই হোক ; শাস্ত্রথেকে যা পাই তা এইখানে একবার যাচাই করে না নিলে তা পাওয়াই হয় না। এই আমার অন্তরবাহিরের মিলনে যা নিরন্তর ঘটে উঠছে আমার ক্ষুদ্রতা তার মধ্যে বিকার ও বাধার সঞ্চার করে' তাকে যেন আচ্ছন্ন না করে—আমার জীবন যেন এই পরিপূর্ণ মিলনের অনুকূল হয় নিখিলকে আমার মধ্যে যেন আমি বাবা না দিই। কৃত্রিম জীবনের জটিল গ্রন্থিগুলি একে একে উন্মুক্ত হয়ে যাক, মুক্ত সংস্কারের এক একট বন্ধন কঠিন বেদনার দ্বারা একান্ত ছিন্ন হোক, নিবিড় নিভৃত অন্তরতম সান্ত্বনার মধ্যে অন্তঃকরণের চিরসঞ্চিত উত্তাপ একটি গভীর দীর্ঘনিশ্বাসের সঙ্গে মুক্তিলাভ করুক এবং জগতের সঙ্গে সরল সহজ সম্বন্ধের মধ্যে অনাগাসে দাঁড়িয়ে যেন বলতে পারি আমি ধন্য !

আমার দিনগুলিকে রথীর কাগজের নৌকার মত একটি একটি করে ভাসিয়ে দিচ্ছি। কেবল মাঝে মাঝে একটি আঁচি গান তৈরি করছি এবং শরৎকালের গ্রহরগুলির মধ্যে কুণ্ডলায়িত হয়ে পড়ে আছি। এই অপব্যাপ্ত জ্যোতিষ্ময় নীলাকাশ আমার হৃদয়ের মধ্যে অবনত হয়ে পড়েছে, আলোক রক্তের মধ্যে প্রবেশ করচে, সর্কব্যাপী স্তব্ধতা আমার বক্ষকে ছই হাতে বেঁধে ধরেছে, একটী স্কন্ধ শান্তি আমার ললাটের উপর চুম্বন করচে। পূজার ছুটিতে সবাই কাজকর্ম ছেড়ে বাড়িতে এসেছে—আমারো এই বাড়ি;—আমার বাড়ির লোকটি আমার সমস্ত খাতাপত্র কেড়েকুড়ে নিয়ে বল্চে তুমি কাজ চের করেচ, এখন একটুখানি থাম। আমিও তাই নিরাপত্তিতে থেমে আছি,—এর পরে কর্ম যখন আবার আমাকে একবার হাতে পাবেন তখন টুটি চেপে ধরবেন—তখন আমার এই ঘরের লোকটি, আমার এই ছুটির কর্তী, কোথায় থাকবেন তাঁর আর উদ্দেশ পাওয়া যাবে না। প্রায় মাঝে মাঝে মনে করি সাধনার লেখার ঝুড়ি পদ্মার জলে ভাসিয়ে দেব—কিন্তু জানি, ভাসিয়ে দিলেও লে আমাকে তার পিছন পিছন টেনে নিয়ে চলবে।

১২ই ডিসেম্বর, ১৮৯৫।

সে দিন সন্ধ্যাবেলায় একখানা ইংরিজি সমালোচনার বই নিয়ে কবিতা সৌন্দর্য্য আর্ট প্রকৃতি মাখামুগু নানা কথার নানা তর্ক পড়া যাচ্ছিল। এক এক সময় এই সমস্ত কথার বাজে আলোচনা পড়তে পড়তে শ্রান্ত চিত্তে সমস্তই মরীচিকাবৎ শূন্য বোধ হয়—মনে হয় এর বারো আনা কথা বানানো। সেদিন পড়তে পড়তে মনটার ভিতরে একটা নীরস শ্রান্তির উদ্বেগ হয়ে একটা বিকল্পপরায়াণ সন্দেহ সময়তানের আবির্ভাব হল। এদিকে রাত্রিও অনেক হওয়াতে বইটা ধাঁ করে মুড়ে ধপ্প করে টেবিলের উপর ফেলে দিয়ে শুতে যাবার উদ্দেশ্যে এক ছুঁয়ে বাতি নিবিয়ে দিলুম। দেবামাত্রই হঠাৎ চারিদিকের সমস্ত খোলা জানলা থেকে বোটের মধ্যে জ্যোৎস্না একেবারে ভেঙে পড়ল। হঠাৎ যেন আমার চমক ভেঙে গেল। আমার ক্ষুদ্র একরত্তি বাতির শিখা সময়তানের মত নীরস হাসি হাসছিল, অথচ সেই অতিক্ষুদ্র বিকল্পহাসিতে এই বিশ্বব্যাপী পৃথিবীর প্রেমের অসীম আনন্দছটাকে একেবারে আড়াল করে রেখেছিল। নীরস প্রহেলার বাক্যরাশির মধ্যে কি খুঁজে বেড়াচ্ছিলুম। সে কতক্ষণ থেকে সমস্ত আকাশ পরিপূর্ণ করে নিঃশব্দে বাইরে দাঁড়িয়ে ছিল। যদি দৈবাৎ না দেখে অন্ধকারের মধ্যে শুতে যেতুম তাহলেও সে আমার সেই ক্ষুদ্র বাতির ব্যঙ্গের কিছুমাত্র প্রতিবাদ না করে নীরবেই নিলীন হয়ে যেত। যদি ইহজীবনে নিমেষের জন্তও তা কে না দেখতে পেতুম এবং শেষরাত্রের অন্ধকারে শেষবারের মত শুতে যেতুম তাহলেও সেই বাতির আলোরই জিৎ থেকে যেত অথচ সে বিশ্বকে ব্যাপ্ত করে সেই রকম নীরবে সেই রকম মধুর মুখেই হাস্ত করত—আপনাকে গোপন করত না, আপনাকে প্রকাশও করত না।

২৪০

নাগর নদীর ঘাট,

১৬ই ডিসেম্বর, ১৮৯৫।

কাল অনেকদিন পরে সূর্যাস্তের পর ওপারের পাড়ের উপর বেড়াতে গিয়েছিলুম। সেখানে উঠেই হঠাৎ যেন এই প্রথম দেখলুম, আকাশের আদিঅন্ত নেই—জনহীন মাঠ দিগ্দিগন্ত ব্যাপ্ত কবে হাহা করচে—কোথায় ছুটি ক্ষুদ্র গ্রাম কোথায় একপ্রান্তে সঙ্গীর্ণ একটু জলের রেখা! কেবল নীল আকাশ এবং ধূসর পৃথিবী—আর তারই মাঝখানে একটি সঙ্গীহীন গৃহহীন অসীম সন্ধ্যা,—মনে হয় যেন একটি সোনার চেলিপরা বধু অনন্ত প্রান্তরের মধ্যে মাথায় একটুখানি ঘোঁমটা টেনে একলা চলেচে; ধীরে ধীরে কত শত সহস্র গ্রাম নদী প্রান্তর পর্বত নগর বনের উপর দিগে ঝুগঝুগাস্তর কাল সমস্ত পৃথিবীমণ্ডলকে একাকিনী জ্ঞাননেত্রে, মৌনমুখে, শ্রান্তপদে প্রদক্ষিণ করে আসচে। তার বর যদি কোথাও নেই তবে তাকে এমন সোনার বিবাহবেশে কে সাজিয়ে দিলে! কোন্ অস্তহীন পশ্চিমের দিকে তার পতিগৃহ?

— • —